

*image
not
available*







11

O.1.



22. III. I

~~22. VIII. 10~~

A. C.

AA: VI. 6.

Assistentie Gallie Soc. Iesu ad vsu Poenit. Gallorum.

DE VITA PATRIS

PETRI COTONI
E SOCIETATE

I E S V.

*QUI DVOBVS FRANCORVM ET
Nauarrorum Regibus HENRICO & LV-
DOVICO, ad Conciones & Confessiones adfuit,
& constituenda in Gallia Societati IESV plu-
rimùm contulit :*

LIBRI TRES.

*Autore PETRO ROVERIO, eiusdem
Societatis.*



BIBLIOTECA NAZ.
ROMA
VITTORIO EMANUELE

LVGDVNI,

Apud MATTHÆVM LIBERAL Typographum.


M. DC. LX.



PROTESTATIO AVCTORIS.

CUm Sanctiss. D. N. Urbanus Papa VIII. die 13. Martij anno 1625. in S. Congregatione S. R. & Vniuersalis Inquisitionis Decretum ediderit, idemque confirmauerit die 5. Iulij anno 1634. quo inhibuit imprimi libros hominum qui sanctitate, seu Martyrij famâ celebres è vita migrauerunt, gesta, miracula, vel reuelationes, seu quacunque beneficia, tanquam eorum intercessionibus à Deo accepta continentes, sine recognitione atque approbatione Ordinarij; & qua hactenus sine ea impressa sunt, nullo modo vult censeri approbata. Idem autem Sanctissimus die 5. Iunij 1631. ita explicauerit, ut nimirum non admittantur Elogia Sancti, vel Beati absolute, & qua cadunt super personam; bene tamen ea qua cadunt super mores, & opinionem; cum protestatione in principio, quod iis nulla adsit auctoritas ab Eccles. Rom. sed fides tantum sit penes Auctorem. Huic decreto, eiusque confirmationi & declarationi, obseruantia & reuerentiâ quâ par est, insistendo, profiteor me haud alio sensu, quicquid in hoc libro refero, accipere, aut accipi ab ullo velle, quàm quo ea solent, qua humanâ duntaxat auctoritate, non autem diuina Cathol. Rom. Ecclesia, aut Sancta Sedis Apost. nituntur.

FAÇVLTAS R. P. PROVINCIALIS
Societatis IESV in Prouincia Lugdunensi.


AVRENTIVS GRANNON Prouincialis Societatis IESV in prouincia Lugdunensi, iuxta privilegium eidem Societati à Regibus Christianissimis Henrico III. 10. Maij 1583. Henrico IV. 20. Decembris 1606. Ludouico XIII. 14. Febr. 1611. & Ludouico XIV. regnante 23. Decemb. 1650. concessum, quo Typographis omnibus prohibetur ne libros ab eiusdem Societatis hominibus compositos absque Superiorum permissione imprimant, permittit MATTHÆO LIBERAL Typographo Lugdunensi librum qui inscribitur *De Vita Patris Petri Cotonii*, ad decem proximos annos imprimere, ac diuendere possit. Datum Lugduni 30. Ianu. 1660.

LAVRENTIVS GRANNON.

INDEX

INDEX LIBRORVM & Caputum.

LIBER PRIMVS.

- CAP. I.  RTVS Cotoni, & prima studia ac mores
adolescentia. pag. 1
- II. *Studia à Cotono in Iurisprudencia posita.* 6
- III. *Ingressus Cotoni in Societatem IESV.* 11
- IV. *Tyrocinium Cotoni in Societate, eiusque puritas
non vulgaris.* 14
- V. *Mediolani Philosophiam disci, Versellis politiones
litteras docet, Roma Theologia orditur stu-
dia.* 18
- VI. *Lugduni inter studia Theologica sacris initiatus
concionari aggreditur.* 23
- VII. *Auenione magna celebritate conciones, & Theo-
logia Moralis Scholas orditur.* 28
- VIII. *Cotoni fama latius se fundens multis saluti fuit
circa Auenionem.* 32
- IX. *Celebre sanctitatis ac pietatis nomen, vestigiaque
earum non leuiter impressa Auenione relinquit.* 36
- X. *Institutas Aquis-Sextiis conciones dimittere coa-
ctus in exilem pagum alacer transit.* 42
- XI. *Gratianopoli plura certamina pro Fide Catholica
suscipit.* 46
- XII. *Nemausi pro Fide multa vita adit discrimina.* 52
- XIII. *Sedata Nemausi tempestas, preclaras de Vitis
& Heresi Victorias reportat.* 57
- XIV. *Gratianopoli denuò Fidei & Moribus ciuium
multum allaborat Cotonus.* 64

LIBER SECVNDVS.

CAP. I. **Q**ua Ratione in Aulã Henrici IV. Francia
ac Nauarra Regis fuerit accersitus. 73

II. Gratia apud Regem primique labores Cotonii in
Aula, ante restitutionem Societatem. 78

III. Restitutio Societatis IESV in Regno Francia
Edicto sancitur. 84

IV. Plurimas Cotonus post Edictum difficultates,
Dei ac Regis gratia superat. 89

V. Edictum Restitutionis nostra à Senatu Parisiensi
admittitur, & Cotonus inter egregios labores pro
Ecclesia à sicario vulneratur periculose. 98

VI. Cotonii in Aula Religio, & contentiones non-
nulla eius pro se à Deo fortunata. 107

VII. Ecclesiasticas dignitates repudiat, signa humili-
tatis & puritatis magna prabet, & Societati
constituenda ac protegenda laboriose vacat. 117

VIII. Graues pro Veritate & Societate disceptationes
suscipit. 125

IX. Delphino Francia fit Pietatis Magister, & Aula
gratia abire frustra conatus, ad Religiosos ac
Religionem promouendam animum vertit. 134

X. Insolita orandi facultate continui labores eius
subleuantur. 143

XI. Henrico Rege detestabili parricidio sublato,
& Cotonum à Ludouico Filio amouere infami
libello satagunt maleuoli. 150

XII. Cotonus grani tempestate à restituendis Collegij
Pariensis exercitationibus depulsus, nostros
Rodumna & in Canada collocat. 156

XIII.

- XIII. *Societatem Libro scripto, multaque sedulitate intentatis calumniis eximit.* 162
- XIV. *Hereticis & delusis arte Malefica, ut ad Fidem & sanitatem redirēt, egregiē est opitulatus.* 165
- XV. *Cum desiderio abeundi Aulica vita teneretur maximo, fit Voti compos.* 170
-

LIBER TERTIVS.

- CAP. I. *A Vla abscedens Lugdunū concionatū iit.* 176
- II. *Post Tolosanas Conciones Romam Proci-
rator à Lugdunensibus Sociis mittitur.* 181
- III. *Diuione & Nanceij concionatur.* 185
- IV. *Burdegalensibus Reſtor Collegij & Concionator attribuitur.* 189
- V. *Aquitanica noſtrorū Prouincia fit Prepoſitus.* 192
- VI. *Profeſſis Societate, Domum Burdegala conſtituit.
Inde Prouincia Francia praponitur.* 196
- VII. *Deſtinatā ad Canadenses noſtrorum Colonia
Parisiis ſanctiſſime vitā excedit.* 203
- VIII. *Cotoni Sepultura & Felicitatis illius nonnulla
ſignificationes.* 210
- IX. *Cotoni naturalia corporis & ingenij bona.* 214
- X. *Cotoni officia erga Deum.* 219
- XI. *Cotoni officia erga alios homines.* 227
- XII. *Cotoni officia erga ſcipſum.* 234
- XIII. *Plures Cœoni Virtutes Illuſtrum proborumque
virorum teſtimonia produunt.* 245
- XIV. *Cotoni rerum occultarum præſenſio.* 249
- XV. *Mira quadam Cotoni den. ortni interpoſitione
patrata.* 253



REVERENDVS PATER PETRVS
COTONVS È SOCIETATE IESV
Vixit annos 63. obijt 19 Martij. 1626.

N. Auroux sc.



LIBER PRIMVS

DE VITA PATRIS

PETRI COTONI

è Societate Iesv.

CAPVT PRIMVM.

ANNO CHRISTI
à 1564. ad 1579.

ÆTATIS COTONI
à 1. ad 16.

*Ortus Cotoni, & prima studia ac mores
adoleſcentiæ.*

PATER Petrus Cotonus è Societate Iesv, vir perquam integræ religioſæque vitæ, lucem primum vidit die ſeptimâ Martij anno ſexageſimo quarto poſt milieſimum & quingentieſimum. Solum verò natale ſortitus eſt Nerondam, quod oppidum eſt apud Seguſianos Galliæ (Foreſienſes nunc vocant) Lugdunenſium Prouinciales, quâ illis per Cemenorum montium extrema cum Aquitanicis eſt confinium. Guichardo enim Cotonò Cheneuoſij domino, erat Regio tunc nomine in eo oppido præfectura: ex cuius matrimonio cum Philiberta de Champrando Rodumnæ (vulgò Roanne) altero Seguſianorum oppido nata, prodire tum alij liberi, tum natiuitatis ordine ſecundus Petrus Cotonus. Erat ſanè

A Guichardus.

Guichardus egregiè Catholicus, & Calvinianos tum maximè verbis & armis tumultuantes in Gallia ex animo auersabatur, liberosque suos ab eis alienissimos esse & cupiebat, & quantum sermonibus rectaque institutione poterat, satagebat; calumnias tamen quæ Calvinianis ferè aut suspectis autoribus in Societatem nostram per illa ipsius primordia iactabantur, non satis caute ab auribus & fide sua amoliebatur. Atque ut non magis corpus quàm primos sensus & affectus animi à Parentibus ducunt liberi; ita Petrus Cotonus mitissimo puer ingenio, ut primum per ætatem potuit, paternas sententias, odiaque iusta æque ac iniusta est amplexatus: Itaque cum Rodumnæ Magistro cuidam primæ literaturæ qui occultum fouebat Calvinismum traditus fuisset in disciplinam, odoratus est statim puer Magistri arcanum vitium, quod & festiuis diebus, ludis & ambulationibus distineret discipulos quo tempore sacra in Ecclesiis peragebantur, & precari eos Gallicè non Latinè vellet. Nec distulit Patrem de periculo suo facere certiores, qui non tantum illum inde statim abduxit, sed auctoritatem etiam interposuit suam ut oppido toto malus Magister pelleretur. Quæ res illi oppido saluti fuit, ut nulla postea hæresis eo penetraret. Datus dehinc Petro Magister alius quamuis certissimæ pietatis, non tamen perinde ut Pater optarat, magnæ sedulitatis. Quod cum eius animum haberet magnopere sollicitum, dispicere cœpit quodnam in Collegium dimittere filium posset, ut assiduo ac sedulo Magistrorum hoc vnum agentium subsidio promoueretur. Et occurrebat ei in proximo Turnonense aut Billomenense, in quibus celebre iam tunc erat literarum ac Magistrorum nomen, sed nunquam imperare sibi potuit, ut nostrorum hominum, quorum curæ commissæ erant

erant illa Collegia, disciplinæ tunc sibi parùm probatæ tam carum pignus concrederet. Vertit proinde ad Parisiensem Academiam cogitationes suas ; Petrumque annos natum vndecim & de se plurima præbentem specimina tùm virtutis & pietatis, ad quas illum mater integerrima piissimæque fœmina informabat, tùm ingenij ac memoriæ, quorum ope conciunculas pueriles iam tunc apud matrem reliquamque familiam audebat ex iis quas audierat moliri ac declamitare ; Parisios ad Marchianum Collegium adduxit, priuatæque eum curæ cuiusdam Magistri Portæ subesse voluit. Is siue suo, siue parentis Cotoni ingenio seruiens, quanquam vir alibi neque malus neque minimè religiosus haberetur, tamen iniquitate temporum se abripi patiebatur, continuisque calumniis contra Societatem teneras alumni sui aures opplebat. Quæ institutio cum accederet ad conceptam iam olim ab eo ex verbis Parentis de Societate sententiam, incredibile est quantam eius animo ab alienationem à nobis, rebusque nostris omnibus ingeneraret. Itaque non tantùm congressum sed & occursum omnem ac conspectum nostrorum hominum adedò defugiebat, vt quadam die dum præter limen Collegij nostri Parisiensis nescio quo ambularet, à comitibus Scholasticis intrò subire compulsus, vt primum nostrorum aliquos vidit, prohiberi non potuerit quin, & festinanter quasi pestilentem ab eis timeret auram alio se proriperet, & postero die ad eius pedes quem habebat conscientiæ arbitrum aduolutus, ingressum illum & conspectum nostrorum tanquàm noxam agrè expiabilem confiteretur. Miretur ille solus alienæ vel ignorantix vel culpæ tantum in adolescentis innocentissimi animum permissum esse, qui Dei gratiæ diuitias non miratur. Deus enim non solum in errore in-

noxio, sed etiam interdum in incredulitate, ut ait Paulus, concludit omnia, ut omnium misereatur, mutetque impugnatorem in defensoré, & persecutorem in prædicatorem; ne cuiquam liceat vel laborem suum, vel parentum in iis quæ gratiæ sunt iactare institutionem; sed illud tantum Apostolicum Gratia Dei sum id quod sum. Sane Cotonus locupletissimam in hac animi sui mutatione Dei erga se gratiam nec prædicare quandiu vixit, nec charitate atque officiis erga Societatem ut poterat pensare cessauit. Cæterum cum illum Deus vellet esse suum, declarauit usque ab hac adolescentia tenerimus ille conscientiæ sensus, qui ipsam in se peccati umbram tam impatienter toleraret: ut non immerito Cotonus ipse recens Societatem ingressus inter cætera Dei beneficia quibus se obstrictum senserat ad perpetuum eius obsequium, hoc etiam connumerarit in iis literis quibus consilij sui causas vberissime ac disertissime Patri suo explicauit; Ita fere disserens. A prima, inquit, ætate „ mea infinitæ Dei bonitati, cui æterna est in nos charitas, placitum fuit, vehementibus me aculeis amoris „ timorisque sui excitare ac stimulare, quæ erant quasi „ pignora quædam eorum quæ à grandiore ille postularet. Deinceps verò non cessauit eundem in finem contra „ omnia quæ mihi imminebant pericula in perpetuis „ quasi excubiis ac vigiliis esse, actionesque meas omnes „ amoris timorisque sui fræno ita coercere ut maximus „ mihi subiret peccati horror, prauorum confortiorum „ odium, & rerum fluxarum fastidium. His ille verbis dum aliud agit animi sui per hæc adolescentiæ fluxa statum describit eiusmodi, qui & admirandus merito & inuidendus, nec tamen iis qui hominis integritatem ac sinceritatem nouerunt fide parum dignus videri possit. Sanè qui eo quadriennio quo Marchianum Collegium

gium Cotonus incoluit discipulum aliquandiu illum habuit Laurentius Bourceretus eius Collegij etiam hodie moderator, pietatem illius ac modestiam in ea adolescentia vehementer commendat; Satisque constat eum iam tùm quod rari erat per ea tempora exempli non solum solemnibus anni omnibus, sed etiam mensium initiis ad Sacramenta Pœnitentiæ & Eucharistiæ semper adiisse; puritati autem animi ac corporis aded studuisse, vt velut casta virguncula ad omnem liberiorum aliorum vocem honestissima verecundia ac pudore ita perfunderetur, vt cæterorum non amorem minus quàm venerationem eliceret. Quæ omnia ed videri poterant admirabiliora, quodd interno potius diuini spiritus magisterio, quàm hominum vel admonitione vel adhortatione prouenirent. Iam in politiori literatura cui ad annum vt dixi ætatis suæ decimumquintum incubuit, quantos ediderit progressus vel inde potest animaduerti quod cum ad easdem literas non nisi tempore breuissimo in Societate sit reuersus, tamen & in libris scriptis & in omni sermonum genere, egregiè semper ab eis paratus atque instructus apparuerit. Et verò impensam in se ab eo quem dixi institutore hac in eruditione operam tam grato memorique prosequabatur animo, vt & inter ipsos aulæ fauores, & deuexa iam ætate senex eum crebrò salutatum iret, & cum apud Ludouicum Regem esset in gratia nepoti eius Ecclesiasticum beneficium non tenue ab eo impetraret. Vbi verò iam satis his literis visus est institutus, qui priuatam eius curam gerebat Portæus, vt Philosophica iniret studia, ad Cardinalitium quod vocant Collegium illum traduxit. Ibi leuia quædam eius Scientiæ rudimenta per annum ætatis decimum sextum cum poneret morbo exceptus est aded graui vt extrema timerentur.

tur. Sed ille in patrocínio cœlitum quod tota vita admodum solemne habuit; deuotissimam collocans fiduciam, Beatæ Genouefæ quam precibus ac votis placarat præfenti ope, mortis tunc periculo se exemptum in posterum semper existimauit, & quantum per occupationes licuit, sacra mysteria ad eius sepulchrum semel in hebdomada postquam Parisios rediit, gratus celebrauit. Quod tamen tunc totam morbi labem absque aëris natalis subsidio negarent Medici posse persanari, domum est à Parente reuocatus, paucisque mensibus pristinis viribus restitutus.

CAPVT II.

ANNO CHRISTI

1580. & 1581.

ÆTATIS COTONI

17. & 18.

Studia à Cotonò in Iurisprudentia posita.

Septimum ac decimum ætatis annum mox initurus, qui incidebat in sæculi Christiani quod tunc agebatur octogesimum, Biturigas in Iacobi Cujacij memorabilis Iurisconsulti disciplinam à Patre est iussus proficisci. Urgebat enim Filij studia Pater vt maturius illum produceret in forum, emeritisque de more forensibus stipendiis Parisiensi Curix Senatorem daret. Quam ille dignitatem Regum Matris Catharinæ Medicæ commendatione aut beneficio obtinere se filio posse non diffidebat, quod plures iam annos illi fuisset à secretis commentariis, multaque atque honorifica negotia eius iussu & causa obiisset. Sed longè alia in cœlo capta fuerant de Cotonò consilia, quibus tùm maximè Pater nolens seruiebat, ac nesciens cum eum Biturigas mitteret. Vt enim eò peruenit Academiam
nactus

naſtus iuuenili intemperie plenam metuere cœpit impensè, ne in illorum incideret conſortium, qui vel mentis corporiſque puritatem quam dilexerat ſemper & enixè coluerat in periculum adducerent, vel antiquum morem ſuũ conſtitendi crebrius ac communicandi in ludibrium verterent. Itaque dum attentius diſpicit quorum ſe familiaritati conſuetudinique permittat, diuino vt credere par eſt conſilio deſtinatur ei adoleſcens & morum probitate non diſpar, & noſtræ Societatis magnopere ſtudioſus. Is in intimam receptus neceſſitudinem cum omnia in Cotono admiraretur ac diligeret, tamen animi eius à noſtris abalienationem nec probare nec ferre poterat patienter. Itaque ſtatuit hunc eius animum omni arte oppugnare, vt in contrarium verteretur. Perſuaſit verò in primis vt Sacellum Sodalitij B. Virginis cui ipſe adſcriptus erat in Bituricensi noſtro Collegio, ſolemni die vellet inuiſere, idque non nobis ſed Virginis honori concederet. Quod ille negare, pro ſua in Virginem pietate non auſus, adiit ſacellum, rediitque non multò noſtris æquior quam ante. Sed haud diu poſtea aſſiduus adoleſcentis vocibus quà obiectas Societati calumnias clâris argumentis depellentis, quà conſcientiam eius intime conuenientis cur tam parum alienæ apud ſe exiſtimationi parceret, cum nonnihil eſſet labefactatus, atque alia commodum B. Virginis feſtiuitas incidiſſet, lubentior iam idem in ſacellum reductus dum preces Deiparæ mœdullitùs allegat, tanta illic internæ pietatis ſuauitate eſt delibutus vt noſtra omnia aliis oculis iam inciperet intueri: ratus apud homines Deo vt illi perſuaſum fuerat non ſatis gratos tam præſentis numinis experimenta vix capi poſſe, cuperetque ſibi dari aliquem, cuius pro Societate autoritatem paternæ

ternæ suasioni apud animum suum posset opponere. Quod ut sensit is quem dixi adolescens rem desert ad P. Petrum Velam Arelatensem de Societate nostra, qui per Quadragesimam concionum suarum facibus ciuitatem & Academiam Bituricensem ad honestatem & pietatem multum approbante Cotonotum succendebat; captaque subinde occasione sermonum Cotonotum mirifice conciones illas commendantis spondet se amicitiae cum concionatore conciliatorem illi fore si vellet, & volentem quam maximè ad Velam adducit. Hic paucis aliquot verbis ad ineundam amicitiam commutatis cum de Societate mentio esset iniecta tam acute in omnes cogitationum Cotonotum sinus differendo penetravit Vela, tamque neruose ac copiose scrupulorum eius leuitatem aut falsitatem aperuit, ut dubium illum reliquerit sibi prius qui Patri nimium credidisset, an iis qui Patri imposuerant irasceretur. Dies aliquot ab eo colloquio fluxerant cum Velæ exacta Quadragesima alio fuit abeundum, quod ut vulgo compertum est statuerunt Iuuenes aliquot Academici, atque inter eos Cotonotus honorificè discedentem deducere. Nobilibus itaque equis sublimes præstò illi ad portam ciuitatis adfuere. Quos ille ut vidit orsus ab his Esaia verbis, *Qui sunt isti qui ut nubes volant?* tam multa de rerum terrenarum despicientia animorumque ad cœlos excitatione tam apposite dixit, ut Cotonotum aculeum infixisset, quem nulla postea dies excuteret. Egit apud Bituriges annos ætatis suæ duos, decimum septimum & octauum, tanta studij Iuris sedulitate atque assiduitate ut ei apud quem diuersabatur admirationi esset; sed eius studium pietatis etsi antea magnum erat, sacramentorum frequentissimo usu inertos ab adolescentia spiritus confouente; tamen posteaquam cum

Vela

Vela est congressus, crebra enim non iam de præsentì tantum vt prius, sed multò maximè de futuro vitæ statu sollicitudo incessit. Explicat ipse eleganter in iis quas suprà dixi literis Patri suo æstus animi sui, his ferè verbis. Cùm in studiis (inquit) quinque sex, octo, atque interdum decem horas de die, noctisque dimidium animū simul & corpus labore disperdēs exegissē, subibat cogitatio exantlare me hæc omnia eo tantum vt Iurisperiti ac literati hominis famam apud centenos aliquot, aut ducentenos homines incertissimo euentu aucuparer, fiebatq; frequenter vt ad noctē mediam auribus, vndique religiosarum ædium sonitu verberatis, sic mecū ratiocinarer. En isti de nocte non aliter quàm ego vigilant, sed hoc inter nos distat, quod illi ad veram, immortalem, certam, salutarem; ego ad fucatam, temporariam, inconstantem, ac multis perniciosam famam contendam. Exaëto verò inter ista biennio, domum rursus paterno imperio reuertit. Sperabat enim Pater maturum se illum forense tirocinio recepturum; sed Cotonum etsi anno decimo nono ætas admouerat, tamen flos primæ adolescentiæ temperantia & corporis integritate protectus adeo non desierat, vt puero quàm viro propior intuentibus appareret. Statuerat igitur Pater eum domi habere donec vultum ætas mutaret, nisi spe ductus Cotonus conceptos magisque quotidie ac magis exardescences excellentioris vitæ igniculos facilius se procul à suis conseruaturum ac porro exsuscitaturum luculentius, egillèt partim per se, partim per amicos paternos, vt in Italiam, Taurinensis Academiæ Iuris tunc disciplina celebris frequentandæ causa, mitteretur. Quod vt impetrauit, Taurinumque venit, tam insigne diuinæ erga se prouidentia specimen est expertus, vt ab hoc tempore con-

tuetur duxerit, quam donec vixit constantem tenuit, tum de peculiari Dei cura erga se ac sua amantissime confidendi, tum edita in se eius curæ exempla per omnia vitæ momenta exquisitè obseruandi ac venerandi. Cum enim ab algido Cemenorum montium aëre in Italicum repente transisset, non regionis tantum situ, sed etiam anni quæ tunc vigeat tempestate æstuosissimum, non facile videlicet tolerabat tenerimi corporis Iuuenis æstus sibi insolentes: Itaque persuasus à Gallo quopiam sodali leuandæ molestiæ causa, frigidam fluminis appetit, pactus ante omnia tum vt velato honeste corpore, tum vt semoto ab spectatoribus loco lauarent Ergo egressi in agros, notant sibi procul ripam quæ cæteris occupatis deserta erat ab omnibus, & eò videlicet contentis gressibus feruntur, nec procul iam aberant ab ea; cum ecce tibi in æquabili planitiæ, nec visi antea nec auditi existunt ex aduerso pulcherrimi pueri duo purpurati, qui manu & clamore vetarent ad ripam illam lauare. Retulit è vestigio pedem Cotonus tanquam deprehensus, & manu iniecta socium secum auertit. Ille reluctans, Te-ne (inquit) tantilli pueri terrent? Sciamus saltem cur nos prohibeant, simulque conuersi ambo nullos iam pueros in plano campo conspiciunt. Hic Cotonus negat se porro loturum, videri sibi Deo non placere quod susceperant; Socius etsi reduci se in urbem patiebatur tamen interdicti illius causâ magnopere cupiebat addiscere; Itaque obuium senem rusticum manu prehensens, doce nos (inquit) obsecro pater, quid rei sit in illa fluminis ripa quam à lauantibus desertam conspiciamus. Ille, nihil aliud est, inquit, nisi periculosissimus gurges in quo meminî videre me ab adolescentia multos flumine haustos, plures periclitatos, & hac maximè die temerarij duo

Iuuenes

Iuvenes aliorum exempla non veriti cum eò se proie-
cissent non emerferunt viui. Quæ cum audisset Coto-
nius, nec tunc, nec tota deinceps vita, cum hæc pluri-
bus nostrorum & extraneorum referret; dubitauit
quin pueri illi duo, Angeli fuerint custodes amborum.
Hincque illi nata multisque deinceps ex causis adaucta
pietas illa tenerrima erga custodem Angelum, qua sic
afficiebatur, vt nec illum vnquam abire ab animi sui
oculis pateretur; nec quidquam nisi illo plenissima
venerationis fiducia consulto aggrediretur, nec finem
vllum apud alios faceret; eius erga se beneficia com-
mendandi.

C A P V T III.

ANNO CHRISTI

ÆTATIS COTONI

1582. & 83.

19. & 20.

Ingressus Cotonii in Societatem IESV.

HInt maiori in dies succensus rerum cœlestium
flamma deligit sibi & Taurinensi Societatis Col-
legio virum prudentem ac Deo carum cui in præsentia
conscientiæ arcana committeret. Suscipiendæ enim in
posterum vitæ consilia, quod in magna pugnantium
cogitationum diuersitate nihil dum sibi liquere cense-
ret, tam citò aperire non fuit animus. Verùm ille
quasi totum eius animum monente Deo didicisset, ab
ipso primo congressu duo illi impense commendauit,
maturitatem consilij in suscipiendo vitæ Instituto, &
cautionem sedulam in auscultandis Dei monitis inter-
nis, ne ea vel sine sensu vel sine effectu prætermite-
teret. Quibus præclatè vsus Cotonius, quâ ieiunando quâ
orando obtinuit vt sine ambiguitate sentire videretur

nullam sibi salutis viam à Deo aperiri nisi per rerum terrestrium in Religioso statu abdicationem. Verum è tot Religiosis ordinibus cui se potissimum dederet cum non satis haberet constitutum mira ei ratione consilium fuit expeditum. Cùm enim alias tam honorificè de aliis, tam modestè ac potius demissè de seipso sentire solitus semper fuerit, vt. quot homines pietati sincere deditos nouerat, tot sibi diuinæ ergà se voluntatis interpretes nactus videretur; tum in ista de vitæ genere deligendo consultatione id feliciter in primis obseruauit. Hieronymum enim Blondium Adolescentem Italum; quod egregiè pius illi visus esset, frequensque ad Sacramenta ventitaret, in familiaritatem asciuerat, eique animi sui æstus plures aperuerat; Isque aliquando reuersus à Sacramentis Cotonò asseuerauit sibi satis compertum videri, diuinæ voluntatis esse vt ambo Societatis IESV Institutum susciperent, setanien si Cotonus recusaret, id nunquam esse facturum. Permouit ea asseueratio Cotonum, reputantem tum adolescentis pietatem, tum asseuerandi constantiam, tum temporis sanctitatem, tum plurimas quas eatenus senserat ad Societatem permotiones nulli hætenus abs se detectas. Ne quid tamen de se præcipitato statueret, magnopere illum rogauit ne sua consilia ex alientis vellet esse suspensa, iret quò Deus vocabat, se sibi non defuturum. Perstabat ille tamen per dies multos Cotonì voluntatem disquirere, cui tum visum differre toto mense responsum, dum diuinam de se voluntatem planiùs inuestigaret. Sed excessit interim è vita Hieronymi Pater, ipsèque assiduus matris flagitationibus factus in patriam ad componendam rem familiarem quasi abiectis cogitationibus pristinis abcessit. Noua hinc Cotonò cura, subuerenti ne sua forte

in capiendo consilio tarditate alienis consiliis perniciem attulisset, & alioqui nulla iam ei cogitatio de Religiosis Ordinibus, nisi cum ad Societatem IESU descenderat, sapiebat. Itaque conscientiae suae moderatorem adit, docet sibi iam pridem in animo esse, Religiosam vitam inire, Societatem mediocriter se optasse iam olim, nunc in nullius alterius cogitatione posse conquirere. Ille ad hæc retulit, cum primum in eius cognitionem venisset, arcano mentis contuitu cuius autorem nesciret, Societatis nostræ hominem in illo se vidisse, nec dubitare quin hoc eius consilium Deo cordi esset, daret tantum tempus aliquod firmando contra futuras difficultates cœlestibus cogitationibus animo, tum rem aggrederetur intrepidè. Fecit latus quod erat monitus, atque ut sibi satis compertam visus est habere Dei voluntatem; ad Hieronymum suum aduolat, de pristina sponsione appellat, conditionem quã optarat representat; nec ille abnuebat si mater sine-ret. Cotonus rem laboriosissimam, mulieris peruiaciam vincendam suscipit, tantæque suauitate sermonis & rationum sanctitate ac pondere causam egit, ut lacrymari quidem posset mulier, sed abeunti filio obfistere non posset. Hoc fuit Cotonus earum artium rudimentum, quibus tota deinceps vita plurimum valuit in hominum animis Deo acquirendis. Præda igitur opimus Taurinum reuenit, & suis sociique rebus breui cum Præpositis Societatis confectis Aronam Insubrum oppidum tyrocinium Religiosæ vitæ positurus ad diem SS. Petri & Pauli destinatur. Quamquam ob æstiuos feruores ad diem S. Hieronymi tantum est ed admis-

CAPVT IV.

ANNO CHRISTI

1584. 85.

ÆTATIS COTONI

21. 22.

*Tyrocinium Cotoni in Societate eiusque puritas
non vulgaris.*

HAbuit illum biennio Arona in Tyrocinio, quo tempore etsi nobis ambiguum non est quin plurima feruentissimæ virtutis prodiderit exempla, quod ex reliqua eius vita facile assequimur coniectura; tamen ea tantum nobis prodenda restant quæ vel ex literis ad suos scriptis quæ in manus nostras venere, vel ex ipsius aliud agentis narratione, vel ex iis qui à Patre ad eum in Italiam auertendi eius consilij causa missi sunt intelligi potuere. Quartò enim demum post initam Societatem mense, Patri plurimùm sollicito de silentio eius diuturno, literæ bene longæ sunt allatæ, quibus ille vitæ à se de nouo institutæ causas copiosissimè exponebat. Eas vt perlegit Pater, irasci videlicet atque immensùm excandescere quòd ex omnibus Religiosis Ordinibus eum maximè filius adamasset, quem ipse in primis odio suo dignum censuisset, nec desperare mitissimi Iuuenem ingenij paternæ autoritate deduci ab instituto posse. Itaque literas rescribit initio minarum & obiurgationum, sponsonumque simul ac blanditiarum plenissimas, quibus illi reditum in Galliam imperabat. Verum posteaquam perstare illum in consilio ex responsione ipsius accuratissima intellexit, ad Catharinam Medicæam Regum matrem, cui iam diu famulabatur, dolores suos detulit, literasque ab ea ad Serenissimum Sabaudia Ducem & Mediolanensem Præfectum

Præfectum impetrauit, quibus rogarentur Guichardo Cotonò filium repetenti auctoritatem suam commodare. Enimverò commotam expectationem tum ex hoc virorum principum subsidio, tum ex summissis è Gallia viris aliquot ad egregiè suadendum & natura & Parentis institutione factis, ita frustrata est Cotonì nostri constantia ut suis propemodùm suavoribus Religiosam vitam ipse persuaserit. Certè quod vnum tunc illis licebat eius spei propter quam venerant irritos, melioris vitæ spe plenissimos ad patrem remisit. Scripsit tunc ad eum literas, quarum caput vnum, quodd insignè puritatis sanctitatisque eius ad illam diem testimonium contineat prætermittere hoc loco non possum. Nam posteaquam prolixas patri ac matri gratias egit de præclara ac pia educatione sua ad id usque tempus quo in Dei familiam fuerat adoptatus, sic orditur referre. Magna (inquit) mihi congenita fuit ab ætate tenerrima proclivitas ad Dei obsequium; nec mihi aliquando contigit ut quidpiam virtuti honestatique contrarium in me admitterem, cum rem esse existimarem pœna omni dignissimam brutis se mancipare flagitiis, à quibus ad hanc usque diem magnopere abhorruì, confidoque fore ut æternum abhorream, ne vel immensæ Dei mei gratiæ, vel tuæ, mi pater, educationi sim aliquando ingratus. Scripserat non dissimilia primis quas post ingressum in Societatem dedit ad Patrem litteris, ut susceptæ vitæ causas exponeret. Agitabar, inquit, prætereà sexcentis tempestatibus, hinc Scyllæ, inde Charybdidis, idest hinc malorum consortium, inde tartareæ libidinum flammæ, quæ rudem atque imperitam adolescentiam fere perdunt: ut plurimum mihi fuerit laborandum ne in alterutrum salutis gurgitem præceps devoluerer. Quod tamen hæcenus peculiari Optimi
Dei

Dei mei prouidentia semper euitauī. Sanè dum immensam Dei gratiam, peculiaremque erga se in tutanda corporis puritate eius prouidentiam, prædicantem Cottonum legi, venit mihi in mentem suspicari pertinere ad tempora ista vel superiora posse, insigne in hoc genere Dei erga illum beneficiū, cuius vestigia in eius corpore multis ante mortem annis obseruata, quando primū fuerint impressa ut opinor nulli est comperitum. Etenim cum aliquando in somnis contra immissa à Dæmone visa impuritati affinia magno animi corporisque conatu, luctaretur, visus est videre purissimos Spiritus duos, fugatis puritatis hostibus capitalissimis, femora sibi fune bis circum ea conuoluto arctissimè compressisse. Cumque hæc omnia, dolorēque acerrimum quem tunc sensit, solis interni sensus imaginibus expressa fuisse euigilans autumaret, vera reperit in corpore suo vulnera, rupta in ambitu cute, quam torti funis eminentes toruli presserant. Et coaluere breui vulnera, sed cicatrix non tantū in morte conspicua fuit iis omnibus qui corpus eius de more lauarunt; verum etiam à pluribus visa est in vita dum alicunde aduenienti pedes, Religioso Societatis more, abluerentur. Quæ causa fuit ut & pluribus coactus fuerit dicere hæc sibi vestigia è quodam somnio relictæ fuisse, & nonnullis reintrota ut dixi enarrarit. Cæterum quievere post istas literas Guichardi parentis artes, nec iam ille de filio à Societate abducendo, sed in Galliam tantū ad proximum Societatis domicilium aduocando sollicitus esse institit, quod tamen non ante quintum ab eius tyrocinio annum, ut dicemus, impetrauit. Cottonus interea noster frequentibus S. Caroli Borromæi Aronam inuisentis adhortationibus & exemplis præclare usus, velut si pugio, ut ipse solebat dicere,

Gigantis

Gigantis vestigiis sua admetiretur, ita animum suum instituebat ad alienæ salutis sitim, ut suas ipsius fauces exarescere nunquam vellet. Ergo ne qua sibi quandoque perniciosa ariditas incideret, orationem ac meditationem rerum diuinarum, qui perpetui duo sunt bonarum voluntatum fontes, adeo tunc in se excoluit, ut tota deinde vita facillimo illi ac felicissimo defluxu manarint. Nec segnius infeliciusque ad pia & laboriosa opera sese illum appulisse argumento fuit Lauretana peregrinatio, quam ex Societatis more tiro suscepit: cum enim & Italici æris, & pedestris itineris insolentia caput immodicè concalefecisset, tantam quotidie sanguinis copiam è naribus effundere, paucis à suscepto itinere diebus, cœpit, ut & multum in præsens debilitaretur, & valetudini suæ in posterum timere non parum posset. Verum pro ea qua erat erga B. Virginem pietate ac fiducia, dissimulare laborem periculumq; suum maluit quàm ut eam tam sacro in loco non saluaret. Nec defuit deuotæ voluntati pretium. Nam ut eo peruenit vnde Lauretana ædes conspici poterat, aduolutusque ut peregrini solent, in genua, preces Virgini concepit, exarescente illico sanguinis fluxione vegetus atq; alacer adoratū iit, liberque in totam vitam hoc incommodo Aronam reuertit, vnde non ante est digressus quàm Religiosis votis editis, annus ætatis eius vicesimus secundus septimo plus mense esset euolutus.

CAPVT V.

ANNO CHRISTI

1586.87.88.89.90.

ÆTATIS COTONE

23.24.25.26.27.

*Mediolani Philosophiam discit, Vercellis politiores
litteras docet, Roma Theologiae orditur studia.*

Q Vinquennium illi effluxit inter hæc tria, cuius temporis memoriam tenuibus ad nos deductam vestigiis breui cogimur exequi oratione. Illud verò se offert primum, non solum tenerrimæ sed etiã admodum ingeniosæ pietatis eius exemplum, quod haud diu post emissã vota, cū audiendæ Philosophiæ Mediolani operã dare iussus esset officiiq; sui esse cēseret Patri vota abs se emissã approbare, statumque suū renunciare, rationem iniit & diuinæ laudis & paternæ vtilitatis plenissimam. Datis enim ad eum literis accuratis enixe suavit ut ad certam diem qua sibi ex Societatis more vota erant innouanda, placeret illi apud vnum è nostris quem à Rectore Lugdunensi per literas impetrarat, purgata rite conscientia cum coniuge & filio natu maiore, ad Eucharistiam accedere, coramque Deo ac sanctis mentibus cogitationem illam suscipere; satius ne esset in statuendo de se qui filius eius esset diuinam ac paternam voluntatem præualere. Et quoniam non dubitaret quin diuina apud eum voluntas multo pluris futura esset quam sua, hortabatur magnopere ut magni Abrahami exemplo vinceret animū, Deoque in quodam quasi holocaustum spiritale, offerret filium: Se enim eodem tempore Mediolani perinde ac si sub eius oculis positus esset, in eandem cum Patre sacrificandi sui voluntatem ita conspiraturum, ut tamen laudem omnem

omnem ac meritum eius operis apud Deum, non sibi
sed Patris esse vellet. Fecit Pater vir optimus quod sua-
serat filius, literisq; postea ad illum scriptis significauit
placere sibi penitus quod Deo; nec quidquam nunc
magis esse in optatis quam vt suam ei voluntatem
posset testificari præsenti. Solutus deinde ac liber hac
cura Cotonus, cum ad Dei obsequiū, studiumque phi-
losophicum, cui ex eius voluntate erat additus, cogi-
tationes vertisset omnes, ea edidit argumenta tū assi-
duitatis in laborando, tū celeritatis ingenij, tū per-
spicuitatis sagacitatisque iudicij; tū felicitatis me-
moriz quæ in eo ad extremos vsque annos miraculū
omnibus fuit, vt in maxima humilitatis ac virtutis,
egregiam simul eruditionis laudem ab omnibus re-
ferret. Itaque cum piorum colloquiorum vulgo aman-
tissimus haberetur, iudicarunt nonnulli ex antiquio-
ribus nostris Patribus qui Mediolani tunc degebant,
idoneum illum comitem sibi esse posse dum ad Virgi-
nem Deo Sacratam pietatis fama tunc celebrem, quæ
Sacramentis apud nos participabat; visendam irent.
Quod cum illi fuisset pergratum, semotus nonnihil à
Patribus dissertationes pias eius Virginis modeste ac
tacite inaudiebat. Sed illa verso ad eum aliquoties ser-
mone, magnopere institit monere vt altissimæ pu-
rissimæque humilitati accuratam Iuuenis operam da-
ret. Fore enim aliquando illud tempus cum à Rege
potentissimo & amaretur plurimum & suspiceretur:
quo tempore nisi animum contemptu sui domitum &
vera humilitate haberet subactum, sibi primum ac
deinde Societati grauem esset perniciem allaturus.
Pupugit ea oratio animum eius, & mirum quantum
ad studium humilitatis succendit. Quanquam quid
illa sibi vellent, quæ de Regis amore dicerentur non

ante intellexit quàm ab Henrico I V. est in Aulam accersitus, ipsoque experimento didicit quàm periculosè loco illo sine humilitate sisteretur. Neque verò ille sibi tum defuit siue in agendis Deo gratiis de tam maturis monitionibus quæ aliunde quàm à prouidentia eius singulari existere non poterant, siue in nouis quotidie humilitatis accessionibus ad priores adiungendis. Hinc verò à Mediolanensi commoratione, de qua diximus, duxissè illum consuetudinem quam tenuit in vita satis constanter, vt Fratrum Nostrorum qui literati non sunt, modo pietatis sensu excellenter, familiaritate delectaretur plurimum, addiscere possumus ex literis ab vno è nostris Patribus Huberto à Turre Leodiensi, inde à Limensi Collegio quod est in Occidentalibus Indiis ad eum post annos plusquàm triginta scriptis, quarum partem è Gallico hic exprimendam latinè censui. Quadam (inquit) die cum me inualetudo nonnulla lecto affixum haberet, Frater noster Augustinus Salombrinus qui Mediolani olim tui, mi Pater, in morbo curam habuit, nunc autem ægrorum quoque in hoc Limensi Collegio valetudini est præfectus, plurima mihi de Mediolanensibus tuis rebus dulcissimo animi sensu commemorans, impense rogauit vt ad te suo nomine ista scriberem. Constantem se ab illo tempore in tui amore fuisse, nec diem vllam abire passum esse quin diuinæ tibi gratiæ accessionem à Deo implorarit, ea admodum lætus memoria, quòd tibi ægrotanti aliquando præsto fuerit. Porrò deuotum se tibi ad mortem affirmat perseueraturum iuxtà initam inter vos olim Mediolani precum societatem; nec quidquam sibi acciderè posse suauius, quàm si intelligat tantum apud te societatis iniunctam fidem valuisse quantam sibi conscius est apud

se fuisse. Enimverò satis explicari non potest quantum in hoc homine nactus sis, mi Pater, amicum apud Deum. Est enim vir plane sanctus vitæque laudatissime iam inde ab annis quindecim quibus Limense Collegium incolit. Nec mihi aut aliis qui eum novimus, est dubium quin virtute sit excellenti, diuinisque illustrationibus ac monitionibus egregiè foueatur. Adeò ille vitam ducit non tantum centum & quadraginta nostris, quot hic sumus, probatissimam, sed etiam multis ac variis noctu diuque laboribus exercitatissimam, ac suavi constantique charitate non solum ergà nostros, sed etiam ergà tricenos ferme Indos atque Æthiopas famulos plane conspicuâ. Hæc eo consilio ex ipso autographo interpretatus sum paulò fusiùs, vt constaret quantè fuerit Cotonus inde ab hac iuuentute vel sapientiæ vel præfagitionis in spiritalibus amicitiiis contrahendis. Cæterùm quod illi per hos ætatis annos vicissimum secundum, tertium, & quartum quos Philosophiæ fere impendit minus erat licitum in salutem hominum publicè incumbere ob Théologiæ imperitiam id ille priuato labore visus est voluisse compensare dum magnum literarum numerum, quem ferè vidimus in Galliam scriberet, nunc vt veteres condiscipulos ad despicientiam rerum fluxarum, nunc vt fratrem natu maiorem ad Dei amorem & obsequium vsunque Sacramentorum frequentem, nunc vt matrem ad Eucharisticam octauæ cuiusque diei communicationem, nunc denique vt Patrem ad moderatè ferendam absentiam suam adhortaretur. Posthæc ætatis annum subiens vicesimum quintum, egregiè iam emensus Philosophiæ disciplinam Vercellas est destinatus, vt suprême quæ illic erat literarum pœtiorum scholæ doctor

doctor præflet. Quo in opere cum vnum versatus
 esset annum, prodentibus se iam tum naturæ ac gra-
 tiæ opibus quibus eum Deus ad promouendam ho-
 minum salutem instruxerat, Romam à præsidibus,
 Theologici studij causa est euocatus, vbi vt opinor
 Nicolaus Bobadilla qui eo ipso anno extremus è de-
 cem primis Patribus nostris est mortuus, eum de So-
 cietatis more amplexatus, quasi vaticinans dixit: *Hic
 Gallus pluris erit quàm decem Hispani.* At enim
 Pater eius non tam ætate (quanquam erat iam se-
 nior) quàm Filij absentis desiderio consenscens, in
 omnem illius recipiendi occasionem imminebat in-
 tentus; ideoque externis omnibus frustratus subsidiis
 ab ipsa quamuis sibi adhuc satis inuisa Societate mor-
 bo suo petere non refugit medicinam. Nam cum annis
 abhinc duobus didicisset Laurentium Magium à
 Præposito Generali Visitatorem in Gallias missum
 Rodumna iter habere, duos ad eum filios allegauit suos,
 multis precibus agens ne filij sibi aspectum ante mor-
 tem negare Societas vellet. Et recepit prolixè Magius
 daturum se operam cum primum Romam redux
 attigisset, vt Patris desiderio mature ac copiosè satis-
 fieret. Suspensus ille postea in omnem famam reuer-
 sionis Magij, vt primum è Gallia eum excessisse anno
 sæculi eius Christiani nonagesimo certior factus fuit,
 alterum è Filiis Romam mittit, qui promissi fidem
 exigeret; isque Fratri iam Roma profecto factus in
 itinere obuius, eum Lugdunum maximo in posterum
 Galliæ bono adduxit. Inde vnus diei itinere ad Patrem
 profectus reperit eum illo iam morbo decumbentem
 qui ipsum breui abstulit. Spatium tamen Cotonò con-
 cessum à Deo quo Patri de suscepto vitæ instituto &
 de Societatis integritate ac pietate tam copiosè sa-
 tisfaceret

tisfaceret, vt non solum veterem illi omnem de ea opinionem stirpitus ab animo euelleret, sed latum etiam Filij consilio, de Animę statu seriò cogitare persuaderet. Itaque optimè de salute æterna sperantem decimo quinto quam aduenerat die extulit, atque epitaphiã oratione simul & inscriptione dilaudauit.

C A P V T V I.

ANNO CHRISTI
1591.92.93.94.

ÆTATIS COTONI
28.29.30.31.

*Lugduni inter studia Theologica sacris initiatus
concionari aggreditur.*

Restitutus Lugdunensi Collegio Cotonus quod supererat Theologici studij triennium pertexuit insigni laude in primis virtutis ac deinde etiam ingenij. Morum illi ac sermonum mira erat suauitas ac moderatio, sensus de seipso nullus, de cæteris egregius. Vigebat iam tum in eo mos ille quem inter Aulę nequitias nunquam deseruit, vt omnes ex se æstimaret, malaque de aliis vulgata nunquam in animum dmitteret. Molestus esse alicui, aut tristem abs se quenquam dimittere non sustinebat, Rerum alienarum minimè omnium curiosus, loquendique de illis parcissimus, commodare autem quibus poterat factò & verbo prolixissimus. Hi fuere illius erga Socios per hæc initia mores, ex quibus erga Præfides qualis tum fuerit non est difficile æstimare. Quilibet eorum nutus illi fuere pro imperiis, mentisque suę recessus omnes non illis minus quàm sibi semper esse

esse voluit apertos. Hinc extitit tam indiscreta præsidium omnium ergà illum charitas , quàm ipsius ergà omnes obseruantia. Cæterùm omnibus charus & suauis sibi vni hostis erat & durus : obseruatumque est tantùm illi vestium ac ciborum neglectum fuisse , vt cum à domesticis aliisque vt sit rogaretur , quid indueret in Italia , quid comederet , quid biberet ? quasi qui Italiam nunquam vidisset , nec formas rerum nec nomina posset enunciare , cùm tamen spiritus pietatis quos illic hauserat nullis satis verbis commendaret. Iam ab hoc tempore vehementes illi erant cum lecto inimicitie , quas ad extrema vsque exercuit , pauculas in eo horas iacere poterat , & mediis crebro noctibus , recepto vestitu in cathedram diuina meditaturus aut oraturus ad lucem se reiciebat. Denique erga Deum & superos tenerrima iam tum pietate ferebatur , assiduus seipsum quasi coram Dei oculis introspicere ; Christum in augustissimo Sacramento ita venerari , vt nullam diem abire pateretur , qua non eum statim ab hora quarta ante meridiem salutatum iret , qui mos ei tota ferè vita perpetuus fuit. Salutari verò sacrificio Missæ bis quotidie antequam Sacerdos esset interfuit , semel vt minister , atque iterum vt auditor. E cœlitibus custodè Angelum cùm primis venerabatur , quem à mentis suæ oculis abscedere nunquam patiebatur , nec vllos cum hominibus nisi eum respectans & quasi consulens sermones miscebat. Hi ferè mores in eo notati ab iis qui familiariter cum eo viuebant primo Lugdunensis illius studij anno , qui fuit ætatis eius vicesimus octauus , & sæculi tunc vertentis nonagesimus primus. Sed de ingenio eius his ad nos verbis perscriptus eius condiscipulorum vnus. Ingenio(inquit)erat admodum

admodum celeri ac perspicaci , memoriâque singulari. Cùm enim studeret Theologiæ , & alter professorum nihil dictare statuisset , attendebat diligenter iis , quæ tota hora dicebat præceptor , & vix pauca in cursu orationis notabat : mox autem vt ille finierat iussus ita reddebat vniuersa , vt triduo illi prælectioni repetendę incubuisse videri posset. Hi mores , atque ingenium , sed in primis concionandi proficiendique in publicum excellens facultas , quæ se prodebat quotidie clarius , præsidibus Societatis suaserunt vt Sacerdotio initiatum vellent , quo eius industria liberius vtiliusque fundi posset. Id factum est exeunte Quadragesima , atque illico dicturus ad populum è superiore loco ad festa Paschalia cum apparuisset magna approbatione atque auiditate est auditus , adeoque illi gratia & fauor audientium ab ipso initio aspirauit , vt maximi concionatoris gloriam ac famam breui colligeret. Itaque inter ipsa studia maximopere desideratus ac postulatus per huius ipsius anni Aduentum quotidianas conciones ad Ecclesiam Sancti Pauli suscipere Lugduni est coactus. Et erat sanè in eo studium multiplex , quod illum sanè redderet non inferiorem. Quærebat quæ diceret diligentissimè , inueniebat feliciter , disponebat dilucide , ornabat floride , pronunciabat venustissimè , meminerat constantissimè. Sed dum dicenda quæreretur , libabat ille quidem ex omni rerum ac cogitationum genere nonnulla ; crebrius tamen in iis quę ad diuinum in hominibus amorem excitandum , peccatiquę turpitudinem exaggerandam pertinebant , vel in reuincendis hæreticis habitabat. Postquam autem apud animum suum quid & quomodo diceret constituerat , aut perscribebat omnia , verbatimque vt

scripserat pro concione dicebat ; aut quod magis mirere , coram Socio quopiam prius enunciabat , eisdemque prope verbis ad populum pronunciata , deinde à concione ita planè vt dixerat perscribebat. Hac sedulitate primæ illi per Quadragesimam conciones eadè in Ecclesia habitæ anno ætatis vicesimo nono, qui fuit sæculi nonagesimus secundus , nec vllus deinceps vitæ annus, quam ad sexaginta tres produxit, hoc illi vel labore vel merito vacuus fuit : tricies quippe ac quinquies Quadragesimæ conciones peroravit. Cæterum inter hanc concionandi assiduitatem , & scholasticarum difficultatum comprehensionem atque enodationem , partitus operam , ita vtrique rei per fuit , vt anno consequente , qui erat ætatis tricesimus , & Theologici ipsius studij quartus, interrupto tantisper concionum cursu ad docendam Philosophiam se comparare à præsidibus iuberetur. Sed intercessit autoritas Illustrissimi Lugdunensium Archiepiscopi Petri D'Espinaç , qui cum Eloquentiæ principatum tenere in Ecclesiasticis Galliæ pulpitis tunc existimaretur ; tamen nascente Cotonii eloquentiâ ita tenebatur , plebisque suæ commoda adedò cum illa coniuncta censebat , vt vehementer efflagitaret ne tam laudabilis cursus concionum illis docendæ Philosophiæ moris retardaretur , quod ad celebrandam concionibus Metropolitanam Lugdunensium Ecclesiam Cotonio sibi opus esse asseueraret. Ita discussum semel docendæ Philosophiæ consilium ; nunquam postea per eorum ad quos accessit audiendi conciones eius studium restituere integrum fuit. Vix conciones Quadragesimæ in Archiepiscopi Ecclesia finierat , cum omnia in ea vrbe tumultibus bellicis personuere , Cotonusque à suis rogatus Segusianis Rodumnam

Rodumnam maternum oppidum conciones suas tran-
stulit , in annum sæculi superioris nonagesimum
quartum , qui erat illi ætatis tricesimus primus. Hæc
mira fuere quæ ille à suis obtinuit, in moribus com-
ponendis , sensibusque pietatis medullitus hauriendis.
Matrem rogatu, immò prope coactu eius, totius vitæ
noxas confessione diluentem audit, duobusque post
annis cum fato functa esset sic ad Fratrem de illa
scripsit: De Matre, inquit, ego nihil ambigo, vt pote
vitæ illius testis auritus , in qua scio difficile pecca-
tum mortale obseruari potuisse. Fratri natu maiori
vitam ex Christiani piique hominis legibus eam
persuasit quæ paucorum sit eiusdem notæ ac sortis
hominum. Fratrem natu minimum præcellenti in-
genio adolescentem postquam nostris dederat insti-
tuendum in pietate , intestina deficientem tabe , cœ-
lo egregiè comparatum transmisit. Sorores duas ita
excoluit , vt totam deinde vitam partim adeundis
frequentissimè Sacramentis , partim oratione ac di-
uinarum rerum commentatione cæteris sui ordinis
mulieribus faciliè præluxerint. Et erat vulgatus tum
inter homines eius regionis sermo , Deum videri ob
merita pietatisque excellentiam Cõtono , totius in
primis familiæ suæ salutem , deinde aliorum etiam
complurium condonare.

CAPVT VII.

ANNO CHRISTI

1595.

ÆTATIS COTONI

32.

*Auenione magna celebritate conciones, &
Theologia moralis Scholas orditur.*

EXeuntes de quo iam dixi anno Cotoni tricesimo primo, cum Societati nostræ suspecta omnia ac potius infesta esse inciperent in Regno Franciæ, Theologica nostrorum studia Lugduno Auenionem ditionis Pontificiæ ciuitatem à præsidibus nostris sunt translata, paucisque post mensibus eodem fuit è Segusianis Cotonus accersitus, vtrum concionibus suis, Societati ciuium gratiam conciliaret. Neque consilium frustratus est euentus. Nam vt eo peruenit Illustrissimî Cardinalis Taurusijs voluntate, qui tunc ciuitati præerat Archiepiscopus, datus est primarię cathedrę per eiusdem anni Aduentum concionator, tanta ciuium approbatione, vt annis tribus continetibus eodem ex loco illi fuerit concionandum. Sed intereà Parisiensi Senatusconsulto nostri Lugduno Collegiisque aliquot pulsî, Auenionem magno numero conuenere ad initia anni millesimi quingentesimi nonagesimi quinti, & visum est Societatis præsidibus, tum Archiepiscopi desiderio, incredibilique in fouendo exilio nostro charitati, tum nostrorum vtilitati tribuendum, vt Quæstionum Conscientię celebrior expositio ad Sacerdotes qui Confessiones in vrbe excipiebant, nostrosque, institueretur. Cuius rei cura cum esset Cotonus annum iam agenti secundum

dum à tricesimo , demandata , templum pro Schola ob Auditorum multitudinem esse illi oportuit , nec Sacerdotibus tantum sed Iurisconsultis qui in Academia erant , Theologisque pluribus locum dari. Ceterum cum ad conciones prope annuas hoc illi oneris accessisset , cuius prætextu de tota ad eum ciuitate difficultates laboresque animorum deferebantur , non difficilis est coniecturæ quantum illi toto biennio quo est in hoc opere versatus fuerit desudandum. Sed erat ingenij tanta suauitate vt laborum eius sensus ad neminem perueniret. Equidem audire me memini Medicum tota regione eruditionis fama celeberrimum , cui Dionysio Christiano nomen fuit , cum diceret , centies se per id tempus capiendi de conscientia consilij causa adiisse ad Cottonum , nec raro multum subueritum ne parum opportune interuenisset : tamen hilari semper tranquilloque vultu ab eo exceptum , nec ante dimissum quam & quietem peperisset , & luculentas suo in animo virtutis flammis suscitasset. Neque verò priuatim tantum sed & publicè constitit laboris eius pretium ; siue quod à iustis dominis non leues pecuniæ summæ eius responsis , ac multo maximè adhortationibus efficacissimis redhibitæ ; siue quod ab eo sacrarum Virginum monasteriis in veterem disciplinam interdum restituendis , interdum etiam nouis legibus Archiepiscopi assensu informandis posita vtilissime opera. Ac licet nonnullæ illi hanc ob rem contentiones cum iis fuerint suscipiendæ qui Virgines seuera contineri disciplina , partim ex immodica erga consanguineas indulgentia , partim aliis ex causis iniquo ferebant animo , nihil tamen fuit quod vis suauissima sermonum eius ac persuasionum non superarit. Nec
maior

maior illi cura fuit earum virginum quæ iam Deo sacræ essent quàm illarum quæ eò aspirarent. Quo in genere res illi tunc contigit diuinæ præsentationis plenissima. Nam cum Virgo quædam multis magnisque Dei instigationibus ad vitam Religiosam impelleretur, nec satis vocantem Deum sequi statueret, quærebat videlicet refractariola, virum quendam pietate insignem qui cupitati eius blanditus negaret ipsius vocationem satis certò proficisci à Deo. Sed cum is ad quem illa rem suam primo detulerat sibi persuadere non posset tot tamque continuos animi motus quot illa se experiri fatebatur sine Deo esse, Cotonum sibi voluit adesse in dando Virgini consilio, qui cum illam audisset de arcanis animi sui permotionibus differentem, respondit videri sibi eam ad Religiosæ vitæ quietem amplectendam diuinitus incitari, magnopereque suasit ut vocanti Deo obsequeretur. Dehinc ea digressa, versus ad eum qui ad se illam adduxerat. Hæc quidem, inquit, ad castas Christi nuptias inuitatur, sed humanas præferet, cumque ciues illam complures ambierint, ignotus quispiam ac peregrinus abducet plurimis vita tota laboribus exercendam. Fecere dictis eius fidem nuptiæ cum viro extraneo octauo post mense conciliatæ, nec cessant ad hunc usque diem labores eius, serui Dei vaticinium iis qui rem norunt egregie commendare. Transiit aliquando etiam operam ad matrimoniorum pudicitiam tranquillitatemque procurandam; sed ut puellis in ætate nubili periclitantibus cautum esset omni sollicitudine in primis inuigilauit. Cuius rei hoc ad nos exemplum peruenit. Puella tredecim circiter annorum, impudicæ matris filia, vicinarum inuitatu cum aliquoties ad Cotonum confessionis causa venisset

set, admissa est post paulò eius iudicio ad Sacram
Communione. Id cùm sensisset mater quę eam pro-
stituere scelerata cogitabat, eaque causa nostri tem-
pli accessu prohibuerat, crudeliter in eam verberibus
desæuiit. Non tamen deterrita est virgo quo minus ad
consuetum Sacramentorum pabulum hebdomadis
singulis rediret; duoque illa in ista animi sui conflicta-
tione non parum admirabilia est experta. Alterum
vt quoties à matre cæderetur minus ipsa vapulando
quam mater verberando vexari videretur. Alterum ex
propria Cotoni disciplina; vt quoties ad cœleste con-
uiuuium accederet, animum in se tam attente die tota
colligeret vt nihil eorum quę circà impudicam ma-
trem gerebantur aduerteret. Venit tandem dies quo
mater, integritatis filię nefaria nundinatrix flagitioso
viro ad eius stuprum condixerat: quod puella cum
præsensisset, domo effugit, Cotonusque monitus ad
grauem primùm matronam, deinde ad tutum Vir-
ginum piarum contubernium traduci eam curauit, &
mater flagitij comperta à Iudicibus ne filiam repete-
ret coërcita fuit. Hinc verò ab hoc anno plurimum
etiam esse Cotono negotij cœpit cum Hæreticis, quo-
rum plenæ tunc fuere circum Auenionem ciuitates.
Quam ad rem nouus ei labor incubuit, vt omnes
eorum fraudes ac tergiuersiones perspectas haberet,
tamque copiosam sibi ex antiquis Ecclesiæ doctõribus
armaturam pararet, vt & libris scribendis, & con-
certationibus cum eis suscipiendis admodum abunde
tota illi vita suppetaret. Nec sanè laboris fructus tar-
de illi atque intempestiuè prouenere. Nam hoc ipso
anno præter deos aliquot alios, Rebulum quoque
magni animi atque ingenij iuuenem qui Hæretico-
rum

rum causæ plurimùm scriptis postea libris incommo-
dauit, ad Ecclesiam ab hæresi traduxit.

CAPVT VIII.

ANNO CHRISTI

1596.

ÆTATIS COTONI

33.

*Cotoni fama latius se fundens multis saluti
fuit circa Auenionem.*

PErgebat anno ætatis suæ tricesimo tertio Auenio-
nenses concionibus suis excolere, omnique ex parte
in melius commutare, cum fama eius mœnibus se iam
non continens plures vndique ad eum acciuit, salutari
verborum medicamento variis ægritudinibus eripien-
dos. Fuit in his & moribus & sanitas vnus cum pri-
mis obseruatu digna. Degebat is vltra Rodani pon-
tem Villanouæ, aut Italus aut quòd in Italia diu vixis-
set pro Italò habitus, sed fide ac moribus longe ab iis
quibuscum versatus erat alienissimus. Etenim cum
prope puer esset educatus in familia Cardinalis Castil-
lionæi, qui fide ac purpura abdicata in Anglia postea
lamentabili fato est defunctus, audierat cum hero ad-
huc iuvene, in Italia peruersum quendam, ac perfu-
dum Iuris Canonici interpretem, cui illud vnum erat
institutum vt doceret Iuris Canonici nullum esse sco-
pum, nisi vt pecuniis hominum tenderentur insidiæ.
Itaque vt quemque Canonem vel Titulum exposue-
rat, sermonem fere claudebat hoc epiphonemate, En
inquebat harpagonem corradendæ pecuniæ! Et hæ-
serat vox improba atque insana, tam tenaciter in
eius quem dixi hominis animo, vt quæcumque in
Ecclesia

Ecclesia Catholica fieri dici-ve animaduerneret , querenda pecuniæ artes esse arbitraretur. Itaque vt ad Caluinianos non transierat , ita fidem ac reuerentiam erga Ecclesiam non retinebat ; sed velut lucifuga quædam noctua domi conclusus Sacrorum ac prope etiam hominum omnium consortio abstinebat. Ea res cum nonnullis eius affinibus maximo iam pridem do-leret opere , ad Cotonum secunda tum maximè famæ aura vtentem , ab eis est delata. Is veritus ne si ad Timonis illius ædes accederet non admitteretur , affi-nibus autor fuit vt hominem visendi cuiusdam agri prætextu domo elicerent. Quod cum illi esset agrè persuasum , Cotonus qui haud procul in insidiis la-tuerat , simulata inambulandi voluntate sensim ad eos accessit , comiterque salutatis sese immiscuit , ac ver-bis aliquot vrbatissimis, vt erat eius rei artifex pe-ritissimus, tetricam hominis frontem nonnihil laxauit. Tum sine sensu subiens in sensus ipsius intimos, quos ab affinibus didicerat, errores eius omnes traducere ac reuincere laborabat ; sed vna erat ad omnia responsio hominis stuporis plenissima. En harpagonem corra-dendæ pecuniæ. Quæ verba cum diutissime sola ob-trusisset , sensit Cotonus inutilem esse lenitatem suam mutatoque dicendi genere cum stuporem verbis coar-guit asperimis , æternique supplicij , nisi respiceret seipsum , minis terroribusque illi omnibus intentatis, derepente auersus abscessit. Statuebat enim non posse tam brutam peruicaciam absque insolita diuinæ cle-mentiae imploratione , crebroque conflictu emolliri. Itaque vt donum attigit , hominis salute inter preces Deo enixe commendata animum ad nouam pertinaciæ illius oppugnationem comparabat. Sed nihil ea opus fuit. Nam ille quietis omnis à Cotoni colloquio ex-

fors, professusque apud suos mentem sibi illius verbis quasi acutis quibusdam clavis conuulneratam; Auenionem haud diu post ista traiecit, Cotonoque ad pedes accidens, & in eius se potestate fore pollicitus, errores omnes sigillatim dedoctus est, purgataque diligentissimè per sacramentum conscientia, ac cœlestis cibi particeps factus, vitam deinde ad Christianas leges composuit. Alterum quempiam inter Hæreticos fortunis iuxta ac pertinacitate primarium priuata quædam negotia sua adduxerant in urbem, quam ut Cotonî commendatione vndique resonantem est ractus, experiri ante discessum constituit num famam æquarent facta. Ingressus igitur quadam die, mediam Auditorum eius concionem Deo providente in eam disputationem incidit qua Cotonus piissime ut solebat ac vehementissime corpoream Christi in Eucharistia præsentiam astruebat, adeoque illius oratione est per-motus, ut aliquandiu à concione hæreret in Ecclesia cogitabundus; ac dum casu oculos in Eucharistiam, quæ forte tunc adoranda prostabat conuertisset, pulcherrimum suprâ illam puellum non semel, sed quoties eodem intenderat, sibi visus sit conspexisse. Quo spectaculo magis perculsus ac magis delectari iam cœpit Ecclesiarum conspectu, posteroque die dum Metropolitancam inuisit, gratissima luceresulgentem aram, puellumque abs se pridie conspectum è loco ubi asseruatur Eucharistia prodeuntem atque aræ inambulantem vidit. Itaque animo iam Catholicam doctrinam de Eucharistia plane complexus Cotonum adit, reque illi à capite exposita reliquos de Religione, scrupulos non difficili negotio sibi passus eximi, hæresi funditus renunciauit. Non pauciores duodenis Cotonî nomine pellekti venire eadem ex causa eodem-que

que euentu ad eum hoc anno Auenionem ; Sed vnius tantum historiam ad eas quas scripsi adijcere suadet cum suscepti operis breuitas , tum ratio ipsius singularis . Adolescens duode viginti annorum Geneuæ ortus & educatus , quàm impura in disciplina nihil attinet dicere , cum in patriis ritibus non satis animo acquiesceret , & quasi per vmbra inaudiret aliam esse vicinarum fere gentium doctrinam ac religionem ; experiri constituit an apud illas reperire posset , quo animo suo satisfaceret , quietemque compararet ; Sic ergo egressus de patria tanquam Abraham de Vr Chaldæorum , bono sine dubio Angelo ductore , vni cuiuspiam homini occurrit , qui sciscitanti vbinam doctorem egregium veræ Religionis offenderet , respondit nominatissimum esse Auenione Cotonum , quo ni falleretur valde bono magistro vti posset ad ea quæ vellet cognoscenda , simulque lenitatem eius ; atque in disceptando moderationem & eruditionem mirifice commendauit . Lætus euentu Adolescens , passuum millibus centum fere & quinquaginta festinato alacriterque confectis Auenionem venit , rogatusque vt sit ad portam vnde & cur veniret ? Geneua dixit se digressum Cotonum eò pertractum famâ , vt fidem Catholicam ab eo doceretur . Admissus in urbem ad Collegium Societatis tendit , sed euntem ignotus quispiam seu dæmon seu homo importuna mali Dæmonis instigatione stimulatus pone affectatur , cumque iam intrâ Collegij septa pedem poneret . Quo tu inquit miser ? quid istum quaris à quo tibi certa perniciēs parata ? quæ cum primum quis sis audierit , re ad magistratum delata in æternum te carcerem compingi curabit . Hac voce territus adolescens pedem retulit , vota que frustrata ingemiscens maximis animi æstibus inter reditus

aut moræ cogitationes iactandum se præbuit aliquan-
diu; sed Deo tandem vincente, reputare cœpit fieri
non posse vt de cuius lenitate ac comitate tam multa
in audiisset ab eo tam aspere ac crudeliter excipe-
retur. Cotonum ergo fidenter adiit, ac veritatis ma-
gna animi sui voluptate breui compos, hæresi solem-
niter renunciauit, vitamque postea instituit modera-
tionis ac pietatis plenam.

CAPVT IX.

ANNO CHRISTI
1597.

ÆTATIS COTONÆ
34.

*Celebre sanctitatis ac pietatis nomen vestigia-
que earum non leuiter impressa
Auenione relinquit.*

TRiennio continuatas Auenione conciones clausit
ad annum ætatis suæ tricesimum quartum, sæ-
culique vertentis nonagesimum septimum. Quo tem-
pore vna fuit domi forisque vox omnium. Donum il-
li famæ à Deo impartitum. Non enim faciliè credeba-
tur tantum prædicandi commendandique eius nomi-
nis studium, tamque suauem in ore omnium eius
commemorationem, vt tunc sentiebatur sine singula-
ri diuini numinis, aut aliorum animos ei conciliantis
aut operibus eius splendorem addentis, fauore existe-
re potuisse. Sanè inter plurima, quæ ad inferendam
hominum animis sanctitatis eius opinionem, tunc
contigeres tria mihi posteritatis memoria visa sunt
non indigna. Hoc primum, Mater familias quædam
oco non humili, sed pietate erga Deum ac sollicitudi-
ne

ne erga suos insignis, filiam in matrimonio sibi probatissimo ac gratissimo collocare cogitans, cum omnia iam haberet eam ad rem comparata, non existimauit sibi perficiendam nisi Cotonì precibus vt feliciter cederet imploratis. Nec ille operam recusauit; sed cum breuem ad Deum precationem regressus in cubiculum ea causa effudisset, reuertit illicò in Ecclesiam, vbi hærere adhuc matrem familias suspicabatur, rogauitque sollicito, quænam dies ineundo matrimonio condicta esset; cumque illa respondisset conuocatos affines, ámicos, atque ipsum etiam Parochum in diem posteram. Ingemiscens Cotonus, quam vellem, inquit, vt in octauam diem! sed tu cauebis omnino, si filia tuæ consultum cupis, ne crastina die res transigatur. Obstupuit mulier ad tam præcisam vocem, nihil tamende Cotonì fide addubitans, orauit denuò vt precibus apud Deum ageret, quo absque vllius hominis offensione res in alium diem differri posset. Vix domum reuersa attigit, cum ex affinibus præcipui quidam misere qui se in crastinum excusari ob suborta negotia postularent. Et illa occasionem non inuita arripiens, nunciis ad alios dimissis vt horum gratia negotium in aliam diem differretur facile ab omnibus impetrauit. Postera die ad condictam antea coniugio horam qui maritus sperabatur Iuuenis, cum semper modestus ac tranquillus visus esset, mente de statu emota repentinam incurrit insaniam, nec vlla potuit in posterum, vel medicorum opera, vel temporis longinquitate restitui sanitati. Memini Coronò ex hac re, quæ statim fuit euulgata, maximam omninò apud genus omne hominum in ea ciuitate fidem atque auctoritatem extitisse. Sed quod nunc dicam alterum, id, etsi non adeò vulgatum fuit cum est per-

actum

actum, tamen & fructu potius & fide est non infelicius. Nam cum per festiuitatem assumptæ in cælos Virginis vir nobilis Dominus du Buillon suasu coniugis suæ, foeminæ grauissimæ, quam Cotonus paulò ante hæc tempora instituerat ad pietatem, ipsum Auenione in ditionis suæ castrum euocasset, vt subditorum, atque in primis familiæ saluti prospiceret: Egit ille quidem cum cæteris felicissimè ac facillimè quod habebat propositi; sed cum ad Iuuenem quendam Heri negotiis præfectum solutionis vitæ hominem opera esset deriuata, nimirum nec ipsi nec ulli facile fuit obtinere vt saluti suæ consulere, modumque poneret cupiditatibus. Verùm post plurimas non solum Cotonis, sed piissimæ etiam cum primis Heræ adhortationes animum tandem induxit, vt temporis quidpiam sumeret ad repetendas mente totius vitæ noxas, certaue die per confessionem abolendas. Fecerit ille an finxerit se facere quod receperat, est incertum; sed qua die instituenda erat confessio, summo mane equum ex herili stabulo optimum, atque ante eam diem mansuetissimum ascendit, simulatoque negotio nescio quo, procul à Cotonis castroque auolat. Hora adfuit confessionis faciendæ, & optima Hera de serui salute sollicita, misit qui ad Cotonum hominem adducerent, compertoque quod contigerat flens ac prope eiulans ad Cotonum venit. Sed ille quasi omnium iam conscius, occurrit, ei subridens, lacrymasque cohibere iussæ dixit. Calcitrat hic iuuenis contra stimulum, sed aliquando fodicabitur, redibit ad te hodie egregie castigatus, atque vt spero alius quàm discessit. Simul rogauit vt sibi discedendi facultas esset, quando nihil se amplius eo loco moraretur. Discessit verò vt petierat, & post horas aliquot reuersus est

Iuuenis

Iuuenis toto corpore mirum in modum fracto ac fatigato, vestibisque misere cœno oblitis lutoque fluentibus. Heram vt aduenit trepidus adiit, precatusque deuissè veniam, narrare aggressus est, sibi dum in agri exultaret quod Cotonò atque Heræ præclarè illuisset, equum repente nulla manifesta causa ita efferatum vt fræno, virga, omnibusque retinaculis contemptis, per inuia seipsum sessoremque suum incredibili impetu in palustria loca præcipitarit, vbi dum luctatur cum solo vestigia hauriente, sua equitem ruina inuolutum affixerit luto, totiusque prope corporis pondere oppresserit. Quo in periculo dum ad suam miser conscientiam respiceret, aiebat visum sibi audire vocem (vix tantum an etiam auribus non satis poterat constituere) quæ iuberet, vt ad Cotonum festinus reuerteretur, nisi malè perire vellet; cumque id se facturum recepisset; leuissimo conatu, equi ruinæ corpus subaxillè, nec aliud iam se optare vberimè lacrymans instabatur, nisi vt ad Cotoni pedes accideret. Verùm abiisse illum didicit, non difficile ab heræ impetrauit eodem in equo iam velut olim mansuetissimo ad Cotonum illicò aduolaret. Exceptus est ab eo rei totius vt Iuuenis sensit iam conscio, per humaniter, cùmque onus conscientiæ, comparato ad id per dies aliquot animo, deposuisset, diffusus immensum viribus suis si ad consueta loca rediret, remisso ad Heram equo, Cotonum laudari hæsit assiduus, omnibusque breui negotiæ abdicatis. Deo se in Religioso Ordine, in quo pie vixit & mortuus est, consecrauit. Extremum huc apponimus, virginis casum qui tota ciuitate Auenionensivulgatissimus fuit. Legerat illa Cotonum conscientiæ arbitrum, non vt eius staret consiliis, sed vt auctoritatem

tatem leuissimis suis , quod postea constitit , voluntatibus prætuleret. Ergo nulla consulendæ voluntatis diuinæ sollicitudine aut diligentia , nullis aut parum certis diuini spiritus instigationibus Cotonum urgebat assidue , vt sibi auctor esset vitæ in religioso Ordine transigendæ. Quod cum ipse recusaret magis operere , negans sibi idonea apparere eius rei suaderæ argumenta ; Illa muliebri vel leuitate vel peruiacia apud quendam Ordinem perfecit vt admitteretur , & quasi de Cotonis triumphans , scripsit ad eum , Intellecturos homines ex ea quam tunc ageret via , non semper diuina plurimum sapere qui maxime videantur. Respondit Cotonus magis operere se vitæ eius gratulaturum , si perficeret vt Deo & hominibus humilitate placeret ; sed nunquam sibi inuentum venisse vt dubiaret an ipsa posset in Religione aliquandiu agere , vnum illud sibi hactenus dubium esse , an posset in ea vitam transigere. Rursus literas eius ac publicauit audacula ; sed ipsa eis laud multo post fidem astruxit non tantum abijcta religiosa vita , sed studiis etiam ad muliebres delicias impendio conuersis. Mitto huius generis prima , quæ in Auenionensium sermone atque admiratione tum fuere ; illudque tantum asseuerare possum , tam multa eum pietatis charitatisque argumenta præbuisse siue in sedandis ciuium interie discordiis , siue in collocanda in tuto matronarum puellarumque pudicitia , siue in excitando in omnibus sanctis studio , vt sanctissima sit ad hanc usque ætem illius in ea ciuitate memoria , & quos retinent pietatis sensus qui eius vixere temporibus , eis se magisterio debere fateantur. Quamobrem cum multis post annis famosus Anti-cotoni libellus prodisset , illustrissime testimonia edidit Episcopi

ac Clerici regionis illius , quibus & calumniarum tenebræ planè dispellerentur , & omnium hominum de eius virtute sensus egregiè aperiretur. Ioannes de Tullia Arausicanus Episcopus vir grauissimus atque eruditissimus hæc tunc pro testimonio scripsit. Quamuis inquit eximius qui ex honorificentissimis illius muniis atque exercitationibus fructus extitit , altissimas in omnium memoria radices egerit ; Ego tamen vt meo etiam calculo veritas roboretur , testor me cum quo tempore Auenioni fuit , Aduentu & Quadragesima præclare concionantem audiisse, cum succisas concionibus horas ad docendam Theologiam , audiendas confessiones , aliaque opera pia fructuosissimè conferret ; vt eum vniuersi ob utilitatem odoremque pietatis quia ex illius afflabatur actionibus singulari amore ac veneratione prosequeremur. Ludouicus Bellus duorum Archiepiscoporum Taurusi & Bordini qui tunc Auenioni præfuere , Vicarius Generalis sic iuratus testatur. Tota inquit Auenio , eiusque vicinia tantum ex P. Cotoni concionibus religiosæque vitæ exemplis fructum collegit, vt mirabiles mutationes tum hæreticorum in orthodoxam fidem, tum Catholicorum in meliorem frugem ex eis fuerint consecutæ.

CAPVT X.

ANNO CHRISTI
1598.ÆTATIS COTONI
35.

*Institutas Aquis-Sextiis conciones dimittere
coactus in exilem pagum alacer transit.*

FLuxerant hæcenus Cotonio satis placide suscepta negotia. Sed ad annum ætatis tricesimum quintum cum in maiorem exercendus esset palæstram, nonnullis subinde difficultatibus diuinæ consilio prouidentiae fuit permissus. Impulerat enim Auenionensium eius laborum fama Paulum Huraltum qui tunc Aquis-Sextiis Archiepiscopus erat, vt maximo ciuitatis suæ templo concionatorem illum volentibus Societatis præsidibus adoptaret. Quo cum aduenisset Cotonus, suarumque concionum cursum valde iam secundum teneret; is qui tunc Aquensi Senatui princeps præsidebat, siue quod Archiepiscopo, cum quo illi intercedebant inimicitiae, ægre factum vellet, siue quodd erga Societatem animo esset parum æquo, literas ex Regis Curia impetrat, quibus Societati quandiu Parisiis exularet, concionibus in Narbonensi etiam illa prouincia interdicebatur. Earum literarum autoritate Cotonus in eo quem dixi concionum cursu suggesto iussus est cedere, eiusque in locum suffectus alius dicendi laude non maximus. Vt illam siue iniuriam siue operæ suæ despicientiam tulerit duæ res postea docuerunt. Nam cum in aula esset, cum qui rem totam erat machinatus quodd alioqui in iudiciis integer haberetur, laude commendatione sua iuuit cum

in

in ampliorem dignitatis gradum promoueretur; Eē hoc tempore stationem sibi iniussu præsidum ratus non deserendam, confessiones quibus non erat prohibitus, totos dies audiebat dū aliò vocaretur; cūque concionis tempus aduenerat humili in sede successorem illum suum concionantem auscultabat modestissimè, & quantum patiebatur veritas non frigide neque parce cōmendabat. Literis deinde suorum præsidum acceptis vbi comperit angustissimum sibi oppidulum Auisanum, cuius Ecclesia in Auenionensis Collegij est potestate in Quadragesimam destinatum, aduolauit scilicet curriculò, latus prouinciam sibi obuēnisse tanto vtiliorem quanto ad speciem minus illustrem. Ergo pro vnica Aquensi binas in die ad Auisanos rusticos conciones; vnā ante ortum, alteram post occasum Solis habere instituit; ac ne viris nobilibus in confinio sitis nihil conferre operis, tertiam quotidie ad meridiem nunc vnus, nunc alterius oppido tribuit, magnā semper nobilium multitudine eum, quocumque conditus esset concioni locus prosequente. Nunquam illi antea vel sensus de se abiectior, vel cœlestis fauor vberior quàm inter hos labores prope rusticanos. Quasi enim aut nulla fuisset aut minima prudentia si quas ad aliquius autoritatis homines literas scriberet; non prius dabat perferendas quàm à proximi Collegij Rectore recognoscerentur. Vltimum quemlibet è plebe aequè ac primum accurabat, fortunatissimo sæpe euentu. Monitus enim aliquando in vili gurgustio fabri lignarij coniugem graui teneri ægritudine; cū cibum iam appposito ad viri nobilis mensam discubiturus esset, rogauit illum demississime ne iurbanè factum interpretaretur si ad illius mulieris audiendam confessionem

fionem ante cibum accurreret; impetravit, accurrit; audiit confitentem, & momento mortuam vidit. Ut satis appareret vel mortis illius præfagationem, vel mulieris salutem tam prompto demissoque animo diuinitus concessam. Alterum huic haud dissimile diuini fauoris exemplum eodem tempore est expertus. Vir enim quidam ea in regione notissimus sacerdotio atque olim etiam religioso voto Deo astrictus, perfractis omnibus religionis ac pudoris repagulis mulierculæ improbissimæ ita se manciparat ut & ad sacrilegum cum illa matrimonium, & ad hæreticorum castra pertraheretur. Quæ res Cotonio diuinitus est significata eo ipso tempore quo procul admodum ab ipso peragebatur. Nam inter colloquium cum viris aliquot nobilibus apud quos sacrilegus ille magna olim pietatis opinione fuerat, repentinas vberesque in lacrymas aliquando erupit, attonitisque mœstitia omnibus, ut se paulo post recepit, veniam subiti motus modestissime postulauit. Percontantibus verò lacrymarum causam, respondit venisse tunc sibi in mentem miserabilem illius viri casum, eamque rem imprudenti lacrymas excussisse, simul eorum animos de humana imbecillitate commonitos contra perniciosi exempli periculum disertissima oratione communiuit. Sed illi qui Cotonii moderationem omnibus in rebus perspectam haberent, repentinum hunc eius motum non destitere animo reuoluere, donec miseri hominis casu magis euulgato, magnopere sunt admirati eodem tempore Cotonio lacrymas ex oculis erupisse, quo scelersto illi verba ex ore vomebatur, quibus Catholicæ fidei nuncium remittebat. Contigit hoc ipso tempore quod grauissima fœmina Domina du Buisson sancte asseuerat, ut cum in mariti castro Eucharistiæ sacrificium

cium priuata in adicula crebrius offerret Cotonus, atque in agendis post sacrificium gratiis prolixissimus esset, non solum ab ipsa, sed etiam à familia conspectus sit aliquoties radiato capite, totoque circum corpore miro splendore coruscans. Memorat eadem matrona cum de suis quibusdam inter orandum difficultatibus apud Cotonum cui moderandam conscientiam tradiderat, sæpe atque anxie quæreretur, illum ut laborantem ipsius animum exemplo suo erigeret, facie non leuiter pudore suffusa narrare exorsum esse. Sensisse se quidem iam olim turbari sibi interdum interiores sensus dum oraret alienissimis visis ab inferno tenebrione intrusis; sed eo primum anno, maiore multò licentia se ab illo diuexatum. Nam ipsi etiam externis sensibus suis dissonos interdum strepitus, fœtores teterrimos, insanas formarum ac spectrorum ludificationes mediis in orationum contentionibus offerri ab eo consueuisse. Vnum tamen se istis omnibus scutum opponere, quod magnus solebat Antonius, collectam ex imbellis hostis despicientia constantiam in suscepta oratione ad exitum perducenda; Hæc illi ut opinor tirocinia fuere' grauium ac perpetuorum certaminum, quæ ad mortem vsque cum humani generis hoste, non mente tantum sed interdum etiam corpore illi ut dicemus fuerint decertanda. Verum is qui iubet de tenebris lucem splendescere; Cotonum inter ista versantem magis quotidie ac magis hominum famæ commendabat. Exeunte enim hoc anno qui fuit sæculi nonagesimus octauus, cum nonnullos alicuius nominis viros ab hæresi traduxisset ad Ecclesiam, alios autem aliquot in agresti illo secessu hæreticis regionibus vicino non leuiter perculisset, moti sunt Gratianopolitani quos labe hæreseos

rescos sensim ibat perditum, vt cum concionatore in huius anni Aduentum, & proximi Quadragesimam à nostris præsidiis expeterent. Quo ille cum maxima Episcopi omniumque ordinum voluntate aduenisset, vt Catholicis hominibus animos atque alacritatem disputationum efficacitate magnopere auxit, ita morum suauitate sermonisque comitate hæreticos adeò mitigauit, vt congressum eius appetere nequicquam interdicentibus Calviniani verbi præconibus non cessarent. Quæ res præcones ipsos in tantam egit rabiem, vt vniuersi in vnum effusi nullam ei ab ineptis litigiis ac concertationibus quietem pluribus annis tribuerint. Sed hoc postea viderimus. Isto verò iam tempore Cotonii famam ad Henrici IV. aures peruenisse constat ex ipsius Cotonii literis ad fratrem hoc anno datis. Scribit enim Marsani Marchionis filium sibi asseuerasse auditum abs se Regem cum diceret, Cotonum modestissime omnium de se inter præteritos tumultus loquutum, & magnis autoribus præclara nunc ad se de illo perlata.

CAPVT XI.

ANNO CHRISTI

1599.

ÆTATIS COTONII

36.

Gratianopoli plura certamina pro Fide Catholica suscepit.

Nondum erat in exitu annus superior, cum importunissimus simul atque confidentissimus Calviniani verbi Minister Cotonum ultro lacecessit, literis ad certamen de rebus Fidei, quod illi fuit, vt anno

no ætatis sue tricesimo sexto & septimo, prope continuum, ita exitu per quam gloriosum. Literas ille scripserat græcis voculis ac sententiolis grammaticum in morem infartas, ex quibus facile intellexit Cotonus tentari suam in Græcis peritiam, quod nec ille græca sua esset interpretatus, nec disputatio Theologica his phaleris melior fieret. Ergo ut homini veteratori, iactantiæ apud suos, plebique hæreticæ contemptus Catholicorum Doctorum ansam omnem adimeret, literas ei omninò græcas rescripsit. Sed vide Sycophantæ nequitiam. Literas has, atque alias quas hoc anno plures dare perseveravit, atque à Cotonò accipere, contra omnem humanitatis rationem, nulla eius qui miserat voluntate, typis mandat, Cotonum ob græcam illam epistolam ostentationis insinulat. Nimirum sic est hæretica versutia, calumniam omnem in partem in promptu habet. Si græca dissimulasset erat imperitus, quia non dissimulavit est vanus. Verùm Cotonò causa fuit cur imperitiæ potius apud hæreticam plebem, quàm vanitatis accusationem timeret. Illa enim ne veritas admittatur ex ore eius qui imperitus audiat absterret; Ista, aut apud hæreticos animalia gloriæ vulgò non suscipitur, aut non magno negotio depellitur. Non erat adhuc cum hoc transactum, quando veterinosus alter Caluini præco, rursus ei scripto disputationem denunciat. Erat vero Cotonò tanta de Deo cuius causam agebat fiducia, tantum salutis alienæ desiderium, tanta laboris patientia morumque facilitas; ut nec ad vanissimum studium istorum hominum vellet advertere, qui nihil aliud nisi gloriam ex his congressibus apud plebeculam suam aucupabantur, nec vlla eorum vel importunitate, vel impudentia se sinerat deterreri. Itaque

que dum ſcriptiones alias ex alijs abs ſe elici inter ipſas concionum quotidianarum occupationes patitur, iuſtum ei opus elabatur de ſacrificio Miſſæ, quod ne Aduerſarius pro libito, vt Hæretici ſolent, peruerſum ederet, de præſidium voluntate ſtatim illi fuit typis committendum. Quies ab iſto nondum erat, cum ſe tertius medium inferret, de tranſſubſtantiatione litem intendens, nec Coronus refugit dum hoc quoque ſuas, imo Veritatis vires verbo ac ſcripto, quod inter eius apologetica fuit haud diu poſtea euulgatum, experiri. Vt mirari ſubeat tantum in vno homine vel ſpiritus ad elaborandum publicè ac priuatim, vel patientiæ ad tolerandos audaciſſimorum hominum impetus eſſe potuiſſe. Tametsi illud maiore dignum admiratione occurrit, quod interim tam multos Catholicorum aut eorum hæreticorum, qui minus eſſent contentioſi gratia labores adiret, vt ab omni aliq negotio ceſſare iis qui ad hoc ſolum attenderant videri poſſet: Magna enim cum eſſet Gratianopoli occaſio licentiæ ac corruptelæ morum ob quotidianum cum hæreticis legum Eccleſiaſticarum ac fere diuinarum contemptoribus conuiſtum; Incredibile eſt quantum illi cum prauis moribus luſtandum fuerit, vt extirparentur, & quantum de pietate Chriſtiana ſatagendum vt reuocaretur. Continui erant poſt conciones viro- rum matronarumque de die ad eum conſilij aut confeſſionis cauſa concurſus, continuæ de nocte cum hæreticis labantibus aut redeuntibus ad fidem collo- cutiones. Sed nullus illi aut illuſtrior labor fuit aut uti- litate vberior, quam cum hic primum fundamenta iecit eorum omnium quæ ex eius ad Henricum IV. profectione tam in Societatem quam in Eccleſiam bona- prodiere. Naſtus enim illic virum Illuſtriſſimum
Franciſcum

Franciscum de Bonne qui Dux Desdiguieres & Regni Equitum Magister postea fuit, maximopere indoluit animum eius per temporum iniquitatem hæreticis opinionibus implicatum fuisse, facileque æstimans quantum toti Galliæ conferre posset eius ad Ecclesiam transductio, tanta eum verborum ac morum suauitate sibi deuinxit, vt & apud Regem, egregium postea laudum suarum præconem habuerit, & ea in ipsius animum veræ religionis semina conseruerit, quæ nunc in fructus maturos erupisse Europa demiratur. Id quo pacto obtinuerit nunc dicam. Impulerat illum Cotoni fama vt videre magnopere atque audire eum optaret, quod vt sine Ministrorum Caluini fieret offensione secretum sibi ex arce ad Ecclesiam molitus aditum, perfossâque illius in pariete fenestella, assiduus illo clam suis subrepebat cum tempus concionis aduenerat, adeoque delinitus ac comotus redibat, vt perpetuis Cotoni laudibus Calvinianos Ministros incredibiliter vrere, animosque eorum suspitione ac diffidentia sui complere non vereretur. Tandem ad colloquium cum illo sæpius venit, pari semper animi voluptate atque vtilitate, quin etiam literis postea eum absente multum egit: nosque vnas Cotoni ad eum vidimus, quibus asseueranter affirmabat constare sibi, illum in ea quam tunc fouebat credulitatis peruersitate non perseveraturum ad mortem, cuius rei fidem euentus postea præstitit. Interim tamen dum ille moratur, non paucis aliis hæresim extorsit Cotonus. Qua de re ista reperi in literis ab eo ad Fratrem illo anno sæculi nonagesimo nono datis. Quindecim hic, inquit, quos nouerim veram Ecclesiam agnouere, plures alij vt per literas amicorum didici, Gratianopoli ad suos digressi, id ipsum, quæ Dei erga eos gratia est,

præstiterunt. Agebatur his rebus in furorem improbus Dæmon, nec eo secius eius administri, qui dum apud imperitam concionem crebrò ac furenter contra eum debacchantur, vilem ex vltima plebe opificem ad nefarium facinus crediti sunt suscitasse. Is enim cum simulasset velle se Cotonò quædam de Fide ac Religione dubia proponere, vt salutis suæ ex eius responsis consulere, admissus de more ad solum solus, cum nescio quid proposuisset; Intento ad responsionem, oculis vt solebat modestissimè demissis, repente guttur inuasit, tantoque conatu fauces oppressit vt voce extincta animam breui, vt erat homo validus, fuerit elisurus, nisi ad Cotonì obnitentis strepitum excitus domesticus cum socio famulus de funesti latronis manibus illum eripuissent. Et erat quidem eius in potestate vir scelestissimus, nec procul aberat vindicandi in eum iustissima ratio, si quæ eius facinoris aurâ ad Senatum alios-ve Iudices peruenisset. Sed cum ille solo prostratus veniam postularet, vehementissimam Dæmonis tentationem cui repellendæ impar fuisset, accusaret; in Ministros culpam reiceret, credulitatis suæ imprudentiam detestaretur; Cotonus de Religionis cuius tam facinorosa essent opera, prauitate admonitum, & salutis suæ, nō perire pessime vellet, consulere iussu dimitti voluit, hisque duobus qui interuenerant silentium quandiu homo ille periclitari posset omni obtestatione imperauit. Et paruere illi eò facilius quod vir miserabilis, cum scelus suum respexisset, veniaque ac clementiæ magnitudine obstupuiisset, ad Cotonum mutato iam animo redire, hæresimque apud eum multis cum lacrymis abiicere inaturarit. Ita concionibus Gratianopoli tunc defunctus Cotonus, Turnonum à præsidiibus est euocatus, vt collecto per dies aliquot in ora-

tionem piâsque meditationes animo , solemnem votorum quatuor professionem de more Societatis emitteret. In quo dum ille versatur , nulla sui alloquendi potestate extraneis facta , Caluini administri veluti Lepores digressis canibus , ita libero lasciuit campo , atque alij reportatas antequam abiret victorias , alij paratas ni abiisset pugnas , alij , quod erat deterrimum conuictum illum , atque in suas partes declinantem à suis præsidibus abreptum , carcereque obstrictum non solum in circulis ac colloquiis , sed etiam sparsis quoquoersus literis prædicare. Ausus quin etiam ille ipse qui semigræcis literis eum initio prouocarat , alias ad eum denuò dare defectionis vel suasorias vel gratulatorias ; nec defuit qui Cotoni nomine alias fingeret , hæreticorum spei ac desiderio consentaneas. Quæ literæ cum à Catholicis fuissent interceptæ , tanto omnes mœrore ac perturbatione consternarunt , vt velocissimis nunciis Prolegatum Auenionensem , Collegiique nostri Rectorem de hæreticorum iactantia admonerent , rogarentque impense vt prospicerent , ne Catholicum nomen quod Cotoni constantia atque eruditione illis in regionibus niteretur , eius lapsu graue detrimentum pateretur. Hæc Cotonus qui Auenionem interea venerat , vt comperit : exarsit scilicet primùm vt par erat amor erga Catholicos quos adeò salutis suæ amantes experiretur ; & iusto dolore contra Hæreticos qui spe sibi tam perniciosa seipsum deludere non vererentur. Deinde Apologeticas ad vtrosque epistolas dedit , quæ licet tunc editæ fuerint , tamen illius quæ ad Catholicos data fuit hoc loco repetere partem operæ pretium fuerit , quod ad pernoscendas Dei ergà Cotoni gratias non parum conducatur. Ergo cum dixisset

neminem vnquam animaduersum à Fide ad Hæresim defecisse, nisi quem prius vel ambitionis fastus supra se extulisset, vel foedæ voluptatis pondus infra se deiecisset, sic addit. Atqui ego per eius gratiam, qui me quamuis fragilem ac peccatorem segregauit ab vtero matris meæ, asserere possum coram ipso qui Iudex, Accusator & testis est operum, verborum & cogitationum nostrarum, me nunquam obnoxium illis rebus fuisse quas gradum ad Hæresim struere dixi; sed ab eis hoc abfuisse longius, quo à primo ætatis vere me ad se attrahere atque à tenerrimis annis amore ac timore suo animum meum coërcere Deo placitum fuit. Quæ cum audiunt qui sinceritatis ac candoris quo in omni vita est vsus, consciij fuere, non dubito quin & ea pro certissimis habeant, & gratiæ in eum diuinæ defluxus vsque à prima ad hanc iam prouectam ætatem perennes non demirentur.

CAPUT XII.

ANNO CHRISTI

1599.

ÆTATIS COTONI

36.

Nemausi pro Fide multa vita adit discrimina.

CÆterum ne sibi nimium placerent Hæretici in hac suade Cotono vel opinione, vel expectatione; visum est Societatis præsidibus eodem hoc anno vt Nemausum urbem pertinaciter hæreticam, quo ei aditum aperiebat Præfectus Prouinciæ Illustrissimus Dux de Ventadour, multum eam sibi operam deposcenti adire ad conciones æstiuas licitum esset. Quamquam epim ad annum tantum sexcentimum

resimam ea illi prouincia esset designata ; esse tamen è re Christiana ipse existimabat ut maturè sentirent Ministri aduersarium quem tam temere tamque falso sibi finxerant suum. Erat Nemausi potestas tota penes Hæreticos , Catholicorum hominum atque in primis Sacerdotum funestissima illis olim cæde quæsitæ ; sed non longo ante tempore Regis edicto Episcopum , Clerum , ciuesque Catholicos iampridem exulantes mœnibus receperat. Ac illos quidem Edicti autoritas , Regisque timor desolatis domibus restituerat, non tamen ciuium hæreticorum amor. Hærebat enim adhuc in animis præteritorum temporum memoria , quæ non tantum amicitias bona fide conciliari non sineret , sed etiam pleraque inter eos non parum suspecta ac sollicita redderet. Sacerdotibus in primis minime tuta videbantur omnia , quod plebs odij contra eos ex Ministrorum concionibus collecti impotens , & ante hoc tempus nulla melius victima quam Sacerdotis sanguine Deo litari posse censeret , & tum maximè ora conuitiis , manus lapidatione non abstineret , cum Sacerdos in veste sua apparuerat in publico. Hoc erant Nemausi loco res Catholicorum, cum ad eos Cotonus aduenit , qui tamen ut Ministros Calvinianos doceret, quam fluxas de sua defectione spes concepissent , nunquam ante id tempus acrior in eorum errores ac fraudes insurrexerat quam tum incubuit. Et mulcebantur sensim ferocis alioqui plebis animi , ut & copiosa ad eum audiendum conflueret & nunquam absque aliqua animi commotione abiret. Quod ut advertere Ministri , furentibus desperatione animis , in id vnum conniti cœperunt ut eum aut fama priuarent aut vita. Fama ut priuarent geminas adhibuerunt artes. Altera fuit ut
homines

homines ordinis , ætatis , conditionis atque etiam sexus omnis ex composito summitterent , qui quæstionibus aut potius iurgiis ita eum fatigarent , vt vel parandis concionibus curandoque corpori tempus nullum faceret reliquum ; vel labefactata aliquando patientia cuiuspiam responsionem negaret , vnde ipsis triumphandi apud populum , insimulandique eum ignorantie , an sa offerretur. Itaque seni illi aut septem aderant à primâ luce , nec ante eum deserebant , quàm suffectis aliis hominem satis occupatum reliquisse se sentirent : qua assiduitate cum eum ad extremam prope lucem tenerent ; periclitabatur videlicet aut sanitas eius aut fama , nisi & ipse breuissimi homo somni dierum iacturam noctibus compensasset , & Catholici re animaduersa iniuriam importunitatemque hæreticorum eo repugnante propulsassent. Malè tamen quandoque fraudis artificibus cessit ars sua , dum non nemo eorum qui lacessendi causa venerant , vehementi veritatis aculeo percussus , pacem animi nisi remisso hæresi nuncio non inuenit. Altera huic ars successit , vt incredibiles afferrent simulationes , quibus videri posset eum ad publicum de rebus controuersis certamen à Ministris prouocatum , congregari recusasse. Nam cum rescissent aliò eum à Præsidibus ad tempus accersitum ; negotiosi ad domum eius accurrunt , certamenque vtrò denunciant. Cotonus tamen de tacita præsidum voluntate confusus , profectione sua in aliud tempus reiecta , certamen admittit. Perculsi inexpectata consilij mutatione Veteratores aliis sese artibus tegunt. Vilem enim atque hæreticam plebeculam quasi ad disputationis spectaculum , tota vrbe accersunt ; vt Magistratus inter diuersæ Religionis vulgus seditionem non abs re veritus ,
dispu

disputationis consilium interdicto, ut fecit disturba-
ret. Triumphabant hic nebulones, adeoque erant ve-
cordes ut in Cotonum autorem referri hoc interdi-
ctum posse, vel non desperarent, vel se non desperare
simularent. Sed omnibus aliud suadebat, & causa in-
terdicti ab hæretica plebe orta, & Magistratus qui
interdictum tulerat totus fere illa tempestate hæreti-
cus. Nunc accipe quæ in discrimina vita eius sit ad-
ducta. Plebs vilissima iurgiorum semper ac certami-
num avida, nihil interdictum morata, die quadam
hospitium eius concursu facto obsedit, quod vel eum
ire disputatum vocibus inconditis ac tumultuosis con-
tra interdictum adigeret, vel si ire abnueret, conuitiis
& lapidatione intra ædes obrueret. Nec coëptibus de-
stitisset, nisi repentino, quamvis vano, imminenti
sibi magistratus terrore dissipata, tempus in alias
ædes elabendi Cotono præbisset. Plus omnibus ausus
est vnus, qui necandi ipsius animo, bis terue eius ædes
cum fica ingressus, dum in faciem eius, innocentia,
comitatis, pietatisque argumenta spirantem intendis-
set, ferrum nunquam stringere potuit, suumque tan-
dem apud illum professus facinus veniam simul & sa-
lutis viam est nactus. Aduit hæc inter, dies Augu-
stissimæ Virgini in cœlos assumptæ sacra, qua Coto-
nus ut erat eo in argumento piissimè copiosus ac di-
sertus, laudes excellentissimæ Dei parentis in Catho-
lici populi concione ab impio hæreticorū contemptu
instituit vindicare. Quæ res cum Calvinianos Mini-
stros acriter pupugisset, & nouis certaminibus verbo
scriptoque viam aperuit, & Cotonum occasionem sug-
gessit dum illis scripto satisfacit, ista de suis Nemaus-
sensibus periculis palam attestandi. Fateor (inquit)
ingenuè & audacter nunquam animum meum pulsa-
ri

ri acerbius , quàm cum de veritate Sacramenti Eucharistici , aut de eius quàm Deos puris omnibus creaturis antetulit Deiparæ honore quicquam detrahitur. Itaque oro vehementer , ac per eum qui nos condidit obtestor illos , qui mihi ob eam quam tueor Fidem noxæ quid piam vel incommodi vellent inferre , si quando nocendi mihi ansam vel sua vel Dæmonis malitiæ eis suggesserit , diuinusque erga me fauor id fuerit , cuius rei suscepta consilia , & ob ingratitude erga Deum lapsusque meos disiecta fuisse satis scio : Obtestor inquam , vti mala omnia , vel potius bona , quibus me afficient , alterius aut vtriusque huius veritatis respectu mihi moliantur. Excessit sub hæc Nemauso ; sed non certamine cum Hæreticis. Vocatus enim à Delphinatis Senatus principe , Pro-uinciæ præfecto Domino Desdiguieres annuente , Christiana sacra multis ab annis exulantia , atque in tres Delphinatus vrbes Diam , Montem Aimari , & Neomagum postliminio ex Regis edicto reuertentia comitatus est , & quindecim concionibus intra dies vicesenos celebravit. Quo in itinere Hæreticos aliquos Ministros , qui maximè illum vt Catholicæ fidei desertorem apud suos prædicarant , malo suo egregiè docuit se fidem Catholicam seruare illibatam. Nemausum inde reuersus non solum nouas cum Ministris velitationes ; sed nouos etiam à furiosa plebe tumultus in reliquum est annum expertus , donec æcerimis Nemausensis Curia interdictis , omnes certaminum ac tumultum causæ sunt sublatae. Enimuerò memini duo illum in Nemausensibus hisce turbis solitum crebro obseruare. Alterum singularis Dei prouidentia , quòd secundum Diuinam & Angelicam nulla in omnibus periculis ope vteretur præsentiore ,
quam

quam matronarum quas Hæresis maximè tenebat obstrictas. Illæ enim auditis furtim eius concionibus non nihil delinitæ, turbidum vulgus mollire, illæ submissis monitoribus Cotonum de periculis suis docere, illæ consiliorum atque insidiarum quas Ministri adornarant indicium facere non cessabant. Alterum fuit suæ vt ipse aiebat culpæ, quòd Nemausensem profectiorem non sibi hoc anno destinata ausus esset sua magis voluntate expetere quam præsidium imperio delatam admittere. Quo factum interpretabatur vt & duriora omnia hoc anno à Nemausensibus, & multò à Deo quam soleret minus interni roboris expertus sibi esse videretur.

C A P V T XIII.

ANNO CHRISTI
1600.

ÆTATIS COTONI
37.

Sedata Nemausi tempestate præclaras de Vitiis & Hæresi victorias reportat.

VErtente subinde anno post millesimum sexcentecisimo qui Cotonum erat à natali tricesimus septimus, susceptis ad Catholicos concionibus solitis nihil ille desiderari à se passus est eorū quæ à Doctore suauissimo simul & salutis alienæ amantissimo poterant expectari. Dicerem sigillatim quantum tunc abolendis vitiis excitandisque virtutibus contulerit, si non in mea vnus oratione multo esse minus sentirem fidei, quàm in solemnibus testimonio Episcopi, Cleri & Curie Nemausensis, quod illi decimo post anno depellendæ calumniæ causa ediderunt. Sensus

H hac

hac de re vnus eorum oninium fuit, sed verba solius Curiae, nuncupato, vt ipsa ait, ad sacrum Euangelij codicem iusiurando, & consentientibus citrà vllam discrepantiam suffragiis facta huc transcribam, Testati, inquit, sunt annis 1599, & 1600. eundem R. P. Coronum continuo in vrbe Nemausensi concionatum esse, atque in ea fere illo toto tempore commoratum, aliisque etiam temporibus per eam quoad per suscepta itinera licuit transiisse, concionatum esse & dies aliquot in ea substituisse, ex quo Nemausensibus potuit ac debuit de actionibus viuendique ratione qua is Pater utebatur familiarissime, constare. Ac reuera constat omnes illius actiones ad Dei honorem ac gloriam, ad spiritualem instructionē consolationemque multorum hominum collimasse; semperque in ea vrbe versatum esse maximo pietatis, religionis & charitatis exemplo ac incitamento; siue in actionibus publicis, quales sunt conciones, cohortationes, catecheses; siue in priuatis, cuiusmodi sunt præsita ægris afflictisque & egenis opportuna subsidia, & cuiusuis notæ ac conditionis hominibus sedulò accuratèque nauata opera. Ita vt eius hominis industriæ, doctrinæ & morum sanctimonix, fides pietas, charitas atque omnia Religionis Catholicæ Apostolicæ Romanæ ornamenta suum splendorem & incrementum in ea præsertim vrbe in qua per bellorum ciuiliū procellas ea omnia miserabiliter deferbuerant, debere videantur. Sic Curia. His verò officiis, non Catholicos tantum, sed & plebem hæreticam ita deliniuit, vt nullis hoc anno tumultibus ab ea prodatur diuexatus. Cuius rei ea quoque Curia his postea verbis testimonium dedit, Eundem, inquit, ipsum publicis concionibus, priuatis

uatis consiliis & adhortationibus concordiam, amicitiam, & fraternam consuetudinem confouisse; & laudabile studium omnium animis iniecisse mutuis se officiis beneficiisque laceffendi, omni personarum acceptione posthabita. Ex quo euenit, vt bellorum ciuiliū memoria pedetentim euanesceret, atque iracundia hominum per temporum iniuriam, & inueteratas similitudines exulcerata placaretur. His artibus non tantum aliis, sed etiam sibi quietem videtur hoc anno comparasse. Quanquam ea quoque fortasse fuit eius quietis causa, quod Cotonī fortitudinē ablata esset spes Caluini Ministris, posse eum timore cædis alterius-ve periculi de statione deturbari. Non enim defuit suspicio, hoc vnum turbis anni superioris quæsisse illa seditionis popularis flabella, vt Cotonus metu debilitatus, aut ciuitate excederet, aut sileret. Et hac quidem illis non successit; sed alia nihilominus via, aut adimere illi sermonem, aut sermonis auctoritatem infringere, ignari quam solido dentem impingerent, hoc anno laborarunt. Etenim cum recens absoluta esset ab eo editio Opusculi de sacrificio Missæ, creberrimis Patrum, Sacrorum, pluriumque auctorum testimoniis vel fulti vel illustrati; Ministri plures, atque ille in primis qui literis semigræcis eum superiore anno compellarat, litem illi falsi intulerunt, quod eum dicerent aut à re alienis, aut vitiatis Veterum testimoniis usum esse. Vnus ergo eorum, typis; alter scriptis committit illi ed bene longum indicem testimoniorum quæ falsi insimularent. Et videlicet sperabant quod alibi illis perierat, alibi se restituros. Per hæc enim fere tempora Rex immortalis memoriæ Henricus IV. Mornai nobilis Calviniani librum contra Eucharistiæ veritatem illustri veterum

rum testimonium fūco illitum , coram lectissimis Iudicibus in examen adduci ab Episcopo Ebroicensi voluerat , eo euentu , vt diluto autoritatum illo testorio , & liber inhonorus , & Autor perennibus Falsariorum notis inultus remaneret. Sed Cotonus ne quid detrimenti res Catholica ex defensionis suæ mora pateretur , vt ingenio , ac multò magis animi magnitudine quadam cœlesti abundabat , Tria simul ad depellendam calumniam suscipit. Nam collecto in primis Catholicorum Nemausensium literato cœtu , librisque ex Aduersariorum etiam bibleotheca depromptis , testimoniorum quæ vsurparat fidem oculata illis demonstratione probauit. Deinde prolixo scripto ad omnes falsi suspensiones quas iniiciebant Ministri , appositas responsiones adhibuit : Denique ne triumphum hoste nec viso , nec audito agi causarentur , literas dat tùm publicas ad Nemausense illud de theatro consistorium , tùm priuatas ad eos qui prouocauerant Ministros , quibus certamen publicū vel flagitabat , vel Magistratus assensu implorato defererebat , vt ostenderet hominibus illusum ab iis qui scriptum illud suum falsi infimulassent. Res in eo erat statu , vt si per Magistratum , quod eatenus factum fuerat , certaminis consiliū disciceretur , Hæreticorum qui maiore ex parte Magistratum occupabant , maximum dedecus nulla posset tergiversatione prohiberi. Alioqui verò insignis benignitas & modestia Cotonii , quæ tum in iis quas scribebat literis , tum tota in vita eminebat suauem illis ad assentiendum necessitatem inferebat. Vicerat enim propemodum eorum feritatem comitate , superbiam demissione , insolentiam moderatione ; vt sua ipsi sponte ad eum interdum domum ventitare , colloqui , & salutare

lutare iam in publico non refugerent. Itaque partim suorum accersitu, partim iponte sua conuenere Nemausum Caluiniani Ministri quinque, quorum è numero is quem dixi, literarum semigræcarum scriptor, loquuturus, reliqui in subsidiis erant futuri. Cotono Deus adduxit victoriæ testem Illustrissimum Cardinalem de Sourdis, qui casu illac iter habebat ad Regem. Adfuit & Nemausensis Episcopus, & primæ notæ Catholici aliquot. Duo dies abiire, quibus duo testimonia à Cotono pro Eucharistica transsubstantiatione prolata, longa Grammaticæ ieiunitatis disquisitione vexata, nunquam eò adducere potuit Minister vt Cotoni sententiæ inutilia censerentur. At ipse facile suspicatus, tædium esse Auditoribus ab his Grammaticæ apicibus, iis cursim compositis aut expositis, doctrinam Transubstantiationis à Patribus, locis illis testatam copiosè ac diserte demonstrabat. Quam orationē, cum multo æquioribus animis auditi aduertissent Hæretici, Actori suo suaserunt, vt mutata velificatione Transubstantiationem testimoniis Veterum, quæ ipsi collatis operis coaceruarant, infirmare tertia certaminis die laboraret. Ille verò vbi dies aduenerat, tribus ipsis horis vna quasi salua recitauit loca prope innumerabilia Patrum, sed trunca scilicet aut detorta, aut vitiata, quibus Transubstantiationem configi contendebat. Stupor obsederat Catholicorum animos, & videlicet nonnulla commiseratio Cotoni, lacrymis etiam quorūdam testata, quod ad alia omnia paratum quasi ex insidiis eò pertrahi viderent, vt ex tempore tot autoritates Patrum explicaret, quot vel meminisse difficillimum esset. Ille tamen cætera lenis ac tranquillus, vbi ambitiosus ille autoritatum imber depluerat, diuina* plenus fiducia ingentes iustulit

sustulit animos, nihilque caufatus vel modum, vel argumentum disputationis, pauca præloquitur; Tum ab vltima earum quæ recitatæ erant autoritatum exorsus, ad primam ascendendo progreditur; tamque dilucidam singulis, aptamque responsionem adhibet, vt memoriæ ingeniique prodigio, & Catholicos lata admiratione compleuerit, & Hæreticos mœstissimo stupore versa vice obrutos domum sine voce remiserit. Quinque posthæc dies perseuerauit disputatio, Ministro quotidie infelicius rem agente, siue quòd nihil eorum quæ accusarat, probare poterat; siue quòd in dictione subita & improuisa infantissimus erat; siue quod Grammatica tantum quisquiliis omnibus locis captabat. Quæ causa fuit vt Hæretici apud Canayum Fraxineum Præsidentem Senatus quem Galli vocant Bipertitum illac forte iter agentem, quod ei in Nemaufenses esset Iurisdictio, enixè egerint vt certaminis cursum seditionum acturbarum prætextu abrumperet. Idque ille ita fecit, vt & Hæreticis quibus tunc præerat pro magistratus munere in præfenti consuleret, & suæ nihilominus saluti in futurum prospectum vellet. Sexto enim fere post mense defunctus eo magistratu, atque ex hac aliisque disputationibus Ministrorum imbecillitatem malamque fidem edoctus, sempiternum hæresi nuncium remisit. Alios quosdam huic accessisse negare non potuit Minister ipse Aduersarius, qui certaminis huius mendacissimam texens historiam in epistola ad Nemaufenses suos ita loquitur. Fateor ingenue nonnullos nostrorum ipsis in prædam cessisse, sed tam paucos tamque nulla ex causa, vt sit cur plus doleant de cæterorum constantia quàm sibi gratulentur de istorum deceptione. Ita miser mala sua palpat. Scitum tamen est certissimò

certissimò & tunc triginta quinque ad fidem Catholicam accessisse, è quibus tres in Magistratu erant, & in posterum tantam ab hac disputatione consternationem Hæreticorum fuisse, vt cum in Ministrorum infantiam ac tarditatem referrent quod erroris potius imbecillitati erat tribuendum, alios vndecumque qui Cotonò eloquentia pares videri possent sibi accersere laborarint. Sane illud hoc loco non prætermiserim, Cotonum humanissimis literis diu ac crebro ante hoc certamen Aduersarium hunc suum conuenisse, ratum aliquid in eius salute posse hac familiaritate ac comitate promoueri; sed animi eius peruicacia ac superbia penitissime perspecta hæc ad eum in Literis quæ hætenus extant quasi futuri conscium perscripisse. Quod ad te attinet, Chamiere, quantum Deus mihi concessit perspicere, salutem tuam esse prouideo deploratissimam. Nam præter execrandas blasphemias quas intrepide atque effrænate euomis contra Eucharistiæ sacrosanctum Sacramentum ac sacrificium, agnosco etiam insignem in te Caluini id est perditissimi hæretici notam, arrogantissimum de te ipso præ aliis sensum, & obstinatum eorum quæ semel senseris amorem. Nec vaticinio cassa fuit fides. Vidimus enim eum quadriennio fere ante Cotonì obitum non solum in hæresi peruicacissime perseuerantem; sed etiam rebellantibus contra Regem Hæreticis Montalbanensibus faces atque animos suggerentem muralis tormenti globo, dissipatis momento membris æterno damnatum interitu.

CAPVT XIV.

ANNO CHRISTI
1601.ÆTATIS COTONI
38.

*Gratianopoli denuò Fidei & Moribus ciuium
multum allaborat Cotonus.*

NEmauso digressus reuertit Gratianopolim ad conciones anni sexcentefimi primi, atque in itinere mulierem pietatis laude Valentia Segalaunorum celebrem inuifit, quæ etiamnum attestatur dum mutuo se ambo salutarent conspectos sibi Custodes vtriufque Angelos humana in specie insignibus, inuicem amoris ac venerationis signis consalutantes, lætisque singulos oculis sui Socij alumnorum intuentes. Quod visum cum illa Cotonus prodidisset, compertus est non tantum rei totius nunc conscius, sed etiam spectaculis eius generis alias assuefactus. Gratianopoli noua illum sed languentia ac prope iam fracta Ministrorum litigia rursus exceperunt. Delirus quidam senex frigidam pituitam in chartas aliquot libelli malè confarcinati contra opusculum eius de Missa infudit, qui libellus cum suapte sponte diff luderet ac contemneretur, indignus est habitus qui Cotonum bilem moueret. Maius illi tunc opus surgere cœpit Geneua Plagiaria, cuius editionem vidit annus post hunc octauus decimus. Cum enim cerneret potissimam eorum partem, quos hodierna hæresis peruertit in Gallia, solam Scripturam, eamque non ex puris fontibus, sed ex lutulentis Geneuensium riuulis suo lapsui prætextum obtendere, instituit singulis concionibus efficere ut ex
propositis

propositis Geneuensium Bibliorum corruptelis intelligerent se non vera sed supposititia Scriptura delusos. Quod institutum cum aliquantum hic promouisset, extremo anno suæ in Aula commorationis absoluit, & libro edito euulgauit. Cæterum ad hoc negotium adiecit sibi hoc anno Cotonus triplicis Catecheseos laborem. Vna fuit communis, vbi controuersia cum Hæreticis agitabantur; Altera moralis, quæ conscientia ius Sacerdotibus exponeret; Tertia Theologica, quæ obscuriores & altiores de Fidei mysteriis quaestiones explanaret. Quæ res summæ erat oblectationis iuxta atque vtilitatis. Neque enim abhorrebant viri doctiores & optimates Senatoresque grauissimi bonas iis rebus multasque horas impendere. Malis deinde moribus quamuis inolitis ac publicis magno animo obuiam iit, atque à Dei domo exorsus, cum animaduertisset Sacerdotes passim secundam à communionem ablutionem inuerso calice in terram excutere, aut parieti impingere, pueroque ministranti calicem ad altaris mappam detergendum tradere solitos, exarsit videlicet pro sua in Sacramentum veneratione, contra inuerecundi ritus indignitatem, tandiuque illum in concionibus exagitauit, donec ab hominum usu exigeret. Quod sequitur ad plebem pertinuit, pessimumque exempli fuit plenissimum, quia tamen etiam turpissimum, indicabitur potius quam explicabitur. Cum virgines extrâ ciuitatem dabantur in matrimonium, in porta vrbs qua coniugibus erat transendum tam fœda peragebantur vt gentilitiam idololatriam vel saperent vel superarent. E loco superiore in illam inuerecundiam tam acriter tamque ardentem Cotonus declamauit vt non modo rem totam de medio sustulerit, sed & autoribus tantum pudoris attulerit

lerit ut per diu conspectum hominum quo erant indignissimi defugere cogerentur. Iam ista quibusdam priuatim sunt ab eo tributa. Familiae non ignobilis quinquennis puer raptore occulto minimeque aspectabili repente de familiarium conspectu abreptus; nunc in vinariam cellam, nunc in obscurum domus barathrum deportabatur. Mœsti parentes ac trepidi, consilij opisque causa puerum ad Cotonum adducunt; quem ille cum deprehendisset innocentissimum, ad Parentes versus inuestigare institit num quæ familiarium aliorum-ve maleficia suspicarentur? quod cum illi negassent, intulit, vereri se ne in Sacramentis quæ susceperat, quidpiam resideret vitij quo ista Dæmonis aduersus eum potestas fulciretur. Hic Parentes quasi expergefacti narrare incipiunt nondum ipsum Baptismo lustratum, quod nescio cuius Optimatis aduentum adhuc præstolarentur qui celebriori baptismo susceptor esset. Exhorruit Cotonus negligentiam, quod priuato saltem ritu puerum non lustrassent, & magnopere vult ne vanæ fortasse celebritati tantum tribuerent, ut pueri incolumitati totam in vitam obsessent. Illi etsi baptismum priuatim illi accurarunt, tamen humanis pleni cogitationibus ad celebritatem illam suam respicere dilatis eo baptismi ceremoniis non destiterunt. Sed cum paucis post diebus multò quam vnquam ante inclementius ac periculosius abreptus esset puer de medio, regustarunt Parentes Cotonum verba, acceleratisque illicò Baptismi ceremoniis Filium deinceps extrà incommodum periculumque omne posuere. Quod exemplum in Vrbe, ubi plurimi spretis hæretica negligentia Ecclesiæ vetustis ritibus lustrati baptismo fuerant, & memorabile fuit & perquam vtile. Alterum addo neque vtilitate

litate neque dignitate minus. Matrōna nobilissima Præfecti Prouinciæ filia, ditissimæ ac potentissimæ spes familiæ, dum conciones Cotoni paterno exemplo frequens audit; maximique facit, hæresim quam cum lacte hauserat suspectam primo, tum inuisam habere cœpit. Sed quod magnus erat per illa tempora Caluinianæ factionis vel respectus vel potentia, nec satis adhuc certa parentis eius erga res Catholicas voluntas, nihil verebatur vehementius quàm ne qua aura suæ cogitationis, vel patris vel alicuius è grege Caluiniano aures afflaret. Itaque rem premebat diligentissimè pari animi sui periculo ac labore, donec eoluculentioribus in dies diuini luminis radiis percussaque magis assidua Cotonō aures dabat, nec satis iam Deum sese animo infundentem ferens, ad eius opem confugit. Is secretissimè admonitus, captata Præfecti salutandi atque inuisendi occasione, matrōnæ colloquio ex Patris licentia, quod aliàs fecerat poritus, totius vitæ noxas consistentem audit, paucisque post diebus diuinis epulis cōmodo loco participatam, opportunis ad constantiam cautionibus communiuit. Tenuit idem occulte institutum plures annos matrōna, Cotonō quotannis clam summittente qui sacris illam impertiret, donec plusculum nacta libertatis, fidem Catholicam ante mortem publice est professā. Hæc dum fiebant, homo hæreticus instigante vt fas est credere inferno hoste, cui iacturæ suæ dolerent vehementer, Cotoni domum ingressus insolentius quiddam atque impudentius dixit ac fecit. Quod vt peruenit ad Senatum, quidquid contra niteretur Cotonus acriter est vindicatum. Innio & Pro-Rex adhuc Hæreticus, Ministrum Caluinianum coram se Cotonō obloqui ausum, tam belle verbis excepit vt ridendum

contemnendumque propinaret. Denique tantus fuit omnium erga illum amor, ut Massiliam inde deinceps abeunti effusa duobus locis ciuitas dolorem suum lacrymis omnique animi significatione sit testata. Sed in hoc Massiliensi itinere res illi contigit non solum Angelicæ custodiæ, diuinique erga eum amoris, sed etiam sanctitatis ipsius argumentis illustrissima. Cùm enim Rodano rapidissimo ac periculosissimo Galliarum flumine nauigaret, vi ventorum an nautarum imperitia socordia-ue nescio, impacta est tam vehementer lapideæ pontis flumini impositi pilæ nauigij quo vehebatur puppis, ut prora, in qua Cotonus ad periculi sensum genua precaturus posuerat, ad oppositam pilam percussa, nauigium à prora ad puppim sub precantis genibus duas in partes funderetur. Confidentius ergò diuino flagitato subsidio nautas monuit, ut nauigium littori aduerterent, quo cum esset peruentum, omnesque exscendissent, partes nauigij sponte sua in diuersa diductæ, manifesto omnes docuere non alia quàm precum Cotonis virtute eatenus coherendo salutem se illorum seruissè.

CAPVT XV.

ANNO CHRISTI

1602.

ÆTATIS COTONI

39.

*Massilia Damonis deprehendit fallacias & mores
ad pietatem informat.*

DEhinc Massiliam Catholicam ciuitatem in annum sexcentesium secundum sæculi, suæque ætatis tricesimum nonum, adiens, respirare sibi est visus.

visus. Liber enim molestis atque inuerecundis Hæreticorum iurgiis, incredibile est quantum pietatis sensibus in se atque aliis suscitandis inuigilarit, quantasque virtutum progressiones in illa ciuitate tranquilli iucundique laboris sui fructus breui conspexerit. Scripsit ipse ad Fratrem hoc tempore in hæc verba. Duos iam menses Massiliæ maritima vrbe egi, vbi animorum piscatus tanto est vberior melle vrbium mediterrænearum, quanto aquatiles animantes terrenis sunt numerosiores. Memini vero audire me eum dicentem, nunquam se aut in alia ciuitate plus erga se, aut in se plus erga aliam tenerrimæ purissimæque charitatis persensisse. Vna tantum in re sibi ægre tunc factum memorabat, quod cum Sacerdos quidam esset in ea Ecclesia vbi ipse conciones habebat, tanta vulgò scientiæ sapientiæque laude, vt matronarum in conscientiæ difficultatibus enodandis commune quoddam oraculum censeretur; nulla ope consequi potuerit, vt vel cum eo congredi ad præbendas sibi mutuò operas in commune animorum bonum, vel cum iis matronis quas ille moderabatur, aliqua verba commutare posset. Enimverò frustratis sæpe iis quos amicitia inter se & illum conciliatores adhibuerat, cum egregiam eius rei conficiendæ occasionem oblatam existimaret, quod ab Ecclesiæ illius præsidibus eius Sacerdotis cubiculum sibi esset ad interquiescendum à concione, attributum, fecit obstinatio eius in Cotonii congressu defugiendo, vt irritus esset consilij, pedem quippe in cubiculum nunquam intulit, nisi, postquam ipse extulisset. Demiratus hominis ingenium alia iam omnia cogitabat, cum semel atque iterum obiectus est illi homo nec opinanti tam tetra & monstruoso vultu, vt inferno spectro similior quàm homini

mini videretur. Pressit rem Cotonus tunc silentio, & amicitiam eius optare desiit, mirantibus non parum his qui prioris animi eius fuerant conscij, nec ipso vbi Maifilia excessit abnuente metuere se plurimum eius sorti. Sed omnia tempus aperuit. Paucis enim post annis, Dæmone ipso per Energumena puellæ os nomen deferente, reus is Sacerdos est apud Iudices factus, confessusque se Virgnum matronarumque animis, impurum sui inter Sacramentum pœnitentiæ amorem magicis afflatibus inspirasse, eaque arte vitium multis attulisse, sententia Iudicum vindicibus flammis viuis est addictus. Cæterum cum tota vita immensum fuerit Cotono studium, Augustissimo Sacramento tam venerationem & vsum apud Catholicos, quam fidem apud Hæreticos conciliandi, vt ex iis quæ iam perscripsimus agnoscitur, tum ea in re egregie anno isto laborauit. Rarus erat aut insolens sacri epuli vsus ad Christi natalia, sed ille paucis concionibus ea causa institutis consecutus est, vt triginta hominum millia eo tunc participarent; quod, inito accurate numero, à Parochis Episcopo fuit renunciatum. Damnati ad triremes viri octingentis plures, præpostera nescio qua Religione non solum in vita, sed etiam in discessu ab ea, Eucharistiæ & Vnctionis extremæ vsu indigni censebantur. Cotonus non illud tantum nunc obtinuit, vana illa Religione discussa, vt morientibus Sacramenta illa ne essent interdicta; sed etiam posteaquam in Aulam venit apud Generalem Triremium præfectura egit vt quibusdam anni temporibus, sanis liceret Eucharistiæ participare. Hæc ille apud Catholicos in Sacramenti honorem tunc promouit, sed apud Hæreticos quæ nunc dicam, Pomeridianas festi cuiusque diei horas, discutiendis hæreticorum

hæreticorum circa Eucharistiam controuerſiis dabat, quo labore effecit; vt ex hæreticis pauciſſimis qui in illa erant vrbe, ſex apud ipſum errorem depoſuerint. Priuatam cum hæretico nobili diſputationem in domo primaria iniiit, de re eadem, & conuiſtum ad Eccleſiam traduxit. Creditum eſt, non argumentis magis quàm incenſis ad Deum precibus ſolitum illum res iſtiusmodi conficere; fuitque obſeruatum viſa quadam inſignia non rarò oblata fuiſſe diuinitus iis quos ille ad fidem Sacramenti Euchariftici pellexiſſet, quæ vt præcum illius effecta poterant videri, ita maxime erant apud eos quibus obtigerant fidei firmamenta. Inſigne eius rei exemplum editum dom Auenione concionaretur ſupra memorauimus. Accipe nunc huius temporis aliud. Mulier annis plurimum nec multò minus infidelitate prouecta, cum ex eius concionibus errorem dedocta, veritatem Euchariftici Sacramenti agnouiſſet, moxque Eccleſiæ conciliata ſacris intercelleret myſteriis Chriſti Domini humanam ſpeciem inter Sacerdotis manus conſpexit. Quo ſpectaculo mirificè confirmata cum poſt dies aliquot eiſdem myſteriis participatura aſſet ac nonnihil eo moueretur quòd vnius tantum ſpeciei Sacramentalis compos futura eſſet, vidit in Sacerdotis manibus diſtinctiſſime hoſtiam ſanguine fluentem, vt non ambigeret ſanguinem illic non deſſe vbi corpus ante conſpexerat. Reieci in hunc locum, quò ſimilia iungerem, præcumque eius hoc in genere efficacitatem docerem, aliud quidpiam non diſſimile, altero ante hunc annò conſpectum. Inſtituebat, vt dixi, Nemaufi deſenſionem Euchariftici Sacrificij Cotonus, Epilcopo nonnihil refragante, quòd plus æquo ſibi metueret à Calviniano populo rerum in vrbe potente, quita-

men

men verbis eius tandem delinitus consilio suscepto fuit. Id quam fuisset Deo cordi, insigniter est Episcopo demonstratum. Nam extrema die annuæ celebritatis diuini Sacramenti, vbi thecam quæ Sacramentum conspiciendum exhibebat benedicturus populo in manus accepit, euidenti specie diuinissimum IESU Christi vultum maiestatis ac decoris plenum, oculosq; ad gratulationem componentem, eo in spatio quod compleuerat hostia intuitus, & intima tunc animi suauitate delibutus fuit, & multum Cotoni instituto Dei gloriæ conferri sibi persuasit, & omnes abs se terrores diuini certus subsidij propulsauit. Sed vt Massiliam reuertamur. Tendebat in exitum annus iste, cum Archiepiscopus Aquis-Septem in huius anni Aduentum ac proximi Quadragesimam concionatorem attribuit. Quibus temporibus quia morem suum ac institutum iuuandi homines tenuit, nec quidquam de gestis tunc de eo rebus ad nos peruenit, earum quas in aula statim suscepit magnitudine, istas vt opinor de hominum memoria tunc extrudente, parcendum censeo stylo. Ac cum de Cotonis antequam Aulam adiret hæc potissimum visa sint digna memoratu, & si quæ forte aut hic exciderint, aut anno non satis nobis comperto euenerint, ea tertius liber sit representaturus; illud tantum nunc instat, vt gesta eius ab Aulæ aditu ad exitum ex ea, altero libro qua decet cura & fide, aspirante Deo enarremus.



LIBER SECVNDVS
DE VITA PATRIS
PETRI COTONI
è Societate Iesv.

CAPVT PRIMVM.

ANNO CHRISTI
1603.

ÆTATIS COTONI
40.

*Qua Ratione in Aulam Henrici IV. Francia
ac Navarra Regis fuerit accersitus.*



ON humano magis quam diuino accitu
aditum Cotonò patefactum in Henrici
Magni Aulam, cum alia omnia cogitans
Aquis-Sextiis conciones haberet; multis
ex signis coniectura fieri potest. Interces-
sit enim non solum iam olim ea quam priore libro
dixi Mediolanensis Virginis prænunciatio; sed etiam
triennio & eo amplius ante hunc ætatis ipsius annum
quadragesimum multiplex eius rei vel in animis qui-
busdam Deo charis, vel in ipsa Cotonì mente præ-
sensio. Valentina mulier diuinis illustrationibus inde
ab ætate tenerrima assueta, cum eum haberet trien-
nio antè cōscientiæ arbitrum, inter feruentissimas
K preces

preces Dei verbis renunciare illi est iussa, futurum in Aulam eius aduentum Regiæque conscientia moderari. Pater Antonius Millæus, qui Lugdunensi Societatis Collegio nunc præest, annis aliquot ante id tempus audisse se ex Cotonii ore testatur, cum assue-ranter diceret diuini consilij esse vt restituendæ in Gallia Societati à Rege adhiberetur. Atque ego planè memini non solum me idipsum per ea tempora in-audisse, sed etiam vulgò in Nostrorum ore fuisse id ab eo multis frequenter significatum. Ac licet non sa-tis clara esse diuinæ voluntatis indicia in tam certis prænotionibus cuipiam fortè videretur; tamen huma-na ipsa accersitus illius ratio cuius mihi nunc series est pertexenda satis edoceret eum absque singulari di-uinæ bonitatis prouisione non contigisse. Etenim exeunte anni sexcentissimi tertij quadragenario ieiunio cum Rex sempiterna memoria dignus Henricus IV. Mediomatrices vt Rem constitueret publicam co-gitaret, eoque Varennaum gratiosissimum tunc au-licum præmisisset, venit ille ex itinere Mussipontum, vbi Lotharingici Principes celebrem nostrorum Aca-demiam constituerunt; sapiusque egit cum nostris, quos amabat non mediocriter; vt ex itineris quod tunc à Rege suscipiebatur occasione auderent ad eum adire, exiliique iam nouennis calamitatem in-posterum deprecari. Quod posteaquam Laurentio Magio est renunciatum, qui eius potissimum rei cau-sa à Præposito Generali Claudio Aquauia missus erat biennio fere antea in Galliam Societatis Visita-tor, tametsi delusa iam crebrò restitutionis nostræ expectatione nihil magnopere sibi auderet polliceri, ne qua tamen parte suo deesset muneri Ignatium Ar-mandum, quem superiore anno prouinciæ nostræ Fran-ciaë

ciæ præposuerat, vt dispiceret quid facto opus esset, è
 Comitatu Burgundico, vbi tunc erat, Mulsipontum
 mittit. Interea iter habuerat Rex Viroduno primæ Bel-
 gicæ ciuitate, vbi ex Gallico Societatis naufragio su-
 pererat tabula non exilis, Collegium Sociis pro tem-
 pore satis numerosum, quod ipsum crebros Sena-
 tusconsultorum Parisiensium tempestates, quæ Fran-
 corum liberos ad Collegia nostra appellere prohibe-
 bant, iamdiu grauitè quatiebant. Qua rerum neces-
 situdine pressus, qui Collegio præerat Carolus à Turri,
 de eius quem dixi Varennæi consilio ad Regem sup-
 plicatum iit, vellet ac iuberet vt interdictis Sena-
 natus Parisiensis Virodunense Collegium ne compre-
 henderetur. Annuir Rex precibus humanissime, ver-
 bisque admodum beneuolis spem dedit plura se ac
 maiora nostra causa velle. Hac spe excitatus, vbi ad-
 uenit Ignatius, Regem apud Mediomatrices cum
 aliquot sociis adit. Ibi Varennæus monitum vt cum
 Villa-regio qui Regi erat à secretis postulata sua com-
 municaret, ad cæteros Regni administratos primarios
 salutatum ire iubet. Postera die, quæ sanctioris heb-
 domadæ feria erat quinta, interpellatus rursus ab eo
 Varennæus, Regis verbis imperat vt in Episcopij aula
 lauanti pedes regio more duodenis mendicarum mu-
 lierum liberis, eosque pie deoseulanti præsto essent,
 posteaque pomeridiano tempore vt liberius ad Regem
 dicerent, in secretissimum eius cubiculum condixit.
 Quo cum illos post horas aliquot Villa-regius admisisset,
 prouolutos in genua Rex stare iussit; orsusque
 Ignatius dicere, postquam diserta oratione impactas
 Societati calumnias depulit, infelicem casum qui nos
 ab eius conspectu, carissimæque patriæ complexu ab-
 stulerat deplorare institit. Clementiam, qua alienatos

abs se plurimum animos ad officium , principisque legitimi charitatem reduxisset , per effusum à Christo sanguinem , cuius tunc colebatur memoria , demisse implorare. Reddi nos penatibus pristinis , si minus nostris , illius certe meritis , regiæque bonitatis respectu flagitare. Exciuit hæc oratio copiosas lacrymas Varennao , ac prope Illustrissimo Duci Espernonio qui fofte aderat. Rex ipse colliquefacto non nihil animo , opinionem odij in nos sui amolitus, nihil vehementius optare se dixit , quam subditorum omnium tranquillitatem & commoda ; multa Parisiis euenisse quæ facta nollet. Tum singulorum qui aderant natali solo quæfuit , & pauca de præteritis calamitatibus interfatus , sciscitatur ab Ignatio num optimos concionatores haberemus ? & num inter illos egregius esset Cotonus ? respondenti maximè illum hac ex causa nec immeritò fieri à multis , Regiisque obsequiis addictissimum esse, assensus est Rex beneuole ; conuersaque ad astantes oratione ; Est ita (inquit) vt dixit : Nam Desdiguieres quamuis maxime Hæreticus eum magni facit , mihi que magnopere dilaudauit. Sane cui hic mirabiles non appareant diuinæ prouidentiae artes, quæ non alia quàm Hæretici hominis ac per diu insignis Hæreticorum patroni commendatione , Cotonum infestissimum hæresis hostem eo prouexit, vbi hæresi afferret perniciem ; is omnino nec mirari quidquam , nec perspicere posse videatur. Cæterum iussos sub hæc nostros Paschalia festa in aula transigere varij exceperet casus. Aulici enim tam benigno Regis potitos colloquio immodica gratulatione ; hostes nominis Societatis , artificiosis cum primis calumniis sunt prosequuti. Eadē quippe die Viridunensis quidā vir, quod pudor est dicere, Ecclesiasticus, nomen nostrum ad Regem

gem detulit, quasi ciuitatem pro ea qua apud Episcopū
eramus auctoritate à Regiis obsequiis abalienaremus;
sed breui concidit insulta calumnia, nulla verisimili-
tudine sustentata. Rex nihilo secius illustria erga no-
stros beneuolentiæ argumenta pergebat prodere, cum
biduo post adfuit homo hæreticus, qui diceret Regi,
Hispanici maris Præfectum Burdegala iter habentem,
effuso ad eum domi salutandum Societatis toto Col-
legio honore exceptum immodico. Postridie Resur-
rectionis Dominicæ Rex nostros iterum in secretissi-
mum cubiculum cum admisisset, monuit magna vt
cautione loquerentur & agerent, narratisque, iis
quæ de excepto Hispanici maris præfecto audierat,
nonnihil de quibusdam nostrum queri est visus. Sed
cum Ignatius indicij falsitatem coargueret, quod
moris nostri nunquam fuerit, totum simul Collegium
ad vllum vel maximum Principem domum ire salu-
tatum, sponderetque se per literas breui quidquid id
esset comperturum: Rex defensionem admisit; sci-
tumque postea, venisse quidem ad nos Præfectum il-
lum sacrorum causa, sed nostrum neminem ad il-
lum domi salutandum iuisse. Dehinc cum restitutio-
nis nostræ negotium Parisios Rex reuocasset, quod di-
ceret esse consentaneum vt Pontificis responsa expe-
ctarentur, quandoquidem ille huic negotio interue-
nisset: Quæsiuit Ignatius iuberetne vt Galliæ Pro-
uinciis Præpositi omnes Parisios venirent, mandata
eius exciperent, & de omnium sociorum fide atque
obsequio sponsores essent? Rex, nihil inquit est opus,
tu tantum veni & Cotonum adducito, diplomata
tutelæ vestræ causa, curanda Varennao dedi, simulque
singulos amantissime complexus dimisit. Ignatius Mus-
sipontum, atque inde Nanceium Lotaringiæ regres-
sus

sus, Magio per literas de iis quæ acta erant admonito Cotonum qui Auenione Prouinciæ comitiis intererat, ad se mitti rogat. Nec ille distulit profectio- nem, sed Mussipontum breui ad Ignatium, atque inde per Parisios ad Regem, qui Fontem Eblaudi petierat, ipso augustissimi Sacramenti festo die, qui in vicesimum nonum Maij inciderat gratissimo sibi dici- omine exhilaratus peruenit.

CAPVT II.

ANNO CHRISTI

1603.

ÆTATIS COTONI

40.

*Gratia apud Regem, primique labores Cotoni in
Aula ante restitutam Societatem.*

DVm iter Parisios versus vt dixi dirigeret, magno-
pere animi pendens quem exitum habitura es-
set ea profectio inter tam potentia ac professa multo-
rum in Societatem odia, nec quidquam humanæ
opis nisi in Regis beneuolo animo esse aduerteret.
Valentiæ Segalaunorum matrona pietatis iampridem
Cotono expertæ atque perspectæ, iussam se a Deo
asseuerauit illi renunciare: Iret intrepide quo voca-
batur, nec dubitaret quin Regis cor esset habiturus.
Quæ verba quandiu Rex vixit de eius erga se bene-
uolentia interpretatus, postquam mortuus est de cor-
poreo etiam corde posse accipi animaduertit, quod ex
illius viuentis voluntate ipsi aliisque è Societate tra-
ditum est, vt in Flexiensi nostra Ecclesia amoris in-
comparabile pignus conderetur. Cæterum quàm di-
uina certaue fuerit prædictio, res ipsa statim demon-
strauit.

stravit. Nam cum Regi sacris adstanti mysteriis primum interuenisset Ignatius cum Cotonò, procul conspectos Rex comitor salutauit, demonstratumque ab Ignatio Cotonum arctissimè complexus, paratum esse iussit in proximam diem Dominicam ad concionem coram se habendam. Versus deinde ad strumosos salutari contactu pro cœlesti Regum Franciæ privilegio procurandos, Ignatium re peracta & Cotonum ad se priuatim in tectam ambulatiunculam aduocauit, mediisque inter ambos horam bene longam inambulans incredibilia beneuolentiæ ac familiaritatis vtrique argumenta præbuit. Sed vide quàm nusquam maleuoli Dæmonis cesset inuidia. Aggreditur ad extremum Rex narrare, venisse ad se ea die cum ad sacra iret mysteria virum nescio quem tanquam de via paludatum & ocreatum, qui secretò significarit adesse se festinanter ex Flandria, vbi ante aliquot dies Iesuitæ nescio cui colloquens audierit Regem ea quæ tunc agebatur Sacramenti festa die strumosos contacturum, sed vnum tunc inter eos adfuturum qui mala ipsum manu contingeret. Addidit Rex, gratias se illi egisse, dixisseque in Dei se tutela ac præsidio constitutum. Hic Ignatius, Nunquam, inquit, fiet Rex maxime vt nouis nos beneuolentiæ signis gratia tua complectatur, quin nouæ illicò suboriantur calumniæ. Meministi sanè cum apud Mediomatrices clementissimis nos oculis respexisti, statim adfuisse qui nostris de Hispanici maris Præfecto calumniatn cuderet; hæc quoque vt arbitror ob nostrum nunc ad te aduentum eadem statim nota percussa fuit. Quid verò, inquit Rex, fuit ne illud de Præfecto falsum? Fuit omnino, inquit Ignatius. Nam cum sponte ille ad nos venisset, inurbanitatis nomen nostri non veriti

veriti, resalutatum non iere. Gratulor sanè, inquit, atque ego quoque hodiernum nebulonem magni non feci. Quis verò finis erit, inquit Ignatius, si cuius quidlibet calumniari impune licebit? Obtestor Rex æquitatem tuam, ut de crimine quæstio habeatur, sciaturque quis illi nostrum, qua in vrbe, quo tempore hæc sit eloquutus, ne vel nostro impune sit si quid peccauit, vel isti si quid est calumniatus. Fiet omninò, inquit Rex, hominemque diligenter perquiri postea iussit; sed ille ita euaserat ut nullum sui vestigium reliquerit. Sensit hinc aperte Rex optimus criminationis calumniam, ac si quid postea tentatum id genus, quod toto biennio frequentissimum fuit, id ille vel indignatione fere oppressit si erat publicum, vel silentio & contemptu pressit si erat occultum. Iam cum ab iis qui Regem audierant Cotonio in Dominicam sequentem concionem indixisse, non tantum in aula, sed etiam Parisiis res esset euulgata, auctor mihi est Andreas Duvallius Doctor Sorbonicus vir probitatis atque eruditionis notissimæ, virum aliquem è nominatissimis Academiæ Magistris, qui animo erat ergà Societatem non admodum æquo, Fontem Eblaudi ea cum primis mente profectum, ut concionem illam audiret, scriptoque exciperet. Censuram quandam meditari ac minitari hominem, nemo, qui id tunc scisset, ambigeret. Regem eo quod intercessit triduo longe alia pungebat cura, ne Cotonius quem chariorem habebat quotidie, conceptæ expectationi vulgataque de se famæ non satis in illo Aula splendore insolito respondere posset. Tamen ubi Dominica ad fuit dies & Cotonius post meridiem auditus, tantopere superata est Regis aulicorumque omnium expectatio, ut cæteris admiratione defixis,

Rex

Rex incredibili exultans lætitia , quandiu Vespertinæ deificæ decantabantur preces, nunc vnum nunc alium è Principibus aut Optimatibus rogare non cessaret ; num præclare dixisse visus esset , cunctisque prolixè assentientibus, Cotonum ad se accersitum ita alloqueretur : Fecisti hodie quod nemo vnus antea : cum enim Aula gustus sit perquam multiplicis , tu tamen apposuisti quod omnibus saperet. At noster ille Parisinus Magister cæteris haud paulo commotior, prope absuit quin illud de Euangelio diceret: Numquam sic loquutus est homo. Certe reuersus ad suos profiteri non dubitauit Cotonum è concionatoribus quos audisset maximum , eruditissimum ac modestissimum sibi videri, concionemque à se scripto exceptam aliis imitandam atque ad vsum suum excerpendam dedit. Hinc iam noui erga nostros Aulæ totius animi atque oculi. Rosnius qui plus omnibus apud Regem poterat , eadem die ad Vesperam , Episcopi & Optimates continentibus diebus certatim eos conuiuas expetierunt. Quarta post die, quæ Octaua erat celebritatis Eucharistiæ , auditus iterum Cotonus , non alios tantum , sed se etiam ipsum superasse toti Aulæ est visus. Nec mediocriter postea se in illum regius effudit amor. Sæpe illi bis ter-ve in die loquutus, nonnunquam etiam inter regionum hortorum ambulationes reperiunt, manuque arctissime prehensum plures horas in totius Aulæ fronte familiarissime colloquens circumduxit. Parisios inde repetens , ac breui in oppidum Sancti Germani diuertens, mandauit nostris vt in Aula assidui essent ; trecentosque illis aureos ne expensis grauarentur attribuit. Tertia hic Cotoni concio audita maiore quam vnquam approbatione ; nec dubitauit Rex asserere , si per Regni negotia liceret , vnam

se quotidie horam illi audiendo daturum. Quin etiam aduocatatum semel ad se Ebroicensem Episcopum, qui postea fuit Cardinalis Perronius, disserere de proposita nescio qua materia cum Cotonno horam & dimidiam, amboque interea capite esse coram se operto, imperauit. Verum nonnihil frigida, huic prosperiorum successum auitui, ne quid noceret affundi oportebat. Id diuina prouidentia fieri passa est per libellum contra nos maledicentissimum, qui Parisiis hoc tempore atque in Aula est euulgatus. At Rex, quem nihil latere poterat, cum id rescisset; nosque nihil queri animaduerneret, ut de calumniis in nos iactatis animum suum celeberrimo loco aperiret, accersiri ad se Francia Cancellarium, in maximo Principum atque Optimatum cetera voluit, coramque omnibus cum exposuisset quantum sibi ex scriptiones displicerent, in mandatis dedit ut de libelli illius autore questio seuerissima institueretur, typographisque Parisiensibus mandaretur, ne quid tale, si sciri esse vellent, typis vulgarent, conuersusque ad nostros quos adesse voluerat: Vobis vero, inquit, ista nihil nocent, nec vestra digna sunt responsione. Fecit Cancellarius Parisiis quo Rex breui adiit, quod iussus erat diligenter, & Rex non diu illic moratus Monticellos abiit. Cœpit Cotonus ab hoc loco, Rege id imperante, Dominicis omnibus ac festis diebus concionari, efflorescente quotidie magis, latiusque peruadente eloquentiæ illius existimatione. Nec tamen deerant qui in tam diuturnis restituendæ Societatis moris, simulate multa fieri suspicarentur; sed Rex omnibus locis animi sui sinceritatem prodere non cessabat. Venit ad eum hoc tempore Matrona e regni primariis vna, quam Rex ut vidit, num Patrem Cotonum audisset concionan-

tem

tem interrogare institit. Illa vulgaribus mora suspitionibus, etli à nobis non erat aliena, tamen aulica dissimulatione, non ad verba sed ad eum quem suspicabatur Regis animum, respondit: Nihil sibi esse cum hoc hominum genere commercij. Agebam, inquit Rex, antequam illos penitus nossem ut tu nunc agis; posteaquam in mores animumque eorum penetraui, longe alia sum sententia. Nosce tantum illos, & magni absque dubio facies. Nouam mox calumniam ab hæreticis contra Societatem, iactatam de conspiratione Anglicana quam Iesuitæ vestitum dissimulanti tribuere nirebantur, ut restitutionis nostræ consilia aut disicerent aut pergerent retardare, Rosinius Calvinianus, ex Anglicana legatione tunc reuertens, nostris probe purgatis disiecit. Transitum interea erat in oppidum Villiericosteretz, ubi Carthusianorum monasterium Rex inuisens, præclaros de Societatis nostræ instituto, quod à Cotonò doceri se quotidie impense volebat, sermones habuit. Contigit autem ut adstantes amicos forte interrogaret quid inter Societatis homines aliosque Religiosos interesset, censerent? cui nobilis atque ingeniosus iuuenis cum dixisset, Cæteros Religiosos fere animum per corpus, Iesuitas per animum corpus domare, egregiam à Rege laudem retulit, quasi nostrum probe perspexisset institutum. Optauit interim Regina, celeberrimam Sacratissimæ Virginis cui Lætitia est appellatio, ad eam haud procul sitam visere, nec satis felices peregrinationis suæ euentus credidit nisi Cottonum à Rege piarum illic actionum moderatorem obtineret, obtinuit, cum, ut Rex tunc narrabat, pro maxima se id gratia habituram affirmasset. Inde

redeuntes Parisij exceperunt , vbi statim Cotoni expetita opera , vt monasterio Montis martyrum , cuius in ædícula Societatis nostræ iacta olim erant fundamenta , restituta recens disciplina eiûs monitis & cohortationibus sanciretur. Hoc rerum cursu tam prospero , & Hæretici timore nostræ restitutionis angebantur ; & suspectæ fidei ac probitatis Catholici inuidia tabescebant. Hinc manauit tenebrosus iterum in nos libellus ; sed Cancellarius mandatorum Regis prope memor , librarios tres in carcerem compegit , infelicitque ingenij sortum suis iterum tenebris damnavit. Quarta hæc præditur in commentariis Ignatiij , & literis Cotoni ad fratrem , infra Iunium ac Iulium mensem suscitata in nos calumnia ; sed quæ vt opinor in publicum eruperit. Nam occultatiores alias quinque Regis auribus instillatas intelligitur ex Cotoni quas vidi literis , secundo Augusti datis ad Fratrem , vbi à suo in Aulam accessu ad illam vsque diem no- uem in nos calumnias conflatas asseuerat.

CAPVT III.

ANNO CHRISTI
1603.

ÆTATIS COTONI
40.

*Restitutio Societatis IESV in Regno Francia
edicto sancitur.*

I Neunte Augusto mense cum Sancti Germani op-
pidum venandi ac rusticandi causa Rex cogitaret ,
commodum sibi esse censuit cum secessum , vt resti-
tutionis nostræ negotium conficeret , Ignatioque &
Cotono venire illò iussis recepit inde se nisi perfecto
negotio

negotio non discessurum. Venerunt eodem tempore ad eum literæ Pontificiæ, quibus Clemens VIII. prolixè illi gratulatus humanitatem qua nostros apud Mediomatrices, ac deinceps alibi erat prosequutus, significabat se, ne quid morarum negotio restitutionis nostræ intercederet, omnem quæ opus esset ea in re potestatem transigendi cum ipso attribuisse Apostolico Nuncio in Regno eius versanti, duobusque nostris Patribus quos apud se Rex haberet. Ergo ad decimam diem Augusti quæ Sancto Laurentio est sacra, in regio Consistorio capta fuere de nostra Restitutione consilia, regioque postea iussu nostri admoniti ut ad Messæum Consistorij consiliariū audiendæ voluntatis regiæ causa adirunt. Hic illis renūciatum, duorum tantum hoc tempore Collegiorum restitutionem decretam Diuionensis & Lugdunensis, vnius autem Flexiensis institutionem: cætera priuatæ suæ prouidentię Regem reservasse: simul datæ illis scripto conditiones nonnullæ, sub quibus ratam esse Rex vellet restitutionem nostram. Missæ antea fuerant eæ conditiones iussu Regis ad Pontificem, atque ab eo Generali Societatis Præposito traditæ, multis obseptæ difficultatibus deprehendebantur. Itaque orarunt nostri sibi ut liceret nonnullas Regi moderationes suggerere, quæ & Societatis institutum sartum nobis ac tectum conseruarent, & Regiis rationibus nihil officerent. Cum responsum esset, licere, Ignatius, Cotonus, & qui forte interuenerat Crittonus, rem de communi consilio diligenter perpendere, preces Regi, quæ moderationes quas dixi continerent, scripto mox oblata. Post hæc intrâ octodiualem Assumptæ in cælos Virginis celebritatem, placuit Regi hunc in modum Ediçti sui conditiones

tempe

temperare. In primis quod propositum erat ut nostri quotannis apud Magistratum fidelitatis sacramento se Regi obligarent; id redactum eò voluit ut semel in hoc nostro regressu præstaretur. Deinde quod dicebatur, nostros Episcopis subditos eorumque visitationi obnoxios fore; Rex qui postea intellexisset quantum ea res instituto Religioso inferre posset detrimenti, ita moderatus est; ut pars illa de Visitatione funditus deleteretur, subiectio autem ea retineretur quæ inter Religiosos cæteros more antiquo usurpata nihil eorum obesset privilegiis. Præterea quod statuendum videbatur, ut qui simplicia vota in Societate emisissent, si perinde ac Professii hæreditates suorum adire prohiberentur; Rex huic conditioni additum voluit; si qui tamen à Societate post illa vota dimitterentur, iis in iura hæreditaria omnia redire potestas esset. Ad hæc quod addebatur, Societati interdictum fore quidquam absque Regis facultate de nouo acquirere eorum maxime quæ ad eos pertinuissent qui Societatem ingrederentur; id Rex de bonis tantum immobilibus intelligendum sanxit. Denique quod erat prætermissum, adiectum fuit, ut omnium quæ Societas ante possedisset, illi optimo iure possessio redintegraretur. Hæc tunc Regi placuere; cumque per eos dies in secreto cubiculo sibi adesse nostros admodum familiariter voluisset, inter sermones de hac nostra restitutione, ausus est Ignatius ab eo postulare ut Bituricense Collegium iis adiiceret quæ restituebantur. Et Rex suavissime os prope ad aurem adinuens. *Facite, inquit, primum quod ego cupio, nam quod cupieritis ego postea faciam.* Ita discessum ex oppido sancti Germani Rothomagum versus, quo in itinere cum Marchio Rosnins in oppidum, à quo est ipsi nomen, Regem inuitasset

inuitasset , tanta repente aquarum elunio domum
quæ Regē , Reginam , ac Sororē Regis exceperat inū-
dauit , vt testā deferere mediūque in agris diu agere
omnes cogerentur. Cotonum eo in periculo crebrò
Rex postulauit ; sed ille loci exclusus angustiis in op-
pidum non procul situm demigrarat. Postera die , vt
mihi Duvallius retidit , ad fuere coram Rege Coto-
nus & quispiam alius vir scientiæ nomine celebris , &
Cotonus de hesternæ eluionis causis tam disertam
disputationem instituit , vt suam in Meteorologia
peritiā doctis qui aderant viris præberet suspicien-
dam. Pupugere laudes approbationesque adstantium
eum quem dixi virum , qui nonnulla in Cotoni dis-
putatione carpere exorsus , verba adhibuit acerbita-
te atque offensione plena. Sed Cotoni tanta fuit in
respondendo modestia atque humilitas vt dubium ad-
stantibus relinqueret virtutem prius an scientiam mi-
rarentur. Sane quem ille inter aulae plausus retineret
animi sensum perspicui potest ex literis quas ad fra-
trem quem in mentis suæ arcana omnia admittebat
hoc mense Augusto dedit. Non possum , inquit , ti-
bi verbis satis aperire quam me rebus hisce humanis
ac vilitatibus parum sentiam illigatum , tam enim ma-
nifeste earum mihi conspicua est inanitas , vt nihil in-
ter istos honores ac fauores quos maximi Regis bene-
uolentia mihi conciliat , patienter agere persuadeat
nisi quod id Deo placitum esse animaduerto. Addit
post pauca. Ea inter ceteras conditione restitui ve-
mus , vt è nostris vnus concionandi & Regi pro tota
Societate satisfaciendi causa assiduus in Aula versetur ,
vereor ne me hæc conditio diutius hic detineat quàm
vellem , sed multò maxima mihi verendi est causa quod
mihi Rex dixerit , Velle se per confessionem peccata
apud

apud me ab eo qui primus occurret celebriore festo die deponere. Ego nisi aliud Deus interea suggerat constitui illum obtestari ut eam ad rem alium quendam è nostris aduocet: quod mihi conducere Societati videatur, ut plures nostrorum hominum degustet: Quanquam diuinæ prouidentiae me deesse quacumque in re usus fuerit nulla ratione sum passurus. Interea Rothomagus Rex attigit incunte Septembri, & quarta eius mensis die Edictales eius literæ de Restitutione nostra, priuatæque ad Regni Senatus singulos à Cancellario datæ sunt in manus Ignatio, nec multò postea cum ad Regem adisset facultatem impetraturus discedendi ab Aula ut muneri suo Regendæ Societatis Prouinciæ præsto esset, mandataque illius de Collegiorum nostrorum restitutione accuraret, dixit se in eius potestate Cottonum relinquere, ut eius opera vteretur pro arbitrio. Fecisse enim incomparabilem eius clementiam ac bonitatem ut non tantum vnus sed totius etiam Societatis obsequia ad omnem Maiestatis eius nutum perpetuo deuotissima esse tenerentur. Rex in animo sibi esse dixit Societatis operam ad res maximas diuinæque gloriæ plenissimas adhibere, tamque multa addidit tenerrimi amoris indicia ut Ignatio lacrymas prouocarit. Creuit posthac in dies eius in Cottonum amor, cumque concionum non esset antehac cupidissimus, Cottono nunc instabat assiduus, ut tempus idoneum sine concione nullum abire pateretur, integraque ac noua audiendi siti semper ad illum accedebat. Quid? quod illud quoque tunc instituit ut sibi ad mentiam perpetuus ille adesset, doctisque ac piis dissertationibus nunc cum Ebroidensi Episcopo Perronio, nunc cum Boiatensi Bertrando des Chaux, nunc cum Archiatro suo Andrea

drea Laurentio cibos sibi faceret suauiores , quod deferendi institutum etsi non fuit postea perpetuum tamen Cotonum sua Rex abesse mensa nunquam est passus.

C A P V T IV.

ANNO CHRISTI
1603.

ÆTATIS COTONI
40.

*Plurimas Cotonus post. Ediētum difficultates Dei
ac Regis gratia superat.*

NEmini durior atque iniucundior accidit Ediēti quo Gallicis reddebamur ciuitatibus nuncius, quàm Caluinianis : ij proinde extrema quasi desperatione in transuersum acti , Cotonum quem vnum restitutionis nostræ architectum iactabant , atrox atque auditu horrendum periculum scriptis artificiosissime literis concitarunt. Id verò sic habuit. Rothomago Rex ad Portum Gratiae quæ vrbs est in Normannico litore, sexta opinor Septembris die contēdebat, cum ei à Caluinianis Prouinciæ Narbonensis primæ Ministris literæ in via redditæ , quæ Cotonum eo antea a Rege iussum experimento insigni docuere & nihil adeò fragile ac vitreum esse quam fauorem humanum, qui tunc maxime frangi possit cum splendet maxime , & nihil structa artificiosè calumnia ad fidem faciendam propensius. Etenim cum Regnum ante aliquot annos ciuilibus dissidiis in diuersa trahe-retur , quidam consecratione sola Episcopus , cuius esset in Oriente Ecclesia , immoderato partium studio grauem in se Regis offensionem commouerat, noxam-

M que

que veritus solum exilij causa volens verterat, pluresque iam annos apud Allobroges Geneuensibus vicinos exul degebat. Hunc hominem asserebant eæ quas dixi literæ Narbonenses, auditum sæpe inter Allobroges Cotoni fidem appellantem, deque illa quiritantem assidue, quod quæ religiosissimè se facturum præsens sibi sponderat, ea, fidei ac religionis immemor tam lente efficeret. Quin etiam dixisse illum aliquoties, nonnullam in animo suo residere spem, perfecturum eum quæ iuratus promiserat circa hæc mensis Septembris tempora; ni faceret, primum se fore qui Regi nomen eius deferret, ne hominem apud se haberet multò quam ipse esset magis reum. Summa verò eorum quæ spondidisset Cotonus, ea fuisse dicebatur, ut cum primum in Aulam aduenisset, atque in Regis familiaritatem admissus esset, veneno alio-ve maleficio eum de medio tollere laboraret. Rex ut eas literas legit, sibi in memoriam reuocauit infimulatum olim apud se cruentarum eiusmodi molitionum illum Episcopum, commotus est nonnihil, eumque alias id genus calumnias silentio ut dixi premere soleret, non potuit hic se continere quin de ista verba quædam Cotonis faciens, adderet sibi suspicionem esse, eum Episcopum confisum iis se artibus posse reditum sibi in patriam conficere: & Cotonus tam crassam columniam detestatus non difficile Regis animum tunc pacauit. Sed ecce tibi circa horam cœnæ dum sol in alterum orbem pronus occideret, cœlum qua Regis tegebat domum nubibus primum rubore cruentatis, tum in atrum quasi conopæum quod tenuis candor decussaret affirmatis, repente circumfundi, cum alibi candida luce resplenderet. Tunc qui illas de Cotonis literas in Aulam attulerant,

Aulicorum

Aulicorum oculos in illud obuertunt spectaculum: Rexque ipse dum ad cœnam transiret, diu in illo hæsit attonitus, mox anxio portenti contemplatione animo mensæ assedit. Adfuit sedenti ut solebat Cotonus, Regique ipso aspectu, literarum quas manè acceperat memoriam innouauit. Ergo animo atque oculis non leuiter conturbatis Cotonum sedi suæ adstantem interrogat, sed qua erat prudētia, secretò, Nouisset-ne antehac illum Episcopum? Noui enim uerò (inquit) Cotonus, atque ille ipse est qui me sacerdotio inaugurauit. Fuit ea responsio Regis animo quasi vnguis vlceri, cum reputaret non esse verisimile hominem qui Patris propemodum loco fuisset Cotonus, in tam præsens periculum eum fuisse vocaturū, si grauissima quædam causa non intercessisset. Itaque commotior iam & subirator, quærens institit, esset ne loquutus hac de re cum Villa-regio, cumque ille negaret, urgere, cur non esset loquutus? simulque sine cibo permanere, & lances incertis motibus nunc ad se ad mouere, nunc remouere. Aduertebant perturbationem ministri, & taciti obstupescabant. Sed Cotonus, qua erat in precando proeliuitate, conceptis ad Deum custodemque Angelum breuiter precibus, sic ad Regem est loquutus. Ego Rex in tua sum manu, laborem tuum quocumque voles meo subleua: Confido enim Deum breui innocentia meæ apud te fore assertorem. Vix finierat, cum ingressi curriculo Aulici nunciant, totam illam portenti. cœlestis molitionem, momento depulsam euanuisse. Et Rex vultu ferreniore cibum sumere est adorsus. Scitum est postea Ministrorum Caluini hanc fraudem fuisse; Nec ab illius Episcopi ore aliud auditum nisi voces miserationis sui plenas, quibus intellecta nostrorum restitutio-

ne, suam deploraret calamitatem, quasi solus in exilio consenescere cogeretur, quòd Cotonum quempiam, ut nos, nactus non esset. Cæterum illud etiam liquido constitit, eum ab anno nonagesimo primo, qui minimum triennio eius exilium antecessit, à Cotonò conspectum non fuisse, cum de accessu eius in Aulam, nec Rex nec ipse vel per somnium cogitarent. Cum autem eo est accersitus, Auenione & Lugduno Mussipontum atque inde Parisios petens totis regionibus ab Allobrogibus, ubi ille erat, dissitus, iteri compertus est peregrillè. Hæc cum Regi præclare satisfacerent; tamen iam secures animi portenti illius cœlestis ineam qua monitus erat diem occursum demirari non cessabat, & Magicæ quidpiam actis potius quam naturæ in eo fuisse per diu postea suspicabatur. Enimvero vertit in autorum suorum caput tam maliciosum nefariumque machinamentum. Immensum enim quantum sibi Rex adiecerit postea ad Cotonum ac Societatis amorem, quantumque de illis quidquam deinceps hæreticis hominibus credere exhorruerit. Nihil crebrius ab ore eius tunc auditum quàm illud. Nimis sero abs se amatam Societatem! Sed nimis etiam sero; temporum hominumque iniuria cognitam! Normanniam interim lustrabat, nihilque sibi accidere gratius demonstrabat, quàm cum vel Optimates vel ciuitates ab eo postularent, ut audiendi Cotonum sibi potestas esset. Itaque festis ac profestis diebus concionari illum iubebat, & scilicet semper ipse auditor aderat, tantisque à concione laudibus eum apud illos qui audire optarant cumulabat, ut omnes subiret admiratio. Cadomi cum primarij regionis nobiles illi adessent, unusque eorum aliquis illi dixisset, magno se audiendi Cotonum desiderio teneri. Audies, inquit,

inquit Rex, enimverò, & ne diu pendeas hac ipsa die, atque vt iam intelligere incipias cum quo tibi homine res sit futura; enuncia mihi qua de re velis eum concionari. Vrgente Rege proposuit ille argumentum concionis, non sane è vulgaribus. Et Rex accersito coram Cotonò mandauit, vt ea die post horas quas designabat paucas, ad cœtum hunc nobilium qui audire illum cuperet de illo argumento diceret. Cotonus Regem demissè veneratus, ad cubiculum se recepit, horâque condicta tam diserte, tamque multis de illo argumento dixit, vt omnes stupore compleuerit. Neque verò id semel tantum contigit, sed cum Rex, vt erat sagacissimus, suorum hominum cum primis gnarus, perspectum haberet, qua hæreticorum quisque offensione in Ecclesiam Catholicam maxime detineretur in hæresi, vt quis alicuius notæ ad illum aduenerat Cotonum statim admonebat, ac sæpe aduenientem iam ad suggestum, vt illius hominis causa de re hac vel illa dicere non prætermitteret. Nunquam porrò illi concionem indicebat (indicebat verò creberrimè) quin auditores ipse illi corrogaret: contigitque vt quædam interdum negotia quibusdam gerenda committeret, recordatusque è vestigio Cotonum interea concionaturum dum ad ea irent, sistere illos, nec ante auditum Cotonum ad negotia ire iuberet. Crebrò illi vox ea in ore fuit: Credo me à Patre Cotonò ex animo diligere; ego certe eum sic diligo, omnibusque id esse certissimum volo. Priuatim verò cum illo differens frequenter aiebat: Ego te iam non vt bonum tantum ac religiosum virum, sed etiam vt fidissimum seruum habeo, cum quo omne mihi genus fiduciæ intercedat. Denique cum amoris suo nullis verbis faceret satis, Archiepiscopo Arclatensi per
cos

eos dies fato suo defuncto, quòd institutum Societatis nondum plane hac in re perspectum haberet, Cotonum in Archiepiscopatum illum promouere omnino constituit. Nec ante ab eo cœpto destitit, quam Cotonus bis aut ter de voto suo, quo dignitates omnes Ecclesiasticas repudiare tenebatur edoctum, rationibus etiam efficacissimis conuicit, id nec ipsi nec sibi nec Societati conducere. Porro quo ille animo esset inter Principis potentissimi fauores inusitatus audi ex literis hoc tempore ab eo datis ad Fratrem: Hærerem, inquit, anxius, ne à tam insolita Principi Maximi gratia, mea aliquando me indignitas alienaret, si gratiam illam aliunde prodire censerem, quam ab eo qui meos oculis Regis obtegit defectus, meam perpetuò imbecillitatem sustentat, magnasque mihi de misericordia sua quotidie suppeditat expectationes. Inter hæc, noua illi suborta difficultas; sed ab ipso lare. Societatis enim hominibus qui Galli non essent parum iucunde acciderat cum Edictum restitutionis nostræ acceperere, quod adiecta esset conditio, ne quis nostrum absque Regis facultate morari in Regno posset qui extra regnum natus esset: nec se continuerant aliqui quominus apud Legatum Franciæ, qui Romæ erat, ea de re exposcularent. Quod cum ille paulò vehementius Regi per literas renunciasset, excanduit videlicet Rex apud Cotonum, gratiam suam aliter quam vellet questus acceptam. Sed Cotonus suauitate solita illi narrare exorsus, literis se à præcipuis quibusdam nostris qui Romæ essent, accepisse, nec aliud in eis animaduertisse, nisi quòd aliqui eorum dicerent, longissimæ illi restituendi nostris parturationi qua Rex olim dixisset se iam diu laborare, non satis videri pattum respondisse.

disse. Rex cui erant in numero acuta dicta. Atqui inquit scribito ad illos : *Matrem nondum extinctam esse , sed alios deinceps parere , si meriti erunt , posse.* Addidit verò, ita regendos esse populos , ut quæ cuperent non simul omnia obtinerent , quo & egestatem suam, & benefactorum gratiam diutius vtiliusque sentirent. Demiratus prudentiam Cotonus, dixit, sibi videri Deum hac ipsa ratione se gerere erga eos quos amat maximè: extensoque paulo longius sermone Regis animum nostris plane placavit , cum diceret nunquam illos hanc conditionem grauitè fuissè accepturos , si non magno fruendi eius obsequiis, subditoque eiusque iuuandi studio tacti fuissent ; nec difficilem esse debere veniam ubi amore peccaretur. Ut autem se placatum Rex ostenderet, literas statim iubet perscribi ad celebres aliquot Societatis nostræ viros diuersarum nationum à Cotonò indicatos , quibus literis potestatem illis faciebat in Regnum suum veniendi, & quantum esset libitum permanendi. Redierat interea Parisios à Normannica lustratione, compereratque Edictū restitutionis nostræ à Diuionensi, Tolosano, & Burdegalensi Senatu in acta iam receptū, à Parisiensi non admitti: Ergo ut illū suauissimè ad sua cōsilia pertraheret, Cotonū ad Parisienses concionaturū producere statuit, ratus hac quoque ratione eos posse deliniri. Venerant ad eum salutandi causa Princeps Senatus & Senatores aliquot; mandauit eis ut Edictum admitterent , tum humaniter inuitauit ad audiendum proxima Dominica quæ erat secunda Aduentus Cotonum in Ecclesia S. Germani Altisiodorensis. Qua die, venit eo Rex , & è Senatu quidam, populi que vis tanta, quantam capere templum potuit amplissimam, magnamque omnes tum eloquentiæ , tum in primis pietatis

pietatis eius admirationem retulere. Idem factum consequente Dominica. Verùm cum tardius res in Senatu procederent quam placeret, Rex consulto inprimis Cotonò de iis quæ obicerentur Societati, ac perlecta Ludouici Richeomi accurata pro nobis defensione; quod in animo regni negotiis distento miraculo esse potest; bene meditatus res nostras iussit è Senatu aliquos ad se mitti, qui causas edicerent morarum, quæ in admittendo inter acta Edicto neceiebantur. Quas cum bene multas & non vulgari eloquentiæ pompa adornatas audisset, tam appolite singulas diluit, vt acumen ingenij eius nationes Europæ omnes, quæ responsa illa in suas linguas transfudere, demirari hæcenus non cessent. Peracta defensione, cum Cotonus pedibus eius aduolutus vberes ei gratias totius Societatis nomine habuisset, *Dum vos, inquit, obsequio meo militabitis, par est me aduersus omnes vobis esse pro clypeo.* Laborabit posteritas vt quod nunc adiiciam credat, quamuis id in Parisiensi isto orbis theatrò infinita hominum multitudo conspexerit Regem Franciæ adcò bello & armis potentem, vt toti Europæ ac prope terrarum orbi terrori esset, adcò prudentem, vt nulla eum æmulorum Principum consilia fugerent, cum à prima infantia ex Caluini Ministrorum ore nihil aliud nisi Religiosorum hominum, atque in primis Societatis nostræ odium didicisset; Tamen humilem è Societate nostra hominem regio in curru sublimem è palatio eduxisse, ac per celeberrima vrbis loca circumuectum ad primarij templi ostium inter stipatorum spicula & tympanorum sonitus adduxisse, manumque sua prehensum suggesto vt concionaretur adinouisse. Hunc quasi triumphum Cotonò ad diem S. Thomæ Apostoli, quæ tertia fuit illi concio
Paris

Parisiis, Rex adornauit. Et ille postquam nonnihil à pudore ac verecundia qua ex indignitatis suæ cogitatione inter hos honores prope obruebatur, animum recepit, orsus dicere ad illa verba-Ioannis, Stetis in medio, & dixit Pax vobis: Christi proprium esse locum medium; siue in Trinitate vbi est inter tres secundus; siue in Natiuitate in medio duorum animalium agnitus; siue in morte operatus salutem in medio terræ; siue in Ecclesia terrestri, medium hominis idest cor sibi deposcens; siue in Cœlesti medius inter Deum & homines intercedens. Vertit deinde ad Regem sermonem, demonstrans eum, vt Christi imaginem, non tantum id hæcenus egisse vt sempiternam in corde Societatis sibi sedem per infinita benefacta poneret, sed etiam ita illam vicissim in medio sui collocasse, vt & in hoc Regni corde Parisiensi ciuitate, & in Ciuitatis corde Ecclesia primaria voluerit conspicuam apparere. Qua de re cum immensas Deo atque ipsi gratias habuisset, perpetuæque illi Societatis obsequia atque apud Deum vota despondisset, & Regem & Parisienses qui aderant incredibili doctrinæ ac modestiæ suæ exemplo recreatos dimisit. Vt Rex qui gratulantis populi voces in digressu iucundissime audiebat, negaret Aulicis deinceps Parisiis sine nobis esse posse.

CAPVT V.

ANNO CHRISTI
1604.ÆTATIS COTONI
41.

*Edictum Reſtitutionis noſtra à Senatu Pariſienſi
admittitur, & Cotonus inter egregios labores
pro Eccleſia à Sicario vulneratur
periculose.*

ALtera die poſt initum annum ſexcentefimum
quartum perſpecta Regis præciſa reſtituendi no-
ſtri voluntate, Senatus Pariſienſis Edictum prout ab
illo erat propoſitum in Acta retulit: rebusque Societä-
tis iam in tuto poſitis, conuertit Cotonus cogitatio-
nes omnes eo vt Eccleſiæ quam vtiliſſima eſſet ſua in
Aulâ commoratio. Præclare ergo vſus in primis Re-
gis beneuolentia, nullum illi reſidere in animo patie-
batur ſenſum de Eccleſia qui dignitati ac ſanctitati
eius minus videretur conſentaneus. Sed quoties ſe
occaſio dederat, vt vel de ſacris ritibus, vel de ratio-
ne regendæ hominum conſcientiæ quibus Eccleſia
vtitur, loqui poſſet, argumenta habebat ad manum
tam multa ad hæc propugnanda, eaque tam valide ac
diſerte proponebat, vt & Aulicorum, qui iis rebus
obloqui prius non verebantur, ora penitus obſtrue-
ret, & Regis animo non paruam earum veneratio-
nem adiiceret. Itaque adeſſe eum ſibi ad Miſſam, ſa-
craque omnia officia perpetuò voluit, vt eorum quæ
fierent aut ſpõte aut iuſſus rationem explicaret. Erat-
que is inter iſta Regis ſenſus, vt auditi ſint Caluini-
ni qui dicerent, eum niſi à Cotonno cauere tandem
fore

fore superstitiosum. Erat ingens Regis studium post suum ad Ecclesiam reditum omnes Calvinianos mitissima ratione, id est disputatione ad sui imitationem pelliciendi: sed studio progressus deerant, quod non semper essent ad manum qui illud promouerent. Posteaquam Cotonum habuit, nullum fere alicuius notæ Caluianum ad se admisit quin ei ante digressum, ut illum audiret, cumque eo priuatim colloqueretur, imperarit. Magnus Coton labor, sed gratus iuxta ac fructuosus: nam hoc tempore præter minoris notæ aliquot, Præfectus vrbis Laudunensis, Domina de Font-le-bon, & secretorum Aulæ particeps Vir spectabilis Dominus de Lomenie labore isto quæsitæ Ecclesiæ. Verum dum ista maxime illi ex animi sententia fluunt, incidit casus qui non tantum gaudia sed illo nostra mœrore maximo interpellaret, sed rerum etiam nostrarum summam in periculum non leue vocaret. Quippe ad diem decimam tertiam Ianuarij primis iam tenebris cœlum obducentibus cum domum Cotonus in cōmodata rheda reuerteretur, audacissimus sicarius, dæmonibus an hominibus instigantibus incertum, ne destinatum facinus minus destinato perpetraret, capite in rhedam qua ille solus cum socio vehabatur, immisso, locum sibi sedis eius notauit, cumque se post rhedam reduxisset, atque in eam à tergo insiliisset, adactum per vela gladium in Cotonum humerum qua collum excipit profunde immerfit versus clauiculas pectoris, haud procul ab asperæ arteriæ regione. Demisit sine voce caput Cotonus, rogantique socio ut haberet, sinum tantum calido iam sanguine redundantem manu ut tractaret placidissime iussit, Urgebat auriga equos impetu maximo, intendentes se magis ac magis tenebras euitare studens,

nec ante potuit cursus inhiberi rhedæ, quàm multum
 sanguinis excussum, multumque vulnere esset incom-
 modatum. Ac perierat sane nobis vir maximus; nisi
 quæ Dei benignitas fuit salvis admirabiliter maiori-
 bus venis, arteriis, ac nervis omnibus, medius inter
 ista delapsus gladius viam sibi fecisset plaga luculenta
 magis quàm letifera. Quod profecto miraculi expers
 non fuisse docere potest hæc narratio. Vacabat enim
 quo tempore hæc Parisiis gerebantur orationi apud
 Valentiam Segalaunorum Matrona cuius se precibus
 commendatissimum esse Cotonus crebro optarat. Ea
 breui postea retulit obiectum tum sibi cruentum faci-
 noris illius spectaculum: Beatamque Dei parentem,
 quæ sicarij manum nunc in guttur, nunc in iugulum
 intentam suâ manu auerteret. Mirus fuit in Aula ani-
 morum motus; posteaquam de illo vulnere est inau-
 ditum. Catholici iuxta ac Hæretici procures hinc
 ad Regem, inde ad Cotonum undatim concurrere,
 quod alterum animo, alterum corpore vulneratum
 conferrent. Qui ad Regem ibant abique villo fidei &
 credulitatis differimne Cotonum laudibus cuncta com-
 plere, Cotonum visendi causam multi adire, ut Rex
 ipse, veritus ne densa illa interpellantium turba vul-
 neri esset impòrtuna, auctoritatem suam interponen-
 dam censuerit ne quis ad eum molestus adiret. Cæ-
 terum non ipse tantum, sed & Regina coniux Regios
 ad eum medicos, chirurgos, pharmacopolas submi-
 sere, iussos ut regia in eum medicamenta impenderent,
 nec alios quàm qui à Regia quotidie mittebantur ci-
 bos coram eo inferri paterentur. Quanta in agrotan-
 tem non priuatorum tantum, sed etiam Collegiorum
 ac cœtuum sacrorum, & popularium benevolentia
 esse prodiderit, Rex ipse illustri sententia significavit
 cum

cum diceret. Optandum prope fuisse hoc vulnus (si periculum Cotonii & sicarii facinus abfuisset) ut & ipse intelligeret quantum ab hominibus, homines quantum ab ipso Cotonus amaretur. Porro indignitatem facinoristam grauitate tulit ut in sicarii inquisitionem proposito iis qui nomen eius deferrent grandi premio, multa quaestorum capitalium & satellitum genera per dies multos habuerit occupata, nec quidquam illi magis doluerit quam cum omnis labor frustra fuit. Scripsere postea, qui e circumforaneorum hominum sermonibus historias saepe consarcinant, fabulosissimam fabulam; authorem facinoris fuisse pedissequum iuuenem, quod paucis ante diebus nonnullos id genus pedissequos conuitia in Cotonum iactantes flagris conscindi Rex iussisset. Audiuius tamen saepius Cotonum negantem ullam vnquam Regiae id genus iussionis aut umbram fuisse aut vestigiū. Calviniani tunc atque hoc etiam tempore multum onerati hominum proborum suspicionibus. nihil tamen est certius, quam autorem facinoris siue sua siue aliena exitum improbitate, adhuc in obscuro esse. At Cotonus diu ac multum a Iudicibus Regio nomine interrogatus de sua hac in re suspitione, illud vnum respondit rogare se Regem demississime ut misero homini parceretur, nec inquisitio progrediretur ulterius, Vultus illi serenitas, verborum comitas, & animi quies ea semper fuit decumbenti ex vulnere, quae sano. Et quanquam Regia admisit medicamenta, tamen ad coelestia cum primis accurrit. Cuiuspiam enim de cuius pietate praclare iudicabat, negotium dedit ut ad Sanctam Genouefam nouendialia sacra sua causa fieri curaret. Fecitque Dei benignitas ut octaua die plane sanus, nona sacrum ipse eodem loco

loco faceret, confessiones quorundam exciperet, pluribusque illo accurrentibus sacras epulas distribueret. Decimo verò tertio die à vulnere suggestum maiore multò quàm aliàs vnquam hominum gratia in Sancti Germani templo amplissimo cum subiisset, voce fuit nihilo quàm ante vulnus infirmiore. Quadragenarij subinde Iuuij. conciones in Palatij aula habere est exorsus, quod illi fuit incredibili cum fructu multorum hominum, sed etiam absque vlla Regis solertissimi quandiu vixit vllò in verbo offensione, immo & absque Aulicorum, diuina parum plerumque ex animo gustantium, fastidio aut satietate. Voluptas Regiserat tum concionum sententias memoria condere, tum data occasione eas apud Optimates refricare. Quod verò Cotonus per hæc initia, sermonis interdum aulici gratiam ac puritatem non satis exprimeret, Rex fauore ac beneuolentia inaudita, vt eum omnibus redderet quam gratissimum, illud sibi susceperat negotij, vt non solùm de gestibus, si qui nonnihil inconditi viderentur; sed etiam de vocibus, quæ illi præter morem loquentium emendate exciderent, mox à concione illum secreto commonefaceret. Iam tum magna apparuit ex eius concionibus aaimorum in Aula mutatio. Matronæ sacramenta frequentius adire, libellis piis assuscere, vestium luxu & aulæ vitiis impensius temperare. Viri qui hæresim imbiberant, modestius de Catholica Religione loqui, colloquia Cotonis expetere, atque si non expeterent ab ipso Rege Cotonò in manus tradi. Qui Catholici semper fuerant de Ecclesiæ incrementis gaudio triumphare, ad Cotonum hæreticos pellicere, mores ne hereticis offensioni essent studiose castigare Societatis nomen, dictæis antea, ludibriis immo & execrationibus,

nibus expositum , hōnori deinceps ac venerationi esse. Nemo enim iā existimabat vllas contra nomen nostrū voces Regi posse non ingratas accidere, qui scisset Nū tā sæpe eos qui Societati obloquerentur verbis castigasse. Et verò Cotonus non ergà se magis quàm erga quēlibet è Societate bene animatum Regem videre delectabatur. Vt quisque nostrorū Parisios aduenerat ad Regē ducebat salutandum. Quod tū faciebat lubentissime cum is qui aduenerat in auocandis ab Hæresi hominibus operam collocarat. Nullum enim Regi festiuus acroama obtingere solere sciabat quàm de iis qui Hæresim abiudicassent. Neque verò hanc apud eum gratiam indigenæ tantum inierant. Duos enim hoc ipso anno Lusitanos ab India reduces , aliosque in posterum non paucos Regi sistere studuit. Is verò sancte testatus æquam sibi ergà omnes qui Societatis nomine fruerentur charitatem esse , magna omnes dignatione ac comitate excepit. Cæterùm aulicis hisce concionibus defunctus Cotonus, quiescere tamen & vocem à suggesto abstinere non est permissus, certatim ad Regem adeuntibus Ecclesiarum Parisiensium rectoribus , ac demissè supplicantibus vt plebēs suas eius voce recreari atque ad virtutem excitari pateretur. Quam postulationem Rex non solum benigna voluntate ; sed non rarò etiam præsentia sua est prosequutus. Crescebant his rebus & Parisiensium in nos studia , & benignissimi Regis Senatusque amplissimi beneficia. Ille enim hoc anno iam adulto , Domum Professorum Parisiensem non tantùm fiscali omni programme absoluit; sed etiam inquilinis opificibus Regiis liberam nobis attribuit, addito mille ducentorum aureorum ad facta testā suppellectilemque restituendam dono. Dedit hoc Cotonī precibus , qui
captata

captata occasione aduentus P. Ioannis Gonterij quem ad Parisienses conciones Rex iusserat accersiri, Religiosum ei domicilium, quod ante nostrum fuerat, impetrauit. At Senatus Amplissimus nos in bonorum quæ extarent possessionem quacunque illi iurisdictio est honorifico Senatusconsulto reduxit. Sed nulla in re Cotonii opera latius se extendit; quam in Collegiis Societati toto Regno vel restituendis vel constituendis. Redhibitum fuerat anno superiore Diuionense; sed cum nonnihil de mercedibus ab Scholasticis exigendis ciues tentarent, quod Societatis instituto non congrueret, id Regiis literis Cotonus prohiberi curauit; ne pecuniis aucti religiosæ integritatis imminueremur diuitiis. Hoc verò anno cum Christophorus Baltazar Lugdunensi præpositus nostrorum Prouinciæ, cum ciuitate Lugdunensi de pactus esset ut Magistrorum stipendio pro pristinis libris octingentis sena librarum millia attribuerentur, Cotonus ut id Rex, cuius tum intererat maxime, probaret, lubenter quæscisceret, impetrauit. Tunc quoque Billomensi Collegio redditu nostri, & Cotonio satagente Rex literas ad Abbatem S. Laurentij Blesas dedit, ut illi Collegio Ecclesiasticum beneficiū iuris sui pateretur attribui. Quamquam id non ante annum sequentem Cotonio Blesis rem sua urgente præsentia ac cura sit confectum. Rothomagensibus, Biturigibus & Rhedonibus hoc item anno Collegia nostra restituit Ignatius Armandus Franciæ Prouinciæ præpositus; Cotonii verò opera fuit ut diplomata Regia omnibus, & Rothomagensi priuatim Collegio ad millia octo librarum de Regia pecunia obtineret. Sed palmaris fuit Flexiensis Collegij tunc suscepta constitutio, in qua cum essent Regis in hoc genere deliciæ, incredibile

est quàm multa ille quotidie cum Cotonò ad eius incrementum ac splendorem vel designaret, vel susci-
peret. Basilicam in quà parens eius tanta fuerat prole
fœcundata, nostrum voluit esse domicilium, lucum
antiquitate arborum spectabilem, hortumque pera-
mœnum adiecit, stipendia iusta breui assignauit, nec
vllæ erant tam humiles de commodis illius Collegij
cogitationes, quas ille se indignas censeret, nec vllæ
tam excelsæ quas sibi aliquandò suscipiēdas non puta-
ret. Cum in his versaretur Societatis nostræ gratia Co-
toni industria, operam tamen & amorem ad alios Or-
dines Religiosos late extendebat; cuius rei illustre illi
testimonium hoc anno præbuit Carthusiensem Ge-
neralis Prior, his ad eum literis, in Ordinis sui Comitibus
perscriptis.

*Frater Bruno humilis Prior Maioris Carthusie to-
tiusque Sacri Carthusiensis Ordinis Generalis
Minister, Admodum R. In Christo Patri Petro
Cotonò Doctore Theologo meritiſſimo, Regis Con-
cionatori longe facundiſſimo, è Societate IESV
salutem, & charismatum omnium plenitudi-
nem ab eodem Domino IESV Christo.*

Illustria veri amoris & charitatis testimonia, infi-
nibus pietate ac celebri doctrina ornatis viris vestri
similibus iure deberi agnoscimus. Vnde fit vt quanti
vestram dilectionem faciamus ostendere, simulque
eximio illi affectui & beneficentiæ singulari, qua
pietas vestra S. hunc nostrum Ordinem eiusque per-
sonas prosequitur, pari gr atitudine & officio respon-
dere cupientes, harum tenore, præter eam, quæ in vi-

ta & in morte est inter hunc prædictum Ordinem, & S. vestram Societatem bonorum operum omnium communicationem & participationem ; eidem piæ vestræ dilectionis concedamus Anniuersarium perpetuum in Calendariis omnium domorum huius nostri Ordinis, scribendum sub die obitus vestri : quem post longa Religiosæ vitæ demensa spatia felicem & prætiosum faciat in conspectu suo omnipotens Deus. Cuius misratio omnes nos tandem in cœlestis sui Regni consortio clementer recipere dignetur. Amen.

In quorum prædictorum fidem his subscripsimus, & Ordinis huius sigillum per scribam nostrum & Capituli nostri Generalis apponendum curauimus. Datum Carthusiæ sub Capitularibus nostris negotiis anno millesimo sexcentesimo quarto.

Sigillantur.

FRATER BRUNO Prior Carthusiæ,
Locus Sigilli.

F. IOANNES BAILLET
scriba Capituli Generalis.

Concionatoris tantum , non etiam Confessarij Regij nomen Cotonò tribuunt hæ literæ , quòd nondum satis vulgatum esset Regem hanc etiam operam ab eo expetiisse. Sed vno fere ante has literas mense particulari primùm confessione expiare apud illum animum voluit. Et Cotonus sanctitatis Sacramenti , dignitatis eius qui tanto in tribunali confederit , & demissionis ei , qui peccata velit eluere , consentaneæ non immemor , nitentem genibus Regem sedens cœpit audire ; etsi dudum ille aliter ab aliis Sacerdotibus

tibus esset assuefactus. Quam rem adeò non secus, quam par erat, Rex est interpretatus, ut eam potius magna cum animi æquitate & Cotonì laude apud viros principes commendaret. Dehinc pridie Resurrectionis Christi quæ tunc dies fuit decima septima Aprilis, repetenti à prima pueritia omnes vitæ suæ noxas per aliquot horas, quamvis nec continuas; nec eodem quo solebat aliàs corporis situ operam dedit: Rege ut in re nunquam ab se prius usurpata suauissimos animo pietatis salutarisque doloris sensus hauriente.

C A P V T VI.

ANNO CHRISTI

1605.

ÆTATIS COTONÌ

45.

*Cotoni in Aula Religio, & contentiones nonnullæ
eius pro se à Deo fortunatæ.*

SExcentesimus quintus Christi post millesimum, & Cotoni quadragesimus secundus annus est sequutus, quo pietas ac Religio eius (ut ab eo quod potissimum est ordiar) cum nostris omnibus semper fuisset perspectissima, tum aulicis, immo Regno toti cœpit esse testatissima. Turbis enim adeuntium, quas vel insignis eius apud Regem gratia, vel incensum commodandi omnibus studium acciuerat, cum perpetuò obsideretur; tamen nulli non erat persuasum frustra illum, aut primis diei horis, aut iis quæ quotidianum sacrum præibant & sequebantur, conueniri. Adeo enim religiose primam diæi horam orationi, matutinamque alteram Ecclesiastico officio in aulico fere sacello genu nixus, ac plusquam tertiam sacrificio

O 2

impendebat

impendebat , vt à nemine se tunc sineret interpellari. Quod institutum eum amici quidam ac graues viri non satis viderentur probare,quòd dicerent perire interdum hac Religione momenta earum rerum gerendarum , quibus plus plerumque gratiæ,quàm orationibus à Deo posset iniri.Vellem,inquit Cotonus,quod vultis , si mihi persuaderi posset aut res vllas Deo gratas sine diuina ope geri , aut diuinam opem alia melius ratione prouocari quam oratione & sacrificio posse. Itaque negabat vllum efficacius magnæ rei gerendæ momentum esse quàm quo Dei auxilium esset rite procuratum. Enimverò ita aulæ toti suum probauit institutum , vt & rarus ei deinceps per eas diei horas interpellator adueniret , & Rex pietatem hanc eius commendaret , atque ab aliis commendari periucunde audiret. Hinc illi accessit studium sacella aulica ad Fontem Eblaudi , & oppidum Sancti Germani , præclaris operibus exornandi , quorum vel arbitrum , vel approbatorem Cotonum habere delectabatur.Nec vnquam illi Cotonus vacuas preces obtulit , cum pro restituendis quæ hæresis diruerat aut deformarat , vel de nouo instituendis eorum qui quotidie succrescebant Religiosorum hominum templis , supplicaret. Quin & Martiis nonnunquã spiritibus positis dies ipse aliquos negotiis ita tum subduxit vt nulla de re nisi de pietate mentionem admitteret. Nam huius anni Calendis Ianuariis indulgentiam à Pontificibus veniam iis qui Societatis Ecclesiæ adeant , ita consequi studuit , vt horis matutinis confitendo , diuinis audiendis participandisque mysteriis absumptis, pomeridianas etiam aliquot in templo nostro transigeret , indictas à Pontificibus preces , aliaque pietatis officia doceri se postulare, eaque

eaque omnia in populi numerosissimi conspectu religiose perficeret. Cumulabat nos inter hæc, nouis quotidie beneficiis Rex benignissimus, siue Claromontanis ædibus, quas inquilini & Bibliotheca Regia occupant, nobis libere asserendis, siue Societatis fama quibuscumque rebus poterat augenda ac protegenda. Quo in genere fuit Pyramidis in scelestissimi parricidij vindictam meritò positæ; sed venenatis in Societatem conuitiis ac calumniis immerito inscriptæ, euersio. Cùm enim egissent nostri cum eo quod æquissimum erat, vt qui causam Societatis nostræ à detestabilis parricidæ causa seiunctissimam esse intellexisset, is ne pateretur contumeliosis tabulis nos in criminis communitatem vocari; sed interposita auctoritate sua faceret vt veteribus tabulis nouæ substituerentur, quæ & parricidium vehementius detestarentur si placeret, & innocentium tamen iniuria abstinere. Erat Rex adeò ad clementiam non factus sed natus, omnesque offensionum fibras iuter subditos suos ita euulsas cupiebat, vt Prætori vrbano breui negotium dederit pyramidem totam à fundamentis conuellendi, ne quod superesset alienationis animorum vestigium. Cùmque aliqui suggererent de nocte rem suscipiendam, ne plebis tumultu disturbaretur, Rex qui & sua nosset tempora, & populi ergà nos animum, luce palam suscipi mandauit. Idque ita confectum est, vt nec commouere se quisquam, nec hiscere contra sit visus. Fuit hæc nostris, & cum primis Cotonò grauissima, ac complurium quæ deinde sequutæ, contentionum origo maxima. Sed ab iis quæ Cotonò priuatim fuere suscipiendæ narratio est auspicanda. Venerat in Galliam ante annos aliquot Ambrosiani Ordinis Præpositus Generalis P. Michaël

Medio

Mediolanensis, vt Lotaringo maleficis carminibus propè contabescenti nonnullam, prout posse credebatur, faceret medicinam. Eum à Regina matronæ nobilis suasu quæ se fascino laborare putaret Parisios accersitum cum vulgò esset compertum, Adriana puella Picarda annos nata citciter sex & viginti, quæ à prima pueritia Dæmonem iniquum possessorem infestumque exagitatore sentiebat, illi sistitur, nec paucis diebus sacris exorcismis procuratur. Sed illo non diu postea ob muneris sui negotia in Italiam repente reuocato, Regina à puellæ parentibus demisse rogata, vti ne illam infelicem & derelictam sine subsidio esse pateretur in eo erat vt à Religiosis Ordinibus exorcistam sibi expeteret; cum ad aram B. Virginis apud S. Victorem animaduertit ab infami spiritu Cotonum, quem sibi præsto esse iusserat ad sacrum, ita vitari ac timeri, vt puellæ corpus coram illo miserabiliter concuteret, ac viri virtutem non sustinens, omnia ageret vt eum de conspectu subduceret. Rata enim tum non alio sibi opus Exorcista, vrgeri eum imperiis cœpit vt rem susciperet, eoque multa excusante, quod id viro publicè laboranti operosum, quod homini de Societate, cuius in actiones omnes adeo curiose inquiratur periculosum, quod denique Religioso apud Episcopos inuidiosum. Illa vt excusationes quas respuere constituerat etiam præcluderet, Parisiensi Episcopo dat in mandatis; vti Cotonum imperio quantum posset, adigeret ad hoc officium miseræ puellæ non denegandum. Non potuit par esse tot imperiorum inuidiæ tolerandæ Cotonus; sed posteaquam apud se reputauit, siue diuini esset consilij vt ea puella Dæmonem nunc exueret, siue non esset, tamen hominibus à fide Catholica deujs

non

non posse non plurimum prodesse, si & eam certo à Dæmone infessam, & Ecclesiæ imperiis subesse Dæmonem, perspicuè intelligerent, hanc quoque operam ratus non alienam ab eo quo tenebatur studio hæreticos in viam reducendi, negotium est aggressus. Ergo cum Principes atque Illustres viri alij & alij spectatum auditumque venirent, ut ipsorum testimonio, hæreticis, atque importuno cuidam hominum generi os opprimeret, qui hisce in rebus sapere se demum putant, cum id quod cæteris est apertum sibi solis obscurum finxerint, noster Exorcista Dæmonem in puella delitescens variis rationibus in apertum producebat. Nam & difficiles impeditasque quaestiones clare atque expedite respondendo dissolvere, latinè atque interdum græcè differere, occulte ab aliis designata aperire, horrendos Tartari cruciatus verbis ab ipsa ductis experientia exquisitè depingere audiebatur. Quarum rerum ne umbra quidem puellæ illi per naturam venire in mentem potuisset. Hac verò extorquebant à Dæmonibus, qui tres quatuorve puellam inhabitare sunt visi, tum Execrationes ac devotiones à Cotoni in eos pro sacerdotali autoritate vibratæ, tum adiurationes per celeberrima quæque fidei Catholicæ mysteria ac dogmata, quarum mihi etiamnum est ad manum exemplar, tum suavissimæ ad Deum preces quas abs se prius conceptas, energumenam voce insequi ac referre cogebat. Sane testatur ad hanc diem vir optimus Georgius Frogerus Doctor Sorbonicus, tantam Cotonio in imperando tranquillitatem, tantam in parendo eius imperiis Dæmoni fuisse celeritatem, ut eorum qui puellæ opitulati erant, nemo vel tam facile vel tam prompte quæ voluit obtinuerit. Adfuit Exorcismo Comes La-

uallensis,

uallensis, ad fidem Catholicam ab hæresi tum primum Cotoni institutione traductus, tantumque ex eo veri in fide roboris sinceræque de Ecclesiæ Catholicæ veritate ac potestate existimationis hausit, vt ad Ecclesiam armis, quod breuì postea fecit, contra Infideles propugnandam plus illi tunc oculi quam aures antea constantis animi contulisse sint visi. Verum vt rebus præclarissimis semper adnascitur discrimen; ita hinc molestissima Cotonò nata contentio; Cùm enim ille ab Academico homine libros nescio quos Theologicos mutuatus, schedulam intra illos non de iis quæ vel quæsisset vel quæsiturus à Dæmone esset, sed de iis quæ ex Theologiæ scitis quæri liceret conscriptam, per obliuionem dum libros restitueret, dimisisset; eam homo ille satis perfidiose ad Hæreticos detulit. nec alio opus fuit inuitamento tum hisce Ecclesiæ professis hostibus; tum iis quos vetustum Societatis odium & recens Cotoni apud Regem gratia medullitus adurebat, vt fluctus contra eum maximos excitarent. Non enim iam ea schedula, sed portentosi libelli in vulgus disseminati, qui curiosissima de Regno, de Regis filiisque eius vita, de bello ac pace aliisque id genus scire ope Dæmonis Cotonum voluisse: atque hanc videlicet artem esse, qua Regis aucupatur gratiam, familiaritatem cum Dæmone, impudentissime mentirentur. Ausus etiam Calvinianus quidam Minister polliceri, se in eas quæstiones iustum breui commentarium confecturum. Sed Rex tribus maxime rationibus totum criminationis machinamentum breui disiecit. Nam in primis Cotoni chirographum quo iactatæ illæ quæstiones continerentur proferri sibi ab eo quì primus rem detulerat, imperauit, cui imperio ille nunquam satisfacere potuit. Deinde cum

cum aduertisset quæstionum illarum numerum in dies
 augescere, & libellorum quæ circumferebantur exem-
 plaria inter se esse dissimillima, Optimati Calviniano
 cuius in sinu deposita primum fuerat calumnia, dixit.
 Hanc sane Monpenserix Bibliothecam sibi videri: Et
 erat Bibliotheca illa, liber, quem Matrona Princeps
 pollicita se edituram, cum diutissime frustrata esset,
 causam dederat aulicis quidquid in mentem vani ve-
 nisset ac ridiculi, Bibliothecæ illi affingendi. Denique,
 vt malo quod leuiorem medicinam non admitteret
 acerbiorē chirurgia mederetur, has literas Cotoni in-
 nocentiæ vindices Prætori vrbanō Parisios mittit.
 Renunciatum est mihi, Prætor Myro, chartulas quas-
 dam in vulgus sparsas, quibus comprehendantur
 Quæstiones nescio quæ Patri Cotonio malitiose adscri-
 ptæ; nec deesse qui eas typis edere, commentariis
 atque interpretationibus quas maleuolentia suggeret
 auctas meditentur. Hoc ergo scripto præcise atque
 enixe tibi impero, tum Patris Cotoni gratia quem
 mea sum dignatus amicitia, tum ad falsos rumores ac
 calumnias inter subditos meos opprimendas, vt i omni
 opere chartulas illas aboleri cures, typis eas vulgari
 prohibeas, atque si iam forte essent euulgatæ seuerē
 in Typographum animaduertas, omniaque exempla-
 ria subducas. Deus te seruet, Prætor Myro, ex Fonte-
 Eblaudi decimo Septembris anno millesimo. sexcēte-
 simo quinto. Post hæc Aureliæ ac Lemouicibus cū Dux
 Sullius & Trimollia primaria fœmina Calviniani ambo
 hanc Regi calumniā refricarent dentato illos dicto re-
 preilit. Hæc videlicet, inquit, Religio est, Ecclesiæ diffi-
 cile, futili calūniæ faciliē fidē habere? Ita tunc oppressa
 maledicentiā: & Adriana, cum ei aliquanto melius esset,
 quanquam non plane libera, domum est remissa. Verum

non hoc sine quieuit Dæmon improbus, qui per illius os dira Cotonno frequenter erat minitatus. Nam tentata hoc modo Regis in eū gratia, aliorum etiam plurimum offensionem per procacissimam mulierem conatus est prouocare. Cuius rei hunc fere in modum factus est conscius. Venerat in Basilicæ Borboniæ sacellum, ut Regi sacra audienti mysteria præsto esset, & Rex statim ad se accersitum orsus est interrogare. Num quendam Episcopum, quem nominabat, domum salutatum adiisset? Num in eius cubiculum ac mullum ingressus in cuiuspiam colloquium venisset? Cotonus negare simpliciter; quod Episcopum illum in Italia esse credidisset, nec de eius reditu quidquam hactenus audiisset, ad eum tamen si Regi placeret se confestim aditurum. Nunquid vero, inquit Rex, custodi domus eius fœminæ consenti aures præbuiisti? Ego vero, ait Cotonus, Episcopum illum qui Religiosus sit cum Fratribus suis habitare censui, de illa fœmina quid rei sit plane ignoro. Quid rei sit, addit Rex, ignoras Cotonne, & mihi persuades; sed fallacia est ac dolus in te fabricatus, quem mox addisces. Finitis mysteriis eum illo ducit ubi addisceret, perditam fœminam, custodem adium illius Episcopi quem Rex nominarat, iactasse apud aliquos Cotonum ad se absente Episcopo domum venisse, Bibliothecam adire optasse, atque illic curiose ab ipsa disquisisse cuinam vsui esset Episcopo, cumque illa præfectam se diceret domus tantum custodiri, atque ille secretiori cuidam vsui ipsam adhiberi contenderet, pollicitam ut suspicione omni eum liberaret, se peccata sua in æde S. Germani certa die per confessionem apud illum deposituram, d. eta die deposuisse: cumque illi castimoniam Episcopi & suam non persuaderet, de conspectu

spectu eius iratam abcessisse. Hac summa fuit fabu-
 la: quam ut Cotonus audiit, Regi dixit; Athanasio olim
 non dissimilem machinam fuisse intentatam, ut non
 tantum in odium, quod hic agebatur, sed etiam in
 publicam infamiam adduceretur; posse, si videretur,
 procacem mulierem eadem nunc ratione conuinci
 qua illa olim Athanasij calumniatrix est deprehensa.
 Rex qui ab ipsis Coton primis responsionibus ca-
 lumniam ei fabricatam perspexerat, ut alienum etiam
 odium ac suspiciones ab illo amoliretur, probauit
 quod offerebatur. Itaque accessit in secretius cubi-
 culum iis qui rem norant, adesse iubet mulierem;
 alioque ex cubiculo primum Ignatium Armandum,
 tum Carolum à Turri, postea Petrum Arnaudum, qui
 erant nostri omnes, extremò Cotonum producit, quæ-
 ritque ex illa coram omnibus, quis horum ad eius do-
 mum venisset? Illa ambigua inter Carolum à Turri
 nigro hominem capillo, Cotonum flauo, aperte prodi-
 dit fallaciam suam. Sed ut penitus redargueretur, quæ-
 siuit ex ea Cotonus, qua die domi esset ab eo quem
 accusaret conuenta, illaque respondente, altero id die
 à festo Assumptæ Virginis factum; atqui, inquit,
 Rex, & tunc & octiduo postea Parisiis Cotonus ab-
 fuit, mecum in oppido S. Germani totis illis diebus
 versatus. Additæ interrogationes aliæ: quibus illa urge-
 ri se ac plane conuinci cum sentiret ad lacrymas con-
 fugit. Et Rex multa minitatus iussam facessere, sup-
 plicio graui destinabat, nisi eum Coton preces ac
 mansuetudo ad veniam postea deflexissent. Dæmones
 soli an etiam homines hanc ipsi calumniatricem sus-
 citassent ignorauit in posterum Cotonus, nec sane ut
 sciret laborauit. Notatus enim est ab iis qui ipsum pe-
 nitus nouerant non alia inter sacra & orationem vul-

tus atque animi serenitate ac tranquillitate quàm inter hos calumniarum fluctus permanfisse. Neque verò inter ista diuinarum regiarumque protectionis argumenta segnius ille vel Societatis publica, vel animi sui interna negotia accurabat. Nam vt Societati commodaret, impetrato per hæc fere tempora à Rege commeatu Rothomagum adiit, quo Elizabetham Monceliam Dominam d'Aubigny grauissimam ac nobilissimam fœminam, quæ non paruam pecuniarum summam in Societatis commoda Cotonii arbitrio impendendam desponderat, perpelleret, vt fecit, ad domum tyrociniò Societatis ex ea pecunia Rothomagi constituendam. Vt verò suis priuatim rebus quo solebat diuum timoris atque amoris studio prospiceret, cum haud diu postea Ludouicus Richeomus Lugdunensi nostrorum Prouinciæ Præpositus ad Regem venisset Aureliam, quod eius se prouidentiarum ac curarum vtpotè ex illa traductum prouincia, subesse adhuc suspicaretur, demissis eum precibus vt mihi postea Richeomus narrauit, tandiu interpellare non desistit donec impetrasset nonnullam vt sibi operam ante discessum constituendis animi sui rationibus vellet impertiri. Ergo in tranquillum seducto locum, vitæ suæ aulicarum rationem omnem ac modum exacte illi ac sigillatim sub oculos ponit: impensè flagitans ne refugeret seuerè annotare quidquid sibi in illa minus probaretur, ac pro imperio emendare; nec defuere quas sublimis perfectionis studium, vitæque in Deum omni ex parte collectæ desiderium ex oculis illi identidem eliciebant lacrymarum placidissimarum. Tum verò quia nonnihil supellectilis aut viatoriarum aut sacrarum Aulica illa vita postulabat, exponi totam ante illius pedes iubet, vt nec re vlla absque Præsidum conscientia vteretur, nec

in Religioſæ paupertatis integritatem vlla minus neceſſaria vtenda peccaret. Et profitebatur Richeſſus nullas ſibi emendandi, plurimas admirandi imitandique cauſas occuſſiſſe.

C A P V T VII.

ANNO CHRISTI
1606.

ÆTATIS COTONI
43.

Eccleſiaſticas dignitates repudiat ſigna humilitatis & puritatis magna præbet, & Societati conſtituenda ac protegenda laborioſe vacat.

QVartum iam annum adelle Regi Cotonus pergebat, cum flueret illi vitæ quadrageſimus tertius, adeoque in dies ei magis ac magis erat carus vt cum nihil omitteret eorum, quibus ſe commodare publice Societatis poſſe exiſtimaret ſi Cotoni interceſſiſſet rogatus, tum animo ſuo non ſatis ſibi videretur facere niſi illi priuatim beneficij quiddam conferret. Itaque cum duobus ante annis honoribus illum Eccleſiaſticis augere Arelatenſem Archiepiſcopatum deferendo tentaffet, & multis Cotoni precibus de conſilio eſſet deductus, accuſabat aliquoties poſtea facilitatem ſuam. Hoc verò anno alia rem via aggreſſus Cardinalatus ei dignitatem, quam recens Pauli V. Pontificatus expeditiorem ac promptiorem faceret, ei aliquoties obtulit: ratus duobus eum iam noſtrorum hominum Toleti & Bellarmini exemplis quæ ipſi identidem ingerebat ad aſſenſum poſſe percelli. Et Cotonus hanc eius voluntatem anno ſuperiore exeun-

te subodoratus, egit cum Ludouico Richeomo, qui tum forte in Aulam venerat, atque à Rege memorabili comitate exceptus fuerat, vt aliquam apud illum securitati suæ operam præbere vellet. Richeomus verò in suo à Rege digressu cum multas inexhaustæ eius ergà Societatem benignitati gratias habuisset, vnã dixit restare, quam si illi Societas deberet nihil ad cumulum adiici posse existimaret. Hanc se comitate eius quam hæcenus esset expertus prolectante, ausurum ab eo infimis precibus postulare. Rex suspicatus aliquid eorum quæ à Regibus solent, Richeomum abs se postulaturum, respondit habere se donorum suorum stata tempora, quibus sponderet se Societatis fore memorem. Excepit Richeomus gratias se habere maximas, non tamen postulare nunc vt aliquid donet; sed potius ne donet. Maiorem enim illi à Societate gratiam haberi nullam posse, quam si dignitates Ecclesiasticas nostris hominibus donare nunquam velit. Rex demiratus postulati genus, quæsiuit, esset-ne bona fide ea voluntas totius Societatis: & Richeomo asseueranter affirmante, dixit, prouidentia suæ fore vt illi omni in re quantum fas esset gratificaretur. Ita tunc dimisso Richeomo, Cotonus nondum sibi satis cautum ratus capta hoc tempore familiarissimi cum Rege colloquij occasione hanc iterum ab eo gratiam illo animi verborumque sensu efflagitauit, vt Rex tum demum certò intelligeret non posse sine magna animi ipsius tristitia has illi iterum dignitates offerri. Disertissima enim ac efficacissima illi oratione voti sui religionem obtendebat, quo cauisset ne sibi absque Pontificis graui & videlicet non ad gratiam composito imperio dignitates eas admittere vnquam liceret. Cumque Rex excepisset se verò si Pontifex
esset

esset effecturum ut hoc sibi cauerent indocti tantum & improbi ; Illi autem qui ipsius essent similes , cauerent potius ne sibi fas esset recusare. Cotonus copiosè edocuit , aliam ei Deum mentem daturum si Pontifex esset ; quod aditum omnem suæ ambitioni præcludere optinorum quorumque hominum suprema sit salus ; quod illæ societates à quibus in singulos bonitas deriuatur ac doctrina , diu bonæ esse ac doctæ non possint , si quos habent bonos ac doctos hoc prætextu facile amiserint ; quod ut quisque probissimus est ac doctissimus , ed latius fundi eius operâ Reipublicæ intersit , quæ dignitatibus hisce quasi cancellis circumscribi videatur. Quæ Rex cum attentissime audisset , recepit nunquam se illi in posterum hac de re verba facturum , rationesque eius magno voluptatis atque approbationis sensu quasi regultans aulicis sæpe enunciavit. Hæc illi subeunda fuit contra honorem primi loci quem nollet contentio , sed alia mox sequuta est pro eo quem vellet extremi loci. Nam cum anno superiore Lemouicas ad nonnullos tumultus reprimendos Rex profectus Cotonum quocumque peruenerat dicere pro concione imperaret , Pictauij quoque in celeberrimo S. Crucis cœnobio , ubi magnus est primariorum Virginum numerus audiri eius vocem voluit. Aderat ei concioni matrona Calviniana maximæ in Regno dignitatis , quæ pro Sectæ audacia proicctaque mentiendi consuetudine , ausa est postea coram Regina matronisque Aulæ principibus asseuerare , audisse se Cotonum illa in concione gloriantem nunquam se in vita peccatum admisisse mortiferum. Ac putidum quidem mendacium iis qui Cotonum modestiam ac pudorem norant , non persuasit ; ne qua tamen hanc trophæa hæretici apud suam plebeculam possent erigere ,
egit

egit Cotonus cum Cœnobij S. Crucis Antistita , quæ Calvinianæ illius soror , vt testimonium sua Virginumque suarum manu obsignatum perscriberet de iis quæ ab ipso illa in concione accepisset. Illa publicis literis testatissimum esse voluit , & hoc ex eo non auditum , & duo tantum ei dicenti tunc fuisse proposita ; Alterum vt demonstraret in omni actione vitæ nostræ ac maximè Oratione agnoscendum cuilibet , nihil esse vnde possit magnopere gloriari , cum alta vndique (si bene se nouit) cingatur miseria ; Alterum , vt hac miseriæ propriæ cogitatione comparatos auditores ad diuinâ misericordiam per Orationem prouocandam institueret. Quod argumentum quàm esset ab illa gloriatione de qua insimulabatur alienum , nihil attinet pluribus verbis declarare. Et nihil quidem notæ Cotoni humilitati repressa hunc in modum muliebris vanitas tunc obfuit ; Sed nobis qui eius virtutes religiosissimè in vita occultas vestigiis sectamur , nunc profuit. Nam quo scripto hanc suam contentionem manu ille sua perscripsit , in eo dum explicat quibus illa mulierex rebus , calumniæ occasionem arripuisset , egregium , sed vt res tunc fuere , necessarium puritatis castimoniarque suæ testimonium reliquit consignatum. Narrat enim sibi nonnullis ante hoc tempus mensibus , alteram intercessisse cum hæretico Optimate contentionem , ex qua illa matrona , vt fere mendacium sibi per Veritatem viam sternit , suam fabulam concinnasset. Etenim cum hæreticus ille pro Calviniana proteruia , cœlibatum custodiri à sacerdotibus negaret posse , omnesque qui se custodire profiterentur , vanos & hypocritas nominaret. Repressit Cotonus os maledicum aliquot verbis. Et ille castigatione factus ad audendum proiectior. Tu verò , inquit , qui

qui te cæteris patronum præbes , adeone tibi tuæ es conscius castimonix vt integram audeas profiteri? Cotonus quod propugnandæ vitæ cœlibi necessarium erat tantum respondit. Neque tu, inquit, neque alius quisquam , ita me diuina misericordia ac pietas sperare iubet, in religiosum ac sacerdotale quod edidi votum quidquam à me mortalis admissum culpæ , olim ad Christi tribunal mihi obiecerit. Hic fuit calumniæ illius hæreticæ fomes, tertiumque opinor, quod de Castimonia sua testimonium in vita consignauit. Nam & olim Iuuenis in Societatis aditu; & postea Vir, dum in desertæ Religionis Catholicæ suspicionem ab Hæreticis vocaretur , & in hac contentione cum dynasta hæretico culpam abs se impuritatis , scripto , vt suis locis narrauimus est amolitus. Cuius rei testimonia vt per naturam alia esse non possunt quàm domestica , ita cum sanctitate , moderatione & sinceritate totius vitæ produuntur , vt in nostro Cotono obsignata , omni sunt exceptione maiora. Cæterum inter ista bello fremere omnia ac feruere in Gallia sunt visa , contra Bullonium Ducem , Sedani Principem. Quo Rex contendens cum exercitu , abesse abs se Cotonum noluit , qui non tantum purgandæ ante bellum conscientix , sed concionibus etiam toto itinere habendis ad manum esset. Sed recepto breui per deductionem Sedano , hanc etiam in eo opportunitatem inuenit vt Catholicæ Fidei prædicationem in hæreticam urbem quasi triumpho secum inferret. Iussus enim illic statim concionari Cotonus insolita de rebus Catholicis existimatione ciuium mentes compleuit, tresque in præsens illorum in Ecclesiæ sinum traduxit. Quin etiam Rex ipse Bullonium Cotonum in consuetudinem iam aliquoties insinuatum in Parisiensi re-

ditu eadem secum rheda inter viros Principes , grauissimo suo imperio sedenti ac de rebus Fidei disceptanti aures dare iussit , atque vt liberius inter se illi capita conferrent , solos in rheda mox relinquere voluit. Neque tamen vt corpore ita animo discessit à Goto. Nam post milliaria aliquot, cum illi equo vehenti lutulenta rhedisque incommoda via occurrisset , veritus ne Cotonum quidpiam obtingeret detrimenti si Regia rheda eo forte loco euolueretur , seruum Regium cum equo nobili ei obuium mittit , qui tantisper eum equitare iuberet dum Rheda periclitaretur. Nec hoc loco stetit eius amor ; sed cum Parisios reuersum esset , salutantibus nostris dixit , velle se illis Cotonum subducere, indeque in Palatio eum primùm degere, tum in Basilica Longauilla qua Palatio iuncta est, vt sibi perpetuo præsto esset imperauit ; Rhedam etiam propriam ob frequentissima itinera habere eum tunc voluit , sed Cotonus quoad vires firmæ fuerunt , id sibi non est passus persuaderi , nec ante eò descendit , quam labores aulici , nostrorum externorumque consilia , ac Præsidum assensus & iussu ad id eum adegerunt. Parisiis graues illum in constituendis Societati Collegiis difficultates exceperunt. Quo enim Regia illum gratia copiosius afflabat ac secundius , hoc illi æmulum excitabatur copia maior, atque in negotiis perficiendis quæ fere ex eorum in Aula muneribus pendebant, morosior. Pro Collegio Pictauiensi potissima illi concertatio videtur fuisse , cuius ab anno superiore surgentia fundamenta quassantibus omni ex parte viris potentissimis retineri posse ; duntaxat crederent, qui rerum omnium potenti Deo res nostras cordi esse sentirent. Ciues hæretici , etsi non admodum erant multi,

multi, tamen Proregis qui à Catholica Fide alienus erat, autoritate facti, tumultu ac terrore si retineretur Societatis Collegium complebant omnia, Catholici incensis id cupiebant studiis, saluamque sibi pietatem ac Fidem absque eo subsidio non sperabant; sed iidem rem aggrediabantur cum ad Proregis offensionem respexerant non sine magno timore, cum ad potentiam non sine magna perficiendi desperatione. Cotonus de timore eorum ac Proregis in hoc negotio voluntate Regem edocuit, diplomata quæ Collegium constitui iuberent, obtinuit; Regem qui acerba odisset imperia & coactam obedientiam, cò perpulit ut ipse Proregi amicas adhiberet quodammodo suasiones, Catholicis ciuibus animos adderet, hæreticis præfixæ voluntatis hac de re suæ claras significationes daret. Cum enim diplomata Regia amanuensium potius facilitate Cotonique gratia extorta, quàm Regis voluntate perscripta causarentur, Rex sua ipse manu versus plurimos illis adscripsit, quibus questus cogi se à suis ut sibi ipsi esset amanuensis, moras omnes hoc in negotio iubebat facessere, cogitareque omnes ad quos id attineret, sibi nihil hic superesse nisi parendi laudem. Ita constitutum est ac erectum Pictaviense Collegium, ut maxima Cotoni pro Societate ac Catholicis ciuibus contentione, ita non minore hæreticorum inuidia. Ex qua cum illi multæ deinceps molestiæ procrearentur ac labores, animi tamen ingentesque in Dei gloriam conatus cœlesti subsidio luocrescebant. Lemouicensibus enim ad Collegij nostri stipendia geminum de re Ecclesiastica beneficium; Molinensibus non tantum Collegium, sed etiam Borboniæ pietatis vetus monumentum S. Iuliani domicilium & omnia iura; Flexientibus cente-

na aureorum millia ; Cadurcensibus denique ac Viennensibus Collegia singula hoc anno vt attribuerentur , apud Regem perfecit. Sed nimirum tot lætis rebus triste quidpiam interuenire oportebat, ne aulicæ ac populatis aulæ gloriola succum virtutis exsugeret. Ergo tam secundo Regiæ gratiæ flatui obiecit se quasi quidam tristis Boreæ reflatu , qui segetem non decuteret sed firmaret, celebris cuiusdam de foro causidici apud Regias aures querela. Is cum hominis alicuius nostri qui extrà regnum erat , libello se perstrictum putaret, dissimulata qua maxime pungebatur castigatione sua , vt vindictam sibi prætextu Regiæ iniuriæ quæreretur, Regi quadam die suggessit scriptos à nostris hominibus libros quospiam extrà Regnum , qui essent Franciæ Regibus iniuriosi, simulque verba quædam ex nonnullis duriora , quæ exulceratis per temporum & bellorum iniquitatem animis imprudenter excidissent , in crimen adducebat. Rex qui hominis fraudem statim sensisset , acuto primùm dictorio illum derisit , tum Cotonum haud procul positum capitis nutu accersit , ac de tota querela edocuit. Cotonus causæ iniquitate demonstrata , quæ more hætenus sæculis omnibus inaudito cogeret eos qui Regno eius naturæ gratiæque ipsius infinitis vinculis tenerentur astricti , vadimonium pro iis qui extrà Regnum essent promittere, cum nec eorum moderari affectibus , nec peccatis si quæ peccarent obuiam ire potestatis ipsorum esse posset , causidicum vehementer urgere institit , vt ex libris ipsis ea loca quæ diceret iniuriosa coram Rege proferret, satis certus ea Regi non aded inuidiosa quàm ipse iactaret visum iri. Ille cum diem sibi produci postulasset , quòd libri ad manum non essent ; præstare nunquam postea potuit

tuit quod receperat. Et Rex negans sibi obsecundandum iis qui dolori suo Regis dolorem vellent obtinere, aliterque se cum suis, aliter cum Extraneis agere didicisse affirmans, ad eorum qui accusabantur Autorum vnum, aliosque eiusdem nationis duos, literas illicò scribi iubet honorificas; quibus Regni Galliæ eis incolendi ius dabat.

C A P V T V I I I .

ANNO CHRISTI
1607.

ÆTATIS COTONI
44.

*Graves pro Veritate & Societate disceptationes
suscipit.*

NVnquam Cotonus aut tutior in Aula erat aut quietior quàm cum minus tutus & quietus videbatur. Diuinæ enim artis erat firmare illum per aduersa, nec ita Aulæ blandimentis deliniendum permittere, vt non ex interuallo humana exerceretur inuidia. Sumpsit hoc anno qui aulicæ vitæ quintusilli erat, ætatisque quadragesimus quartus, aperta huius rei experimenta. Cum enim gratia esset apud Regem certa quotidie magis ac confirmata; tum difficillima illi ac molestissima negotia passus est Deus faceffiri. Nam primum hoc ipso tempore maleuoli quidam ac parum certò Catholici, vt Cotonò inuidiam in Aula pararent, odiosissimam quæstionem; An liceat insidias contra Regum incolumitatem structas, si per Sacramentum pœnitentiæ agnitæ fuerint, aperire: in circulis ac colloquiis ingerunt: aures quin etiam Regis, & Ducis Bullonij qui in Aula adhuc hærebat sermoni

sermonibus eiusmodi obsident, adeoque rem urgent, ut inambulans aliquando Rex cum Bullonio accersitum ad se Cotonum interrogaret. Si quis contra Regis vitam quidpiam se machinari in Confessione Sacramentali ipsi aperuisset, nunquid nam esset quod ipsum prohiberet rem Regi secreto renunciare. Esset enim verò, inquit Cotonus, religio Sacramenti, quæ tota collaberetur, si vel minima labefactandi secreti via esset aperta. Si enim Regis incolumitas maximum, fateor, regni bonum, sed tamen humanum, ac diuino minus, satis iusta causa esset secreti relaxandi, multò certe id iustius diuini honoris protegendæ gratia faciendum esset. Atqui hac semel patefacta porta, quidquid ab homine peccati designari Sacerdos in Confessione agnouerit, id videlicet ne diuinus lædatur honor, qui nunquam peccato non læditur, non erit secreto habendum. Iam cum secreto Sacramenti potius quàm honori suo cautum esse Deus voluerit, ut ad eius vtilitates homines prolectaret; graue sane videri non debet quòd eidem secreto Regum postposuerit incolumitatem. Addidit sub hæc, ne Regum quidem incolumitati satis prouisum fore, si eius causa Confessionis arcanum effringeretur. Postquàm enim id inter homines constaret, nemo eorum, qui perniciem Regibus machinaretur adedò desiperet, ut vel Confessionem institueret, vel de eo scelere quod tanto suo periculo statim enunciandum sciret, verbum in Confessione faceret. Ita dissuasor deesset tanto sceleri, qui alioqui præsto esset in Confessione, si spe secreti scelus suum detegere nefarij proditores auderent. Hæc ille cum disertissimè disseruisset. Tu ergo, inquit Rex, enixe dissuaderes? Sane inquit Cotonus, quam possem maxime; nec illud tantum, sed impunitatem etiam illi

illi à Rege conarer impetrare, si prodere seipsum scelerisque socios extra Confessionem in animum induceret; si id non auderet, lege Sacramenti adigerem non tantum ut ipse à sceleris cogitatione procul abscederet; sed etiam Socios terrore omni intentato arceret. Quid si, addidit Rex, vel tu illi, vel ille aliis non persuaderet? scelus videlicet perfici sineres? nequaquam, respondit Cotonus; sed corporis mei obiectu vulnus vel exciperem vel impedirem. Tu ne, inquit Rex mihi intentatum vulnus exciperes? Non vulnus, inquit ille, sed mortem excipere millies malim quam ut Regio corpori male eueniat. Arrisit Rex, & placide quæstioni modum imposuit; quæ in tam lubrico, atque inter veritatem & pietatem aduersus Regem tam ancipiti loco, sollicitum interim Cotonum habuerat non parum. Secundum hæc cum Cleri Gallici generalia comitia anno superiore cœpta, iam essent in exitu, Cotonus qui iampridem perspexisset nulla re magis foueri in Gallia hæresim, quam Ministrorum Caluini ingeniosa nequitia; nec Ministros vlla potius causa perseuerare in suscepta nequitia, quam quod sustentandæ suæ ac suorum vitæ hoc vnum illis sit artificium; agere cum Rege institit ut Clero Gallico autor esset ad maiorem decernendam de Ecclesiasticis pecuniis annonam iis vel Ministris, vel eorum adiutoribus qui Caluino vellent nuncium mittere. Amplexus Rex optimus cupidissime consilium, egit efficacissime ut id Clerus approbaret, idque institutum magnis postea incrementis adauctum hæresis vires incredibiliter in Gallia debilitauit. Ministri enim qui paratum sibi apud Catholicos perfugium sentirent, nec fraudi iam tam acres incumbere, nec prauas partium machinationes adedò secretas habere, nec suspicione

cione defectionis apud suos carere, nec pauci aut parui nominis ad nostros coeperunt transire. Quæ res Calvinianos omnes suorum inprimis doctorum, deinde credulitatis etiam diffidentia compleuit. Neque verò Cotonus rem Catholicam hoc tempore opera minus iuuit quam consilio. Nam præter inferioris notæ aliquot, viros etiam tres nobilissimos, Castelnau Regiæ custodiæ præfectum, Mainuillium & Vassauium deductos ab hæresi adiunxit Ecclesiæ. Enimverò nimium iam diu cessare sibi visus malus Dæmon, dolorem quem ex erepta suo de ore tam opima præda concipiebat, concoquere amplius non potuit. Sed ad noua Cotonum reuocauit certamina eò grauiora ac periculosiora, quòd in eis non causa eius priuata, sed totus Societatis in Gallia progressus ad indubitata discrimina ab iis qui speciosa Regij publicique boni nomina suo obtenderent odio, trahebatur. Domiciliis enim nostris primùm, deinde etiam hominibus lis est intentata. Nam cum pluribus iam exemplis compertum esset, domicilia nobis in Gallicis vrbibus nulla facilius promptiusque via constitui, quàm attributis in nostrorum, qui laboraturi in eis essent, stipendia Ecclesiasticis beneficiis; existimarunt non immeritò qui animo erant in nos haud satis æquo, grauius nobis incommodari posse, si Regij Consistorij Consulto ab eorum adeunda possessione velut regiis rationibus aduersante interdiceremur. Ergo inuentus est vnus quispiam de iis qui Regiis vtilitatibus ex officio inuigilant, qui ad Consistorium Rege præsentem ea de re referret. Et dicebantur initio sententiæ ab iis, qui ad beneficia Societati semel attributa, sibi suisque in perpetuum ademptā aspirandi spem quererentur, sane admodum nobis infestæ. Sed vbi Rex animum suum

suum aperuit, orsus de Societate quæ ex Cotonodidicerat, atque de ipso Cotonod quæ longa iam experientia docuerat pertexere, negansque beneficiorum fundatores si reuiuiscerent alios in vñus beneficentiam suam impensam optaturos, quam in quos Societas eam conferret, magna est sententiarum facta mutatio. Nec defuere qui non tantum Regiæ conscientia, sed etiam publicis ac priuatis rationibus, beneficiorum in nostros participationem plurimum conducere, efficacis disertaque oratione docerent. Quippe nec Regibus apud Deum periclitari eo in facto iudicium, de eorum quibus benefacerent dignitate, in tanta doctorum ac proborum hominum copia quantam Societas haberet; nec publicis obesse rationibus, quod ad tam multas tamque diuturnas Reipublicæ utilitates ex tot millibus beneficiorum, quorum plurima in vñus non sanctissimos abeant, pauculis aliquot cum Societate decideretur; nec denique priuatis eorum rationibus qui suis beneficia destinassent, commodius quidquam posse contingere, quàm vt Societate rite constituta, haberent vbi liberos, si diuini esset consilij, in eam admissos, priuatim ac publicè vñiles sibi olim gratularentur. Has rationes suis identidem interloquutionibus Rex iuuabat, atque apud Coronum postea & alios suauiter regustabat. Stetit ad extremum, nec Regis nec aliorum hoc in genere beneficentiam nobis esse intercludendam. Hoc periculum excepit aliud, quod dum nostros homines iis quas hereditario iure possiderent fortunis ante tempus euerteret, omnes Instituti nostri rationes perturbabat. Litem intulit nobis in eodem Consistorio Regius Aduocatus, cui non placebat in more esse Societati nostræ, vt qui inter nos exacto probationis tempore sim-

plicia Religiosorum vota emisissent , ij suorum postea bonorum ius retinerent , eaque in solidum reciperent cum votis soluti à Societate iusta ex causa domum ad suos dimitterentur. Ergo ille paternis perpetuò bonis prohibendos contendebat , qui semel vota in Societate edidissent. Qui enim iis votis Religiosi fierent , eos in cæterorum Religiosorum ordinem ac morem Paupertatis observandæ cogendos. Id ni fieret dum suspensæ manerent familiarum fortunæ , matrimoniis quæ interim conciliarentur iniuriam fieri. Quippe vel ea familia vnde noster est , suspensis inter eius perseverantiam aut defectionem animis coniugium fortuna sua dignum non sortitur , vel si sortitur , nostro postea deficiente , fallit familiam cum qua convenit. Addebat , hinc negotiationum crebrò ac mutuatorum fidem laborare , dum diuiti in speciem familiarum fortunas suas committunt homines , quæ vnius è nostris leuitate ac defectione de statu momento deiciatur. Itaque colligebat Reipublicæ interesse , ne familiarum fortunæ diu pendeant in incerto. Permonuit hæc oratio Cōsistorium , Consultumque editum , vt de re tota Rex qui tunc aberat , moneretur. Verum ille monitus negavit sibi placere vt de re illa quæreretur , aut statueretur quidquam , nisi de ea prius Cotonus in Consistorio esset auditus. Itaque à Sigillorum Regis Custode aduocatus certa die causam pro Societate dicturus in Consistorio adfuit. Hic verò cum ostendisset quam grauibz ac necessariis ex causis Pontifex ius esse voluerit Societati , exsoluendi votis simplicibus eos qui post diuturnas probationes , vitio suo minus ad eam idonei comperti essent , ne votis obnoxios , vel ad certam ipsorum , eiicere , vel ad certam idoneorum perniciem retinere cogeretur ; sciscitari institit ex iis qui

qui aderant, moderate-ne essent laturi si qui eorum filios in Societate haberent, minus instituto idoneos, ad certam eos mendicitatem domum remitti? Quod si id, ut est, minime paternum videretur; cogitarent nec illud quidem paternæ charitatis quæ omnium maxima est, videri debere, ita vniuscuiuspiam è filiis splendori atque opibus consulere ut alios antequam de eorum in religiosa vita constantia quidquam certi esset, iure omni ac fortunis denudatos exponerent mendicitati. Neque verò quidquam esse in eius qui hanc nobis litem intendisset oratione quod viros sapientes meritò deberet permouere. Nam Religiosi, inquit, post illa vota estis. Quid tum postea? Ergo aliorum Religiosorum vobis lege vtendum. Sane ridicule. Quasi Religiosorum omnium lex sit vna, ac non alij aliud agant, aliud vestiant, aliud vescantur, atque aliud etiam voueant, absque vlla Religiosi nominis iniuria. Atenim inquiet, Paupertatem æque omnes vouent. Vouere non nego; sed æque omnes vouere pernego. Modulum enim vouendæ seruandæque paupertatis aliis alium sua præferunt instituta. Ius possidendi latifundia Benedictinis, Carthusianis, & aliis votum paupertatis non adimit; Capuccinis & aliis adimit. Quid Religiosis militatibus Alcantaræ, Calatrauæ & Sancti Iacobi in Hispania & Lusitania; an non ius est post votum paupertatis tum paternas fortunas, tum quæ sitas ex fructu beneficiorum quæ ab Ordine obtinuerunt in vita prout libuerit dispensandi ac disponendi atque in morte testamento ad alios pro arbitrio transferendi. Ac ne extranea exempla minus moueant, an non in Gallia præsto sunt nobis Religiosi Victorini Massiliæ, quibus votum paupertatis testandi in extremis potestatem non ademit? Sed ne pluribus exem-

plis rem vrgeam, Romanum postremò Ius appello, in quo extat Iustiniani constitutio potestatem faciens iis qui monastica emiserint vota & liberos ex coniugio domi reliquerint, testamenti post vota condendi, quo facultates inter liberos, & monasterium partiantur. Quæ omnia quantum absint ab aliorum Religiosorum more ac iure nihil attinet demonstrare. Enimverò si non Religiosa tantum verum etiam professa ac solemnia vota ius iis quos dixi omnibus in paternas facultates integrum reliquere; quanam porò intemperies fuit Aduersarij nostri, vt votis simplicibus atque ex causa interdum relaxandis paternas illicò facultates abdicandi necessitatem annecti vellet? Sane cum ex Religioso nomine quod vota illa simplicia tribuunt argumentatur; næ ille parum in argumento suo videt, si tot non tantùm Religiosorum verum etiam Professorum exemplis vim eius plane labefactari non videt. Nam quod subiinde adiicit Reipublicæ interessè, vt qui matrimonia contrahunt, qui mutuam communicant pecuniam, qui negotiantur cum iis familiis, quarum vel inopia vel copia ex cuiusdam è nostris constantia aut defectione pendeat, in eo quod gerunt non decipiantur; hoc profecto est nodum quærentis in scirpo. Nam si Reipublicæ non interesset à tot hypothecarum antecessionibus, tot fideicommissis, tot substitutionibus quæ plerumque arcanæ sunt & ex syngraphæ aut testamenti privati abdito eruendæ, matrimonia, mutua, & negotiationes hære suspensa: Quid erit quod quis merito censeat Reipublicæ interessè ne à iure apertissimo ac toto orbe Terrarum iam notissimo, eadem nonnihil suspensa maneant? quanquam quid est cur suspensa vocemus? cum eorum qui sapienter matrimonia,

mutua,

mutua, & negotiationes ineunt solertia ac cautionis
 esse debeat ne plus facultatum esse sibi fingant aut
 aliis, quàm certo esse constet, aut si fingunt quam
 ipsi sibi accerserint ne moleste ferant deceptionem.
 Quæ cum vehementer disertèque dixisset Cotonus,
 orabat ad extremum, nec institutam à Pontificibus,
 laudatam à Conciliis, Italiæ, Poloniæ, Germaniæ, Hi-
 spaniæ totique orbi Christiano probatam consuetudi-
 nem, ex qua Societatis tot nominibus vtilissimæ na-
 sceretur incolumitas, in periculum vellent adducere.
 Plus apud se Regis Augustissimi iudicium qui nos
 Regno hac consuetudine non reiecta restituisset,
 plus Gallicorum omnium Senatuum assensum quàm
 leuissimas vnius hominis morbo fortè potius quàm
 iudicio contra intentis cauillationes valere paterentur.
 Excepta est applausu atque admiratione omnium ora-
 tio, nec alia deinde de re quam de eloquentia atque
 efficacitate illius toto Consistorio actum. Regi quin
 etiam gratulatum venire aliqui, Concionatoris sui
 in omni dicendi genere excellentiam, & per eos
 Consistorio ille renunciavit nolle se vt de Societatis
 Instituto quisquam amplius disceptaret, bonis eam
 legibus niti, semelque Edicto transacta frustrà in exa-
 men reuocari. Ita pax Societati & Cotonus ad tempus
 fuit. Et ille constituendæ Societati in Gallia, quod re-
 stabat intentus, duos illi Collegia, Ebreduni vnum, Ni-
 uerni alterum impetrauit; Rege ipso plurimum cum
 iis quorum intererat disceptante vt res nostræ quam
 optimo statu iis in vrbibus collocarentur. Quin & hoc
 ipso anno millenos aureos ad leuandam Collegij Ro-
 thomagensis inopiam, millenos item in Romanam
 domum comitia generalia excepturam à Regia beni-
 guitate deriuauit.

CAPVT IX.

ANNO CHRISTI
1608.ÆTATIS COTONI
45.

*Delphino Franciæ fit Pietatis Magister, & Aula
gratia abire frustra conatus ad Religiosos
ac Religionem promouendam
animum vertit.*

VOluebatur iam annus sexcentessimus octauus, cum Regi prouidentissimo placuit, maiorem natu Filium Franciæ Delphinum septimo ætatis anno vix admotum Cotono in manum dare, vt primis ab eo Christianæ Fidei morumque rudimentis imbueretur: Qua re vt nullam potuit illustriorem significandæ suæ de Cotono existimationi excogitare, sic nec vlla Societatem honestare, aut ad dignitatem splendidius, aut ad multorum vtilitatem vberius. Fecit verò Delphini, qui hodie est LVDOVICVS XIII. Rex augustissimus, incensum Fidei Catholicæ asserendæ ac propagandæ studium; Fecit pietas ac vitæ integritas, quæ non tantum in Principe sed etiam in priuato possit esse miraculo vt cum illi immensæ eas ob res gratiæ à toto Regno immortaliter debeantur, nonnullæ tamen in eum, qui prima illarum semina sacro eius pectori commendauit à multis interdum refundantur. At Henrici Parentis vt incredibiles quotidie erant amoris ega Cotonum accessiones, ita mirifica ornandi eius ac protegendæ studia: Colloquia eius tam crebro expetebat, vt Aulæ inuidiam non tantum Cotonus sibi; sed etiam Rex Cotonum vereretur. Itaque

ne

ne & ipse voluptatē suā , & Cotonus Aulæ gratia careret , duo instituit. Alterum , vt eum non priuatim tantum vt prius , sed etiam publicè de re quapiam proposita coram Aulicis iuberet disserere , quo & illi suam quoque voluptatis partem caperent , & quibus de rebus crebra illa cum Cotonō colloquia solerent esse intelligerent. Alterum , vt cum se vt solebat à Regio latere dandi aliis loci gratia submouisset , clara voce , si colloqui esset libitum , reuocaret ; ne se Cotonus arroganter obtulisse ; sed , vt res erat , Regi tantum accersenti paruissē agnosceretur. Eiusdem est generis quod addam. Conciliabatur in Aula inter Regij sanguinis Virum , & Mulierem Principem matrimonium , quod sanguinis nonnulla propinquitas absque Pontificis venia hærere non sinebat. Qui rem confectam volebant , veniam contracto matrimonio satis adfuturam tempori prædicabant ; Cotonus consultus negauit id licere , morasque matrimonio sua responsione attulit. Hinc videlicet à Viris primatiis delatæ ad Regem querelæ. Sed ille : Alterum , inquit , è duobus faciendum , aut consulendus Cotonus non est , cui male facere est animus , aut si consulitur , non quod cupiditas sed quod veritas postulat expectandum , atque æqui boni faciendum. Nec dissimile fuit hoc quoque. Sensit è palatinis suis aliquos , deprimendi Cotonī studio laborare de persuadenda sibi aliorum Concionatorum præstantia ; eaque de re colloquens cum Regina ; Mæx , inquit , istud est artis meique iudicij , inter noscere quas Inuidia laudes procreet , & quas Veritas ; momento vtrarumque ingenium perspicio. Itaque ad illas obmutesco , meoque silentio silere illum iubeo qui plura garrere parabat ; ad has disertus sum , meaque oratione facio eum qui mecum de illis loquitur

quitur eloquentem. Periclitari in Cotonno poterat diuina gratia inter has aulicas gratias, si eas nimium amasset; sed illi earum omnium patientia inerat non voluntas. Hoc enim maxime tempore in suam ipse vitam inquirens, magnopere angi cœpit, ne forte dum alienis obsecundabat compendiis, suæ ipse saluti dispendio esset. Habebat autem iampridem suspectas suas istas in Aula moras. Non enim dicam mores, qui non minus distabant ab Aulicis quam à terra cœlum. Sed tamen vel ipsas moras inter Aulæ plausus, inter Principum Procerumque blandimenta, inter munera excipiendi Confessiones, consulendique eorum saluti, nonnihil sibi esse posse periculosas suspicabatur. Et alioqui verebatur, ne Dei occultè admonentis voces forte essent, quas plurimi alio sane animo iactabant tunc crebro in Aula, non Cotonni solius esse Regem oportere, alios quoque eius gratiæ debere esse participes. Igitur vt animo suo satisfaceret, nec Regiam intereà sibi ac Societati offensionem accerseret, duplex ad suum ab Aula excessum iniit consilium. Primum, vt ad alios concionatores audiendos commemoratis qua per se qua per alios eorum laudibus Regem pelliceret, certus suadere illi vt in Aulæ suggestum aduocaret si quem ipsi placere aduertisset. Sed Rex ad tres tantum è nostris qui per Aduentum Patisiis tunc concionabantur duci se pertulit, nec Cotonno carere se diutius volens, ad palatium rediit, nihil dicens vnde promoueri Cotonni consilium posset. Hinc ergo exclusus aliam exorsus est telam, quam nihilo magis detexere potuit. Etenim cum aliquoties nonnullos Regi suggessisset multò se vt aiebat aptiores vt illi essent à Confessionibus, dedit se aliquando occasio commendandi Archiepiscopum Ebredunensem ob

ob sanctissimum vitæ institutum, quam commendationem Rex pro eo ac par erat præclaris verbis approbavit. Et Cotonus illicò per se atque Archiepiscopi Fratrem Andream Laurentium Regis Archiatrum agere est aggressus, ut Regiarum illi Confessionum munus demandaretur. Sed passi sunt ambo repulsam, Cotonoque priuatim idipsum urgenti Rex iam commotior dixit, Frustrà ipsum agere, ut aliquem suum in locum subroget, nolle se alium, ac si maxime eligeret tamen arcana conscientia se nihilominus ipsi patefacturum ut consilio eius vteretur. Quæ ut audiit, non institit porrò huic consilio; sed omissis verbis satagere cœpit rebus ipsis, tum ut eorum qui assiduas eius cum Rege colloctiones leuiter non ferebant, declinaret offensiones, tum ut internis Regis utilitatibus impendio magis inuigilaret. Ac prioris quidem instituti ut compos fieret, legem sibi indixit, tum in Regium colloquium quam posset plurimos data occasione insinuandi, tum seipsum cum quis se vel minimum Regio colloquio obtulerat modeste ac sine sensu subduccendi. Et quanquam plerumque falsus consilij, à Rege ubi ex oculis eius abscesserat illicò reuocaretur, tamen hunc morem constanter tenuit donec Rex vixit. Postèrius autem ut assequeretur, diligenter annotanda habebat, quæ variis ex Prouinciis ad se delatæ erant Regiæ charitatis occasiones, atque earum tam tempestiuus ac prudēs Regi monitor aderat, ut nullam unquam suggereret, quin simul expeditam rei ad exitum perducendæ rationem demonstraret: quo est consecutus, ut rarissimas ab eo repulsas illis in rebus pateretur. Itaque cum per hæc tempora Catholica Ecclesia vel nouis, vel innouatis Religiosorum viro-
rum ac mulierum familiis mirifice floreret, multique

rationibus humanis potius quam diuina prouidentia rem metientes, quod eæ familiæ cum egestate per initia sua conflictarentur, earum propagationi in Gallia obstitissent; commune illarum omnium perfugium erat Cotonus, qui Regi suaderet Seruorum Dei nunquam in eius Regno esse nimium posse, vbi plus semper nimio esset Dei inimicorum. Nec defuit Rex Cotonis studio, sed cum illi dedisset in mandatis vt dispiceret serio ac notaret quidquid ad Religiosorum Ordinum comoda cum Summo Pontifice agi posset, matureque se admoneret, literis apud illum frequentibus egit vt quod authoritatis suæ esset restituenda Ordinum in Regno suo disciplinæ vellet impartiri, nec dubitaret quin Regia potestate quidquid ipse decerneret, fulciretur. Itaque hac munitos autoritate Franciscanos quos vocant Recollectos Cotonus per initia crebro perducente iucunde ac comiter accepit, liberaliter eis præsidio, pecunia atque autoritate adfuit, & contra eorum molitiones qui disciplinæ refugerent seueritatem præclare sustentauit. Concionatori cuiuspiam nominatissimo ex ordine Franciscano qui Cotonum ac Recollectos coram se auderet sugillare, dixit Rex aliquando. Si me audies silebis in posterum, nam dum tu verbis malis perstreps vitam illorum leuiter perstringis, illi tuam optimis factis silentes conuulnerant & conscindunt. Dominicanos haud diu postea incescit idem reuocandæ disciplinæ studium; sed à paucis hominibus initio susceptum, inueteratis plurium moribus & scilicet machinationibus obruebatur, ne se eo authoritatis gradu erigeret in quo multos ad imitationem pelliceret. Rex vt rem à Cotonis intellexit, Prouincialis præpositi qui sancto obnitebatur studio non tantum repressit

conatus;

conatus; sed etiam auctoritatem Pontificio iussu acci-
di, atque in alium qui restitutioni disciplinæ veteris
allaboraret participari curauit; vnde ij postea fructus
prodire quibus hodie suauissime Regnum perfruitur.
Carmelitanis & Benedictinis eodem arctioris vitæ de-
siderio percussis, & Rex copiosa gratia & Cotonus
studiosissimo sub hac interuentu non defuit. Sed istud
hoc in genere illustre cumprimis fuit. Dux erant in
Aula nobiles fœminæ, ambæ spectatæ dignitatis, am-
bæ hæresi à pueritia innutritæ, ambæ postea Cotonî
institutione hæresum dedoctæ atque Ecclesiæ Catho-
licæ adiunctæ, ambæ ad vitam Catholico nomine di-
gnam eruditæ, & ad internæ pulchritudinis studium
per Sacramentorum frequentem usum ab eo animatæ,
ambæ denique Religiosæ vitæ inter Carmelitidas
Virgines suscipiendæ consilia quasi vno vtramque as-
flante Spiritu cœperunt agitare. Sed cum nobilitatis
virtutisque nomine magno essent apud Regem pretio,
magnaque apud Reginam charitate, luctandum vi-
delicet illis fuit aliquandiu vt suam illis constantiam
approbarent. Cui rei postquam abunde satisfecerunt,
Regina suâ ipsas in rhedâ quasi triumpho in Christi
sponsi desideratissimi domum, Carmelitidum cœno-
bium, mediam per ciuitatem traduxit. Hæc Cotonus
cum in cæterorum Religiosorum familias conferret,
non tamen nihil Societatis causa faciebat. Nam hoc
anno vt redintegrari illi Augense Collegium, & Ara-
bianense de nouo constitui liceret à Rege obtinuit.
Remense autem biennio ante dum bello Sedanum
peteretur, ex itinere ciuibz concessum, multisque
artibus deinde oppugnatum, eius protectum indu-
stria, hoc anno aperiri & Ecclesiasticis aliquot bene-
ficiis donari contigit. Inter quæ vt Regi constaret Re-

rum omnium nostrarum ratio, visum Cotonio in primis Catalogum illi eorum omnium qui tota Gallia ad fidem ex hæresi nostrorum opera adducerentur offerre, qui cum quadringentos interdum aut quingentos aut sexcentos excederet, mire illi gratus accidebat, aulicisque ab eo non voluptate animi maxima ostentabatur. Ad hæc cum à Viro primario sermo coram Rege inductus esset de Collegio Burdegalensi, tanquam de domo census tota prouincia vberrimi ac ditissimi, nec illius dictis aliter resisti posse videretur quàm Tabulis obsignatis, Cotonus vt rei etiam nostræ familiaris Regi constaret ratio, Præpositos omnes Prouinciæ Galliarum per literas monuit, vt censum sibi omnem domorum quas in sua quisque ditione haberent fide publica contestatum mittere vellent, quo eum Regi tradere atque eorum qui nostras opes vanis sermonibus augerent os comprimere atque obturare posset. Factum est vt petierat, productique ad Regem rationum nostrarum libelli, fidei ac fiduciæ nostræ iucundissimo sensu cum affecerunt, cumque hanc nostræ vt aiebat integritatis, fiduciæ ac candoris testificationem plurimum commendasset, comperit libellos omnes pro iactatis in vulgus opibus plenos reipsa esse honesta paupertate. Nulla enim reperta domus cui libræ æris Gallicæ ducentæ in nostrorum singulos suppeterent, cum tamen ex ea summa excerpendum esset in commune quidquid Bibliotheca, Ecclesia, Officina medica, aliarque id genus sumptuum occasiones hauriunt: Quæ ratiocinatio sic Regem affecit vt in eius mente non leuiter hære ad exigui memoriam temporis, sed alte ac penitus in eam descenderet ad perpetuum, Societatis cum se occasio dederat suscipiendam hac in re patrocinium. Quin vt etiam eius fructum

etum ad alios propagaret Cotonus iussit vt libellorum exempla Cancellario, Præfecto Ærarij Regij & quatuor Amanuensibus traderet; quo vos, inquit, ij quoque norint, sintque obrectatoribus vestris idonei testes vos non sic Iberos, non sic Aureos esse vt vulgus putat. Adiiciam his ad extremum ea quæ Cotonus hominibus à Catholica fide alienis hoc tempore priuatim ac publice tribuebat. Nam in primis quidquid habebat, post eas quas dixi curas, diurni nocturnique otij, id ille scribendæ Institutioni Catholicæ impendebat, quam Caluino confutando hæreticisque sanandis Regis iussu iam ab anno superiore susceperat, adeoque hoc anno promouerat vt primam illius partem Summi Pontificis censuræ submissam Romæ iam haberet, quod intelleximus ex literis Cardinalis Belarmini: quarum partem hic iuuerit recitare. Liber, inquit, R. V. iussu suæ Sanctitatis transfertur ex lingua Gallica in Italicam, vt possit intelligi ab iis quibus mandatum est vt referant quid de libro sentiant. Ego legi prima aliquot folia iam conuersa, & sane admiror eloquentiam tum authoris tum interpretis, & persuadere conatus sum Pontifici ex primis foliis de toto opere iudicium fieri posse, quod feci, vt res citissime expediretur, sed Sanctitas sua voluit translationem omninò perfici. Quare celeritas vel tarditas negotij pendebit à diligentia Traductoris. Valeat V. R. mei memor in sanctis precibus & sacrificiis suis. Romæ die 4. Maij 1608. Hæc Cotonus priuatim, sed publicè quæ nunc dicam duo Hæreticis hoc tempore laborabat. Alterum, vt nostris fas esset in eas Regni Nauarræ partes quæ Regi parebant concionum causa penetrare. Nam ab anno 1599. incolæ aut maiori ex parte hæretici, aut Catholicis potentiores Edictum

ab ipso extorserant quo Nostri Concionibus per eas regiones interdicebantur. Sed mutato iam erga nos & hæreticos animo, legem hoc anno maxima vt compertum est postea earum vtilitate abrogauit. Alterum fuit vt ipso in palatio apud Fontem Eblaudi cum Ministro Caluianiano celebris apud suos nominis, qui forte illuc aduenerat, disceptationem de rebus Fidei coram Aulicis Hæreticis & Catholicis susciperet. Ea enim in disceptatione cum hæreticorum vanitas liquido apparuisset, qui pura Scriptura niti se iactent, cum nullam dogmatum suorum partem vllò eius verbulo rite possint constituere, Aulici quidam hæresim sunt dedocti. Extat eius disceptationis historia, cui ad calcem attexuit Cotonus quæstiones Caluiniani dogmatis plurimas, quas Viris nobilibus scripto solebat tradere, vt si earum ex Scriptura probationem à Ministris elicere non possent, clare videlicet intelligerent vana sibi capitis hæretici somnia pro Christi Fide obtrudi. Quæ res multis quotidie eorum transitionibus ad Ecclesiam præbebat ansam. In his aliisque ad genus cum perpetuus esset in Aula Cotonus, tamen solemnem illam suam animi ad omnia immobilis tranquillitatem, diuinis in rebus attentionem adeò retinebat, vt cum hoc anno Societatis nostræ Generalis Præpositus Claudius Aquauia Barisonum è nostris Patribus vnum negotiorum causa legasset Regi; ille in reditu prædicaret nullum se ex aula miraculum maius referre, quàm quod Cotonum vidisset in tanta hominum rerumque omnium iactatione quantam habet Aula, facilius animum colligere, omnesque in Deum cogitationes cum vsus esset cogere, quam qui Religiosa cella nunquam exirent.

CAPVT X.

ANNO CHRISTI
1609.ÆTATIS COTONI
46.*Insolita orandi facultate continui labores
eius subleuantur.*

ANnus sexcentessimus nonus insigne in Cotono aut diuinæ gratiæ, aut virtutis labore quæsitæ prodidit argumentum. Cum enim ante id tempus nulla ei res procliuior in vita fuisset, quam diuini auxilij per orationem ad omne suum negotiū efflagitatio, vulgōque id esset obseruatum, concionum, quas habebat incredibiliter frequentes, argumenta, sententias, permotiones ab oratione potius quam ab studio & lectione ei prouenire; tum hoc anno mirabilis illi orandi ac diuina meditandi facultas est concessa. Abibant illi diurnæ horæ, ut ex iis quæ diximus potest coniici, inter innumera negotia proximorum causa suscepta, quæ meditandi atque orandi tempora multò quam voluisset decisa magis atque angusta relinquerent. Ergo concessum illi ab hoc anno quod tota constanter vita tenuit, ut nocturnis horis inter ipsum somnum, quem breuissimum capiebat ac leuissimum, orationes ac cogitationes de Deo non intermitteret; nisi si forte disceptatio quædam cum hæreticis aut cum Cacodæmone, quod quandoque contingit, animum tunc illi à Deo auocasset. Ea facultas siue ex Dei peculiari quadam gratia, quales ille in thesauris suis conditas habet innumerabiles; siue ex assiduo impensoque orandi ac meditandi inter vigiliam studio promanaret

naret, retractantibus somniis quæ vehementius hæserant in vigiliâ, signum sane fuit non vulgaris Cotonii pietatis. Cæterùm eam ipse prodidit bis in vita, primum anno sexcentesimo vicesimo, atque iterum mensibus aliquot ante mortem: ac priori quidem tempore prope coactus, cum Nanceij in Lotaringia cubiculum incoletet cuius craticij ac tenues parietes voces nocturnas ad vicinum Rectorem ac Confessarium eius transmitterent. Ipsi enim crebris oppido sciscitationibus disquirenti, vtrum eas voces aut morbus aliquis, aut lectus, cubiculum-ve incommodum exprimerent; cum nulla dissimulandæ veritatis ratio occurreret, dixit se tanquam conscientiæ suæ tunc arbitro enunciaturum, quod apud omnes eatenus tacitum voluisset; orsusque id quod iam enarraui exponere, ante duodecim annos eam facultatem sibi obuenisse significauit. Rector tunc erat Carolus Bilidstein, qui hæc se à Cotonio accepisse omni asseueratione affirmat. Iterùm verò cum sermonem fereret cum alio è nostris, haud longe ante mortem de vario genere gratiarum quibus Deus homines in virtutis studio vel sustentat vel promouet, ac multos nominatim appellaret in quibus peculiare Dei gratias obseruasset, adiecit notum sibi esse hominem, cui esset à Deo tributum vt inter somnum, liberum haberet ad propitiandum precatione contemplandumque Deum rationis vsum. Solitus vero erat toto illo sermone si de aliis diceret nomen addere, si de se sine nomine quasi de tertio loqui. Vt facile appareat eum hac in re plus aliquid sibi à Deo tributum censuisse, quam natura vfu veniat. Sane quanto ipsius commodo cesserit hac facultas intelligi potest ex vi prope incredibili negotiorum quæ in illum hoc tempore vndique incumbebant

bebant, ut nisi illi noctes pro diebus ad colloquium nonnullum cum Deo licuisset impendere magna illum in tanta tamque antiqua precandi assuetudine vitæ insuauitas videretur exceptura. Enimverò præter laborem quem in reuocandis ad Ecclesiam hæreticis augeri quotidie nunquam sibi mitigari est passus; quinque illi erant hoc tempore in Aula negotia, quorum singula alium quempiam habuissent distentissimum. Ea fuere, continua prope cum Rege colloquia, Negotiorum Societatis apud Regem eiusque Administros tractatio, Literæ omnem in partem rescriptæ, Conciones tum in Aula tum plerisque in Ecclesiis Parisiensibus prope annuæ, & librorum conscriptio. Ac colloquia quidem cum Rege eiusmodi erant, ut in Apologia pro se postea scripta Cotonus ipse hæc quasi totius Aulae experimento contestata scribere non dubitarit. Regem consuetudini & colloquiis suis id pro sua benignitate tribuisse, ut in comitatu, in confesso, in oculis, in auribus ferè semper habere ipsum voluerit, proximè sibi accumbendo & obambulando adiunxerit, multa familiarissime sciscitatus sit, quouis tempore, quocumque loco æquissimis viderit oculis, nec aliis post annorum plurium decursum, quàm quibus post primos congressus. At Negotia Societatis quàm multa, quàm magna, quàm molesta tunc fuerint, æstimari ex eo potest, quod plurima Societatis domicilia restituenda essent, plurima instituenda, census, prædia, Ecclesiastica beneficia, quæ per exilium nostrum ad alios peruenerant, per recuperatores redhibenda, noui census Collegiis aut olim egestate laborantibus, aut de nouo institutis comparandi; in quibus omnibus cum nec sine autoritate Regia quidquam promoueri, nec

autoritas Regia absque Ministrorum ipsius prona voluntate facile posset expediri, non est proclive explicare quibus ille officiis eorum voluntates promereri, aut ad quæ obsequia se deicere cogeretur ut Societati commodaret. Plane ut qui cum inter ista tantum conspiceret, nullo apud Regem loco esse existimare posset. Sed illi deiici, immò deprimi coram omnibus nullius erat negotij, tantum tamen temporis & operæ quæ multis etiam aliis rebus deberetur huc impendere non erat nullius. Nam quid dicam de Literis vndequaque scriptis, quarum copiam fuisse tantam referunt, qui illi adfacere, ut qualibet hebdomada, mensa bene ampla iis oppleretur ad quas ille rescripserat. Cotoni verò ea erat animi fortitudo ut nulla eum copia à respondendo deterreret, ea charitas ut negotia ad quæ pro Societate vocabatur nunquam detractaret. Conciones verò Aduentu & Quadragesima per sexennium iam habuerat, vno semper Aulae loco, coram eisdem fere Auditoribus, iisque non parum, ut sit in Aulis, ad rerum diuinarum fastidium pronis. Quo maius illi incumberebat onus, ut nouis quantum poterat argumentis eorum leuaret fastidium. Nec tamen interea se ita totum Aulae dedit ut plures Parisiensium Ecclesias, plura Virorum ac Virginum cœnobîa repetitis interdum sæpius vna die concionibus non frequentaret. Denique perinde atque si ista omnia, otia tantum fuissent ac ludi, scribendæ Institutioni Catholice quam Rex ei ut dixi demandarat animum & calqum ita impendebat ut in iustū opus anno sequente perducta lucem viderit. Atque hi labores eo sunt admirabilitate pleniores quod nec de spiritualibus occupationibus quæ in bene longis orationibus, Confessionum auditione, colloquiis

loquiis salutaribus, consultationibus de conscientie iure litæ rant; nec de urbanitatis erga viros honestiores officio quidquam sibi voluit esse propter eos diminutum. Voluit Rex per hæc tempora ad labores hos veteres nouum adiungere, honoris in speciem, sed periculi simul plenissimum. Cum enim aduerteret se per bellorum ciuiliū præteritas turbas ab iis quibus tunc obsidebatur delusum Ecclesiastica sæpe beneficia parum idoneis hominibus quasi in nauatæ sibi operæ præmium detulisse, consultius se nihil hoc tempore facere posse censebat, quam si de eorum quos ad beneficia promoueret eruditione ac moribus cognitionem atque arbitrium Cotonodeferret. Defugit tamen longissime hanc iudicii atque oneris molem Cotonus, seque excusatum haberi impendio orauit, ne in tanta idoneorum hominum paucitate aut suam ipse conscientiam læderet, aut effugere hominum inuidiam & maledicta pluriū saluti perniciosa non posset. Decessit tum quidem Rex de consilio, optimæ mentis conscientiam vexare veritus, sed nullum deinde ad beneficia admisit, quin vel ad Societatis Collegia si nondum studuisset informandum, vel si studuisset per annos aliquot refingendum, mitti iuberet, vitæ apud nos Ecclesiasticæ verum esse exemplar asseuerans. Hæc dum in Gallia gereret Cotonus, non tamen prouidentie suæ oculos illius finibus patiebatur circumscribi; sed porrectis Constantinopolim vsque cogitationibus, Collegium nobis apud Galatam instituebat, cuius molitio quia plurimum fuit annorum ab altiore est accersenda principio. Decreuerat Rex paulò ante annum millesimum sexcentesium quintum Legationem Constantinopolitanam viro illustri Baroni Salagniaco, Cotonis nostrorumque amanti-

mo, dederatque abeunti in mandatis vt apud Principem Turcarum ageret, nostris vt liceret Constantinopoli domicilium constituere. Qua in re cum Cotonio id plurimum optanti vellet gratificari, tum Legatorum Gallorumque omnium qui eo negotiandi causa appellebant, commodis prospicere se existimabat. Egit Salagniacus impigrè atque studiosè quod iussus erat, & ad mensem Majum anni sexcentelimi quinti Literas Turcarum Principis ad Regem misit, quibus & id nobis concessum, & antiqua S. Petri Ecclesia apud Galatam domicilio atque vsui nostro attributa. Sed ne quid negotio periculi afferret præcipitatio, censuit Rex expectandum Breuati reditum, qui annos viginti duos Constantinopoli Rem Gallicam procurarat, ratus eius monitis tutiore omnia ac diuturniore statu collocari posse. Dum tamen hæc ducuntur moræ non defuit rebus suis infernus tenebrio, cui nostrorum in sua Regna profectio suspecta erat ac formidabilis; sed fabricatam vbi minime expectabatur Parisiis machinam Constantinopoli intendit ad euertendum nostræ profectionis consilium. Etenim cum ad annum sexcentesium sextum monitus à Cotonio Rex augustissimus, moliri hæreticos in Anglia Græcorum Patrum, quos tum ex aliis tum ex regia ipsius Bibliotheca eruerent euulgationem, non absque magno Fidei periculo, egisset apud Cleri Gallici comitia, vt malo obuiam irent, nostrisque hominibus editionis Patrum curam adiutis nonnulla pecunia Typographis commissam vellent; Consauiauit ea res non tantum hæreticorum sed etiam aliorum quorundam animum, qui vel Societati non vellent optime, vel sub Catholico nomine hæresim fouerent. Hi ergo Schismaticum quendam è Græcia monachum Ioasaphum Parisiis nacti

nacti literas ad Constantinopolitanum Patriarcham
 Raphaëlem Clerumque ipsius scribere illi suadent,
 quibus hortaretur nostræ vt profectiōni animosè ob-
 niteretur ; Viros nos esse ex fraude & dolis compo-
 sitos, Regionum perturbatores, & qui non alia causâ ad
 illos moliremur accessum, nisi vt Patrum Græcorum
 veteribus spoliaremus codicibus, quos more nostro
 peruerse postea editos dogmatibus Ecclesiæ Græcæ
 propugnandis inutiles ad ipsos remitteremus. Fecit
 vagus ac nequam monachus quod suus erat dili-
 genter, ac nisi maior fuisset Legati Regij apud Pa-
 triarcham quam ipsius fides, negotium funditus di-
 sturbasset. Sed Legato de nobis meliora spondenti
 credere ille maluit, literasque monachi in Galliam
 remittendas ei dedit. Rex vt eas literas vidit, ex-
 cauit videlicet in eos quos illis in literis scribendi au-
 thores sibi fuisse monachus perscripserat, grauit-
 erque erat aduersus eos consulturus, nisi illi re abnega-
 ta Græcam Monachi fidem accusassent ; quam cum
 ille non satis purgaret, exilio luit. Restitutum deinde
 negotium, ac Romæ apud Pontificem, Societatisque
 nostræ Præpositum Generalem denuo agitatum, hoc
 demum anno Rege non exiguum pecuniæ summam
 attribuyente, nostrisque illo proficiscentibus felicia
 accepit initia. Hæc vero studia atque opera Cotoni,
 quæ aliquot iam annis in Aula Franciæ suscipiebat,
 ita illum toto Regno commendabant vt eius famam
 non tantum vltra Regni, sed etiam vltra Europæ
 terminos ad vltimas Indias propagarent. Nam hoc
 ipso anno Matthæus Riccius, qui lucem Euangelij
 nostrorum princeps in amplissimum Sinarum Regnum
 intulit, cum abiturus è viuis monita ad virtutem
 quodam quasi testamento suis legaret, hæc inter ce-

tera vt scribit Trigaultius libro quinto expeditionis Sinicæ, inter mortuis prope vocibus pronunciauit. Ego P. Petrum Cotonum qui apud Regem Galliæ degit, in domino plurimum amo, ad eum tametsi ignotum pro eo quod Dei gloriam promouit hoc anno scribere & gratulari statueram, eumque priuatim de nostræ missionis statu reddere certiorẽ, nunc peto à vobis vt quoniam mihi hoc omnino præstare non licebit, vt me apud eum excusetis.

CAPVT XI.

ANNO CHRISTI
1610.

ÆTATIS COTONI
47.

Henrico Rege detestabili parricidio sublato, Cotonum à Ludouico Filio amouere infami libello satagunt maleuoli.

DAbant se posthæc Cotonus initia anni sexcentissimi decimi non solum tranquilla, sed etiam Societati fructuosa. Semel enim illi professus Rex Augustissimus nolle se pati vllam in Regno ciuitatem alicuius nominis in qua Societatis nostræ Collegium non institueret, vt refert Cotonus ipse capite sexto Apologiæ pro se scriptæ, & promissis stare pergebat egregie, & difficultates si quæ obstarent fortiter superabat. Itaque ineunte hoc anno, Cadomensis Collegij natalia extitere, quibus multiplici obstaculo impeditis Cotonus sedulitate & precibus apud Deum Rex crebris præcissisque imperiis, quasi manibus salutaribus est obstetricatus; Neque verò impune quiscumque istis eius consiliis obuiam iit, quin & in offensionem

sionem & cum primum illi occurreret, in acrem etiam
 obiurgationem incideret. At Cotonus moderatione
 maxima eius beneuolentia utebatur, nec facile quid-
 quam postulabat quod non auferret, quia nunquam
 nisi consideratissime postulabat. Etenim vices Dei al-
 terum erga alterum gerere mutuo agnoscebant; Co-
 tonus Regem, ut quidquid Societati ab eo impetrare
 nitebatur non beneuolentia magis quam modestia
 obtineret. Rex autem Cotonum, ut quidquid ad con-
 scientiam attineret, in eo esse satisfactum Cotonum ma-
 gnopere optaret. Quamobrem testatus est Perronius
 Frater Cardinalis, Regij tunc consistorij Consiliarius,
 postea Archiepiscopus Senonensis, audisse se hoc an-
 no Vicennis Regem apud aulicos asseuerantem. Nul-
 lum sibi vnquam cognitum hominem ingenio de-
 missiore ac modestiore quam Cotonum, quem nullus
 aulae fauor extolleret, nulla Procerum familiaritas au-
 dacem faceret, nulla infimorum obseruantia impe-
 riosum. Quo testimonio nullum haberi de Cotoni ad-
 uersus Regem modestia potuit illustrius. E contra verò
 quantum in iis quæ ad conscientiam pertinent, Coto-
 ni sententiæ stare Rex cuperet insigni per hæc ut opi-
 nor tempora argumento est proditum. Refert enim
 Duuallius Doctor Sorbonicus concionatorem quem-
 piam ac Doctorem, qui regnante Henrico III. magna
 cruditionis fama floruerut, librum Henrico IV. con-
 tra Calvinianum quendam Ministrum abs se conscri-
 ptum obtulisse. Cumque Rex sciscitatus esset, quid in
 illo rei pertractaret, respondisse Prædestinationem.
 Rem, inquit Rex, sane difficilem & magnam! Sed
 ego quod Cotonus de ea credit id ipsum plane credo.
 Substitit ille; nec ausus repugnare, & institutum eius
 laudauit & Cotonum. Simile fere est quod memini
 audire

audire me. Cotonus, septimo post hunc anno, nulum Regi tempus maiore conscientiae cura virtutisque impensiore studio exactum quam hunc annum qui illi extremus fuit, quod tum aliis, tum hoc exemplo docebat. Bellum enim Rex instruebat apparatu litis circum gentibus formidabili. Cuius belli cum causas & auxilia familiariter in cubiculo secretiore soli Cotonus edisserere voluisset. Ille qua erat sinceritate & animi fortitudine non dissimulavit, hoc vnum sibi gloriae ipsius ac salutis studiosissimo dolere plurimum, quod negotium totum & haereticorum hominum causa susceptum & haereticis auxiliariis transigendum videretur. Cui Rex, amo vero, inquit dolorem tuum salutis meae amantem, simulque consilia sua altius aggressus explicare, tam abunde docuit mentem sibi tantum esse oppressis amicis opitulari, non tantum nullo Religionis detrimento sed etiam multo maximo si res succederet commodo, ut Cotonus sibi plane satisfactum, quod Rex magno satagebat opere, existimarit. Verum haec consilia oppressit post paucos menses execrabile Regis Optimi Maximique patricidium, quo non tantum Societatis sed etiam totius Galliae cor conuulnerari ac concidere est periclitatum. Aduit tamen diuina providentia ac bonitas quae non tantum Regno Regique Ludouico puero sapientissimam fortissimamque moderatricem, sed etiam Societati nostrae patronam ac conseruatricem amantissimam Reginam Mariam Mediceam illico attribuit. Ad eam enim cum altera die à funesta clade Patres aliquot è nostris salutandi & condolendi causa aduenissent, & Cotonus pauca quaedam dolore & lacrymis oppressus perorasset; Illa rerum gerendarum inter lacrymas non immemor. Te vero inquit mi Pater, adesse mihi
de

de more volo, Filioque meo à confessionibus & concionibus esse quemadmodum Parenti fuisti. Parabatur interea illius iussu donum nostris optatissimum, Cor Regis demortui, quod ille fiducia amorisque in nos sui testandi causa multis ante mortem annis, in Collegij Flexiensis Ecclesia quam exædificabat mandari sepulturæ, si quid humanitus contingeret, imperarat. Id illi de vnus è Regia consanguinitate: Principis manu susceptum Regio in curru inter cereos ciebraque funalia longissimo Urbis tractu elatum, in Ecclesia nostra Parisiensi deposuerunt, & sacris funebribus per dies aliquot procurarunt. Quo tempore obseruata est à multis Cotoni æquitas animi, qui cum sibi periisset charitatum omnium suauissima & maxima, atque vt mox consilic in tanta hominum temporumque iniquitate maxime necessaria, tamen interpias lacrymas & vota pro salute Regis demortui, nihil de instituto siue diuina meditandi, siue agendi cuni proximis, siue libros quos habebat præ manibus, ad umbilicum perducendi labore atque spatio sibi passus est decidi. Decimo quinto post die Flexiam versus cum Regio pignore instituta profectio, visendo Aulicorum in vestitu lugubri, nostrorumque in Sacerdotali cultu dum per Civitatem iter fait, spectaculo, digressis postea præter aliquot primarios Aulicis & effandentibus se in occursum pagis oppidisque, habitæ à nostris vbi visum est opportunum conciones funebres in Regis commendationem: sicque appulsum Flexiam, atque apparatu spectatissimo in primum templum Regium cor delatum, & vbi Coronius concionem absolutissimam de Rege in sacris funebribus pronunciarat, in templo nostro inter elaboratissima Epitaphia conditum fuit. Sed hæc dum Flexiæ

fiunt, turbulentissimam nostris ac Cotonò inprimis tempestatè Parisiis apparabat infernus hostis per satellites suos aut Hæreticos, aut hæreticum animum Catholico nomine occultantes, quibus nihildolebat vehementius, quàm Regis Ludouici lateri Cotonum inhærere, Christianæ legis dogmata ei instillare, Romani Pontificis amorem & reuerentiã suggerere, hæreticorum fraudes detegere, diuinique in primis numinis amorem ac timorem inculcare. Hi enim interea, cum aduersus Societatem communiter nonnulla essent maligne fabricati, maledicentissimum peculiari-ter libellum cui Anticotonò nomen erat, procuderunt, in quo non tantùm collectam regnante Henrico in Cotonum inuidiam copiosè effuderunt; sed etiam Societatem totam per eius quasi latus crudelissimè lacerarunt. Vbi Parisios est reuersum, & totis compitis nihil aliud nisi infanis libelli nomen, & pluribus Ecclesiarũ pulpitis nihil nisi calumniæ in Societatem audiebantur. Sed Reginae providentia tunc factum vt Institores tam profani mercimonij, grauibus pœnis propositis celesiter coërcerentur, & non longe postea diuinæ Iustitiæ vindicta, vt calumniosi concionatores acerbis probrosarum vocum pœnas dependerent. Nam eorum vnus seditionis per conciones flabellum, Romæ quo legatus fuerat, ad Fidei Inquisitores abreptus, vitam quatuordecim annis misere productam in carcere deposuit. Alter, Curio Parisiensis & Theologus atrocium conuictus flagitiorum Ecclesiastico carcere quem pluribus annis incoluit effracto, Geneuam euolans in hæresi est mortuus. Tertius, Dei verbo pro libidine in concionibus ad populum abutens Parisiensis Episcopi sententia, Concionibus tota diœcesi est interdictus. Cotonò vero animus erat adeo excelsus ac
sibi

sibi præclare conscius, ut nemo in eo vel perturbationis vel deiectionis ullum obseruaret vestigium. Ac statuebat ille quidem si ex animi sui sententia rem gessisset, silentio & patientia Aduersarios vlcisci; sed aliter visum eius moderatoribus, qui calumniam vanissima sibi trophæa de innocentia constituere, Christianæ rei non conducere censuerunt. Iussus igitur Apologiam texere, vulgatas in Societatis commune nomen calumnias validissime diluit, priuatim verò in se iactatas suis verbis modestissime, sed testimoniis ciuitatum ac prouinciarum vnde illi feræ calumniæ erant accersitæ, ita profligauit, ut perpetuas notas calumniatorum suorum frontibus ad memoriam sceleris sempiternam inuulerit; quorum testimoniorum partes aliquas cum se occasio obtulit suprâ recitauimus. Potuit postea Aduersarios etiam suos per illum ipsum confutare vehementius, qui scribendo Anticotono manum commodarat, & calumniarum fabricatores eorumque falsitatem nullo negotio prodere. Nam ille facti poenitens, Religiosæ se vitæ addixerat, operamque suam sarcindi quod inferre erat conatus detrimenti, auidus Cotonum offerebat. Sed ille veritati satisfactum ratus, vindictæ & Aduersariorum nomini parcere maluit. Cæterum Regina Regni moderatrix, Principesque ac Procures qui illi aderant in consilio, cum facile intelligerent quorsum pertinerent hæ calumniæ, & oblatam sibi Anticotoni lectionem plerique sunt abominati, & Cotonum Regi quotidie magis admouendum censuerunt. Atque ut omnis hæreticis spes excideret, non tantum ille Regem deinceps ad Missam, ad Vespertinas preces, & aliò assidue est affectatus. Sed etiam cum Regia subinde Remis celebraretur inauguratio, bis ter-ve confitenti aures in pu-

blico accommodauit. Inter hæc autem quàm inuictò solutoque animo degeret, vel id vnum fuit argumeto, quòd præter editionem Institutionis Catholicæ quam tunc pertexuit, & Apologiæ contra Anticotonum quam suscepit simul & perfecit; noua hoc anno opera, quia per Regis ætatem minus erat apud eum occupatus, designare atque aggredi non dubitarit.

CAPVT XII.

ANNO CHRISTI
1611.

ÆTATIS COTONI
48.

*Cotonus graui tempestate à restituendis Collegij
Parisiensis exercitationibus depulsus, nostros
Rodumnae & in Canada collocat.*

Sed intercessit anno sexcentesimo vndecimo priuatis hisce occupationibus publica in Societatem tempestas, cuius exulcerandæ occasio huius fuit modi. Studium erat Cotono incredibile, & Hæreticos errore abducendi & Societatis operâ propagandæ. Eamque ob rem cum non rarò apud Regem Henricum questus esset, nullam esse in Regno Academiam quæ magistrum haberet earum controuersiarum quas Ecclesiæ hodierni mouent hæretici: Rex sermone ea de re habito cum Cardinali Ioyeusæo & Perronio Consistorij Consiliario, cum aduertisset non dissimilem esse eorum querelam, coram Cotono ad se euocato imperat vni Amanuensium vt Literæ conscriberentur, quibus potestas nostris fieret Scholam Controuersiarum in Claremontano Collegio Parisiis instituendi. Nam cæteras disciplinas ibi doceri donec Collegium Flexiense adoleuisset,

adoleuisset, non placebat. Eæ literæ cum viuente Rege vim non habuissent, quod nonnulli vererentur ne ad publicas Academiæ Cathedras hac data via nostri irreperent; multisque agerent apud Regem ne ante, vnâ Scholam Collegio Claromontano redderet quam omnes; quòd illa vna discipulos tantum veteres Academiæ subduetura, non nouos aduocatura videretur; secus autem esset euenturum si omnes simul restituerentur. In quo etsi illi vere, callide tamen ratiocinabantur, cum intelligerent omnium Scholarum restitutionem Regi nondum cordi esse. Sed eo inter has moras tristi fato subtracto, Præses Thuanus, qui probè agnosceret, Academiæ Parisiensis solitudinem non aliunde esse quam ex eo quod flos adolescentiæ Galliæ ad Flexiense aliaque nostra Collegia conflueret, tentandum ratus vtrum is cum Magistris Parisios posset reuocari, Cotonus assiduus instabat vt Collegium Claromontanum suis restitui exercitationibus satageret. Quod cum nostri quoque non mediocriter cuperent, Cotonus est persuasus vt à Regina Moderatrice alias postularet Literas quibus genus omne disciplinarum Collegio Parisiensi restitueretur, nullas iam moras obiiciente Flexiensi, quod in eam iam magnitudinem ac frequentiam quam Rex Henricus optarat peruenisset. Has Literas cum Regina humanissime concessisset, Cancellarius lubens obsignasset, nostri-que vt solet Senatui recognoscendas atque in acta referendas obtulissent, intercessum est ab Academiæ Rectore; nostri-que etsi anno propè vno cessarant, nec vltrò tendere constituerant, coacti tamen ad extremum, in ius ambulare, triduum ipsum conuitia & calumnias tota Europa in omnibus Lutheranorum, Calvinianorum, atque id genus hominum officinis

millies

millies recoctas, præsentēs pertulere. Inter quæ mirifica fuit Cotonī animi magnitudo, siue in Societate ab obiectis calumniis vindicanda, quod ille impenso semper studio fecit; siue in eorum animis, qui se à nobis visi erant eo in negotio abalienasse, reconciliandis; siue in eorum qui in Senatu, vel in Academia quidpiam censebantur posse, voluntatibus promerendis, si quando retractandum esset negotium: cui tamen aliud tempus, aliamque operam diuina reseruarant consilia. Sed ille interea cogitationem de Societate nunquam deponens, Clarissimo Viro Iacobo Cotonō Domino de Cheneuoux Fratrum suorum natu maximo, aut dedit aut auxit animum, Collegij Rodumnæ apud Segusianos nobis in auitis ædibus instituendi. Qua de re hæc ad illum in quibusdam literis verba facit. Gratias Deo habeo ob spiritalia ac temporalia bona quibus te cumulauit, oroque eum quotidie vt eorum nos intelligentes faciat & perpetuò gratos. Fundatio Collegij opus est eorum quæ Deo potes offerre maximum & acceptissimū, posteaquam ei & liberos & teipsum sponte deuouisti. De liberis quod dicit, pertinet tum ad Ignatium Cotonum, qui Societati ab eo sponte traditus, non diu postea in illa sancte est mortuus; tum ad Filias eius aliquot quæ annitente Cotonō nostro, vitam susceperant præclareque degebant, religiosam. Alio vero loco sic scribit. Festina Fundatoris nomen assequi. Nam sacrificiorum millia duodecim quæ à Societate tunc obtinebis, immenso erunt tibi tuisque rebus præsidio. Fecit Iacobus quod monebatur, & præter ædes quas dixi, loco amœnissimo sitas, stipendiaque operariis nostris liberaliter attributa, Ecclesiam etiam egregij operis à fundamentis exædificauit, de cuius ædificij impensis quæ ad me
ipse

ipse scripsit, quia insignes Cotoni nostri virtutes aperiunt, hic iuuerit referre. Vnum, inquit, est quod forte aut non norunt omnes, aut non credunt, cum tamen sit verissimum. Cotonum ex incredibili Regum duorum & Reginae erga se gratia, non tantum nihil sibi priuatim commodatum voluisse; sed ne fratri quidem primogenito & tunc vnico, nisi quod annuum illi de Regio arario congiarium aliquandiu impetrauit; cuius tamen vt summa omnis ad Collegij Rodumnenfis, quod ille fundarat, edificandam Ecclesiam conferretur, eos Ecclesiae fines curauit designari, quibus nec ea pecunia, nec multo amplior fuerit satis. Nimirum solitus erat dicere, nulla se religione tangi si quid accuraret, quod Societati vel Ecclesiae publice commodum esset; sin autem suis, externa id genus commoda & fortunas priuatim quæreretur, vereri se magnopere ne sibi in suis commodaret, gratuitamque in fronte professus operam, mercedem à tergo admitteret. Ita fere Iacobus de Fratre. Cæterum vix istud Cotonus noster inchoarat cum aliud molitus est opus, vt Societati maxime consentaneum quia laboriosissimum, ita ad Dei gloriam præcipuum. Regio enim est latissima in conspectu Oceani Gallici, vel ex Regno nostro Noua Francia, vel ex præcipuo fluuio Canada haud pridem nominata; positione & soli fecunditate, si coleretur, Galliae non dispar: quam hominum millia multa, gens fera ac plane syluatica percurrit magis quam inhabitat: ita illis vita tota venando & sedes mutando transigitur. Huic genti Religionis lucem, & morum cultum per nostros vt inferret Cotonus multum apud Regem Henricum sategit donec ille vixit, neque defuit tam propensæ in Dei gloriam Cotoni voluntati Regia vel approbatio vel commendatio.

datio. Sed quòd vel nulli, vel non multi Galli certas ibi sedes adhuc posuissent, nonnulla iam tum pecunia in viaticum attributa expectare iussit dum sibi quidpiam certius à Viris aliquot explorandæ regionis causa eo missis renunciaretur. Hæc agenti mors interuenit nobis ac bonis omnibus luctuosissima; nihiloque minus cum ad Ludovicum Filium, Matremque Regni moderatricem, qui exploratum ierant, hoc anno rediissent, redintegrato Cotonus studio agere cum Regina institit, vt quæ Maritus tanta virtute ac pietate destinasset, Ipsa effecta vellet, nauique ad Canadenses proximè soluturæ duos è nostris, qui viam cæteris patefacerent, iuberet imponi. Annuit illa, munificeque respondit desiderio. Diepam ergo, vnde erat soluendum, missi qui illam expeditionem primi tentarent Petrus Biardus & Enemundus Massæus, Nauem quæ sola eo anno ad Canadenses adornabatur, comperiunt in Calvinianorum potestate esse: qui vt de nostris inaudiere, palam atque asseueranter edixerunt, Iesuitis locum in suo nauigio non futurum; neque vllis vel Reginæ imperiis, vel Diepensis Præfecti denunciationibus ad ea se patiebantur sententia deduci. Hic Cotonus inopinata difficultate erectior, Antoniæ Pontix Marchionissæ Guercheuillæ, grauissimæ Fœminæ, quæ nostros iam liberali viatico iuuerat, persuadet vti ad percellendos Satanæ conatus, qui boni operis frugem perdere satageret, auxiliarem sibi manum tendere vellet. Itaque illa paucissimis diebus, quæ eroganda quæ corroganda pecunia, eam summam conflauit, quæ Calvinianis illis nautica Societate depellendis sufficeret, nostrisque sua beneficentia & industria mulier cordatissima, post quadrimestrem fere nauigationem, nouum illum bene

merendi de humano genere campum aperuit. Ac licet Anglorum iniuria, quæ nostros bienniò postea captiuos inde abduxit, Eius & Cotoni operam, pro hæretico videlicet diuinæ gloriæ odio, visa sit per aliquot annos retardasse, non tamen aut animum aut conatum extinxit nouæ expeditionis anno millesimo sexcentesimo vicesimo quinto, qui Cotoni extremum præcessit, vt suo loco narrabimus, eas in Regiones suscipiendæ. Cæterum cum Calviniani, Regum Regnorumque perniciēs, Regis impuberis ætate imbecilla audaciores facti, tumultus tota Gallia minitarentur, & vero etiam machinarentur extremo hocce anno, nisi suorum comitiis immoderata postulantibus satisfaceret, incredibile est quantum Cotonus apud omnes quos pietate ac sanctitate excellere tota Europa nouerat, laborarit vt diuinum numen Regi ac Regno precibus impensissimis propitiarent. Vidi ego viri optimi literas, qui Neapoli maxima à Deo beneficia inter Eucharisticum sacrificium solitus erat impetrare: Quibus literis stipulanti Cotonò respondebat nulum se sacrificium facturum quo non Regis Regnique incolumitatem Deo ex animo commendaret. Alterius etiam literas habeo Roma scriptas, qui & Regis & Cotoni ipsius causa, septies in die diuinam se bonitatem sollicitaturum spondet, vt & alterum Regno seruet Fideique Catholicæ propagandæ studio succedat, & alterum illi vtilem ac salutarem præstet.

CAPVT XIII.

ANNO CHRISTI
1512.ÆTATI COTONI
49.

*Societatem Libro scripto, multaue sedulitate
intentatis calumniis eximit.*

NE nihil nouæ exercitationis Cotonno ac nostris, quod singulis fere annis insigniter hætenus fecerat, Infernus tenebrio adderet; Causidicum, qui contra nos in Senatu anno superiore tres dies erat debacchatus, eò impulit hoc anno vt actione sua typis euulgata totius Galliæ oculos atque animos turpissimis mendaciis impudentissimisque calumniis inficere non dubitarit. Sed non defuit Societati Cotonus, nec vllam quietis partem cepit, donec per se vel alios luculentissima testimonia ex omnibus Europæ regionibus accerferet, quibus Pontifices, Reges, Nunciij Apostolici, Episcopi, Principes, eorumque Cancellarij nos ab obiectis à causidico criminibus vendicarent. Quæ ille testimonia cum inferuisset in librum defensionis nostræ causæ, Aduocati nostri nomine abs se egregie hoc anno elaboratum; & accusationis nostræ architectos si non quo par erat pudore ingenti certe dolore; & probos omnes eximia gratulatione compleuit, quòd aduersus tantas moles calumniarum & hostium, singulari Dei benignitate Innocentiam nostram non tantum tuto, sed etiam illustri loco per ea testimonia collocatam viderent. Sane quocumque hic Cotoni labor penetrauit, mirabiles in hominum animis commutationes effecit.

Ambianos

Ambianos beneuolentissimam nobis ciuitatem sum-
missus erat Causidici liber , vt aliquam forte beneuo-
lentia labem afferret : & mouerat duorum hominum
animos, vt eius calumnias pro veris nostris crimini-
bus iactarent in vulgus , sed fecit eorum lectio quæ
Cotonus adornauerat , vt Magistratus vtrumqueduci
iuberet ; alterique multam ; alteri eam ignominiam,
nobis nequidquam deprecantibus, imposeret, vt nu-
datis capite ac pedibus , nixus in genua , sola tectus
interulalinea , ardensque funale manu præferens, quæ
dixerat , in publico retractare noxæque veniam à
Deo & nobis absentibus supplex postulare cogeretur.
Iam Rothomagi cum eundem Causidici libellum Bi-
bliopola quispiam prælo de integro committere , la-
tiusque vulgare instituisset , Senatus Rothomagensis
id graui interdicto vetuit , & Chalcographum minus
dicto audientem ea coërcitione repressit , vt prælo
iam eductas schedas igne, vstulatas videret. Quid?
quod apud ipsos etiam hæreticos veritatis voces va-
luere ? Nam Neraci in Aquitania , vbi tunc Senato-
rum Burdegalensium decuria altera parte Caluiniana
residebat , idem calumniarum contextus cum venalis
circumferretur, Senatorum consulto decretum est , vt
publice concerperetur , nefariæque mercis propola ad
tempus non breue in carcerem compingeretur. His
rebus videri poterat longa Cotonio ac nobis parta
tranquillitas, sed res ei erat cum Dæmone hoste im-
portuno atque inexpiabili , qui vix ista defuncto no-
uam illi apparauit Tragædiam, eo tristiores ac mole-
stiores quo magis improuisam. Nam fluitantem ad-
huc in salo Societatis famam , mox denuò tempestas
excepit , perque scopulos sane periculosos transmisit.
Intenta quippe in omnem occasionem maleuolentia,

cum nihil in Gallia comperiret quo nocendi sitim
explere posset, mediæ Germaniæ commentarium quen-
dam Martini Becani accersuit, è quo decerpta quæ-
dam capita, temporum atque hominum inuidiæ ob-
iiceret. Nec dubium erat quin si in ea institueretur
tunc quæstio, summa quædam iudicii seueritas foret
pertimescenda. Verùm Regina à Cotono monita,
quantum ab æquitate atque humanitate ipsius ab-
esset, si vel vnius cuiuspiam verba in alios eiusdem
nominis atque instituti homines vindicari, vel ea quæ
eruditissimæ etiam linguæ vix satis cautè norint euol-
uere in vulgi sermones deduci sineret; benigno edi-
cto denunciauit, non placere de illo commentario
quæstionem à quoquam haberi. Retulit posthæc li-
beriorẽ paulò animum Cotonus ad solemnia pieta-
tis negotia. Quanquam ea erat in eo animi firmitu-
do & capacitas vt nulla eum negotiorum vel multi-
tudo vel difficultas perturbaret. Solebat enim de eo
dicere grauissima scemina Domina de Fleuri Villare-
gij clarissimi Viri soror, quæ domi suæ Cotonum diu
habuerat inquilinum: Nullum se vidisse hominem
magis occupatum, nullumque minus impeditum.
Ergo nobilissimo gratissimoque omnium, quæ habe-
ret negotiorum, Regis iam adultioris ad pietatem
institutioni alacrius iam intentus, tantum illi rerum
Christianarum studium indidit, vt & earum auditio-
ne suauissime teneretur, & cum accepisset in Parisiensi
Nouitiorum nostrorum æde certamen inter primarios
pueros de Christianæ Fidei elementis hoc anno in-
stitutum, interesse ipse voluerit, præmiaque singulis
pro eruditione distribuere. Qua in Regis institutione
quantum promouerentur Regni totius & præsentis
commoditates & futuræ expectationes declararunt
Regni

Regni Comitia duobus post annis. In quibus Ordo Ecclesiasticus amplissimis verbis Reginae gratias de omnium Ordinum sententia habuit; quod tam Christiane ac pie Regem educari curaret. Cæterum ubi Cotonum inter hæc aliaque eius generis opera defecerant dies, nocturnæ excipiebant lucubrationes, quarum opera hoc & proximis aliquot annis constitit, in tomo vno Meditationum Sacrarum, & duobus Concionum.

C A P V T X I V.

ANNO CHRISTI
1613. & 1614.

ÆTATIS COTONI
50. & 51.

*Hæreticis & delusis arte Malefica, ut ad Fidem
& Sanitatem redirent, egregie est
opitulatus.*

DVo inter priores aliquot ac posteriores fluxere Cotonon nonnihil solito tranquilliores anni, huius sæculi tertius & quartus post decimum. Fuit enim Societati quæ cum primis illi curæ erat ab hostium impugnatione nonnulla tunc quies; quanquam ob communem Ecclesiæ causam ne tunc quidem labor illi aliquis aut sollicitudo defuerit. Enimverò cum ante annos aliquot Benearnensium Episcoporum gratia, multa ad Catholice Fidei illa in Prouincia restaurationem ab Henrico Rege impetrasset; illudque in primis ut Catholicas conciones nostri, quibus id pridem fuerat interdictum, habere illic ad populum possent: Visum est hoc anno Senatui Prouinciæ, qui fere tunc è Calvinianis constabat, nonnulla aduersus Henrici
de creta

decreta populorumque salutem constituere, in quibus illa duo fuere capitalia; ne Catholici concionatores plures tota Prouincia esse possent quam quatuor, cum Ministri Calviniani essent sexagenis plures; &, ne confitentibus aures præbere nostris liceret. Quæ ubi Cotonò fuerunt renunciata, exarsit videlicet iustissima ira, tantamque Diuinæ ac Regiæ Maiestatis iniuriam tam impatienter tulit, vt nullum fecerit finem; facinoris illius apud Reginam, Regiumque Consistorium suis coloribus depingendi. Ac nisi maxima tunc fuisset temporum iniquitas, obtinuisset videbatur vt res tacita non præteriret. Illud certe confecit, vt Aulæ constaret, magno remedio cum se occasio daret, malo illi faciendam medicinam; quam sane non multis post annis alia opera, sed non alio diuinæ gloriæ studio factam sibi Benearense gratulantur. Hæc dum gererentur Parisiis, insignis agebatur Tragœdia Nemausi Arecomicorum, quæ multum Cotonì operam Christianæ rei gratia habuit occupatam. Etenim cum ante annos quatuordecim conciones illic, vt libro primo scripsimus, magna hominum gratia haberet: Jeremiam Ferrerium hominem florentissimi inter Calvini Ministros nominis, nonnulla sibi amicitia vsuque familiaritatis coniunxerat, nec vanam iam tum spem conceperat, animi eius ab errore abducendi. Dum tamen ille nescio quibus ex causis rem differt, autor ei fuit Cotonus ad diuini luminis gratiam promerendam hoc saltem intereà publicæ Regis ac Regni tranquillitati conferret, vt in hæreticis conciliabulis, Calvinianos idest seditiosos impetus suorum, pro ea qua apud eos erat authoritate comprimeret ac demulceret. Cuius consilij ille memor, Henrico IV. seditiosorum domitore humanis rebus exempto, Cotonò

tono per literas spopondit se Reipublicæ cum maxime vltus foret operam nauaturum Regisque ac Regi-
næ nomine ab illo oprime animatus promissi aliquandiu fidem expleuit. Sed vix illum semel atque iterum mitia sectantem consilia, Caluiniani ex furore ac seditione plane compositi, obseruarant, cum iactare ceperunt discessionem illum à Caluinismo meditari Regia redemptum pecunia, camque ob causam Caluinianum illi Ministerium abrogarunt. Quo sacrilego munere, non ab illis violentius quàm à seipso cupidius exutus Parisios ad Cotonum venit, & ab eo Regi-
næ impense commendatus inter Nemausensis Curriæ Consiliarios est allectus. Sed ne hic quidem quiescere per Sectarios ei licuit, qui turbulenta plebe excita, ferro, flamma, lapidatione in rem eius familiarem, grassati, Parisios illum rursus cum suis perfergere compulerunt, vbi cum hæresim aperte iam eicrasset, seque ac sua in Cotonum proiecisset, opportunis Regis Clerique Gallici remediis in tuto est collocatus. Hos atque alios Cotonum labores non qua homines vulgò æstimant mercede, sed qua ipse summæ benignitati se maxime obnoxium crederet, visus est Deus tunc rependere, cum Nepotem eius vitæ innocentia spectabilem è Societatis Tyrocinio in emeritas Cœlestium turmas cooptauit. De eo sic scripsere literæ anni decimi tertij post sexcentesium è Parisiensi tyrocinio datæ. Ignatius Cotonus annorum duo deniginti adulescens, octo mensium continenti grauique vexatus morbo, Niuerni quo venerat mitioris cœli hauriendi gratia, occubuit. Tyro multiplicium præcellentiumque virtutum studio clarus, qui si euaderet in virum, expleturus videbatur eximia religionis numeros, ita cum natura expresserat, & finxerat cultura ad Instituti

tuti nostri maxima quæque decora. Quo vero animo mortem eius acceperit Cotonus patruus, docet pars ista literarum quas ad Tyronis Patrem dabat sub eius decessum. Illustrissimus, inquit, Dux Niuernensium, & Reuerendissimus Episcopus, magno nos obstringunt beneficio, quod Ignatij Cotoni curam gerunt. Verum multo maximum tibi mihi que erit à Deo munus, si illi cordi fuerit, ipsum hoc statu animi euocare ab hoc mundi cœno, cuius me tam crebrum tamque graue tenet fastidium, ut inter mortis maximum desiderium, sola mihi insit vitæ ex Dei voluntate tolerantia. Accipe nunc quæ Cacodæmoni implacabiliter hætenus insæuienti Cotonus reposuerit anno eiusdem sæculi decimo quarto. In Cantabria inferiore quæ ditionis est Gallicæ, & Pyrenæorum montium interiectu ab Hispanica discluditur, aut insito genti vicio, aut longa Christianæ institutionis penuria, tam late patens Magiæ ac Maleficii regnum nequissimus sibi spiritus constituerat, ut Sacerdotali Plebeioque Ordine ea passim labe infecto, nulla Burdegalensium Quæstorum seueritas, nullæ cruces, nulla busta eum de possessione possent depellere. Quæ res cum Cotonò à Burdegalensibus fuisset renunciata, autor ille fuit Reginæ moderatrici Regni, ut volente Senatu nostri eam in Regionem excurrerent, qui proposita impunitate iis qui Exorcismis & Sacramentorum usu Dæmonis in se potestatem abiudicare vellent, suauibus remediis malum sanare conarentur. Laudauit Regina consiliū, sumptibusque eam in rem attributis, nostrorum aliquot eò voluit destinari. Ergo qui missi fuere, nondum discusso præteritorum iudiciorum ac suppliciorum terrore, pauculis initio hominibus persuadere ut Ecclesiæ remediis uti audacter vellent. Sed
posteaquam

posteaquam eos qui erant vñ Dæmonum iniuria , & sagarum incurſu in diuturnum tempus liberatos eſſe vulgabatur , bene magni cœtus adoleſcentum qui tenelli adhuc & doli neſcij, vel à nequiſſimis Sacerdotibus vel à Sagis Orco erant deuoti ; nec pauci ſenes, qui quadragenariam vel longiorem ſeruitutem Dæmoni ſeruiſſerant, ad noſtros abiecto pœnarum metu accurrerunt, tam vberi euentu, vt menſibus minus quam ſenis, ſexcenti homines Tartareo ſoluti aucto-ramento ad Chriſtiana ſacra reuocarentur. Conatus eſt, vt puto, ſe Dæmon vlcifci, ſed imbelli atque infelici vindicta. Nam in primis hominem illi quempiam exciuit diris melancholiæ vaporibus in dementiam verſum, qui cum delira quæpiam ab eo frequenter poſtulaſſet , mollemque ſemper ac morbo quo tenebatur conſentaneâ reſponſionem tuliſſet; pertæſus tandē ſuauiū verborū, importunus illi ad omnē Palatij, Eccleſiæ, ac Domus noſtræ exitum aderat, pugno interdū aut cubito ferociter impellens , ac poſtulata ſibi repræſentari perurgens. Quem Cotonus cum coërcere facile per Regios miniſtros poſſet, perſeuerauit tamē aliquot annos tolerare, ac quantum poſſet verbis mitigare, donec illi aut ſanitas cogitationē de Cotonio ademit , aut morbus eam alio conuertit , aut Dæmoni Cotonij patientia doluit. Tendebat iam in exitum fere hic annus; cum Reipublicæ pacandæ cauſa Rex , Regina & maxima natu. Regis ſoror Piſtauos & Britones adiere; & Cotonus ſequi iuſſus toti Regiæ Domui, quod hætenus non contigerat , à Confeſſionibus fuit ; dum apud Namnetas , Cœnomanos & Carnutes Sacris participaret. Tanta porro eius audiendi cupiditas inceſſerat populos earum regionum , qui tunc primum cum videbant , vt minus quam ſexaginta diebus coa-

ctus fuerit plusquam tricies dicere coram concione
vbique admodum numerosa. Post Aulae reditum Pa-
risios, coacta sunt ad mensem Octobrem generalia
Regni Comitia: & pertasi, vt arbitror, nimis diutur-
næ per annos fere duos tranquillitatis nostræ, qui vel
Cotoni in Aula gratiam vel Societatis in Gallia
restitutionem concoquere non poterant; cum multa
hactenus contra nos moliti essent, tum illud nunc sunt
aggressi, vt in Societatis Instituto multa annotarent,
Regni, vt aiebant, moribus ac legibus aduersantia,
quorum emendatio à Comitibus scilicet vel expectare-
tur vel desideraretur, vt in Gallia vtiliter conque-
scere nobis aliquando liceret. Tangebatur intime Co-
tonus omni Societatis iniuria. Itaque continere se
hoc loco non potuit, quin libellos qui hac de re pro-
dierant contrariis scriptis confoderet. Et Comitia adeò
non sunt ab Aduersariis nostris permota, vt à Rege
expetierint potius, vt Societatem peculiari tuitione
foueret, Collegium Claromontanum restitueret, &
alia Collegia toto Regno propagaret.

CAPVT · XV.

ANNO CHRISTI
1615. & 1616.

ÆTATIS COTONI
52. & 53.

*Cum desiderio abeundi Aulica vita teneretur
maximo, Fit Voti compos.*

INter hæc adfuit annus huius sæculi decimus quintus,
quo Rex Ludouicus iam natu grandior tam illustria
puritatis, moderationis, omnisque pietatis specimina
præbebat, vt & rediuiuam Ludouici IX. Cœlitibus
ascripti imaginem videre sibi Franci viderentur, &
sapien

sapientissimæ piissimæque matri Reginæ omnes Regni Ordines qui tunc conuenerant gratias referrent copiosas ob sanctissimam eius institutionem : Quin & in libris hac causa editis ea de Cotonò dicerentur, quæ insignem animi eius demissionem magnopere onerarent. Post Comitiorum dimissionem data est opera Regiis matrimoniis Gallos inter & Hispanos, quæ pridem desponsa atque optata à plurimis, insigniter ab aliis impugnabantur. Cumque Regio prope funditus conturbato, pauci ea perducere possent ad optatum exitum sperarent, fertur Cotonus ea asseueratione pluribus confirmasse, felicem totius negotij euentum, ut plus aliquid scire de illo, quam humanitus posset, videretur. Itaque non dubitauit Regi de obiectis difficultatibus differenti aliquando hæc dicere : Mihi, Rex, tam certo liquet matrimonia ista prospere conficienda esse, ut si me hac in re animus fallat, nunquam illi fidem sim in posterum habiturus. Et constitit toto gratulante Regno animo eius fides. Hæc se ex Cotonò audisse, cum omnium animos negotij desperatio maxime occuparet, testatur etiam hodie Magdalena de Sancto Iosepho, maiori Carmelitidum Monasterio Parisiis Præfecta. Porro dum Regina mater virilibus, ac nescio an etiam cœlestibus animis plena, negotio insisteret, nullam cogitationem passa est prauertere eam quæ ad liberorum suorum conscientiam omni ope muniendam pertinebat. Itaque cum spectatissima Cotonì virtus egregiam ei spem faceret, alios capi ex Societate nostra posse, qui eius affectarentur vestigia, duos sibi ex ea depoposuit, Patrem Ioannem Suffrenum maxima tunc Parisiis approbatione hominum, concionantem; & Patrem Marguestanum Hispanicæ linguæ bene peritum; istum ut Filix suæ Principi

Y Hispano

Hispano desponsæ ; illum vt sibi à Cōfessionibus esset. Cotonum enim à Regis Filij latere abscedere ne sua quidem causa volebat. Qua de re cum ad Fratrem Cotonus tunc scriberet , hæc habet inter alia : Magna me cupido incessit Reginæ Sororis Regis , Confessionum eius audiendarum causa, affectandæ , munereque meo Patri Ioanni Suffreno cedendi , duabus ex causis ; Et quia ille multo quam ego melius eo defungeretur , & quia mihi quiete , immo potius secessu & solitudine magno-
pere est opus , quam alibi obtinere me posse diffidam , nisi ea in regione , quæ ob patrij sermonis imperiti-
tiam , vna tantum in re non difficillima occupatum me sit habitura. Sed hæc videlicet illi cupido hæ-
ferat à vehementiore desiderio depulso. Incredibile enim est quam illi semper sollicita omnia atque sus-
pecta in vita aulica fuerint, quantoque opere egerit , vt per diuinæ prouidentia consilia,licitum sibi esset nun-
cio Aulæ remisso vitam à turbis semotam denuò sa-
lutare. Quid non ille hanc ob rem, dixit, fecit, scripsit? Vidi literas eius complures ad Fratrem , ad Viros , ad
Fœminas Religiosas, quibus aut propositis hinc inde
vel perseverantiæ in Aula , vel secessus argumentis,
nunc prudens efflagitabat consilium , nunc diuinam
de alterutro voluntatem precibus & sacrificiis disqui-
ri , verbis demissione amoreque vitæ perfectioris ple-
nissimis precabatur. Audi nunc quid hac causa susce-
perit. S. Bernardum Clareuallis Abbatem inter Pon-
tificum ac Principum virorum , aulas vitam duxisse
diuturnam atque in primis sanctam iampridem gna-
rus, illum enixe statuit propitiare , vt opem sibi qua
apud Deum valet plurimum , vel ad abdicandam
quamprimùm , vel qua decet cautione ac sanctitate
retinendam

retinendam aulicam vitam commodaret. Itaque impetrato ægre comæatu ad Monasterium vbi corpus eius est situm , sacrificiorum certum sibi indixit numerum vt diuinam expiscaretur voluntatem. Ac non satis nobis tunc constitit quid ille lucis ad rem suam hauferit à Deo; sed diuinam tamen per se & alios sollicitate bonitatem non destitit, vti sibi mature repræsentaretur missio , auditusque est ab hominibus piis non absque admiratione, cum diceret, Morari in Igne Purgatorio vsque ad Iudicij diem, si ita Deo visum esset, minus sibi molestum fore, quam deponere in Aula vitam. Obtestabatur vero aliquando quempiam magna apud se opinione sanctitatis , feruentes ad Deum sua causa preces impendere, vt Aulicæ commorationis suæ tempus in angustum cogeretur ; illoque religionem obtendente, ne forte hoc esset diuinum refugere obsequium, cuius tam multæ occasiones in Aula suggererentur, Ipse è contra vultum sincerissimo rubore suffundens : Hoc vero, inquit, est quod mihi animum maxime pulsat, dum tam paucas à tam multa segete spicas colligo, ac si quid perficio infinita negligentia corrumpo. Quæ ille tanto animi sensu pronunciabat, vt in verbis mens tota appareret. Tanta illi inter perpetua merita sui inhærebat despectio. Fœdum habuit deinceps Gallia annum sæculi decimum sextum ciuilibus bellis ; Cotonus autem peculiariter infestum. Græcam enim Ecclesiam , vt narrauimus, missa nostrorum hominum manu iuuare , atque insanitatem si posset reuocare sategerat, nec regiam solum auctoritatem , sed etiam copiosas Virorum Matronarumque pecunias eo corrogarat. Omnes tamen labores suos hoc anno quorundam hominum inuidia prope in irritum deductos, conspexit; Nostri qui Constan-

nopoli

nopoli erant per iniquas delationes, tetro primum carceri addictis, tum grandi mulctatis pecunia atque ad extremum Turcicorum Magistratuū infesto elogio ex parte maiori iussis exulare. Sed ille contra infernorum hostium fraudes atque impetus erecto celsoque animo semper incedens, & sollicitata de nouo piorum hominum charitate, pecuniaria damna bona ex parte refarciit, & nouas operas eo submissas protegere ac fovere non cessauit. Hæc foris; sed domi alta erat Cotonum quies inter Aulicas quæ tunc gliscebant dissensiones. Totus enim in id incumbibat, vt fidem suam liberaret in promisso iam olim Opere Geneuæ Plagiariæ; nec tamen intereà satis obtinebat, vt pietas eius, atque erga dignitate Superiores charitas & obseruantia non in aliorum suspiciones parum amicas traheretur. Quo pertinent verba hæc illius ad Regem, in Epistola operi quoddixi præstituta. Hinc, inquit, omnibus liquebit, in molestissima mihi commoratione aulica alias in res tempus à me consumptum, quam in negotia vt vocant Status; quæ non minus ab animi mei ingenio, quam à susceptæ vitæ Instituto sunt aliena. Quod si quis etiam voluerit meminisse inter conciones ex ordine solito habitas, & pias occupationes præter ordinem susceptas, Volumen hoc meum confectarium fuisse Institutioni Catholicæ, Tomo vni Concionum, duobus Tomis Meditationum, Apologiæ aduersus Anti-cotonum, libello multiplici precandi ex formula, & libro de Intima occupatione mentis; is profecto multo magis assentiet iis quæ dico. Atque hæc mihi necessario scribenda fuere, vt calumniæ obuiam irem, quæ seruis Dei absentibus æque ac præsentibus instat sine missione infesta. Sane Cotonum idonea hiæ vsum defensione, non tantum ex hoc numero librorum
eius

eius conficitur, sed etiam ex aliis operibus, quæ hic omilla, recensuit tamen in breuiculo quopiam, inter ipsius chartas post mortem reperto. Nam præter opera hæc quatuor ante vitam aulicam abs se edita, Tractatum de Eucharistia, Apologeticum pro Deipara, Acta Disputationis cum Chamiero, & eorum Epitomem; recenset etiam opera quatuordecim in Aula variis ex causis à se scripta & euulgata. Ad illa enim septem quæ in Epistola iam citata numerauit, adiiciuntur in breuiculos: Liber contra Ministrum Giggordum, Epitome controuersiarum, Enchiridion pietatis. Veritas detecta de Henrico Iesuita combusto Antuerpiæ, Actio Montholoni contra Martilierum, Defensio Concilij Tridentini, Defensio Instituti Societatis: His verò omnibus addidit ad extremum post exitum ab Aula, contra Turretinum Caluini Ministrum, Relapsum Geneuæ Plagiariæ. Hæc ergo inter, qui tantum illi otij esse suspicabantur, aliena abs se vt curaret; næ illi & humanæ mentis vires, & probatam tot iam exemplis Cotoni virtutem non satis æstimabant. Sed nimirum diuinæ iam stabat prouidentia cum ab Aula abducere, eamque ob rem non ipsum tantum eo quo iam pridem abundabat aulæ fastidio cumulabat, sed Aulæ quoque iam nonnullam ipsius satietatem permittebat, cum optatam ex illis quasi vinculis missionem ei esset anno proximo representatura. Ex quo anno, extremi deinceps Vitæ ipsius libri, commodè ducetur nobis vt opinor principium.



LIBER TERTIVS
DE VITA PATRIS
PETRI COTONI
è Societate Iesv.

CAPVT PRIMVM.

ANNO CHRISTI
1617. & 1618.

ÆTATIS COTONI
54. & 55.

Aula abscedens Lugdunum Concionatum iit.



ULTIS nominibus exoptatus tandem
aduenit Cotonò annus decimus septi-
mus post millesimum sexcentésimum.
In primis enim hoc anno est elucubra-
tus susceptum ab annis decem & octo
Opus, quo Geneuensium plagium in veteri versione
Bibliorum de manibus hominum subducenda, vt im-
purum ac illegitimum Versionis suæ scætur pro ea
substituerent, copiose conuincebat. Quod opus quan-
ti ipse faceret declarauit hisce ad Regem verbis, eius
operis fronti appositis. Ab eo, inquit, tempore quo
Henrico magno placitum fuit Maieitati vestræ me at-
tribuere, tum vt ad prima Christianæ Fidei elementa
Illam erudirem, tum vt precanti, & conscientiæ se-
creta

creta confessione exponenti adesset, nullum me illi arbitror obsequium præbuisse præter educationem ad pietatem, cum eo conferendum quod aggredior dum id Opus euulgo, quod nunc ad Maiestatis vestræ depono vestigia; salutarituitiois illius umbra protegendum. Nec est quod quis suspicetur suo Cotonum sibi testimonio blanditum. Nam Cardinalis Perronius, cuius iudicio in hoc scriptorum genere non facile aliud acrius Gallia tulit, tanti illud fecit, ut & perpetuo haberet in conspectu, & apud amicos proficeretur; Alteram euertendæ in Gallia hæresi machinam à Cotonò, Alteram à se intentam. Cotonum enim diuinæ Scripturæ, se Sanctis Patribus allata maligne ab Hæreticis vitia in apertum protulisse. Iam verò illud etiam Cotonò contingit multò opatissimum hoc anno, quod Rex Ludouicus, ætate iam ac virtute adultus receptum ante annos aliquot à Matre optima ac sapientissima Regni gubernaculum orsus moderari, hoc faciliorem illi ac iucundiorē ab Aula secessum præstitit, quo & ipse aliena iam omni institutione superior videbatur; & Cotonò iam pridem expetenti iustius, atque ei qui tunc erat Auræ statui commodius concedebatur. Sane missionem suam ex Aula non tantum sibi ipse magnoperè est gratulatus, sed ut aliorum quoque, quasi de beneficio Dei maximo gratulationem exciperet, Pontifariam illicò ad Mariam de Incarnatione Carmelitani Ordinis, magna apud se iam olim opinione sanctitatis formidam accessit, cumque ex ea audisset, quanto ipsa quoque Cotonì comodo tribueret eum regressum ad vitæ pristinæ tranquillitatem, incredibili exultans gaudio remittere tunc primum rebus creatis nuncium, religiosamque vitam inchoare est visus. Quare directo

Lugdunum itinere , paucis postquam eò peruenerat diebus in domum Nouitiorum se condidit, precibusque creberrimis ac vehementissimis condendit ab iis, qui Societati illic præerant, vt vnus minimùm annus sibi tribueretur à concionibus , cæterisque cum populo occupationibus liber; quò actæ in Aula vitæ rationibus cum Deo positis collectæque ad nouos labores spiritu alacrior subinde ac vegetior posset in publicum redire. Sed votis hisce intercessit Episcoporum populorumque voluntas , qui vocem eius è suggestis eo efflagitabant vehementius , quo illa impatientius diutiusque caruerant. Itaque in primarium Lugdunensium templum ; altero quam se in Nouitiorum domum subduxerat mense, prodire coactus, conciones per Aduentum ad populum habuit, tanto gratiores quam olim , quanto ipse & rebus gestis erat illustrior , & demissione animi, pietate , diuinique honoris amore auctior. Inde iterum ad Nouitios aduolauit anno eiusdem sæculi decimo octauo , acturus inter ipsos non aliter quam ex ipsis vnus. Mira illi erat voluptas, & pios animorum simplicium cogitatus in rem suam aptatos sublegere, & sermonibus hominum terrestria tantum ac fluxa sapientium non amplius obtundi. Nihiloque fecius non solùm Nouitios crebris cohortationibus ; sed non paucos etiam alios ad pietatem instituere priuatis colloquiis pergebat. Quadragenariis subinde concionibus defunctus est eodem quo prius templo, tanta apud Auditores gratia , vt inimicitias quamuis inueteratas ac prope inexpiabiles eius interuentu deponere quidam sint persuasi. Erat inter eos vir nobilis & egregie militaris, cui plures iam annos acre intercedebat dissidium cum filio, filia & coniuge , in quo componendo plurimum Religiosorum
aque

aque ac nobilium Virorum opera delusa fuerat. Eum Cotonus pridie quam Christi celebraretur Passio ad se plectum in cubiculum, ita Christi exemplo appositisque verborum medicamentis emolliit, ut Filium cuius causa subortum erat dissidium à Cotono ex composito introductum atque ex improviso ad genua accidentem lacrymis manantibus sit amplexatus, receptamque deinde in gratiam Filiam & Coniugem qua decebat pietate sit prosecutus, tota applodente ciuitate. Lugduno haud multo post has conciones digressus, Beatam Virginem Anicij in antiquissimæ religionis templo salutatum iit. Quo in itinere nocturnis interceptus tenebris cum ad fluuium incerti ac periculosi aluei peruenisset, comitibus ob vadi ignorantiam periclitari transitum magnopere verentibus, ipse collecto breuiter ad orationem animo, cæteris sequi iussis equum primus in aquam impulit, eaque viam direxit, ut facile appareret ducem illi præire aliquem, nulli alij aspectabilem. Narrauit ipse haud multo postea piissimæ Fœminæ cuius silentio confidebat, in transmittendo fluminis vado candidatum quempiam virum sibi à gurgicibus proximis abducto præiuisse ad ripam, nec postea comparuisse. Quod euenisse hoc tempore qui ei tunc adfuere magnopere suspicantur. Anicio reuersus, multisque simul conciones eius vndequaque flagitantibus, ita operam dispensauit; ut Molinensibus eas quæ octonis diebus celebritatis Sanctissimæ Eucharistiæ haberi solent; Gratianopolitanis quæ ad Beatæ Virginis Assumptione; aliis alias tribueret. Mira vbique audiendi auditas, mirus ad eum concursus fuit, dum alios famæ celebritas, alios veterum concionum suauitas prolectaret. Habuit enim tantum mellis eius oratio, quantum ad

Auditorum appetentiam perenniter quodammodo prouocandam tantum solidi cibi, quantum ad pascendam & nunquam satiandam sufficeret. Ac licet interdum ob concionandi frequentiam eadem reponere cogeretur, tamen ea erat dictionis gratia, ut non minus secundo audita delectaretur quam primo. Sed dum Gratianopoli post eas quas dixi conciones Valentiam progrediretur insigni illi sanitatis demonstrandæ occasio intercessit. Medio enim in itinere nulla statione commoda, tam graui morbo afflictus est illi Socius, à quo hæc accepi, ut inter æstus febris ardentissimos, cibique omnis fastidium, biduum totum trahere ipsum magis quam ducere cogeretur. Hoc statu ad S. Marcellini Ebredunensium primi Episcopi oppidum ac celebre illa regione templum, cum ægre illum prouexisset Cotonus, multum expetenti despondit se à Deo ac Sancto Marcellino opem illi inter fœra postulaturum. Et ille cum nec stare, nec genibus niti posset ad fundam adrepens Ecclesiæ à tergo altaris in quo sacrificabat Cotonus consedit, videlicet æstuarè perrexit ut solebat, donec eo peruentum fuit, ut sacer Christi sanguis hauriretur: Tum enim corpore momento refrigescente, dolore capitis concidente, sedatis ventriculi torminibus, integræ se redditum sensit sanitati, atque in hospitium cum Patre reuersus cibum qua olim appetentia, iter qua solebat alacritate carpere cœpit. Neque verò vnquam postea dubitauit, quin hoc sibi à Deo beneficium solemniter Cotonus in Sacramenti usu Religio impetrasset. Valentia triduo concionatus, cœlestis etiam virtutis vestigia non leuiter impressa reliquit. Nam cum apud nobilem ciuem hospitio esset exceptus, materfamilias tam vehementi capitis dolore cruciata ut lacrymas tenere non

non posset , interno quopiam monitu moueri se sensit ,
vt in ceruical cui nocte proximè lapsa Cotonij caput
incubuerat suum ipsa caput deponeret . Quod vt fecit
momento temporis omni doloris sensu liberata fuit .
Hoc se ab ea ipsa quæ beneficium senserat accepisse
sancte est testatus P . Claudius à S . Columba Turnonen-
sis hoc tempore Collegij Rector . Tendebat hinc Co-
tonus Tolosam , vt ad populum diceret per Aduen-
tum . Longum iter , & varia interiacentium incola-
rum circa Religionem studia . Nullam tamen ciuita-
tem , vna excepta , nullum prope oppidum sine con-
cione præterit ; sed ne ab exilibus quidem pagis ali-
quando abstinuit , plane pertransiens non tantum sa-
nando , vt dixi , aliquos ; sed etiam benefaciendo pleris-
que . Qui illi fuit comes eo tempore perpetuus , inito
exacte concionum eius numero , in cōmentarios tunc
retulit , auditum eum abs se hoc anno ducenties vi-
cies dicentem publicè pro concione , priuatim autem
ad Religiosas Virorum Fœminarumque familias ,
cohortationes habentem toties , vt numerare pi-
guerit .

C A P Y T I I .

ANNO CHRISTI
1619 .

ÆTATIS COTONI
56 .

*Post Tolosanas Conciones Romam Procurator
à Lugdunensibus Sociis mittitur .*

SImul ac adfuit annus sæculi decimus nonus , To-
losa Burdegalam multum à nostris iuxtà atque ex-
traneis expetitus excutrit . Itus illi ac reditus mora-
que

que Burdegalensis dierum fuit paulò plus quam triginta, sed concionum viginti quinque Montem Albanum Calvinismi eo tractu arcem penetrare, hæresimque suo in cubili lacessere Episcopi rogatu subinde non est veritus. Binas conciones paucissimis, qui ægrè illic degere sinebantur, Catholicis tribuit; sed magno Hæreticorum confluxu. A concionibus super iis quæ dixerat, cum eo velitatura domi aderat schola hæretica; cui ille tanta vultus, sermonis atque animi moderatione mentem demulcebat vt rabulam nescio quem Religiosi Ordinis desertorem, quod orationis eius suauitatem rabiosule interpellaret, procul facessere ceteri compulerint. Rari verò fuerint Episcopi tota illa regione Aquitanix, qui Cotonum ad se non euocauerint, siue vt eum hæreticis opponerent, siue vt Catholicos in regione hæresibus plurimum contaminata, sermonibus eius solarentur ac fouerent. Itaque non solum Burdegalenses, Nouempopulanos, Agenenses ante Quadragesimam; sed etiam ea exacta Montalbaneses, vt dixi, Rienses, Lombardienses, Castrenses ab Episcopis accersitus accessit. Sex hæreticos alicuius notæ hoc tempore publice restituit Ecclesiæ, plures priuatim. Inde per Cadurcos, Rutenos, Aruernos, & Segusianos Lugdunum reuertit, concionibus quatuor mensium spatio habitis centenis quadragenis, id est paulò pluribus quàm quotidie singulis, quod interdum bis terue diceret vna die. De his Coton: laboribus magna sanctitatis eius apud Aquitanicas illas gentes opinione cum Præfecta Monasterij Rosnij quæ illi tunc debebat inter Ordinis Feullientini virgines renunciaasset matri suæ grauissimæ matronæ D. de Fleury Villaregij sorori; rescripsit illa expertam se esse illos tantum de Cotono pro dignitate æstimare,

æstimare, qui cum de propinquo nollent. Hoc quippe
 Cotonno adfuit quod vulgò viris sanctis, vt cum cæ-
 terorum mores familiari consuetudine soleant vilesce-
 re, tùm ipsum quo propius quisque ac familiaris
 inspiceret, hoc vehementius suspiceret. Enimuero vt
 Lugdunum attigit, noui operis est denunciatione
 pulsatus. Geneuensis enim quispiam Molossus cri-
 men plagij suis obiectum confortibus depellere cona-
 tus, misero quodam libello Geneuam ipsius Pla-
 giariam arroserat. Ei, Cotonus intrà bimestre iustum
 reposuit volumen, cui Geneuæ Relapsæ nomen fecit.
 Secundùm quæ in Prouincialibus nostrorum comitiis
 Lugduni lectus est à Patribus vt Romam Prouinciæ
 Procurator iret. Quæ legatio vt ipsi fuit gratissima,
 quod in ea tyrocinij abs te in pietate illic positi vesti-
 gia esset recogniturus, Patresque aliquot Italos, qui-
 bus plurimùm in rebus piis tribuebat, coram allocu-
 turus; Ita rerum præclare gerendarum occasiones non
 paucas suppeditauit. Nam in primis cum nix adeò co-
 piofa angustas Alpium sēmitas occupasset, vt ægrè
 earum vestigia apparerent, ingruit insuper quadam
 die tanta caligō vt vix comiti conspicuus esset comes.
 Ergo Cotonus socios dum eunt iubens repente in gra-
 du consistere, seducto in partem equo deuoluitur in
 pedes, atque inde genua, ardentique prece Deum
 propitiatus, caliginem breui, vt à sociis tunc creditum
 est, dispulit, simulque cum luce præsentissimū ostendit
 periculum immanis barathri in quod paucis post passi-
 bus, si pergerent ire vt cœperant, præcipites fereban-
 tur. Iam Romæ cum esset, molestum dissidium quod in-
 ter Regis Galliæ Legatum & Pontificios Magistratus
 ob nescio quas contentiones exarserat, solita illa sua
 comitate & rerum gerendarum felicitate breui compo-
 suit,

fuit. Quare is qui tunc Ecclesiæ præerat Paulus V. humanissimis illum ac beneuolentissimis oculis conspexit, nec quidquam abs se passus est desiderari eorum quæ ad satisfaciendum Cotonii pietati pertinerent. Lauretanam ædem hoc itinere inuisit, prodiditque ipse post reditum cuiuspiam confidenter, Angelico se nuncio monitum dum ad aram altaret, ut caros sibi quosdam nescio qua tunc necessitudine pressos Beatæ Virgini commendaret. Nec vanam fuisse commendationem illi ipsi, quorum res agebatur persensere. Reuersus est Roma per Alpes maritimas aspero cum primis & saxeo itinere, auctus comite vno sacerdote quopiam in secunda Narbonensi Prouincia, qui illi occasionem suggessit non vulgarem fiduciæ in Deum qua plurimum nitebatur exercendæ. Nam cum illum misere fractum lassitudine, quod aliquot iam dies iter pedibus confecisset, in equum clitellarium, seruo pedibus ire iussu succedere Cotonus voluisset, ille equi aut soli vitio cum sarcinis tam excusse non longe post est deturbatus, ut toto corpore durissimo solo afflictus, equique ac sarcinarum ruina obrutus pallorem, exsanguem ipsamque speciem mortis, spiritu omni sensuque ac motu intercluso indueret. Ad cuius casum Cotonus in preces versus, corpus de aggere publico in agrum vicinum à comitibus deportari iussit, nullo se inter gestandum vitæ signo prodente; tum omnibus ad vicina oppida, ut remedia & chirurgos, si qui adessent, medicos-ve accerterent digressis; visus est sibi homo videre Sanctissimam Virginem altero, & Cotonum, qui tamen in equo semper fuit, altero se brachio subleuantem; exiliensque illic in pedes, doloris laborisque omnis se exortem sensit, & comites breui reuersi ex oppidis compererunt nihil iam remediis opus esse

esse, vegeto illo iam ac sano non tantum stante ac colloquente cum Cotonio; sed etiam mox pedibus suis multo quam ante validius atque alacrius viam carpente. Is postea Cotonio plurimum venerationis exhibuit, tantumque illi debere vulgo præ se tulit ut diceret, nisi lex sibi silentij ab eo esset maximis obtestationibus imposita, facturum se facile ut id quoque cæteri faterentur. Non tamen potuit quin oblatum sibi Sacræ Virginis Spectaculum, comitum vni aperiret, qui cum illud Cotonio renunciasset, fassus est ingenuè se illi ex animo Virginis opem inplorasse. Cæterum is postridie & seriam peccatorum confessionem instituit, & de manu Cotonii Eucharistiæ religiosissimè participavit, atque ad suos subinde est dimissus.

C A P V T III.

ANNO CHRISTI
1610.

ÆTATIS COTONII
37.

Diuine & Nanceij Concionatur.

HVNC finem habuit Italica peregrinatio, quam statim anno sexcentesimo vicesimo excepit Burgundica, cum designatus iam esset ad Quadragenarium Ieiunium Diuine concionator, magnâ Senatus grauissimi populique auitæ pietatis tenacissimi expectatione. Et mira certe fuerunt studia, tum illorum ut præsentem Cotonum colerent & ausculta- rent; tum Cotonii, ut antiqua in eis Religionis ac pietatis semina noua cultura exsuscitaret ac propa- garet. Et si enim ingenti semper atque inuicto animo

erigebat sese contrà contortas ac vertiginosas Calvinianorum opiniones ; tamen cum populum nactus erat antiquæ ac sinceræ pietatis , mirum erat quantus quàmque facilis assurgeret ad cœlestes pietatis sensus & animo concipiendos, & verbis in Auditorum pectoribus conferendos. Hac functus opera, rursus peregrinationem suscipit Turnonum , aliaque in loca quæpiam , tum negotiorum Societatis gratia ; tum ut nobiles viros ac mulieres aliquot ab hæresi reuocaret. Hanc enim ille habuit frequentissimam hisce annis quibus Parisiis absuit peregrinationum causam , quæ rarò illi frustra cessit. Cæterum dum hoc anno Burgundiam, Sequanicam, & Lugdunensem, eamque Belgicæ Galliæ partem quæ Lotaringia nunc dicitur , ac nonnihil Aquitanicæ concionando lustrat , non commemorabo quæ ille solita pietate aut tulerit aut perfecit omnia ; duo tantum scribam multum ut mihi quidem videtur insolita , quorum unum Vefuntione apud Sequanos, alterum Nanceij apud Lotaringos est expertus. Erat Vefuntione apud Sequanos piissima puella, quæ præclarissime vsa grauibz ac continentibus morbis , quibus plurimos iam annos ita lecto tenebatur affixa , ut nullam se in partem posset commouere, tam æte patientiam in animum suum demiserat , ut non solum omnem recipiendæ sanitatis mentionem grauer ferret; sed etiam minora semper, quàm animæ suæ commodum esset tolerare se quereretur. Ea cum adesse Cotonum in vrbe rescit , magnopere eius colloquium expetiit per quendam ex Patribz nostris; nec Cotonus , ut erat maximus probatæ virtutis in aliis amator atque admirator, minore ad eam cupiditate accurrit. Igitur dum colloquuntur , illaque consilij de statu mentis capiendi auida , omnes cogitationum

num

num suarum recessus sub eius conspectu ponit, Cotonus compertum est eam posteaquam plerosque omnes corporis dolores sibi fecerat tolerandi alacritate suaves, diuturnis precibus à Deo postulasse, ut animi dolores acerrimos liceret experiri. Quæ vota cum non satis succederent, quandiu mens eius in creaturis occupabatur, quod nullius earum vel præsentia vel absentia vehementer tangi posset, tandem continuatis illa precibus, impetrauit aliquem illius doloris sensum, quem ex Dei priuatione æternis addicti suppliciiis experiuntur. Demiratus celsitudinem animi & virtutis exaggerationem Cotonus, rogare eam institit, ut preces quas exercendæ ad patientia animæ, tot iam malorum tolerantia abunde expiata impenderat, sibi qui illâ plurimum indigeret, impertiri ne recusaret. Illa enixe rogantem non aspernata, hanc salutaribus consiliis quæ multa ab eo acceperat, gratiam habuit, ut dolores animi quos ipsa patiebatur maximos illi à Deo flagitaret & obtineret. Ac Cotonus pluribus sæpe narrauit, tantam per horas aliquot, vim doloris animo suo, priuatum se à Deo reputanti, incubuisse, ut nec aliud tunc mentem intendere, nec ullis postea verbis eum potuerit satis explicare. Hæc Versutione. Sed Nanceij dum Virginis in Cœlos Assumptæ octiduana celebritate conciones habet, incidit in aliam fœminam, quæ ab ætate tenera Dæmonis energemate vexabatur. Huic opis aliquid, quæ solebat precum tranquillitate atque efficacitate afferre persuasus, globulorum coronam, qua Beatæ Virginis Salutationes numerabat, quod ex illa penderet lignea crucicula piissimæ quondam Fœminæ Mariæ de Incarnatione Ordinis Carmelitani, vñu dedicata, imponere illius capiti parans, Dæmonis inuolatu retardatus

est, qui & coronam ære nexam in diuersas templi in quo ista gerebantur partes dissipauit, & cruciculam defregit. Cotonus tamen tanta precum apud Deum, & imperij apud Dæmonem vi est vsus, vt cum cogeret illico & diuisæ cruciculæ partes ita agglutinare, vt diutissime hæserint, & globulos vndique collectos sibi in manum referre. Verum cum ille ad vnum omnes sibi collegi ac reponi iussisset, Dæmon imperata exacte facere tunc detrectans, vnum quempiam, quod tum quidem Cotonus non aduertit, nescio quo in angulo prætermisit. Sed vide vt diuina bonitas obsequiis quodammodo certare cum seruis suis non refugiat, quóque eos habet exactius sibi obsecundantes, eò accuratius omnes, imperij ipsorum auctoritatem ratam esse iubeat. Discesserat iam Cotonus Nanceio dierum aliquot itinere, cum nocte intempesta inter altissimas tenebras micare in cubiculo suo fulgetras, mugireque cæca quædam tonitrua aduertit, missaque sub lecti cervical manu ad sacras reliquias, quas contra nocturnos id genus terrores ibi solebat condere, globulum coronæ suæ adhuc hærentem catenulæ, qua nexus fuerat, vnà cum reliquiarum thecaprehendit. Cumque postridie à Socio qui fractam coronam Nanceij nouo ære nexuerat didicisset defuisse tunc vnum de numero globulum, aperuit illi, quod rarò alias fecerat, quid sibi ea nocte contigisset, dum is globulus à Dæmone diuino imperio redderetur.

CAPUT IV.

ANNO CHRISTI
1621.ÆTATIS COTONI
58.

*Burdegalensibus Rector Collegij & Concionator
attribuitur.*

DEstinatus est anno mox consequente Burdegalensi Collegio Rector, cum longe ante ab Illustrissimo Cardinali Sourdio postulatus illic esset concionator. Vtrumque munus dispari animo, sed euentu non dispari, plus paulò quam anno est perfunctus. Tametsi enim ad conciones lubentior, ad Rectoris autem officium alieno tantum non suo impulsu ferretur; tamen nec disparem ad vtrumque accurationem abs se attulit, nec diuersam ab aliis commendationem, retulit. Sane in Rectoris munere quatuor illi à Deo dona adfuerunt, quæ alium quemlibet singula sapiens commendassent. Primum, excellentissima quædam de diuino præsidio in negotiorum aditu fiducia, & demississima diuinæ prouidentię in eorum exitu quancumque in partem sederent veneratio. Hinc fuit illa animi eius quies, quam omnes mirifice prædicant, qui de rebus eius gestis retulere. Nosque audiuius eum dicentem, sibi in gerendis muneribus impositis semper fuisse persuasum, fieri non posse vt qui se diuinæ manui confidenter tradiderit sustentandum, de viribus ad negotia perficienda idoneis vnquam diffidat, & qui diuinam prouidentiam pro dignitate suspexerit vllò ex negotiorum exitu dolorem animo capiat. Alterum fuit, præclarissima de iis quibus præerat omnibus existimatio:

non

non enim vlla fuit in quoquam tam exilis dicendi agendiue facultas; cuius ille si perfectionem non posset, saltem initia non commendaret, inque usum aliquem aut aliorum, quod sine cuiusquam fieret detrimento, aut suum quod esset approbationis argumentum, non adhiberet. Mirari verò etiam hodie plerique non desinimus, hominem ea pietate, eo iudicio, eoque rerum usu, Juniorum monita, dicta, facta, quæ cum pietate essent coniuncta, ita in rem suam cōvertere solitum, ut ex animo profiteretur; multum se ex illis proficere. Adhæc cum in bono facilioris credulitatis nonnullis interdum videretur; tamen fuit semper in malo minime omnium suspiciosus aut credulus, ut quæ ad eum deferebantur in hoc genere, si non essent plane perspecta silentio premeret; si esse viderentur, pro ratione muneris sui tam verecunde reprehenderet; tantaque vel admittendæ defensionis, vel dandæ veniæ facilitate, ut magnum haberent plerumque vel inde culpæ obstaculum, qui ei parebant, ne verecundiæ illius reprehendendi necessitatem afferrent. Quanquam ubi quempiam nactus erat religiosa animi demissione minus commendatum, nonnullam sibi severitatis personam aliquando imponderet. Hinc manavit donorum eius tertium, Agendi cum iis quos humilitas ac Religiosa moderatio fecisset laudabiles, ratio plane honorifica. Non enim ille absque honoris præfatione quenquam appellare, aut non interrogata suauiterque persuasa cuiusque prius voluntate præcise vlli auditus est imperare. Quod si quid sui negotij aut publica aut priuata causa alteri mandasset, quod homo nullius laboris defugiens fecit quam rarissime, tantum deinde ei gratiarum, ut eas sine pudore nemo facile posset audire.

Quid?

Quid ? quod si quis ei vſpſiam gratificatus aliquid eſſet, id ille nec pectore nec ore vnquam excidere patiebatur, dataque occasione nonnullo quantum per Religionis leges licebat benefacto reponebat. Denique ſi quid ei dum præſſet, vt ſit, exciderat imprudenti, vnde alicui ægre factum eſſet, magna tenebatur ſollicitudine, donec omnem illi ab animo ægritudinem pepuliſſet, nec ceſſabat aut comiter agendo, aut honorifice appellando, gratiam quietemque eius redintegrare. Quartum fuit, gratia apud homines non vulgaris, magnaque in rebus ſuſceptis ſedulitas, quorum altero aſſequebatur, vt nulli vnquam moleſtus, aut intempeſtiuus interueniret, altero vt negotia ſine cuiusquam incommodo mirificè vrgeret, feliciterque vt plurimum conficeret. Gratiam ei parabat ſanctitatis opinio, morum inoffenſa ſuauitas, ſtudio omnibus pro eo ac ſciebat & poterat gratificandi, & ſalutis eorum qui ſe illi amicitia aut quacumque conſuetudine applicuerant, cura ſollicita. Quarum rerum exempla huc fruſtrà coniecero, cum illis hæc hiſtoria creberri-me fuerit interſpecta. At ſedulitatē ipſi afferebat amor quo exarſerat, Eccleſiam eiſque gratia Societatem viris meritisque florentem intuendi. Qui amor ita animū vitamque eiſ totam habuit occupatam, vt ſtudia ſua omnia eo tantum videretur intendiſſe. His ille munitus præſidiis non ſolū difficultates, quibus eorum, qui hominibus præſunt, animi ſolent conflicta-ri, non difficili negotio eſt eluctatus, ſed etiam ita Sociorum internis ſtudit commodis vt non contem- pendis acceſſionibus, externa quoque adauget.

CAPUT V.

ANNO CHRISTI
1622 & 23.ÆTATIS COTONÆ
59. & 60.*Aquitanica nostrorum Prouincia fit Præpositus.*

Alias sollicitudines addidit annus sexcentessimus
 uicesimus secundus, quo Prouinciæ Aquitanicæ
 præfectura illi fuit demandata : sed præaulicis mole-
 stiis ac fastidiis omnia tunc censebat suauia. Itaque
 cum per hæc tempora eas in regiones Aula uenisset,
 & ille tum maxime Agennenles concionibus suis
 ad pietatem institueret, Procerum votis ac studiis vix
 sibi passus est persuaderi, quod sine nota defugere
 non poterat, ut Burdegalam sexto quam à Rege sibi
 dilectissimo aberat anno, eum salutatum, veteresque
 aulæ necessitudines reuissum iret. Vbi humanissime à
 Rege exceptus, de loco superiore auditus Agennum
 mox rediit, unde à Quadragesima Encolismam pro-
 gressus Societati Collegium, lege qua solet optima,
 est depactus ab incolis. Qua ex re etsi ille plurimum in
 se postea molestiæ contentionisque deriuauit; tamen
 diuina fretus fiducia suum ac Societatis ius retinuit.
 Oëtiduum festiuitatis Eucharistiæ dum illic concionan-
 do egisset, ad Regis Matrem, quæ per confinia iter
 instituerat est accersitus, ingentique exceptu beneuo-
 lentia, inuitantibus plurimis uti Parisios reuerteretur,
 constanter abnuuit. Cuius rei causam à P. Suffreno, qui
 Reginæ à concionibus & confessionibus, erat rogatus,
 hæc responsum dedit. Constare sibi multò plulquam
 triennio

triennio conſequentē Pariſiis ſe vtilem non fore, etiamſi eò iret cum primum liceret, nec tanti eſſe vel Aulam, vel Aulæ vicinitatem vt tantilli ſibi temporis quietem perire vellet. Reuocauit in mentem hæc verba Suffrenus poſt eius mortem, duoque iſta in eis cenſuit obſeruanda: Alterum, perſpectum ei fuiſſe diuinitus mortis ſuæ annum, cum tam aſſeueranter operæ ſuæ uſum eo quo mortuus eſt anno, tanto ante definiſſet: Alterum, tantam animo eius à vitâ aulicâ abalienationem inſediſſe, vt non tantùm octennio quo Pariſiis abſuit, nullam vel ſigno vel verbo reuertendi cupiditatem oſtenderit; ſed nec inter amicos quos habuit & numero plurimos, & autoritate præcipuos, eius rei mentionem lubenter tolerarit. Verſus inde ad luſtrandam pro officio Prouinciā non exterius minus quàm domesticis adueniebat expectatus. Illis, quia diuini verbi facem quocumque venerat inferēbat; Iſtis, quia in eius ſuauitate moleſtiarum omnium ſolatiū, in perſpicacitate difficultatum exitum, in æquitate votorum quæ ratione niterentur finem optatum ſibi deſpondebant. Venit ex illo itinere ad Santones, vbi Arnaudum egregium bello ducem, ab Hæreſi reducem ad Sacramenta admittit. Progreſſus poſtea Benearnum fœdum olim hæreticæ impotentię cubile; ſed paucis ante annis inuiſta Ludouici XIII. magnanimitate aſſertis in Religionis fortunarumque libertatem Catholicis, expurgatum; Collegium Societati conſtituit Pali primaria gentis vrbe, cum decreta à Rege alendis noſtris ſtipendia tum primum libeſcialiter eſſet conſecutus. Ea re conſeſſa ceſſauit aliquandiu à munere, vt ad Redones per huius anni Aduentum, & ſexcentefimi viceſimi tertij Quadrageſimam diceret pro concione, vbi Hæreticis

aliquot Ecclesiæ restituendis fortunatam dedit operam, tantamque ab Episcopo, Senatu ac Populo inuit gratiam, ut memoriæ illius suauitatem temporis longinquitas nondum potuerit abolere. Redditus suo muneri, cum spe nonnulla duceretur Collegij nobis apud Cantabros Gallicos in vrbe Boiato, vulgò Baiona, constituendi, occasionem cupidissime arripuit, facta à quibus oportuit potestate, suscipiendæ ex eo itinere peregrinationis breuissimæ ad superiores Cantabros, ut Sanctissimi Parentis nostri Ignatij incunabula, Loyolæ veneretur. Quo loco quantum ille suauium lacrymarum fuderit, quantumque hauserit animo consolationis, nec ipse facile explicabat, nec illi ægre conuincient, qui excellentem de Societatis Instituto estimationem tenerrimumque ergà illam amorem, quæ fuere in Cotonio perpetua, pro eo ac res postulat, æstimabunt. Flexo subinde itinere Boiatum versùs, in grandi Cantabriæ Gallicæ oppido memorabili functus est charitatis exemplo. Cùm enim publico hospitio matronæ viduæ opibusque præstantis, sed Religionis auitæ insigniter studiosæ, exceptus esset, didicit ex ea Caluinianum quendam vulturium opibus eius inescatum, conductis ut plus posset ab eo qui genti præerat Comite vestigalibus, nuptiis suis magno quietis & scilicet Religionis periculo quâ violenter, quâ artificiose imminere. Ergo cum hominem Cotonus non tantum verbis pro eo ac merebatur, castigauit in præsens, atque à flagitio repressit; sed etiam grauius posthæc ea de re apud Comitem, qui Catholicus erat, conquestus, autor fuit ut potestatem tam impotenter ac periculosè abutenti abrogaret. Sed hoc postea factum: Nunc cum eodem in oppido plerum hominum commendatione celebraretur, apud eum mulier quæpiam

piam domi suæ Religioso in vestitu degens, quod dicerent eam coluisse à prima ætate virginitatem, prolixis in orationibus diem prope solidum iam pridem transigere consuevisse, mira demùm nescio quæ peregrisse. Ille, ut erat omnis pietatis amantissimus, ratus nonnihil se ab illa fructus capere posse ad vitam sanctius transigendam, colloquium eius expetiit & impetrauit. In quo dum aliud ex alio differunt, peruentum eo est ut illa diceret, nullo se vanæ gloriæ motu, nullaque alterius peccati tentatione pulsari; multo minus peccatum ullum quantumlibet minimum in se admittere. Videlicet, inquit Cotonus, cum ad confessionem adis, vetera quædam peccata Sacerdoti suggeris. Confessione vero, inquit illa, non est mihi usus, nec magis peccasse me aliàs quam nunc commemini. Suspecta interim erat Cotonus eius in se sanctitatis asseueratio tanta, quæ nec naturæ virtute ulli posset, nec gratiæ munere pluribus hætenus sciretur contigisse. Tamen rogare porro institit, crebre ne participaret sacris mysteriis, quorum ipsi usum insolita illa mentis puritas facile expediret? Illa rigente ceruice, negare Eucharistiæ se aliquot iam annis participasse, quippe quam non tantum sibi minime necessariam, sed ne utilem quidem censuisset. Exhorruit ad ea verba Cotonus; nec iam dubitauit, quin à malo Dæmone mulieri factus esset focus, non modo dum Eucharistiæ inutilitatem, sed etiam dum præceptorum Ecclesiæ neglectum persuasisset. Orsus ergo quæ solebat suauitate, periculum ei suum demonstrare, cum præfidentes eius spiritus nullis satis verbis aut rationibus posset deprimere, mœstissimus excessit. Neque verò postea cessauit hoc exemplum, tacitis locorum hominūque nominibus in ore habere, dum perniciosam

inquirendi agnoscendique peccata sua negligentiam priuatis in sermonibus insectaretur. Negabat enim eam mulierem in tantum vnquam vanissimæ confidentiæ neglectusque exitiabilis barathrum fuisse prolapsuram, si qua par erat diligentia animum ad lapsus suos quotidianos aduertisset. Quin & ipse cum in anteacta vita tantum eam in rem attulisset diligentiae quantum par erat eum facere qui quotidie confiteretur: tamen isto stimulatum se asserebat exemplo, vt seueriorem in se deinceps niteretur exercere censuram. Quæ sane, vt extremo hoc libro dicam, stuporem omnibus qui consistentem audirent, concitabat. Cæterum compertum est aliquot post annis posteriorem illius mulieris famam, non satis primæ respondisse. Sed Cotonus apud Boiatum aliquandiu concionatus cum Collegij instituendi consilia parum sentiret explicari, re in aliud tempus reiecta Pictauos per Aduentum concionatum abiit.

CAPVT VI.

ANNO CHRISTI
1624 & 25.

ÆTATIS COTONI
61. & 62.

*Professis Societatem, Domum Burdegala constituit.
Inde Prouincia Francia preponitur.*

DOmum deinde Societatem nostram Professis hominibus, opus Præsidibus operatissimum, constituere Burdegala aggressus ad annum sexcentesium vicesimum quartum, tam feliciter rem spissam oppidò, ac difficultatibus perplexam, are non exiguo à Viris Illustribus corrogato confecit; vt diuinæ prouidentiae

dentia cordi esse eius industriam omnes habuerint persuasum. Sane opem illi hac in re plusquam humanam adfuisse vel hoc vno disces exemplo. Dixerat discessui suo Burdegala, ut Pictauos instante Quadragesima reuerteretur certam diem, iamque iusterni equos, ocreas à fociis indui, sibi omnia ad iter necessaria præsto esse iusserat, cum ad breuem orationem, ut fere ante iter solebat, in cubiculum ingressus, finita oratione fociis in cubicula reuertere iussis, non ante posteram diem se abiturum denunciat. Subiit tum quidem omnes admiratio mutati tam inopinato consilij; sed posteaquam vulgo est cognitum illum ea die de quibusdam ædibus Professorum domui necessariis, quarum emptio non parum futura difficilis videbatur facillime transigisse, in lætitiā se vertit admiratio, nec tamen ulli tum compertum fuit, quisnam illi tam feliciū morarum autor fuisset. Verum exeunte hoc anno Parisios ad Prouinciæ præfecturam accersitus, & Valentiam in Segalaunis præteruectus, certus de silentio piæ cuiusdam matronæ dum ipse viueret, ut eius augeret ergā beatos Angelos pietatem, narrandum illi censuit haud multo ante sibi contigisse, ut à quorundam hominum custodibus Angelis suauissima violentia prohiberetur loco aliquo discedere antequam negotium ipsis commodum confecisset. Quam narrationem cum illa post eius mortem euulgasset, negarunt qui illi perpetuo viarum comites adfuerunt alio spectare videri quam ad ea quæ dixi Burdegala negotia. Cæterum per ea tempora quibus expeditionem de qua dixi Pictauicam, concionum causa suscepit aut confecit, cum de Parisiensi sua profectioe nihil adhuc haberet compertum, prænuntiātum illi est diuinitus, atrocem Parisiis tempesta-

ten

tem imminere Societati ad annum millesimum sexcentessimum vicesimum sextum. Qua de re literas tunc enim Burdegala dedisse religiose asseuerat Rector Collegij Turnonensis, qui ea quæ de Cotonno retulit, ab ipso aut ab iis qui gerendis rebus interuenerant se agnouisse profitetur. Sane literas ab eo tunc ad Fratrem scriptas ego ipse legi, quibus dicebat sensum sibi quendam esse intimum, parari se à Deo ad mortem, tum aliis indiciis, tum quòd ingrauescerent sibi renum ex calculo dolores, quos annum iam quintum inter tot peregrinationes pertulerat creberrimos ac grauissimos. Nihilo tamen secius Benearnum nunc alacer repetebat, vt matronæ nobilissimæ adesset redditum ab hæresi ad Ecclesiam meditati. Illa enim ne imperitia aut fraude alicuius, ad nos transitionem fecisse insinularetur, confidentissima aliquot Ministerij Calviniani capita ad se per literas aduocarat, vt vnum illis Cotonum à quò alias permota fuerat ad hæresim deferendam opponeret. Et admisere per literas illi quidam oblatam cum illo disputationem, quam pudor aut vanitas vetabant recusare; sed ad diem locumque condictum nemo eorum homo adfuit, singulis putide obtendentibus collegarum interdictum. Ergo eà Matronà tandem Ecclesiæ reddità Burdegalam reuertit, vbi non diuturna illi fuit lætandi ex re bene gesta facultas, literis breui Roma allatis, quæ Prouinciæ Franciæ præfecturam ei demandarent, quas ille literas lacrymis prope deleuit, dum vel præteritæ quietis, vel tempestatis futuræ, cuius erat probe iam conscius, imaginem sibi poneret ab oculos, nihilque tunc omisit eorum quæ ad eam præfecturam abs se amolendam integra obedientia præstare posset. Verum posteaquam ita Præfidi Societatis comperit esse cordi, crexit
contra

contra omnes difficultates animum, & quod instabat, domum Professorum Burdegalensem templo egregie pro tempore ac facultate adauxit, moxque se in viam Parisiensem, per Tectosages, Septimanos, Heluios & Segalaunos dedit ineunte iam anno sexcētesimo vicesimo quinto. Cumque dies aliquot Turnoni Segalaunorum interquiesceret, Vir quidam Religiosus, illustri puritatis prudentiæque eius opinione ductus, secreto illi aperuit alterum iam annum fœdis se imaginibus atque impulsibus quamlibet repugnantem ac refugientem ab impuro Dæmone circumfideri ac prope opprimi, eaque re consilium eius, atque apud Deum patrocinium efflagitauit. Cotonus mollissimis verbis eius in præsens mœrorem leuare cum laborasset, bene in posterum sperare, sibi que ipsum non deesse iussit. Urgebat nihilominus pessimus Dæmon oppugnationem suam donec vixit Cotonus, sed posteaquam mortis eius fama vitæ sanctissime ætæ memoriam in hominum animis refricauit, Vir idem Religiosus ad diem decimam quintam Maij votum suscepit, si fauens ac propitius contra nequissimum spiritum sibi esset Cotonus, bis in die certam se præcationem persolutorum vsque ad vicesimam nonam Iunij Cotonum dum viveret multis nominibus celebrem. Concepto voto remisit illicò oppugnatio, sensimq; languescens ad dictâ Iunij diē plane cessauit. Sed hæc postea euenere. Cotonus verò hoc tempore continuatis itineribus Parisios expectatissimus aduenit, vbi Rex, Regina, Aula, ac Ciuitas nouem non totis annis postquam discesserat reducē lubētissime exceperunt, conciones eius illicò expetierūt, magnisq; eas concursibus Aulici ac ciues frequentarunt. Rapiebant illū ad se diuerse Ecclesiæ in Cōciones, quæ imminēbāt dierū Quadraginta; sed cum in Archiepiscopi potestate

potestate futurum se professus esset, ædi Metropolitanae concionator ab eo est datus. Tam prosperis ac tranquillis initiis Præfecturæ, & laborum eius interposuit ut sæpe aliàs nequissimus Dæmon molestum cumprimis negotium. Erat enim circa Dieppam in Normannia Sacerdos quidam ut vitæ clam flagitiosissimus, ita palam pietatis simulatissimæ, qui ut suæ forte seruiret simulationi vnum è nostris ad conciones in Ecclesia sua habendas solitus erat aduocare. Is Sacerdos grauium postea flagitiorum compertus cum per tormenta interrogaretur de familiaribus ac notis, vim dolerum non ferens nostrum nominauit, cui verba quædam affingeret temeritatis atque offensionis plena. Ac licet ille tormentis postea exemptus suam erga nostrum calumniam detestatus, quæ illi affinxerat retractasset; tamen in periculum semel adductus noster, incredibile est quantum Cotonio laboris crearit, ut in re tanta nec obniteretur iustitiæ, nec deesset innocentia. Et fuit laboris fructus, nostri hominis innocentia liquidò tandem suis Cognitoribus probata. Sed nihil hac in re incredibilius contigit, quàm Cotonii tranquillitas, quem nemo verbo aut facto inter tot occasiones quot molestissimum negotium suggerbat commotiorem vidit. Qua eius tranquillitate tam vehementer vrebatur Dæmon, ut continere se non potuerit quin haud procul ab hoc tempore per os mulieris iam olim energumena cum è Lotaringia venisset Parisios grauib; excepto conuiciis minas atroces intentarit, denuntians adducere se illi ac Societati annum in Gallia sæuissimum ac turbulentissimum; quo & ipsum multis modis infestum haberet, & Societatem è Gallia expelleret. Hoc quidem plane mentitus; sed illud quantum potuit mox adortus.

Nam

Nam cum Prouinciæ suæ lustrationem Cotonus post aliquot dies iniisset Blesis cubiculo orationis causa aliquando clausus sensit adesse cateruas Dæmonum quæ foetore ac iustrepitu cuncta complerent, cumque illū cubiculo extrudere, quod voluerant, nō valerent, animum saltē eius ab oratione abducere magno connisi opere, nunc ferocium animalium terribiles formas, & barathrorū tenebrarumque horrores, nunc versa vice decoras corporum species agrorumque atque hor-
torumque amœnitates oculis eius obtruderent. Quæ ille, tametsi sensu pulsatus magis quàm animo intenta ad id quod susceperat cogitatione, præteruehebatur; tamen haud parum ominolum censebat, quod tantum Dæmoni nunc licere Deus vellet. Itaque quærebat enixe toto illo itinere Superum pacē, ac præter B. Virginis celebres ædes, quas ex itinere nunquam insalutatas præteribat, Veneticam etiam urbem apud Armoricos, tum aliis ex causis, tum illa maxime adiit, vt S. Vincentij Ferrerij monumentū veneraretur. Cuius ille viri vt inflammatum alienæ salutis studium, ita concionandi quocumque venerat assiduitatem demiratus semper fuerat; & quantum fas erat æmulatus. Reuocantibus eum subinde Parisios Societatis negotiis, cuncta illic reperit, vel professis in nostros odiis exulcerata, vel occultis suspicionibus tumida. Nam & calumniosi in nos libelli tota vrbe impune venditabantur, & prodigiosa quædam ac scelerata scripta, quibus non Regia minus Maiestas, quam Regni Proceres indignis modis lacerabantur, ad nostros Auctores à maleuolis hominibus referebantur. Quibus malis quamcunque posset medicinam facere sui muneris arbitratus, ad Fontem Eblaudi Regem adiit. Estque ab eo humanissime auditus, dum vera copio-

ſaque oratione has atque id genus alias calumnias à
noſtris hominibus depelleret. Sed diuinæ videbatur
eſſe permiſſionis, nihil vt illi hoc anno in rebus hu-
manis ſinceræ ac diuturnæ voluptatis obtingeret. Nam
vix à Rege digreſſo, grauis incidit controuerſia cum
amiciffimo Epifcopo, de Religioſorum hominum
exemptione ab Epifcoporum poteſtate. In qua cum
Pontificis beneficium Religioſis vehementer vendi-
carat, tamen eam modeſtiam animique demiffionem
retinuit, vt hæc Epifcopus poſt eius mortem teſtari
non recuſarit. Magna, inquit, mihi ad Fontem Eblau-
di interceſſit cum illo contentio; ſed cum maxime
commoueretur, admirabar tum illum maxime &
amabam; tantum ſuauitas eius nonnihil tunc conca-
leſcæta, radiorum fundebat atque ſplendoris. Vtinam
loco eius nunc eſſe periclitarer! tam inſignes enim
ſuauitates alio recipi loco non poſſunt quam ex quo
prodire. Sic ille. Excurrit inde Cotonus Bituricas, vt
ſcholis Theologicis quas illic Illuſtriſſimus Princeps
Condæus liberalitate ab ingenio ac magnanimitate
ſua non diſpari inſtituebat, auſpicata daret initia.
Ac cum ſe poſteà ineunte hyeme Pariſios vt per
Aduentum Conciones haberet recepiſſet, moleſta
excepit eſt cum Viro clariffimo contentione, ne
Filij ipſius ſaluti deeſſet, quem pater, Societatis iam
initiatum tyrocinio reuocabat in vitam priſtinam.
Qua in contentione quò plura illi fuerunt concoquen-
da quæ homini liberorum amanti paternus dolor
exprimebat; eò mentis eius tranquillitas & ex vera
virtute demiffio eluxit illuſtrius. His in laboribus
transactis illi eſt annus qui mortem anteceſſit.

CAPUT VII.

ANNO CHRISTI
1626.ÆTATIS COTONI
63.

*Destinata ad Canadenses nostrorum Colonia Paris
suis sanctissime vitâ excedit.*

NEc mitiora fuere anni sexcentefimi vicesimi sex-
ti, quem vltimum vidit, initia, quanquam non-
nihil id illi primum blandita. Orsus enim cum anno, de
Canadensium salute, quæ cordi iampridem illi erat
nouas serialque cogitationes suscipere, diuinâ mode-
rante benignitate incidit in virum nobilissimum Ni-
colaum Rouault Gamachensem in Picardia Marchio-
nem, coniugemque eius, matronam cordatissimam
Franciscam Mangot, quibus & facultas esset & vo-
luntas salutem hominum diuinamque gloriam pro-
mouendi. Cum iis haud ægerime egit, vt de bonis
suis annua librarum tria millia, sustentandis homini-
bus nostris, qui in Canadensium ad Christianam
pietatem institutione operam ponerent in perpetuum
attributa vellent. Quam ille optimæ familiæ liberali-
tatem cū nonnulla aliorum beneficentia cumulatiore
fecisset, octo è nostris ad Canadenses ante mortem
destinauit, etsi eo non nisi post eius mortem quidam
sint profecti. Dum tamen ista gerit studiosissime,
clarum ac sibi solenne in suo corpore sensit indicium,
vehementis cuiusdam tempestatis aut Ecclesiæ gene-
rationis, aut Societati priuatim imminētis, quod
mihi est explicatius hac occasione describendum. Sci-
tum ergo est sanctorum hominum nonnullis tantum
C. c. 1 fuisse,

fuisse, vel priuatæ vel publicæ salutis studium, vt non solum animo, quod solent omnes, sed etiam corpore acerbissimos dolores præferrent, si quid aliena salus vel passa vel passura detrimenti crederetur. Id quod in Catharinæ Senensis & Lutgardis clarissimarum Virginum rebus gestis, est à magnis viris obseruatum. Cotono simile quiddam solitum accidere ab eo maxime tempore quo Regis Aula excessit, certam fidem faciunt tum comites eius itinerum, tum alij quibus id ille aperuit. Nam cum vehemens illud studium, quo Ecclesiam contra Hæreticos, & Societatem contra calumniatores protegere apud Reges consueuerat eo iam conuertisset, vt ardentibus votis idem munus apud Deum exerceret; tributum est de cælo, incertum an precibus an meritis eius, vt quoties grauis quædam calamitas aut in Ecclesiam aut in Societatem impenderet, acerbissimus ei dolor alterum in pedem incumberet. Quo ille admonitus, non seipsum tantum, sed socios etiam vehementissime excitabat, vt Deum impensius precibus propitiarent, ne quod forte salutis æternæ periculum inter calamitates temporarias boni adirent. Et hunc dolorem non ipso tantum creberime prodente, sed totius etiam corporis immutatione, quod repentinus admodum adueniret, ac pro calamitatis futuræ magnitudine nunc diuturnior esset nunc breuior, comites se aduertisse euentu nunquam frustrato sancte asseuerant. Hoc igitur ille nunc quoque monitore excitus, non parum diu ambiguus hæsit & anxius vtrum Ecclesiæ toti an alicui eius parti esset pertimescendum, & quanquam initio toti Ecclesiæ timebat non nihil, quod bellâ tunc inter Christianos Principes videret agitari nonnulla; tamen vt res fluebant,

versa

versa demùm in Societatem nostram sollicitudine,
 non dubitauit quin haud procul abesset ea tempestas,
 quæ tanto ante Burdegalæ sibi fuerat denunciata.
 Itaque vt illam eo fructu exciperet, quem diuina ex-
 petebat prouidentia, animum suum ita comparauit, vt
 primum suas plurium annorum noxas, & quas admi-
 sisse se crederet tota vita potissimas generali confessio-
 ne dilueret; deinde humanis omnibus negotiis in
 dies octo abiudicatis, totum se in rerum cælestium
 cogitationem desideriumque colligeret. Et is qui con-
 fessionem eius tunc audiit professus est eo demortuo,
 mirabilem se obseruasse in iis quæ ad Deum pertine-
 rent animi eius celsitudinem, & incredibilem de bo-
 nitate illius fiduciam; vitæ autem actæ modum adeò
 circumspectum & castigatum vt quod alias dixere eo
 audito alij de peccatis confitentis, non tam suo quam
 ipsius iudicio credere cogerent. Iam qui ei adfuit ex-
 tremo se per rerum cælestium meditationem ad fe-
 rendam quæ imminebat tempestatem comparanti,
 cum nescio quid illi rei gerendum obtruderet quibus
 horis à meditatione vacabat, hoc ab eo responsum tu-
 lit. Tu, inquit, videris ne interiecta hæc occupatio
 cuiquam sit offensioni; mihi certe Dei mei bonitas mi-
 nime sane promerito iam olim illud donauit, vt à sus-
 ceptis orationibus ac meditationibus animus meus
 nunquam nisi consulto diuertat, atque ad eas cum li-
 bitum fuerit reuersus, momento adhærescat. Quæ
 cum diceret, tantus ei pudor vultum occupauit, vt fa-
 cile appareret non iactantiæ, à qua ille longissime sem-
 per absuit, sed excidentis ex improviso veritatis ea
 verba fuisse. Secundum hæc Quadragesimæ conciones
 ad S. Pauli exorsus, comperit paucis post diebus non-
 nullos homines qui iam pridem in omnem deterende

Societatis famæ occasionem inuigilabant, tum in alia quædam nostrorum scripta, tum in quendam librum duobus ante annis in Italia editum, & recens in Galliam minime profecto opportune inuectum, curiosissime inquirere. Ergo ut omnem offensionis ansam adimeret conquisita quam potuit diligentissime eorum librorum exemplaria ab hominum oculis submoueri curauit. Sed obtinere non potuit, quin ea ad nimium multos peruenirent. Ut augustissimus Senatus Parisiensis in omnem opportunitatem tranquillitatemque Regni semper intentus, vno exemplari per Senatusconsultum abolito, cæterorum lectione ac diuenditione toto Regno sibi censuerit interdicens; atque ad Senatusconsultum adiecerit, ut ad diem certam Cotonus, qui Prouinciæ præerat, aliique tres è nostris Senatus mandata audituri adessent. Agebat ille tunc annum ætatis tertium supra sexagesimum, corpore graui & plurimum pituitoso, ac vigiliis, laboribusque priuatis & publicis confectus. Ergo succrescente per pluuiam tempestatem, illorumque dierum ieiunia pituitæ affludentiâ, cū ad dictam diē plures in Senatu egisset horas, ut illi quantum fas esset, satisfaceret, altera post illam die leui tentatus febricula à concione decubuit; sed impatiens vel vna die sacrificio ac Sacramento carere, postridie animo quàm corpore fortior, lecto se eiecit ut sacrum faceret, ac nisi qui ei aderant prohibuissent, ad concionem etiam ea diē condixisset. Tertia diē à primo decubitu; aperire se Medicis periculum cœpit, hacque vna post annos plurimos caruit Sacramento, ut remediis naturalibus locus esset. Eadem diē ad vesperam, vi morbi in grauescente per momenta singula, perlatum ei est ac perlectum Senatus consultum à quopiam Accenso Senatus,

quò

quo nonnulla ad nostros mandata, eius quem diximus libri occasione edita continebantur. Audiit ea Cotonus placidissime, cumque auctoritati acquievisset, parabat ad sequentis diei primam lucem, præcipuis quibusque nostrorum ex iis quæ habemus Parisiis domiciliis euocatis Senatus voluntatem significare. Sed hic tu mihi vide antequam progrediar, diuinæ bonitatis erga seruum suum suauitatem. Erat Cotonus ut diuina gratia erectus & audens animus, ita natura mitis ac timidus; pericula corporea, morbos, atque in primis mortem sine horrore naturali vel cogitare vel audire non poterat; tametsi de illis natura in rationis ac gratiæ gyrum reducta, frequenter in publico differebat. Ergo diuina bonitas ut naturæ illius quodammodo obsecundaret, mortis illi ac mali corporei sensum omnem ratione facillima, minimeque saluti incommoda detraxit. Dum enim necessariam Societati, quæ illi secundum Deum & Ecclesiam carissima erat operam præbet, occupato animo in diuina ope iam imploranda, nec mori se sentiebat, nec doloris signum vllum præbebat; Nam hora post mediam noctem prima, cum somnum capere ægritudo non sineret, lecto se erigit, socio edicit in animo sibi esse sacrū facere ea die, quod S. Iosepho, quem impense colebat, sacra esset; Breuiarium Ecclesiasticarum precum ut nocturnas perlegat, petit; partem earum tardissime ac laboriosissime euoluit; alteram, oculis ut ipse existimabat ex sanguinis copia à medicis detracta, caligantibus, ut autem res erat in mortem se iam condentibus, in aliud tempus reiecit. Versus dehinc ad orationem mentis tacitam sedebat tranquillus, sensimque vultu concidente, oculis recedentibus, palloreque tristi subeunte ad mortem ibat. Quod ut aduertit qui ægro ministrabat,

ministrabat, Sacerdotem socium aduocat, à quo monitus Cotonus de suo periculo, rogatusque vellet-ne Sacramenta suscipere? quamuis periculi sui sensu nullo tangeretur, prolixè tamen annuit, sociumque hortatus, tibi ut adesse vellet, quod supererat Ecclesiastici in eam noctem officij cum eo perlegit, tunc aduolatus illi in genua noxarum confessionem instituit; sedique suæ restitutus mox ut præsto esse Eucharistiam sensit, in genua rursum se proiecit religiosissime, sacroque participatus epulo, cum collecto in se animo perstaret in genibus, cernereturque ab omnibus manifeste deficere, rogatus ut attolli se ac sedi lecto-ve imponi sineret, negauit id decere quandiu in cubiculo sacra adesset Eucharistia. Ergo ut illa est elata, lecto impositus, ac statim sacro oleo liniri cœptus, ad tertiam quartam-ve inunctionem animam ea qua vixerat tranquillitate efflauit. Est autem obseruatum non vanè tunc à multis, duo illi in morte tributa, quorum in vita cupidissimum se aliquoties significarat. Alterum erat, ut ad diem S. Iosepho Beatæ Virginis sponso sacram, inter tanti Viri calencia tum maxime pro humano genere patrocinia, diuino iudicio sisteretur. Qua de re cum dissereret paucis ante hebdomadis quàm moreretur, dixit quibusdam nostrum, si per eam quam diuinæ prouidentia debemus veneracionem licitum esset cuique quod maxime placeret optare, nihil adeo sibi in votis fore, quam ea die è viuis abire. Alterum, ut in diuinissimi Sacramenti complexu vitam exigeret. Quam ob rem, & olim curæ illi semper fuit, ut Sacramenti materia vteretur si posset denliore ac copiosiore, quæ Christum ipsi hoc diutius præsentem sisteret quo calori stomachi resisteret pertinacius; & in extrema hac participatione perquam
verisimile

verisimile est, Christi corpore adhuc corpus eius inhabitante mortem illi obtigisse. Id quod si illi à Deo est tributum ego non ambigo quin inter excellentes adorationis, amoris, gratiarum actionis, oblationis sui ipsius, aliosque id genus internos actus, quos dum præsentem apud se Christum credidit, magna semper facilitate in vita exercuit, animam efflarit. Sane ut ea dere minus ambigerem, fecere Cotoni literæ, quas vidi scriptas anno superiore ad Virginem S. Iosepho deuotissimam. Orabat enim illam impense, ut preces, quibus apud S. Iosephum valebat plurimum, sibi commodaret, quo illius suisque votis coniunctis posset in id quod supererat sibi vitæ, S. Iosephi ope, obtinere partem nonnullam eius reuerentiæ, amoris, ac deuotionis ergà Sacramentum Eucharisticum, quandiu in suo perseveraret pectore, quibus Sanctissimus Iosephus abundabat dum Christum puerum vlnis suis circumferret. Quæ profecto in extremo hoc maxime vitæ actu tam deuoto clienti S. Iosephum non negasse, concursus festæ eius diei, & mortis tam citò post acceptum Sacramentum obitæ non difficile persuadent. Ut spes sit maxima, illum à corporea ista cum Christo per Sacramentum & spiritali per amorem coniunctione, ad æternam gloriæ, bonorumque omnium communionem transiisse.

CAPVT VIII.

*Cotoni Sepultura & Felicitatis illius nonnulla
significationes.*

Vulgata Parisiis Cotoni morte mirabiles fuere non tantum Aulæ ac Ciuitatis ; sed eorum etiam qui vndequaque aderant Catholicorum iuxta ac Calvinianorum consensiones , maximum Regno virum periisse ; Aliis diuturna eius , sedula ac fidâ in primis apud Regem obsequia ; Aliis inoffensam morum integritatem ; Aliis inexplabile bene hominibus omnis generis faciendi studium prædicantibus. Sed bonos omnes primos simul & infimos incredibilis olim inceserat Sâctitatis eius sensus. Corpore enim sepulturæ causa in apertum locum educto , tanti fuere eorum omnium concursus, ad videndum, osculandum, rosariis aliisque id genus rebus contingendum , vt sex prope horæ turbis fuerint ante sepulturam concedendæ, quos sâctæ satisfacerent pietati. Elatus est ad extremum inter tam confertam multitudinem hominum omnis ordinis, vt à Sacerdotibus exequiarum Ordo retineri nunquam pòtuerit. Proceres ac de populo multi , vberes ex oculis lacrymas visi fundere dum sepeliretur. Illustrissimus Archiepiscopus funebri præesse officio cum interuenisset iam incepto, osculari demortuum , & sepulchro condere voluit. Rex à nostris postea aditus, grauem sibi fuisse ac molestam eius mortem significauit , scire locum quo esset conditus voluit , atque dum de eo aliquandiu cum P. Suffreno sermocinaretur, de sanctitate eius se non ambigere affirmavit. Regina
eius

eius Mater cum post dies aliquot nostrum in templum aduenisset, adesse se dixit ut Cotoni preces expeteret. Matróna Princeps cum per ea tempora grauiter laboraret in partu, non dubitauit Cotonò preces concipere, iisque se subleuatam persuasum habuit. Viri Principes cum perspectissimam sibi illius sanctitatem dicerent, voluerunt se à Theologis doceri, liceretne ei priuatim preces ante Pontificis decretum adhibere? Iam eorum quæ corpus eius contigerant, quæ illi in vita vsui fuerant, quæ manu eius scripta aut consignata erant, tantum fuit apud multos desiderium, ut ægre illi à nostris sit satisfactum. Gabriel Albaspinæus Aurelianensis Episcopus, Vir autoritate atque eruditione præcipuus, cum quidpiam eorum quæ Cotoni fuerant à nostris per literas expetiisset, Breuiarium quo ille preces Canonicas diu persoluerat, accepit, atque hæc sibi ad eum qui miserat censuit rescribenda. Non te, inquit, latebit sat scio, cum primum mihi in conspectu fuit fasciculus quem misisti, venisse mihi illicò in buccam Breuiarium hoc esse R. Patris Cotoni, eumque à me osculo exceptum, ac postea resignatum. Hoc ego munus lubens atque exultans suscepi, vitæque meæ carius habeo. Memorem enim illum mei fore, pieque ut illud recitem suis apud Deum precibus effecturum confido. Illud verò inter primæ Sanctitatis Cotoni argumenta censeo collocandum, quod mortis eius nuncius in Regni loca diuersissima mirabilibus sane modis, apud eos maxime quos ille viuens nonnulla precum ac meritorum communicatiōe, alio-ve id genus charitatis nexu sibi consociarat, breuissime fuit dissipatus. Primum enim circa ipsam diem qua vira excessit Nanceij in Lotaringia mulier multis ab annis energumena cui liberanda

ab infesto hospite nonnihil olim Cotonus laborarat, magnis lætisque vocibus clamare non cessabat, mortuum Cotonum. Cumque is qui ipsius præest exorcismo Viardinus intento in cœlum digito significaret inter beatos illum degere si esset mortuus: Respondit Dæmonn, nihil sua referre, dum hinc morte sublatus esset. Ad hæc Valentia Segalaunorum, quæ Parisiis distat leucis centum decem & octo, ipsa die vel postera quam mortuus fuerat Cotonus, matronæ cuidam, pietatis nomine sibi olim commendatissimæ, conspiciendum se ille præbuit incredibili splendore circumfusus, tamque certam eius in animo de cœlesti beatitudine sua persuasionem ingeneravit, vt de ea deinceps ambigere, illa nullo modo posset. Quid vero dicam de Rodumnensi matrona Antonia Miela constanti fœmina, virtute diuinisque donis diuite, cui paucis diebus ante Cotonum mortem vigilantem ac sentientem, obiecta est in cubiculo corporea species pallidæ ac morientis lucis, cuius in medicullio suggestus esset concionatorius, non solo nixus sed aëre quodammodo pendulus, viro intus insidente, cui & puerilis in vultu gratia, & sceptrum esset in manu. Quod spectaculum cum illa, Dæmonis insidias verita, non parum auersaretur; perferre tamen plusquam vno horæ quadrante est coacta. Et abiit illud quidem ex oculis, sed magna ipsam sollicitudo tenuit, quo visa pertinerent, vsque ad Dominicum diem post Cotonum mortem, cuius ad vesperam sentire visa est Cotonum sibi ad latus manifeste astantem, qui visa exponens diceret, pallentem illam lucem mortis sibi tunc imminens; suggestum in aëre pendulum, doctrinæ à rebus terrenis auulsæ; puerilem gratiam, vitæ innocenter ac pure transactæ; sceptrum, arbitrij æquissimi in conscientia

scientia Regum ac priuatorum moderanda notas illi ac symbola præbuisse. Quæ illa cum gaudio ac lacrymis diffuens acciperet, hoc agere tantum poterat vt Cotoni sibi patrocinia precationesque ardentissimè deposceret. Eodem tempore in Rodumnensi item oppido Ioanna Matellia triginta annorum virgo, cui ob diuturna religionis ac pietatis exempla quotidianus Sacramenti Eucharistici vsus à conscientia moderatoribus iam olim est indultus; cum de Cotoni morte nihildum inaudiisset, animo à sensibus post communionem, vt solet, alienato, videre illum est visa, non tantum aureo collucentem fulgore, sed etiam regio cultu throno insidentem aureo, flammeasque sagittas versus augustissimum Sacramentum iaculantem. Quod visum dum immensa admiratione prosequuta esset, tanta interim est diuini amoris suauitate delibuta, vt in sensus ipsos redundaret suauitas, totaque sibi die dulcissimum quidpiam ore ipso regustare videretur. Cumque illi ad Vesperam Cotoni mors esset renunciata, non dubitauit quin illius in cælo gloria, atque aduersus Eucharistiam religio & ardor matutino illo viso sibi fuisset declarata. Neque inducere in animum postea potuit, vt de Cotono aliter quam de Viro in cælis admodum glorioso loqueretur, aut cum eo aliter ageret, quam cum cœlite apud Deum gratia præpotente. Extremum hoc indidem profectum habe. Anna Vitella insigni erga Deum pietate, atque erga desertissimum quemque beniginitate Vidua, animo inter orandum abducto Parisios, visa sibi eodem die videre Coronom de cælo candidatum aduenire eum in locum quo eius corpus erat conditum, gratiisque corpori prolixè actis, quòd tam vtilem ac facilè ad salutem, operam sibi præbuisset,

inter

inter Christum, Mariam & Iosephum in cœlos remigrasse. His fere modis diuina benignitas, aut eos quorum saluti Cotonus viuens peculiariter opitulatus fuerat, solabatur; aut gloriam eius ac felicitatem longe lateque euulgabat. Nec tamen nullum Parisiis ubi iacebat mortuus beatitatis illi præbere voluit testimonium. Duo enim Viri pietatis amantes, & Cotonum ea causa in vitam cari, nonnulli eius post mortem spectaculo sunt potiti. Alter cœlos penetrantem conspexit. Alter, cui animus diuina meditans frequenter extrâ se rapitur; dum ad eius corpus in feretro iam compositum genua posuisset, repentina illius sententiæ meditatione pulsatus; Pretiosa in conspectu Domini mors Sanctorum eius; Cotonum ad feretri caput visus est sibi conspicere linea casula concionantibus solemnibus, & Sacerdotali stola tam late fulgentem, ut gemmis coruscare vestitus vterque videretur.

CAPVT IX.

Cotoni naturalia corporis & ingenij bona.

HVnc fecit manendi inter mortales finem P. Petrus Cotonus; Vir si cuncta consideres perquam absolutus. Nam corpore in primis fuit staturæ inter proceras mediæ; vultu dum ætas viguit non tantum honestissimo, sed etiam inter viriles plane pulchro, colore egregie candido ac leuiter rosco, barba & capilo flauo, fronte admodum lata, sed æqualiter plana, naso mediocriter erecto, genisque ac mento moderate in acumen ex orbe desinentibus. Sed in oculis, quos habebat

habebat gratos admodum ac nonnihil cæruleos, ipsa quod ille ait sessitare modestia videbatur; aded illos & temperate demissos, & nullo casu vel torue obliquos, vel defixe apertos, vel leuiter mobiles habuit. Oris cum loqueretur plurima erat yenuitas, labiis ea gratia ac moderatione diductis, vt in admodum distincta ac perenniter fusa, atque aliquando vehementi locutione, neque hians quidquam neque contortum in ore cerneretur. Sanitate fuit diutissime æquabili, roboreque contortum in ore cerneretur. Verum multa in eo mutauit extrema ætas, quæ & palpebras nimio sanguine suffudit, & vultum rubore liuido infecit, & corpus morbis nonnullis ac grauitate tardauit. Iam Ingenium in eo erat, quo nescias an ad agendum multiplicia, cumque hominum multiplici genere vllum possit optari aptius. Nam magna erat ad ea quæ audiebat aut legebat complectenda celeritate, maxima ad retinenda quæ complexus fuerat, firmitate. Græce commodè, Latine etiam eleganter, Gallice præterea floride admodum & dicere & scribere idoneus erat. Poësim triplici hoc sermone mediocriter coluerat. Scientias philosophicas perceperat accurate, & docere, omnium quibus notus hac in re erat iudicio, pro dignitate potuerat, si non ad conciones vtilior eius opera existimata fuisset. Theologicas quæ docentur in Schola difficultates dum iunior audiret, acutissime perspiciebat & discutebat. Sed concionibus postea addictus id tantum ex eis amauit, quod statuendis aut explicandis fidei morumque dogmatibus visum est necessarium. In quo versatus est tam facile & dilucide, vt non tantum à populo cum vtilitate; sed etiam ab earum rerum magistris cum voluptate & admiratione audiretur. Historiam humanam & naturalem non
tam

tam sciendi quàm vtendi causa delibata. Et suppetebat ei facile ex vtraque quo hodiernos mores aut emendaret aut illustraret cum vsus poscebat. Sed nulla res ingenium eius vberiore sensuum optimorum copia ditauit, quàm meditatio perpetua eorum vel quæ diuinis in literis de magnitudine, sapientia, benignitateque sua nobis esse prospecta Deus voluit, vel quæ Christus dum terras inhabitaret, nostra causa gessit & tulit, vel quæ homines Deo chari in vita degenda designarunt. Ex his vero omnibus nullas ille cogitationes magis ad vsu suum atque alienum seponebat, quam quæ suauibus amoris ergà Deum virtutem igniculis excitandis idoneæ viderentur. Hinc exisistebat facilitas prope infinita agendi quam-suauissime de rebus diuinis tam priuatim quam publice, vt neque iis qui pietatem amarent imparatus aut ieiunus, neque iis qui rebus humanis magis attenderent grauis vnquam videretur. Erat verò in eo tam exacta dum priuatim ageret, eius quæ inter viros honestos agendo loquendoque obseruatur vrbauitatis peritia, vt nulli non opportunis & gratus interueniret. Quod si qui ipsum suæ rei causa conuenisset, tum verò si qua comodare illi ratione posset, honestate, comitate & benignitate cum illo certabat egregie; aut si per sua negotia non posset, tam decore ac modestie excusabat, vt non minus quandoque verbis, quàm rebus satisfaceret. Dixit pro testimonio Vir. Clarissimus D. de Fleury, cuius in ædibus Parisiis aliquandiu egit Coconus; Henricum Regem, nonnullos Regni procures ad eum quandoque destinasse, non eo tantum vt in iis quæ pertinebant ad fidem & pietatem instituerentur; sed etiam vt subortas inter se de honore ac decore cōtrouersias ipso arbitro componerent, periculosasque ac plerumque pernicio-
sas

fas familiis cotentiones vitarent. Tantum Rex magnus in Cotoni siue peritia, siue suauitate, siue ad persuadendum efficacitate ponebat. Sane est inter eos qui eius opera informati priuatim ad virtutem fuere res testatissima, mirabile fuisse eius ingenium, cum quid alicui vel ad salutem propriam, vel ad Dei gloriam suscepisset suadendum. Tantum enim illi suppetebat vel in animo ardoris, qui ex oculis totoque vultu emicabat gratissime, vel in oratione ponderis & explanationis elegantissimæ, vt non vinceret solum, sed etiam adeo vincendo mulceret, vt & vinci voluptas esset, & prius se victos homines sentirent quam vinci. Rari haftenus exempli fuit, vt idem quis publicè appareret, qui priuatim. Nam quosdam solertia quæpiam & gratia in priuato commendat sermone, quos in publico pusillanimitate obruta deserit: Quosdam è contra cellitas & erectio animi commendat in publico, quos morositas & quidam quasi rigor priuatus ab animis alienat. Sed Cotono hoc fuit proprium, vt ambiguum relinqueret vtro sermone plus valeret. Etenim quantus esset in publico non vnius vrbs aut prouinciæ; sed totius quanta est Galliæ testimonio constat, cuius ille non tantum prouincias omnes, sed etiam ciuitates prope atque oppida Dei verbum circumferendo percurrit. Erat autem fama illius tam illustis, vt non raro cum aliquò aduentasset, atque in Ecclesiam, vt mos illi erat, salutatum Eucharistiam illet, tanta eo vis populi, visendi eius causa conflueret, vt iusta illi videretur concio. Itaque vt erat ocreatus, sumpta veste concionatoria non differebat ad eos dicere, præsentia longo intervallo apud plerisque famam superante. Mira videri potuisset in alio tam improuisa ad populum oratio; sed in Cotono admirationem ex

E c

assuetudine

assuetudine perdiderat. Testis mihi est vir grauis Ludouicus de la Sale è Societate nostra, aliquando se Cotonio adfuisse cum palatium iam ineunti, vt concionem haberet coram Rege Henrico, ad ianuam occurrit Rex ipse subortis de repente negotiis alio euocatus; rogatumque de quo argumento concionem esset habiturus, iussit aliam in diem argumentum differre, sibi quippe animum esse illum ea de re audire. Paruit, & interposita vix semihora ad Reginam & Aulam quæ auditura conuenerat, aliam concionem nihilo cæteris deteriore est architectatus. Alio tempore concionibus de Morte aliquot in Aula habitis, edixit in extrema se postridie dicturum de Iudicio. Vltimo, & Regina Margareta Valesia quæ tunc aderat magna cupiditate exarsit hac cum de re auscultandi, sed graui postridie impedimento interueniente misit qui suggestum prope subeunti nunciaret, optare se magnopere, concionem illam vt in aliam diem differret; nec recusauit Coronus, populi tamen iam expectantis offensionem veritus, si concione omninò abstineret, aliam illicò de morte addidit, ad priores tam felici euentu, vt prouisas omnes ac paratas hæc improuisa & imparata visa sit vulgo superasse Accipe hoc extremum omni admirabilitate hoc in genere superius. Dixerat mane festo quopiam die in oppido, quo viri aliquot nobiles, eius audiendi auidi sibi mutuo condixerant, digressusque à concione statuerat ad vespërâ in oppido altero quæ mane dixerat repetere, quòd hic quoque vtilia fore censeret. Sed ecce dum iam est in suggestu, crucemque sibi edita voce imprimit, videt nobiles eosdem qui matutini fuerant auditores templum ingredientes, nullaque vel perturbatione vel mora institutum mutat, ne illis sit offensionem, aliud argumentum

argumentum proponit, aliamque concionem pertexit tam feliciter; ut Socio qui repetendæ concionis consilium ab eo in via didicerat, animaduersa mutationis causa, non admiratio sed incredibilis stupor tota concione incesset. Sexcenta id genus exempla paratissimi ad omnes euentus ingenij memoriæque constantissimæ in Cotonio iuvene æquæ ac sene sunt obseruata, quæ nihil attinet fasius perscribere, quod & nulli eorum qui cum illo vixere non sint aliqua ex parte perspecta, & genus hoc omne commendationis vel à corpore, vel ab ingenio, non aliunde quàm ex coniunctione cum virtute, de qua nunc mihi differendum est, efflorescat.

CAPVT X.

Cotoni officia erga Deum.

OMnino verò illustria fuere quæ ille in omni virtutum genere exempla edidit; sed ne sim quodammodo infinitus si stylo prosequi tentem omnia, tantum hic dabo aliqua eorum quæ ad summa Christiani officii capita pertinere. Ergo cum ea quæ Deo deferuntur sint in eo officio potissima, quanta in illis fuerit quàmque multiplex Cotonii virtus, ex iis opinor liquebit, quæ ille vel Catholicæ fidei, vel magnanimæ de Deo fiduciæ, vel incensæ erga eum charitatis, vel deuotissimæ religionis studio impulsuque suscepit. Atque ut de Catholicæ fidei studio dicamus ante omnia; Insigne est cum primis quod altero quam contra Hæreticos concionari cœperat anno, ad Catholicos Montilienses in Tricastenis literas scribens, quæ in Apo-

logeticis illius etiamnum extant, votum in hanc formulam concepit. Opto ut si quando exigua hæc industria ac facultas, quæ mihi de cælo obtigit, aut vigiliæ, labores, verba, opera & sensus mei non conferantur ad fidem protegendam, propagandam ac promovendam, obliuioni detur dextera mea, & adhæreat lingua mea faucibus meis: Atque ut paucis omnia complectar nihil in posterum ingenij desidero, nisi ut eo intendatur, nihil virium corporis nisi ut pro eo eertent, nihil pulmonum nisi ut hoc respirent, nihil sanguinis, nihil vitæ nisi ut fluat & expendatur in fidei vel defensionem vel obsequium. Enimvero abunde voti sui compotem factum nulla pars vitæ quam postea duxit, non aperte declarauit. Etenim cum Ministris Calvinianis ex condicito multis coram testibus & auditoribus ter publicè depugnauit, libros contra hæresim scripsit nouem, duodecim annis qui illi ab hoc voto ad Henrici Regis obitum effluxere nulla prope dies fuit, qua non aliquem vel institueret, vel admitteret ad Catholicæ fidei professionem, vel perueracem coram multis si non suo, aliorum certe bono non confutaret. Curæ autem erat Regis Optimi ne Cotonus deesset quod in hoc negotio gereret. Nullus enim propemodum Caluino addictus ad eum adibat, quin illi daret in mandatis, ut Cotonum vel audiret concionantem vel priuatim de Religione conueneret. Neque vero huic operi dies toti fuere satis. Sed bona etiam interdum pars noctium fuit adiicienda. Habuit enim etiam Cotonus suos non rarè Nicodemus, qui humanis quibusdam vel cogitationibus vel timoribus ducti, nocturnam optarent disciplinam. Qua de re sic retulit Villaregij soror, miraculo sibi crebro fuisse, quod labori par esset Cotonus, quem non solum die, sed nocte

nocte etiam multa de Religione ardentissime differentem cum viris Calvinianis crebro audiret, dum apud se hospitem habuit; maxime cum nullæ eum vigiliæ, animique contentiones prohiberent, quin summo rursus mane ad nouos labores vigilaret expeditus. Iam Fiducia de Deo etiam nonnulli spem, alij spei diuinæ affectum, curæ protectionisque eius certissimam expectationem interpretantur; aded in Cotonno abundauit, vt qui eum nouere propius, negent vllam in eo virtutem magis eminentem fuisse. Hinc enim illi ad magnos perpetuosque Dei causa ausus, animi alacres & excelli; hinc desideriorum ac voluntatum omnium ex diuinis perfecta suspensio; hinc tranquillitatis, quietisque internæ perennis quædam ac cælestis in omni rerum humanarum euentu æquabilitas promanabat. Itaque nihil ille aut in se excitabat vehementius, aut in iis quorum saluti consuleret optabat crebrius, quam magnanimam de Deo fiduciam. Cuius rei testem inter multas quæ ad manus meas venerunt, dabo Epistolam ad Religiosam Virginem, cuius pars sic habet. Hoc tantum mihi nunc suppetit temporis, vt salute data ad fiduciam de Deo te horter. Quis enim animum despondere possit, qui cogitet sibi Deum esse pro patre, fratre, sponso, pastore, duce, doctore, tutore, curatore, amico, esca, præmio? Despondeant qui ista non credunt, aut quibus gaudium est & fiducia, Satanae more, tota in seipsis. Fiducia nostra in eo sit, qui nobis est rerum omnium instar, qui misérias nostras sua misericordia abolet, atque imbecillitates potestate sustentat. At charitate in Deum quam fuerit incensus nemo ignorarit, qui vel leuiter librorum quos de pietate scripsit lectionem usurparit. Tendunt enim in eis omnia ad intima animæ

animæ cum Deo per charitatem adhæſionem. Hic ille & quæ intrâ & quæ extra Deum ſunt omnia aduocat vt animo ſuo bene Deo volendi argumenta ſtimuloſque ſubiiciat. Hic quo quidque in creaturis Deo propius fuit & carius, eo in amoris ipſius ſenſum intimumque complexum prius peruadit. Chriſtum hominem, Virginem matrem, Iosephum eius ſponſum, Ioannem Euangelistam, alioſque Deo diuerſis rationibus coniunctiores, quibuſdam gradibus amoris ac laudis proſequi non ceſſat, vt hoc quaſi motu excitatus ad Deum cui illi adhæſere, medullitus completendum incaleſcat. Habeo ad manum eius methodum mente orandi, qua ille tota prope vita vſus ex libris, quos hoc in genere edidit variis temporibus facile intelligitur. Ea cum ad varia poſſit aptari argumenta, tum in omnibus ad Dei amorem ſuauiſſimum plane dirigitur. Nam primam partem in Dei præſentia ſenſu intimo haurienda, demiſſoque ac puro animo adoranda occupat; ſecundam in ſenſu amoris ac delectationis ſuauiſſimæ de internis externiſque Dei bonis; tertiam in conſecratione oblationeque ſui ac ſuorum omnium Deo, cum vehementi petitione vt ex Dei voluntate, in ſe & aliis cuncta tranſigantur. Sed neſcio an amoris eius in Deum vllum extet vberius argumentum, quam quod obſeruatum in ciuitate Catholica, vbi hæreticis controuerſiis minus erat loci, conſiones de amore Dei ſententiis rationibuſque diuerſas ab eo habitas quinque ſuprà ſexagenas, inter plures quas de aliis rebus triennio dixit. Denique tam dulci in Ieſum Dominum amore ferebatur, vt cum pios animi ſui ſenſus haberet ſecretiſſimos, tamen tacere cuidam noſtrum non potuerit aliquando; videri ſibi nullius à ſe tantæ iniuriæ veniam, nullamque rem tantam ob

Ieſu

Iesu Christi amorem posse postulari, quin illicò postulata, quantum in se esset, concederet. Quid verò ad extremum dicam de piissima illius in colendo venerandoque Deo ac cœlitibus religione? Quam ad virtutem non ille tempora quædam & opportunitates, vt ad cæteras; sed omnia prope vitæ suæ momenta videtur destinasse. Si enim inter nocturnum etiam soporem, vt priore libro diximus, ad cogitationes in Deum defigendas satis vigil esse potuit, multò profecto oportet expeditius eum extra soporem illam in rem inuigilasse quæcumque tandem incideret occupatio, quæ nunquam eum magis quam somnus potuit præpedire. Narrant eorum quidam, qui confessionibus eius audiendis dum in aula esset, sunt adhibiti, vocante plerumque Rege Henrico cum in palatium venisset, contigisse vt principum optimatumque interuentu cogeretur horas interdum plures ad fenestram rectus astare, dum Rex negotiis cum iis qui interuenerant confectis iuberet eum accedere; atque eo tempore tanta illum mentis contentione in orationem ac meditationem solitum sese inuoluere, vt nullo strepitu commeantium, nullis colloquentium vocibus posset auocari; compertusque sit à Sociis plerumque, nec ad homines qui illic aderant, aduertisse, nec sermonum, qui grauibus admodum ac nouis de rebus circum eius aures conferebantur, sensu vlllo pulsatus fuisse. Negabat satis perite illos facere, qui operosis exquisitisque præparationibus tunc tantum cum acceditur ad orandum colligi animum iubent. Optimæ quippe præparationis initium ab ipso vitæ instituto altissime duci, si homo ita res humanas in animo habeat, vt ab eis non habeatur. Nec illi aliunde hæc doctrina erat quam ab experimento domestico. Quod enim ipsum res creatæ

minimum

minimum distinerent, eo factum, quod plerique eorum qui ad orationem accedentem viderunt, asseuerant, ut quam primum genitu posito vela orationi expanderat, tota corporis immutatione appareret, lictus illicò transuolasse, atque in orationis profundo secundissima iam tranquillitate nauigare. Quanquam nihil est quod magnopere hanc inchoandæ orationis procliuatatem in eodem demiremur, cui ea quæ aliis est inchoatio, nihil reipsa esse aliud nisi orationis rarissime interruptæ continuatio poterat videri. Describit ipse hanc suam perpetuandæ quodammodo orationis rationem, in concione quam edidit de Oratione, ubi tum hæc tum alia orationis suæ lineamenta verbis communibus expressisse facile intelligitur ab iis qui rerum eius consciij fuere. Homo inquit spiritalis etsi loquitur, negotiatur, operatur coram hominibus, tamen non alibi animi obtutum figit quam in cœli ac terræ Regem, quem coram semper conspicit, & præ quo Reges ac Principes terrestres minimum quidpiam esse sentit. Si placere cuiquam conatur, illi certe Soli; si displicere veretur non alij quam ipsi, nec homines aliis respicit oculis, quam quibus Dei voluntatem, quæ postulat ut gratus illis esse satagat, quibus eius opera vult bencheri. Hoc ille pacto celsitatem sibi tantam animi parat ut terrena nunquam attendat, verseturque in urbibus velut in desertis locis, atque in turbis hominum, velut in solitudine. Hæc fuit Cotonno facilitas ac studium eius orationis quæ meditando transfigitur, nec multum dissimile alterius quæ in diuina ope vel exposcenda vel gratissime agnoscenda occupatur. Nam ne plurima iam alibi commemorata hic reponam, insigne huius generis exemplum cui noster Ludouicus de la Sale se interfuisse testatur, tantum

tantum adscribam. Venienti aliquando in palatium Cotonobuius fuit è Regni proceribus vnus auctoritate ac dignitate præcipuus, qui nescio quid à Rege ambiens, eiusque apud ipsum gratiam sibi vtilem ratus, illi exposuit quid postularet, vehementerque probare rei æquitatem connisus, orare institit, vt verba Regi sua causa facere ea de re ne recusaret. Vix ille abscesserat, cum Vir Princeps eadem occurrens via, gratiam eius implorauit, vt dere eadem contra quàm optabat prior, statuere Regi suaderet. Ille magnopere veritus vel offensionem alterutrius, si de ea re ageret cum Rege; vel vtriusque si non ageret, Ludouico quem dixi laborem animi sui secretò aperuit, cumque ambiguitatis non minus apud ipsum reperisset, postquàm peruenit ad palatium, subduxit se sine sensu in angulum, positisque humi genibus, diuinum consilium oratione expetiit, retulitque eiusmodi, vt quantum distincte non sit agnitum; tamen euentus docuerit absque neutrius offensione rem transactam. Iam vt de Oratione quoque illa quæ voce enunciatur scribere non prætermittam, de Ecclesiastico precum penso, cui ille exsoluendo prope est immortalis; inter Socios qui illi variis temporibus adfuere, aliosque morum eius in Aula & alibi gnaros constar, nunquam ab eo recitatum nisi in genua prouoluto, si ritus Ecclesiæ sinerent; ac si quando labore vel itinere debilitatus sedens aut reclusus à suis est persuasus inchoare, nunquam quietem admisisse donec in genua procubisset. Et erat tanta ei consuetudo verba sententiasque attente perpendendi dum legeret, vt factus ipse sit aliquando nonnullis, Christianæ fidei mysteria quæ Psalmis aliisque Officij diuini partibus etiam mysticè tantum aut propheticè innuuntur, menti interim suæ cur-

sim ac dilucide in verbis quasi in quodam speculo solita obuerfari. Verum ubi ad Eucharisticum sacrificium sese applicuerat, nullum erat attentionis, reuerentiae, aut exquisitae pietatis genus, quod ille in animum non aduocaret, externisque plurimum argumentis non proderet. Iam primum praeter expurgationem animae per Sacramentum Pœnitentiæ, quod non tantum quotidie, sed etiam quam potuit proxime ante aditum Sacrificij semper obiit; solemne illi fere fuit sesqui-hora orationis vel mente vel voce exacta, Martyrologium perlegere, ut Sanctorum qui ea die colerentur patrocinia inter Sacra exposceret, moxque ad Sacrificandum accedere. Tum verò etsi modestiæ semper erat singularis; tamen intentus Deo ac Sacrificio animus, tantum vultui totique corpori dignitatem ac compositionem addebat, ut Angelicum nescio quid spiraret, atque ad pietatem spectantes commoueret. Deinceps etsi voces omnes ac motus graues erant, perpensi ac reuerentes; tamen cum Sacramentum in manibus & conspectu erat, omni amoris ac reuerentiæ genere animum & corpus ita occupabat, ut in cordis sui sinum velle Sacramentum prius condere quam in os videretur. A Sacrificio non minus quam semihoram inter quascumque occupationes gratis Hospiti suo referendis insu-me-bat. Nec rarò contigit ut senex iam & magistratum in Societate gerens, sacrificio sociis non tantum auditor, sed & minister postquam ipse sacrificarat, adesse vellet. Neque verò hæc illi pietas à solo prouenit Sacerdotio ac Sacrificio. Nam inde à prima iuuentute cum Vercellis humaniores literas proficeretur, tanta religione Sacramento participabat, ut meminerint adhuc nostrorum aliqui, concurrissè interdum Vercellenses in templum, ut communicantis

municantis spectaculo, vel admiraturi, vel imitaturi si possent fruerentur. Idque ab Italis Patribus se accepisse, mihi affirmate est testatus vir optimus Franciscus de Canillac è Societate nostra. Cæterum si quid in iis quæ gerebat, perplexum illi, atque exitu difficile occurrebat, id fere explicatum ac proclive à Sacramento referebat. Itaque mos illi erat inter molesta negotia, cum ad Sacrificium adiret, dicere, Eamus ad consilium. Exploratum autem, est, internum animæ quorundam, qui eius curæ suberant, statum, arcanaque necessitates illi sæpenumero inter Sacra fuisse detectas. Semel enim atque iterum cum de rebus suis occultissimis cognovisse, easque sibi mox à Sacrificio aperuisse sancte est testatus vnus ex eius Sociis.

C A P V T X I .

Cotoni officia erga alios homines.

Proximum est vt de officiis Cotoni erga alios homines ea annotemus, quæ illi ardens charitas imperauit, vel generatim erga Ecclesiam, vel priuatim erga Societatem, alios Ordines Religiosos, ac cuiusque sortis homines. Nam quæ toti Regno contulit dum duobus adfuit Regibus, alteri deuexa ætate, alteri crescente, malo alienæ sit æstimationis quam mex. Certe non est difficile coniicere, hominem pietate insignem, ingenio permitem, industria sagacem, amore præcipuum, ea Henrico Regi familiaribus colloquiis insinuasse, quæ & animum eius suauiter atque efficaciter permouerent, ad suæ alienæque salutis

tis studiū, & toti Regno non leues afferrent commoditates. Legi Cotonī ad fratrem literas, quibus hæc ad se Henrici consuetudine suā magnopere vt apparet læti ac permoti, verba est complexus. Ego te, inquit, non tantum pro viro Religioso ac meo Concionatore, sed pro fidissimo etiam atque amantissimo seruo habeo, mihiq̃ue est animus me ipsum tibi, omni cum libertate, ac fiducia aperire. Fecit vt dixit, eumque postea arcanorum animæ consciū habuit, non tantum magna fiducia; sed etiam tanta interdum animi voluptate ac permotione, vt Cotonū audierimus narrantem, tam vberes illi quandoque dum mutuo agerent fluxisse lacrymas, vt suas ipse continere ad illius aspectum non posset. Non latebant hæc Calvinianorum peruicacissimos, qui omnia Regum bona suas solent interpretari calamitates, nec facile alia ex causa odia calumniasque maiores Cotonō vanis vtique conatibus exsuscitabant. Sed quibus mollior ac melior erat animus, incredibile est quantum hac Regis de Cotonō fiducia pellicerentur, vt errores apud illum deponere Ecclesiamque Catholicam augere vellent. Neque verò ipsi deerat industria bene vtendi Regio in se amore ad Ecclesiæ commodum multorumque hominum salutem. Vnum illius industriæ exemplum mihi à viro optimo Godrano Doctore Sorbonico & Congregationis Oratorij Presbytero, qui viderat commemoratum non puto hic omittendum. Duxerat nescio quis Regiæ domus ad minister coniugem muliebri id est cæca atque importuna peruicacia hæreticam, quæ illi non tantum blanditiis quibus poterat plurimum, sed etiam Bibliorum suorum testimoniis, Ministrorum Caluini aliorumque eius asseclarum colloquiis quotidie instabat ac prope peruincebat

peruincebat, vt ad Calvinum deficeret, quod postquam Cotonus est subodoratus ad Regem iit, monitumque quantum ad domestici illius sui salutem vno aut altero verbo posset conferre, adduxit vtei denunciaret, tolerare se quidem externos Calvinianos ex Regni lege si ad Ecclesiam reduci se non sinerent, sed vt domestici sui ab Ecclesia auocarentur, se non toleraturum. Ille percussus non leuiter hac Regis denunciatione ad coniugem rem detolit, nec quietem modo ab illa impetrauit in præsens, sed etiam de se antea propetriumphantem Cotono opitulante breui sub Ecclesiae fideique iugum versa vice redegit. Leuia videri ista possunt, quanquam in conficienda hominum salute nihil est leue, sed leuia tamen videri possunt, præ iis quæ ad commune Ecclesiae bonum ille adlaborauit. Nam exorsus ab Ecclesiae Magistratu, Regi Henrico consilium eius plerumque expetenti tam modestè, prudenter ac religiose aderat, cum de eligendo Episcopo, Abbate, alio-ve Præsule quæreretur, vt extrema Regis ætate tanta esset optimorum doctissimorumque Præsulum in Gallia copia, quantam antiquiores vix meminerant prius fuisse. Verum haud leuiora his fuere quæ ille in ætate Regis Ludouici tenella sibi censuit suscipienda. Vixit enim annos prope septem in perpetua quadam quasi specula pro Ecclesia, vnde prouideret ne sibi hæresis nimium, vt solet illis temporibus, arrogaret; neu quidpiam Ecclesiae detrimenti daret. Nihil erat in hoc genere tam abstrusum quod illum lateret, nihil tam arduum atque impeditum quod absterret, nihil tam pertinax & laboriosum quod frangeret. Nullæ ei dierum magnitudines satis erant, cum malo cuiuspiam Ecclesiae vel cauendum esset vel medendum, vt genus omne hominum circumcur

circumcursaret atque ambiret si res exigeret, perindeque omnibus supplex adesset ac submissus atque si priuato suo vel suorum malo prouidisset. Cumque hanc eius sollicitudinem nonnulli velut nimiam aut superuacuam reprehenderent, solebat respondere, sibi quidem mortuum videri dum viuit, qui cum aliquid possit nihil satagat, qui verò contempta Ecclesia in qua sola æternæ suæ gloriæ pignora Deus deposuit, alia omnia satagat: nihil sibi videri satagere. Hæc ille Ecclesiæ publicè aut tribuebat aut cupiebat; sed priuatim satis constat multa in loca Euangelij vocem iam pridem Calvinianis blasphemiiis eliminatam eum reduxisse; hæreticos non pauciores ducentenis priuata institutione Ecclesiæ asseruisse, multo plures publica, sed non tam compertos. Verum quanto studio ferretur in ea quæ ad Societatem nostram propriè pertinerent, duabus rebus insigniter tota vita patefecit, fama illius & propagatione curanda. Etenim cum Rex Henricus qui sero cognitam Societatem, tamen tam penitus habebat perspectam, vt calumnias in eam vix admittere posset, rebus humanis esset subductus, factò agmine hæretici & hæreticorum auctoritatē dilacerandam sibi priuatim ac publicè verbo & scripto Societatis famam pluribus annis susceperant, quibus omnibus ita se Cotonus vnum obiecit, vt totam Societatem latere regere, intentaque in omnes tela suo excipere corpore videretur. Libros ea causa scripsit alicuius magnitudinis quatuor, plures pro temporum & rerum ratione exiliores, quibus non tantum Societatis institutum, sed etiam Sociorum facta ac dicta à venenatis eorum quos dixi morsibus partim rationibus, partim amplissimis Europæ prope totius testimoniis præclare vendicauit. Hæc palam. Sed quas in cubiculo

coram

coram Rege & Regiis vitanda habuit petitiones, ex fere illi plus operæ attulere. Tantum enim artificij ac simulationis ad calumnias machinandas Aduersarij aferebant, vt nullius fidem non interdum commouerent. Itaque in palatium accersitus quandoque de die, quandoque adultis iam tenebris, omni se illicò Cœlestium præsidio communiebat, & densissimas sæpe tempestates præter spem omnem prætenta solertissime veritatis atque defensionis face a nostrum capitibus discutiebat. Legi literas ipsius ad Fratrem, quibus significat, paucis hebdomadis plusquam octonas eius generis calumnias in Societatem intentatas sibi fuisse depellendas. Vt non sit difficile hinc intelligere quantum aut illi Societas in Gallia deberet, aut ille se Societati debere iudicaret. Verum negotium illi fuit tametsi minus periculosum; haud paulò tamen magis operosum in Societate per Galliam propaganda. Æstimari verò tum opera eius, tum pretium operæ potest ex eo, quod dum Aula excessit domicilia in ditione Regis Franciæ Societati reliquit circiter quadraginta tria. E quibus vt in Aquitanica ac Narbonensi Gallia quaternum denum possessio, quam vix retinebamus, nobis per Edictum Regium rata esset allaborauit. Vt vero vndenum, quæ priorum temporum calamitas nobis eripuerat, partim per idem Edictum, partim per recuperatoria Principis rescripta ius reciperemus perfecit. Denique vt octonum denum possessionem de nouo adiremus, non tantum Regium assensum, qui benignus fere fuit ac procliuis, impetrauit; sed innumeras etiam exhaustit molestias vt ministrorum Regis quorum ea in re operæ interueniebant, faciles haberet voluntates. His si addas Constantinopolitanam & Canadensem Coloniam; si nonnulla Societatis

cietatis domicilia, quibus non auctoritate tantum, sed manu etiam profuit, si utilitates spirituales nostrorum illustratissimis dum priuatus vixit exemplis, & appositissima ad omnem pietatem doctrina dum præfuit promotas; non dubito quin vnum ex amantissimis Societatis parentis filiis Cotonum sis habiturus. Nam quid dicam de charitate eius erga reliquos Ordines Religiosos, quorum studia in Religiosæ disciplinæ ruinis sarcien- dis ita amauit ac promouit, ut nullius potentiore apud Regem & Regios patrocinio vterentur. Agebat aliquando nescio quam Religiosi Ordinis causam apud vnum è quatuor Amanuentibus Imperiorum Regis, Illeque assiduitatem eius ac sedulitatem pertæsus, nonnulla ei cœpit obii- cere de inutilitate tot Ordinum Religiosorum; quæ Cotonus eo animi ardore percussit, docens temporalem Regnorum statum non alio beatum esse quam spiritali, ut omnes qui aderant intelligerent veram illi bilem his tantum ex causis concitari. Neque verò illis intra verba tantum subsidio erat, sed non exigua etiam Optimatum Regisque benefacta ad eorum subleuandam egestatem nonnunquam corrogabat. Nec se- gnius utilitatibus eorum spiritualibus inuigilabat. Virginum enim cœnobîa aliquot, partim disciplinæ pristinæ restituit, partim legum omnium quas olim habuerant oblitæ, de Episcoporum sententia nouis institutis informauit, partim inter ipsa sua incunabula vix assurgentia consiliis atque auxiliis sustentauit. Nihil attinet ad extremum magnopere laborare, ut calculos subducamus cæterorum hominum, quibus ille commodus in vita esse studuit, cum spissum sit ac prope infinitum negotium, atque exiis quæ diximus satis perspiciatur plus multo sui temporis aliis eum tri-
buisse

tribuisse quam sibi. Concordiam familiis inter se conciliare ars ei fuit præcipua, quod nulla esset tanta animorum exulceratio quam ille suavi verborum pharmaco non leniret. Itaque in hoc genere officij inde à primis quibus concionatus est annis creberrime & laudatissimè est versatus. Sed nulla in eo ars fuit vel dignitate prior, vel vtilitate vberior, quam serenitatis turbatis mentibus restituendæ. Quam artem non solum plerique è Societate crebrò atque insigniter se expertos affirmant, siue consilij causa priuatum adierint, siue ad reddendam de statu animi rationem ab eo fuerint cum præses esset, accersiti. Sed eam multo maxime senserunt qui illum conscientiarum actionumque intimarum moderatorem nancisci potuerunt. Referunt enim, labores animorum explicantibus patientissima & tranquillissima audientia adfuisse, ac fere verbo vno aut altero quietem attulisse. Neque verò secreto se potuit continere ista seu gratia Dei seu industria eius; sed ad familias vtriusque sexus Religiosas, præsidum priuatorumque rogatu ita quandoque se extendit, vt agnoscant etiamnum aliquæ multum sibi ab illo non rarò ea re fuisse commodatum. Scripsit Duuallius Doctor Sorbonicus in vita Mariæ de Incarnatione Carmelitidis, quæ magna sanctitatis fama Parisiis floruit, nulli illam hominum secreta animi sui penitus aperuisse quàm Cotonio, postquam illius semel industriam degustauit: eodemque virtutis eius sensu ductam Angelicam de Trinitate Illustrissimi Ducis Brissacij filiam, quæ inter Carmelitidas sanctè vixerat, omnes mentis suæ labores ac sensus in Cotonii auribus per Confessionem deponere morituram voluisse, speique ac consolationis plenissimam vita excessisse. Alius quispiam in vita

Catharinae de IESU tradidit, aduocatum item à pia illa Virgine Cotonum, vno verbulo æstuanti scrupulose animo pacem ac tranquillitatem conciliaſſe.

CAPVT XII.

Cotoni officia erga ſeiſum.

POſtremum genus officij ſibi proprie Cotonus impendit, ſiue in virtutum quas ex voto ſuſceperat excolendas, ſiue in aliarum, quæ animum intra ſeiſum componunt, exercitatione. Atque vt ab illis auſpicer, quibus ille moderatus eſt delectationibus corporeis, quando ſatis vt opinor eſt compertum ex iis quæ diximus, caſtimoniæ ſtudio nec illi quidquam viſum antiquius, nec diuina liberalitate conceſſum vel vberius vel procliuius, tria tantum adiciam, immenſæ illius puritatis conſectaria, ab iis qui de rehus eius nos admonuere, vt veriſſime ita meritiffimè obſeruata. Primum fuit perennis quædam verecundia, cuius, vt ſcribit S. Ambroſius, ſocietate caſtitas eſt tuta. Etenim extrema etiam ſenectute ad omnem vel occurſum vel ſermonem vel actionem aliorum inconditam, eodem modo pudore vultum ſuffundebat, atque in prima adoleſcentia, tametſi non eâdem cauſa. Nam quem tunc colorum nouitas forte & imperitia, eum poſteà impenſum honeſtatis ſtudium exprimebat. Alterum fuit, ſenſuum cuſtodia vigilantiffima, quæ non tantum præſtabat illum tutiſſimum inter aulica gynæcea & magnam matronarum, quæ piis illius utebantur conſiliis multitudinem; ſed etiam ſe in omnes quibus ille aſſueuerat, propagabat, vt communem

communem quandam modestiæ legem indicere, cum ad eos adierat, videretur. Tertium, sensus quidam horrorque maximus impuritatis in iis qui se illi labe quacumque lasciuiæ fœdati applicuissent. Condixerat enim aliquando aulico cuidam ad Confessionem in posterum diem, & erat ille solutissimæ vitæ. Ergo nox Cotonus integra inter tam tetros fœdiores est transacta, vt nec quietem caperet, nec ante quidquam olfacere suaue posset, quam hominem Sacramento expiatum menti restituisset saniori. Contigit aliàs vt aliquis impuro oculorum coniectu maculatus, sacrificanti ministraret, cui Cotonus post sacrificium, in partem euocato absque arbitris. Ego inquit conscientiæ tuæ recessus nolo peruadere, sed magnopere tibi autor fio vt ipse non segniter penetres & discutias: Nam tantus abs te fœtor efflauit, tantusque mihi tui horror toto sacrificio incescit, vt non putem frustra metibi huius rei autorem esse. Veniam simul postulabat si quid offenderet. Sed ille culpam altissimo confessus pudore, & tunc cœlestem Cotonus perspicacitatem puritatemque demirari non cessans, actis ex animo gratiis ad remedia mali sui conuolauit, & post eius mortem, rem totam ita vt recitavi ad diuinam gloriam enunciauit. Porro tam exactam corporearum delectationum castigationem obtinuit, forte ille quidem externa corporis afflictatione nonnulla, siue quia indicta ab Ecclesia ieiunia tam religiosè obseruabat, vt inter quotidianas conciones Quadragenarium nunquam soluerit, quamuis sexagenario iam maior; & quo anno mortuusest biduo tantum ante mortem cum iam admodum male haberet, ab eo se abduci sit passus; siue quia duobus in hebdomada diebus per annum, tribusque per Aduentum abstinere, priuata lege con-

fuevit, siue quia nonnulla id genus alia domandi corporis exercitamenta v̄surpauit. Verum nec vlli rei debere se amplius ille censebat, nec ab aliis deberi optabat, quam incenso Dei amandi, verendi, venerandique studii. Illud enim habebat in ore, sensus nostros post primi parentis peccatum, quasi agrum quendam esse maligni soli, qui spinis ac sentibus statim vt cessauit cultura, fruticetur. Ergo vt in eiusmodi agro lentum ac frequenter operam frustraturum negotium suscepit agricola, qui sarculo vel runcina sentes conetur sigillatim excindere vel extirpare, maligno solo dum alibi purgatur, alibi noxiam segetem reponente; multoque ille procliuius ac fructuosius fauente aurâ sentes earumque stirpes omnes vno oblato incendio aboleuerit. Ita ad corruptorum sensum noxias delectationes extirpandas, qui externæ tantum castigationis ferro vtatur, eum nec certissimam, nec breuissimam animo suo culturam adhibere. Qui verò doloris intimi, amorisque diuini in se flammâ crebro exsuscitet, non tantum sensus suos illis quasi sentibus breui liberare; sed egregia etiam virtutis fruge animum certo conscrere. Hæc fuisse Cotonæ artes moderandi corporeis voluptatibus; sed vt animum haberet ratione ac diuina voluntate probe subactum, has in primis virtutes amauit; Humilitatem, omnis obedientiæ parentem: Æquitatem animi, patientiam & seueritatem in seipsum, quarum exempla aliquot ab eo edita si commemorato, puto satis ostendere, fuisse Cotonum quantum fas est homini, omni bonorum genere in vita perquam absolutum. Enimvero quantos ille in humilitate progressus fecisset, Henricus Magnus perspicacissimi vir iudicij, non tantum verbo declarauit, dum vt iam narraui,

raui est professus, hominem se qui Cotonno humilior
esset nouisse neminem; sed etiam factum. Nam cum ad
eum quispiam adisset aliquando haud satis pro Ma-
iestate eius demisse, Cotonum illico iussit accersiri, qui
diuinam ut solebat in Rege imaginem intimè con-
templatus, demississima honoris venerationisque ge-
nera, quæ intet fauores quoslibet ac familiaritates,
nunquam omiserat, cum vserpisset, muto quodam
magisterio, ut Rex optaret, alterum officij sui egregiè
commonefecit. Neque vero erga præstantiores magis
quam erga pares aut inferiores humilis fuit; quod
duorum è nostris hominum Hispanorum testimonium
docuit. Illi enim cum Parisiis iter haberent, à Coto-
no ad videndum Regem, ut velle illum sciebat, ad-
ducti, coramque experti inusitatam Regis tum erga
Cotonum beneuolentiam, tum erga se humanitatem,
interrogantibus postea quid ibi Aula vidissent, respon-
debant duo se vidisse miracula: Alterum in Rege, ob
insigne magnanimitatis cum humanitate coniugium;
Alterum in Cotonno, ob incredibilis fauoris & amoris
Regij cum immensa humilitate consortium. Est verò
in hoc genere præclarissimum, quod vir spectabilis
Franciscus Iouillet Castillionæus à Cõsiliis atque Elec-
tiosynis Regiis nobis religiose asseuerauit. Quo tem-
pore Cotonus apud Henricum IV. gratia & beneuo-
lencia florebat maxime, sibi contigisse ut cœlo im-
moderate pluuio maceratus vndique aqua & luto ad
hospitium ubi iam Cotonus erat, aduentaret. Ibi Co-
tonum sua incommoda miseratum, & alia quædam
ad se confouendum aggressum, & nulla vel tergiuer-
satione vel relictatione prohiberi potuisse, quin se-
denti aduolutus ad genua extremi famuli in morem
ocreas sibi è pedibus detraheret impendio lutulentas.

Sed

Sed erat in Cotonii humilitate illud præcipuum, quod nihil haberet non tantum affectatum, sed ne exquisitum quidem. Oblatam enim humilitatis externæ occasionem sumebat potius quam captabat. Nam & magistratum in Societate gerens, nihil eorum quæ eius loci hominibus tribui solent aut recusabat aut quærebat, & in conuictu communi cum nostris, tametsi Fratrum illiteratorum colloquio plurimum delectaretur, nec ullis de intimo animæ suæ statu apertius sit unquam loquutus quam illis: minore, ut opinor suo periculo, maioreque illorum fructu id se facere ratus; tamen congressus illos iucundius omni tempore admisit quam quæsiuit. Illud verò enixe semper cauendum censuit, ne eas humilitatis externæ occasiones quæreretur, unde peccati ansam alij possent arripere. Expostulabat nescio qua de re cum illo vir quispiam, & exulcerato dolore animo aliquoties interrogabat quem se esse existimaret, cumque Cotonus respondisset, vilem terræ vermiculum, subiecit ille, ne pro vermiculo quidem se illum habere, simulque contumeliosa multa atque iniurosa adiecit. Quibus violari charitatem Cotonus cernens non tantum occasionem quæ ampla offerebatur, externæ humilitatis sumere non institit; sed tacitus etiam vocem illam suam tunc coarguens negavit in posterum placere sibi emissam. Hac ille moderatione cum in externa humilitate uteretur, tamen & nullum seruabat modum in sui actionumque suarum apud se contemptione, despicientia ac redargutione, ut mox dicam vberius; & perpetuus erat in animo suo sub Deum deiiciendo, cuius à providentia continuisque auxiliis pendere se totum, & sentiebat lubens & iucunde gratulabatur. Hinc manabat alterum illud bonæ mentis in Cotonio indicium, constans

constans quædam atque immutabilis animi æquitas. Cum enim abs se impetrasset, ut nihil haberet non tantum acceptius, sed etiam optatius, quam Deo subesse, suaque omnia ab illius nutibus suspensa sentire, quamcunque illa vergerent in partem, parem animo quietem capiebat, quia pari votorum fine, nempe diuinæ voluntatis obsequio potiebatur. Meminimus qui cum illo diu versati sumus, videre nos hominem dum iuuenis esset in studiis laboriosissimum, operibus alienæ salutis causa susceptis exercitatissimum, contentionibus cum hæreticis agitatissimum; dum autem ætate maturior esset, vitamque in Aula duceret, eorum qui palam erant hæretici maledictis, immo & plagis conscissum, eorum qui occulte fovebant hæresim famosis libellis & calumniis iactatum, eorum qui Regis erga ipsum beneuolentiæ inuidebant occultis artibus in inuidiam adductum; denique dum ætate iam deuexa Societatem regeret, multis priuatim difficultatibus ac publicè concussum. Nemo tamen nostrum meminisse potest aut oris in eo serenitatem obscuratam aliquando atque offusam perturbatione animi, aut sermonis suauitatem impatientia exasperatam, aut factum aliquid ab eo vel designatum animo infedato. Cum nocturnus quidam tenebrio corpus eius gladio violauit ut diximus anno sexcentesimo quarto, spectaculum fuit, ut refert Virginum Carmelitidum quæ Aureliani sunt præfecta Maria de IESU, Illi ac Parisiensibus reliquis quibus eum videre per Regem licuit permirum; quod viderent hominem tanto scelere & iniuria ad præsens mortis periculum adductum, vultu, verbis totaque corporis compositione tantam animi tranquillitatem spirantem, quantam nemo sanus atque illæsus ostendere

dere potuisset. Neque verò sibi tantum illam amabat animi æquitatem, quæ ex diuinæ prouidentię respectu nascitur; sed eis etiam qui consiliis ipsius utebantur enixe commendabat. Conquerenti enim cuidam de molestis vicibus animæ suæ, quæ à sensuum spiritalium abundantia momento temporis in egestatem transiret, sic rescripsit: Quod postulas quid in copia vel inopia tua agendum videatur, ego hoc vnum tibi omni opere agendum censeo, vt te agi sinas: Dominus enim, qui charitate infinita animis nostris tanquam re sua vitur pro vt vult, ipse est quo semper agimur nisi obstat. Alteri cuidam de interno statu suo plus æquo laboranti: Non recte inquit, tibi consulis, si plus de miseria tua diffidis, quam de milericordia Domini confidas: Ipsius omnino es quidquid es: sine ergo vtatur re sua pro libito, siue ægre siue benigne faciat, siue tribuat siue neget, siue pace siue bello exerceat, tranquilligratque Deo animi est, æqui bonique cuncta facere. Iam egregiam istam animi æquitatem duplici stiparat præsidio, mira alienorum morum ac lapsuum patientia, & incredibili suorum impatientia. Ac de ea quidem patientia testimonium habeo ab Andrea Duallio Doctore Sorbonico Theologieque Regio Professore, quod propter eam quam de Cotoni rebus habuit notitiam, egregiamque viri eruditionem ac fidem, verbis prope annumeratis à Gallico Latinum faciam. Patientia, inquit, illius cum laboribus & humilitate certabat; Cum enim moris sit vt quos Reges beneuolentia fauoreque suo sunt dignati, ij calumniis & inuidiæ tot hominum obiciantur, quot eisdem fauoribus vel inhiant, vel se digniores esse gloriantur, non potuit Cotonus effugere quin inuidia calumniaque pulsaretur, sed pulsaretur tantum non

non de statu bonæ mentis depelleretur. Exemplo sit
 vir quidam de Parisiensi Academia, qui cum Theolo-
 gicos nescio quos libros Cotonno pro familiaritate mu-
 tua commodasset, ac post aliquod tempus recepisset;
 schedas quasdam intra libros per obliuionem ab illo
 relictas nactus ad primarium Aulicum non tantum
 Calvinianum, sed etiam Calvinianorum in Gallia pa-
 tronum maximum, eas detulit. Qui ratus se Cotonno
 ægerrime posse hac in re facere, schedas illas Henrico
 Regi non absque suspicionum suarum appendicula in
 manus dedit. Sed Cotonni erga se fide amoreque cer-
 tissimus, indicium & suspensiones contempsit. Conti-
 git haud diu postea vt agentem mecum familiariter
 Cotonum ex occasione interrogarem; nosset ne illum
 quem dixi virum Academicum? Ille nihil aliud res-
 pondit, nisi causas quasdam intercessisse cur cognosce-
 ret. Aded illi mollis erat sermo de eo qui honorem sa-
 lutemque eius per hostes Fidei vocare in periculum pro-
 dita familiaritate non dubitasset. Sed seruabat solem-
 ne suum Cotonus, qui cum alias semper probè nosset
 eos à quibus scriptis etiam libellis incessabatur conui-
 tiis & calumniis, tamen nec aduersus illos verbum fa-
 ciebat vllum, nec impigre pro illis laborabat, si qua
 occurreret occasio illis commodandi. Hactenus eo lo-
 co Duuallius. Sed alio loco scribit interfuisse se non ra-
 rò quibusdam ipsius cum literatis honestisque viris
 congressibus, in quibus vbi inciderat de te quapiam
 ad scientias pertinente sermo, Cotonni consuetudo es-
 set sententiam de ea suam perspicuè admodum ac di-
 serte exponere. Si quis tamen, vt fit, ingenij opinio-
 ne vel iactantia contra niteretur, despici se potius ac
 prope proteri pateretur, quam vt molestus esse reni-
 tendo periclitaretur. Addit Duuallius animaduersionem

aliquando à Maria de Incarnatione quæ celebri Sanctitatis opinione in Carmelitidum Ordine vitam finiit, cum Cotonus spiritualia initurus exercitia pro Societatis more, preces ipsius, ipsius, quas faciebat maximi, imploratum venisset, socium eius Sacerdotem grandævum nescio quibus negotiis alio pertractum, post nonnullam cum ea moram, præcise admodum ei edixisse ut veniret, quòd alio etiam eundum esset: Et Cotonum Regio tum maxime favore hominumque observantia inclytum,obruptis quas inchoarat vocibus tam demisse ac placide ad eum illico accessisse, ut sceminam de virtute præclare iudicantem admiratione compleverit. Non est dissimile quod referunt alij per eadem aulicæ eius gratiæ tempora contigisse. Dum enim die quapiam domum ex Aula se reciperet ad vesperam, occurrit ei ad exitum palatij Princeps quispian de Regia Borboniorum familia, qui contenderet docendum illum abs se de re graui atque instanti. Cui cum aures negare sine offensione Cotonus non posset, atque ille rem sane grauem pluribus explicaret, factum est ut antequam primæ se intenderent tenebræ domum reuerti non posset. Reuerso occurrit, qui domui præerat, eorum quæ inter ipsum & Principem illum intercesserant plane ignarus, ratusque sui officij esse, illam in reditu tarditatem non prætermittere tacitam, Cotonum ea de causa non leuiter verbis increpitum, vetuit in posterum idem peccare: Ille verò deiectis in terram oculis, manibusque modestissime intrà pileum collectis, veniam postulat, atque emendationem spondet, nulla de obiecto sibi impedimento voce emissâ. Quod tamen vbi ex socio eius est intellectum, mirifice Coroni humilitatem ac patientiam apud omnes commendauit. Et erat sane inter aulicarum siue adulationum

tionum ac plausuum blanditias, siue occupationum molestias ac fastidia, tanta vel humilitas vel patientia permira, quamuis nec in eo noua, nec cum vita aulica antiquata. Nam viriles vix dum annos inierat, cum sacris ordinibus initiando ad morosum quendam senem qui examini præerat deductus est ab vno è nostris viro graui & erudito, cui cum sedem postulari ab illo sene aduerteret, accurrit vt erat officiosissimus sedemque obtulit. Senex interea suspicatus Cotonum sibi ipsi sedem afferre, superbissimum appellauit, vocibusque aliquot contumeliosis male deinde acceptum stare in angulo iussit: stetit ille suffusus verecundia, nec vllum verbum defensionis suæ causa commutauit. His similia exempla patientiæ non vulgaris, Henrico Magno acerrimi iudicij viro vocem illam vt verissimam ita plane honorificam crebro expressere: Cotonus de nemine male censet, & nemini vnquam succenset. Verum omnium rerum hominumque patientissimus Cotonus, sui vnus erat impatientissimus. Instabat enim sibi perpetuò cogitatione atque interdum etiam verbo accusator quæstorque asperrimus, vt amorem sui ipsius bonorum operum labem communissimam detegeret atque eliminaret. Itaque quinquennio fere ante mortē hæc scribebat ad Virginem Carmelitidem. Si cuiuspiam, inquit, memoria dignus essem, hanc vnam vellē illum pro me gratiam à Deo continuò exposcere, vt bonitati eius placeret tutū me à meipso præstare: satis certus, nec Deum, qui vtilitates suas cum nostris artissime copulauit, offendi à me posse nisi mecum, nec me nisi à meipso. Rursum verò aliis in literis, quæ sunt de latebrosis insidiis amoris sui ipsius, his quasi coloribus mores suos depingit. Hæc inquit, nobis est continua exercitatio, vt anima nostra sibi ipsi displicens placeat

Deo, eique illum honorem exhibeat, vt amore eius amorem sui, latentem domi hostem, nocte ac die oppugnet. Nihili sunt labores externi præ hoc interno, cuius is fructus est vberimus, vt cælo toti constet idem nobis displicere quod Deo, ac si quid forte amor nostri furtim extorqueat, id longe inferius esse ea voluntate qua contra nitimur. Caterùm quam assiduus esset in hac exercitatione Cotonus, agnouere in primis ij qui contenti aures præbuere, qui etiamnum attestantur tantum fuisse illius in erratis suis disquirendis subtilitatem, vt vix vlli errata apparerent, quæ ipse interdum vehementer accusabat ac detestabatur. Atque cum moris sit in Societate, vt in suam quisque bis in die inquirat conscientiam, his temporibus tam vehementem Cotonus in se exercuit quæstionem, tamque acris seipsum notauit censura, vt compertus sit à Sociis plerumque manantibus toto vultu lacrymis inde exiisse. Verùm breuia nimis illi videbantur ea tempora præ studio internæ puritatis. Itaque nulla ei pars temporis ab hominum congressu supererat, qua non statim regrederetur in seipsum. Quare siue legeret, siue scriberet interdiu, siue quietem noctu captaret, audiebatur identidem has atque id genus alias voces repetere. Domine miserere mei! Hei mihi peccatori! Sana Domine animam meam, quia peccauit tibi! Quas cum tota vita crebro vsurpasset, tum ea die ac nocte quas vixit extremas, nullum finem fecit iterandi: vt satis appareret illum inter assiduam pacis veniæque diuinæ postulationem & ducere antea spiritum & reddere ad extremum contendisse.

CAPUT XIII.

*Plures Cotoni Virtutes Illustrium proborumque
virorum testimonia produnt.*

Testimonia hominum pietate, probitate, atque authoritate insignium multo iis, quas dixi, plures Cotoni virtutes prodidere, quarum exempla illis constitisse ipsa docet fides testimoniorum. Ergo Illustrissimi Cardinalis Rupefocaldij sensus est, Cottonum præter eruditionem atque eloquentiam non vulgarem, pietate etiam fuisse tenerrima, atque integritate testatissima, quod illo maxime tempore constiterit cum Aula abiit. Tunc enim qui contra integritatem vitæ quam in Aula annis quatuordecim duxerat in maxima, ut tunc solet, loquendi libertate quidquam diceret, neminem esse inuentum. Subnectendam huic puto Francisci de Sales Episcopi Geneuensis, viri sanctitatis opinione celeberrimi sententiam, quam ab eo dum viueret, literis sermonibusque expressam affirmavit, præclaroque Cotoni elogio auxit vir Reuerendissimus Andreas Sauerzeanus Episcopus Bethleemiticus, qui arcanorum prope omnium Francisci de Sales diutissime particeps fuit. Is vero sic scribit. R. Pater Cottonus maxima semper fuit apud Dominum de Sales opinione, ac quoties se dedit occasio, audiui illum verbis singulari veneratione plenissimis de eo loquentem. Nec ambigo quin si hætenus in militante hac Ecclesia mereret, suffragio suo publice testaturus fuerit, vitam illius serui Dei, præclarissimis exemplis fuisse plenam. Paucisque inter-

positis

positis addit. Mihi certe admirationi semper fuit excellens magni illius ac fidelis Deo serui eruditio coniuncta cum probitate ac virtutibus, quas ei Deus impertierat eminentissimas. Itaque post longissimam usque ad mortem perseverantiam, iudicari aliud non potest, quam præclaræ illius animæ coronam iustitiæ à Deo impositam, ob labores officiaque prope innumera, quibus ille Ecclesiam eius iuuit ac prosequutus est donec vixit. Gabriel Albaspinæus Aurelianensis Episcopus, ubi Cotonum mortem inaudìt, ad vnum è nostris ista scripsit. Mortuus ergo est optimus Pater, cui similes multos non habetis. Nec scio an plus in eius morte Societas vestra, an Ecclesia, an Francia, an Viri omnes honorati amiserint! Erat enim meo iudicio innocentissimus, mitissimus, & amore hominum dignissimus. Sed ut abeam à Pontificiis infulis, Vir Illustris Michaël de Marillac Rectorum Sigillorum Custos vigilantissimus asseueravit, Cotonum sibi in vita notissimum, virum fuisse pietatis ac probitatis testatissimæ; sed Religiosæ imprimis simplicitatis candore conspicuum. Petrus verò Berullius Congregationis Oratorij in Gallia Præses, longo usu atque intima consuetudine Cotonum coniunctus, hæc tria in illo insigniter obseruata testatur; Animum continenter Deo adhærescentem, inuiolatam lenitatem, morum omnium sed pietatis maxime æquam in exitu atque in aditu Aulæ integritatem. Accedat his Andreas Duuallius, qui ubi plurima de illius virtutibus memoratu dignissima annotauit, quæ nos variis huius historiæ locis inseruimus, sic extremo scribit. Mitto hæc pauca quasi stillam in pelagus virtutum, rerumque à Cotonum mirabiliter gestarum, sed nonnullum meæ in eum deuotissimæ voluntatis argumentum. Denique Clau-
dius

dius Robertus vir eruditissimus atque optimus, Cotonno hoc monumentum adornauit, in Galliam suam Christianam inferendum. Obiit anno 1626. R. P. Petrus Cotonus Societatis IESV, dum Parisiis apud Sanctum Paulum maximo concursu, fructu, ac plausu in Quadragesima concionaretur. In hoc autem Heroë inter homines versante domicilium perpetuò fixit facundi oris & boni pectoris alias rara, vere singularis cognatio, intus & extra palam, semper & vbique bonis omnibus cognita, dilecta, culta, pueris etiam visa, sed noctuarum ac vespertilionum ad lumen solstitiale caligantium & cæcutientium oculis inuidentibus inuisa. Itaque merito viri huius tumulus (si quis quamuis ære perennior tanti sit nominis capax) carmen hoc incilum æternæ posteritatis memoriæ commendandum seruabit.

*Antiquæ Gallorum pietatis
Acerrimus idemque mitissimus*

Vindex Petrus Cotonus,

Diris hæresibus profligatis,

Malis moribus fugatis,

Purpureo charitatis lumine

Quasi vestimento amictus,

Mortales in terris suscipiendas modo exuias

Olim in Cælis immortales suscipiendas reliquit.

Nolo hoc loco missa facere testimonia sacrarum quarundam Virginum, quibus eò notiores fuere Cotonii virtutes quo diutius ad eas ab illo sunt eruditæ. Maria de IESV Carmelitidum Aurelianensium Præfecta ab ætate prope tenera spiritalibus Cotonii vñ consiliis, audita illius morte has ad eius sororem literas dedit. Alleuerari, inquit, potest mortuum esse Cotonum morte iustorum, vt immortaliter Deo viueret. Id videlicet persuadent

persuadent in primis Religiosa vita quam duxit annos quadraginta duos exactissimam, deinde labores continentes ad Dei gloriam, & obsequium Ecclesiæ, Ordinis sui, totiusque Franciæ suscepti. Tum incredibile studium salutis omnium hominum & exempla sane innumerabilia religionis & pietatis, innocentiae & candoris, mansuetudinis & charitatis, modestiae & humilitatis, rectitudinis ac puritatis consiliorum operumque omnium. Denique cura quædam inexplicabilis voluntatis suæ ad diuinam, quæ illi perpetuo erat ob oculos, adiungendæ; quo fiebat ut cum vel minimo indicio quidpiam Deo gratum esse comperisset, nulla re prohiberi se sineret quin id ageret; cum autem è contra ingratum, nullis suasionibus adduci se pateretur ut vellet. Harum aliarumque virtutum perpetua exercitatio satis persuadet cœlo eum esse receptum, nobisque potius eius precibus opus esse quàm illi nostris. Ac fatebor equidem magnam mihi in eius ope positam esse fiduciam, quam ut tu pro necessitudine, quæ cum illo tibi intercedebat, nobis implores magnopere opto; atque si quid eorum quibus ille in vita est usus habes ad manum ad nos quæso des perferendum. Sic illa. Ex eadem Cotoni disciplina fuit Magdalena de S. Iosepho, quæ Parisiis maiori Carmelitidum Monasterio nunc præest, atque de eo iam demortuo ista scripsit. Nō ausim equidem attingere maximas atque admiratione dignissimas Cotoni virtutes, quod iis explicandis non satis mihi facultatis esse animaduertam. Illud tamen asseueranter dixerim, expertam me in illo manifestissime variis occasionibus donum Prophetiæ; nec caruisse sanctam eius animam pluribus aliis diuinis privilegiis sat scio: quæ ut agnoscant homines, ac pro dignitate venerentur diuina ut spero bonitas perficiendo aliquando.

CAPVT XIV.

Cotoni Rerum occultarum præsensio.

ADmoneri me hinc sentio vt huic tractationi de Cotoni virtutibus subtexam breuiter alteram de signo virtutum eius duplici: Prophetia, & Mirabilium patratorum facultate: quarum argumenta non pauca mihi supersunt iis adiicienda, quæ toti inspersi historiæ, quod vel eorum tempora non satis perspecta, vel morte eius fuerint posteriora. Igitur tam excellens erat Cotonopietas animique deuotio erga beatissimum illum Spiritum cuius in custodiam præsidiumque à Deo traditus fuerat, vt & ancipites deliberationes suas amica quadam plenaque venerationis fiducia ad eum referre nō dubitaret, & ab illo non tantū consilij in ambiguis cōpos; sed etiam rerum plerumq; futurarū & latentium conscius reuerteretur: Meminere qui iter agentem sunt comitati, eum creberrime, cum quid vel de periculosa vel de incommoda via ambigeretur, secedere non nihil ab arbitris solitum & obnupto inter manus vultu sedentem, vel genu nixum aliquandiu perseuerasse, reuersumque subinde eundum aut non eundum hac vel illac renunciasse euētu felicissimo, nec finem facile fecisse postea Custodis Angeli in periculis à se auertendis beneficia vel commemorandi vel commendandi. Quanquam non ad eum crebrius quā ad alios pertinebat illa quā ab ipso consequeretur rerum futurarum latentiumque prænotio. Scripsit aliquando ad Iacobum Cotonum maiorem natu Fratrem, visum sibi quadam antequam scriberet die, hu-

mani generis hostem contra ipsum acerbissime exardescens iracundia, nec se ab ea die cessasse diuinum contras hostiles insidias præsidium illi implorare. Tempus docuit pertinuisse id visum ad calumniam atrocissimam, quæ non longe postea obiecta Fratri vitam fortunæque eius omnes cum adduxisset in discrimen, eadem quæ prænunciata fuerat ope est discussa. Alio tempore ad Ioannem Cotonum tertium natiuitatis ordine fratrem egregietunc valentem, sed iuueniliter ultra vota sua exultantem, scripsit, temperaret feruidis iuuentutis motibus. Non enim satis constare, vtrum anni finem principio parem esset habiturus; ageret proinde quod iam iam moriturus egisse vellet. Nec abfuit vaticinio fides, Ioanne haud inde procul à sicario quodam misabiliter confosso. Eiusdem est generis quod aliàs de vna è sororibus suis integræ tunc valetudinis ad fratrem scripserit, non falso se augurari, eam non diu fore superstitem, & mors illius brevis sequuta fidem verbis fecit. Harum ego literarum exempla vidi, nec quisquam familiam eius nouit, qui euenta fuisse qualia dixi non certò sciat. Iam peccare me non leuiter contra historiæ sinceram fidem arbitrarer, si exempla duo Prophetiæ Cotoni gratiæ, quæ Carmelitidum Aurelianensium Præfecta cum ad ipsam pertinerent sub nomine incerto narrare maluit, annumeratis propè scribentis verbis, non facerem Latina. Audiit, inquit, aliquando Cotonus confitentem quampiam & abire parantem monuit, vt animum haberet ad tolerandum paratissimum. Imminere enim illi intra octauum diem grauissimæ quiddam molestiæ. Proinde studeret per id tempus se ipsam frequenter diuinæ offerre voluntati, paratam animo lubentissimo admittere, quidquid illi vel statuere vel permittere visum

visum esset. Fecit illa quod erat monita, crebroque paratam se ad omnia, Deo offerens animum per eos dies ad ferendum quidquid illud esset molestiæ obfirmavit. Aderat dies octava, & en tibi instigatione nescio cuius tam atrox, tamque verisimiliter conficta calumnia in illam adornatur & evulgatur, ut nisi Deus servum suum admonitu animum eius antea ad tolerandum informasset, fieri non posse videretur, quin & illa se tueretur acriter & autorem calumniæ egregie vlcisceretur. Sed dum reputabat se à Cotonio ad patientiam non ad defensionem aut vindictam institutam esse, premebat videlicet animum, lubensque molestiam tolerabat, confisa veritatem nutu diuino quandoque in apertum proditura. Postero die ab excitata calumnia facere non potuit, quin ad Cotonum iret, qui ut illam procul est contuitus, quasi totius rei iam conscius, subridere cœpit. Illa autem sanctè affirmat, id illum postquam evenit, aliunde quàm à Deo rescire non potuisse, multò minus prædicere antequam evenisset. Nam & res eiusmodi erat, ut nulli venire in mentem posset suspicio, aut eam omnino aut ab eo unde prodit eventuram. Quin etiam Cotonus autorem machinationis totius nunquam in vita viderat. Ergo quæ calumniam patiebatur, cum ad illum subridentem accessisset. Non est, inquit, mihi quod rideam, quam tu prænuunciasti molestiam ego nunc sentio, tu illi tolerandæ mihi subsidio eris: in te enim vno secundum Deum mihi sitæ sunt omnes opes. Respondit Cotonus, nihil illi verendum esse, quin feliciter cessura essent omnia, sedata brevi hac tempestate; ferret tamen interim fortiter quod virtutis exercendæ causa Deus permisisset. Et erat verbis eius vis tanta, ut tranquillum in tempestate, serenum in nubilo, pa-

cem in bello illicò impertirentur. Factum deinceps est quod prædixerat, & in nihilum defluxit calumnia nemine allaborante. Quod ut tam citò tamque perfecte posse fieri humanitus non sperabatur; ita Cotoni precibus plane videtur tribuendum. Audi nunc aliud ab eadem & de eadem. Pendeat, inquit, aliàs magnoperè animi aduersis conflictata rationibus, quæ ambiguum illi facerent, an consilium de re maxima suscipienda quod habebat in animo Deo esset placiturum. Laborem eius cum didicisset Cotonus condoluit ex animo, vocesque vrgente penitus charitate, sibi excidere est passus, quas nulla vis alia vnquam extorsisset. Cum ego, inquit, tibi ante biduum Deum precibus placare contenderem, manifestis agnoui indiciis hoc abs te Deum exposcere (certam rem significabat, quæ postea euenit) nec obstare quidquam aut impedire debere vel posse quo minus id perficiatur. Ut dixit ita euenit; sed anno post illud tempus integro, id quod ei humanitus notum esse non poterat. Cæterum cum quidpiam eius generis aperiret, tanto oris pudore, corporisque & animi demissione verba sua commendabat, ut veritatem sinceritatemque animi proderet ex omni parte. Et verò cum cæteros futura vel occulta enunciantes postquàm eorum vitam semel probarat, æquo facilius videretur quibusdam auscultare; tamen difficile admodum, ac nisi certissima eorum quibus loquebatur vtilitate vel necessitate, ea quæ ipse in eo genere cognorat excidere sibi est passus. Et confido equidem eiusmodi visum iri æquis lectoribus, quæ hæcenus enarraui; sed quod nunc dicam est insigne. Comitem quendam suum nescio cuius culpæ coarguebat aliquando, illeque tametsi culpæ sibi conscius, defensionem tamen obtendens, aliquos

vt fit accusabat quòd nomen suum immeritò ad illum detulissent : Cotonus, vt animi eius ab aliis alienationem præpediret, negauit præcise id se ab alio quàm à Deo agnouisse, & comiti qui rem quàm esset arcana prænouerat, facile persuasit. Nec dissimile est quod è Sociis eius vnus religiosissime asseuerat, erratà quæpiam sua quæ cæteros omnes præter se laterent, bis sibi ab illo sine ambiguitate aut vlla obscuritate detecta.

C A P V T X V.

Mira quadam Cotoni demortui interpositione patrata.

Postrema mihi restat opera in iis rebus Cotoni enarrandis quas aut ij quibus illæ contigere, aut qui præsentibus adfuere viri pietate ac fide noti pro Mirabilibus Naturæque lege superioribus habuere. Atque vt de iis tantum quæ post eius mortem contigere hiedicam, cum nonnulla eius generis in vitæ eius historia sim executus; Ludouicus Bouchart è Societate nostra triduo postquam Cotonus vita excesserat grauissimis intestinorum torminibus diuexari cœpit veritusque ne vt aliàs (erat enim iam olim torminosus) biduum forte in tam acerbo dolore, vt ad mortis limen deduci videretur, sibi esset transigendum; opem Cotoni cuius tunc virtutes ac merita in ore hominum maxime versabantur sibi censuit exposcendam. Concipit itaque breuissimam ad Deum orationem, qua mentorum Cotoni respectu acerbissimum cruciatum deprecabatur. Nec mora, detumescentibus intestinis

stinis subsidit dolor, membrisque haud multò post
 suavi somno solutis omnis morbi iactatio plane est con-
 sopita. Hæc Aureliani; Sed quæ nunc dicam Monti-
 uillariis in agro Rothomagensi paucis post mensibus
 contigere. Cum enim Virgo Religiosa de celebri op-
 pidi illius monasterio grauissimo cõflictaretur morbo,
 nonnihil eorum, quæ Cotonò dum viueret vsui fuif-
 sent ab vno è nostris efflagitauit, eiusque ope morbo
 leuata has de re tota literas chirographo suo signoque
 vsa perscripsit. Molesta me, inquit, torquebat ægri-
 tudo, quæ plures iam noctes ac dies nullam somni
 partem videre pateretur, cum P. Pargonus aliquid
 eorum quæ R. P. Cotonì fuerant ad me attulit, quo
 accepto, precibusque eius pie imploratis, somnus me
 illicò tranquillus & arctus est complexus. Vbi euigi-
 laui, quod acri dolore stomachi adhuc tenerer, confi-
 sa ex animo de ea virtute quam experiri iam cœpe-
 ram, imposui stomacho quod ex rebus Cotonì accepe-
 ram, sedatoque extemplo dolore omni conualui. Lau-
 des sint grateque Deo, seruoque eius piissimo, cù-
 ius pro me preces voueo quæsoque esse perpetuas. Hæc
 illa. Eodem prope tempore Nancæj in Lotaringia
 Ioanna Liouilla cum plures corpore dolores toleraret,
 ac mortis Santitatisque Cotonì fama latissime perua-
 geretur, doloribus suis opem humili precatatione ab eo
 postulauit, postulationemque tam prompto excipi sen-
 sit leuamento, vt alio illud quàm ad Cotonì merita
 referre se posse non putet. Dixit hæc iurata vicesimo
 septimo Martij anni consequentis, excipiente iuramen-
 tum eius ac testimonium D. Simonino Doctore The-
 ologiæ ac Protonotario Apostolico Sanctique Apri
 Nancæi Parocho. Nec diu postea Mathurinus Amau-
 ry ciuis Parisiensis, cum molestissimo iactaretur he-
 mitritæo,

mitritæo, Cotonî, cuius virtutem ac pietatem in vita frequenter probaret, opem demortui precibus demissis efflagitauit, & quem precum, eundem illicò in posterum omne tempas molestæ illius afflictionis finem habuit. Hinc optime erga illum animatus, quidam eorum quæ Viuentis corpori vsui fuerant impen- se disquisiuit, nactusque panni eius particulam quo pituitam dolentium crebrò in senectute palpebrarum Cotonus terferat, filio illam suo, qui ex intestino ignotoque morbo grandi macie extabescens ad mortem ibat, de collo suspendit; nec mora cibi appetentia restituta, paucis diebus habitui corporis non tantum bono sed etiam pingui redditum vidit. Hæc omni asseueratione ac sacramento firmata ex illius ore me frequenter accepisse cum eam consultò interrogarem sanctissimè testor. Mense subinde Augusto, qui à Cotonî morte primus fluxit, Turnoni ad Rhodanum Ægidius Lacarrius è Societate nostra adolescens, quinos iam senosue menses molesto ac prope quotidiano capitis dolore tenebatur, cui nec animi ab studiis quibus addictus fuerat, relaxatio, nec frequentes in agris inambulationes, nec alia eius generis remedia leuamento erant. Is cum die quapiam Eucharistiam religiose adoraret, perpelli se intime sensit, vt votum susciperet menstruæ Communicationis Eucharisticæ ad solitas adiiciendæ, donec annus euolueretur, ea mente vt Deo gratias referret de iis quas in Cotonum contulisset gratiis. Votum annuente præside emissum secuta est illico sanitas, nullo ne in orationes quidem ac meditationes intendenti se, capiti doloris superstitie vestigio. Conceptum est id votum ad Virginis in cœlum assumptæ festum diem: & ad secundum Octobris interrogatus adolescens à Claudio de Sancta

& a Columba Turnonensis Collegij Rectore notæ grauitatis ac probitatis viro vt capite valeret ? religiose asseuerauit, omni se illius morbi sensu carere. Quæ in sanitate capitis cum plures postea menses perseuerasset, aded confisi sunt de diuini beneficij constantia qui Societati illi præerant, vt adolescentem qui nouitius etiamnum fuisset, ad vota Religiosa admittere nihil morarentur. Hæc ego ex Rectoris, quem dixi, literis ad me aliosque perscriptis huc deriuauui. Iam ad idem fere tempus, Parisiis vir probus, Sacerdos Italus, cum à ciue Parisiensi arbitrante illum quidpiam rei suæ subduxisset, grauiter infimularetur, ac prope in infamiam adduceretur, auditis quibusdam Cotoni rebus gestis, venit in spem posse ipsum labori huic suo opitulari. Itaque cum plus vno mense innocentiam suam humanis rationibus approbare frustra prius contendisset, ad diuina hoc tempore versus præsidia, nocte quadam dum preces ante quietem Deo offerret, impelli se sensit vt votum nuncuparet pecuniæ cuiuspiam pauperibus largiendæ si Cotoni precibus aliquis eius negotij exitus sibi aperiretur. Quo statim nuncupato, lecto se dedit, atque en tibi mane antequam lecto exiret, innocentis pueruli hoc procul alio in lecto cubantis, qui laborem animi illius nec sciebat, nec per ætatem capere poterat fortuitis sermonibus edoctus quo loco ea res esset quam sibi subductam ciuis Parisiensis querebatur, & se infamia & illum iactura facile exemit. Nec dubitat nunc affirmare, vt ipse præsens audiui, id sibi post Deum solis Cotoni precibus accepto ferendum esse. Sub exitum Augusti aut initia mensis Septembris ingenuus adolescens Yuo de Boissius Namnetensis cum nonnulla eorum quæ hætenus scripsi vulgante fama inaudisset,

inaudisset, spe ductus se in Cotoni meritis nonnullum solatium reperire posse molestorum torminum, quibus quotidie annum prope totum ita fuerat excruciatum ut febrem quandoque dolor ciceret, ad aram in qua augustissimum seruabatur Sacramentum prouoluit, opem Cotoni ex animo implorauit, auditusque absque mora dolore omni diebus multis liber fuit; sed cum sanitatem sibi eius ope paratam quamuis non dubitaret, profiteri tamen apud alios veritus, ne fidem non faceret, reluctante crebro ac reclamitante conscientia moraretur, quadam die dolores illi denuo iidem incubuere, quibus ille quasi castigatus spon- dit se deinceps Dei beneficia non habiturum tacita, si Cotoni iterum patrocinio iuaretur; & quasi cum precibus eius certarent Cotoni subsidia, sanitas statim illi est representata non minus certa quam spon- sioni eius fides, quam ubi egregie liberauit, doloris illius vacuus fuit, annum iam prope integrum. Hæc vero omnia non ipsius tantum sed eorum etiam qui morbum eius ac sanitatem præsentis ag- nouere integerrimis testimoniis mihi sunt comperta. Sequutus est deinceps mensis October, cuius die quadam non satis comperta, vir quispiam apud Vocontios cum mira quædam Cotoni interuentu patrata ex nostri hominis literis agnouisset, constituit inueteratæ febris suæ remedium in illius precibus qua- rere si quando reuertisset; quod cum breui postea contigisset, atque ille propositi siue immemor siue negligens quod statuerat facere distulisset, tam vehementi æstu est conflictatus ut extre- ma vehementer timeret. Quæ res illi Cotoni memoriam cum reficasset, votum expressit Eu- charistici Sacrificij Deo per Sacerdotem offerendi,

si fauens sibi ac propitius foret Cotonus. Damnatuſ
voti, febrim in poſterum non ſentit. Quod ego ita
vt in literis vnus è noſtris qui præſens aderat lege-
ram recitauit. Ad initium verò menſis Nouembris
iſta die Sanctis omnibus dedicata Nancæj Fran-
ciſcæ du Bois annos natâ decem & ſeptem, ve-
hementiſſimo febris æſtu, ſomni die ac nocte ex-
pers iactabatur; quod vt mater eius Elizabetha de
Ranſſin animaduertit, imaginem Beatæ Virginis
membranæ appictam quam à Cotonò acceperat cum
hac ſubſcriptione, Ora pro P. Petro Cotonò, capi-
tî filiæ impoſuit, atque ea illicò tranquillo ſopi-
ta ſomno febris atque æſtus ſenſu omni poſt ſom-
num caruit. Sic iſta retulit iurata coram Simoni-
no, quem ſuprà dixi, Apoſtolico Protonotario. Ex
cuius etiam tabulis eiſdem fidei publice faciendæ cau-
ſa, ſigno eius obſignatis manuque ſubſcriptis habemus
id quod ſubnectimus. Maria Hannotina Barenſis
annos fere tricenos nata, circâ medium eiſdem anni
Decembrem, tam acerbo capitis dolore exercuaba-
tur, vt non tantum dies nocteſque ſomno careret,
ſed etiam triduum totum commouere ſe aut incedere
ſine acerrimis capitis aculeis tormentiſque non poſſet,
febre interim ex vi doloris in reliquum corpus ex-
ſtuante. Perſata ad illam eſt ea quam dixi imago, Coto-
ni nomen ſubſcriptum habens, & illi capitis parti
quam dolor pungebat acutius impoſita, momento
temporis omnem mali ſenſum deterſit. Quod iſta
quoque ſolemni iureiurando affirmauit. Hæc fere didi-
cimus Cotonî interuentu admirabiliter patrata proxi-
mis fere nouem ab eius morte menſibus. Sed anno mil-
leſimo ſexcenteſimo viciſimo ſeptimo, qui mox eſt ini-
tus, intra id quod ſupererat ad aniuerſarium obitus il-
lius

lius diem tirmestre spatium, hæc fere ad nos eius generis peruenerunt. Apud Conisopitum in Britannia Armorica, grauis matrona cui filia vnica tam periculoso tenebatur morbo, vt mors momentis omnibus timeretur, ad Sacerdotem de Societate rogatum iit, vt in sacrificio Eucharistico filia suæ quæ animam perpetuè ageret, memor esse velle. Ille cum se id facturum recepisset, particulam interim tuniculæ qua viuens Cotonus intime vestiebatur de filia collo suspendendam donat, monetque vt Oratione Dominica ac Salutatione Angelica quinquies recitata, Cotonus merita ac preces à Deo imploret. Fecit matrona sedulo quod iussa erat, & astantibus honoratis hominibus non paucis, Filia eius statim vtea quæ dixi collo excepit, conualuit. Rem totam ij qui beneficij fuere compotes chirographo suo sunt testati. Circà eadem tempora Parisiis vir Ecclesiasticus, longa assuetudine ac procliuitate naturæ impuris commotionibus conflictari ac vinci facilis, Cotonus puritate atque integritate quam didicerat persuasus, subsidium eius aduersus imbecillitatem suam supplici precatione atque obtestatione flagitauit, adeoque præsens atque efficax obtinuit, vt multis ab ea precatione ad hanc diem mensibus euolutis, nulla de se trophæa hostem suum constituere illo protegente sit passus. Id quod ego profiteor me ab eo certissime agnouisse. Verteabat se iam annus in mensem Martium, Cotonus vt per initia natalem, ita per media fatalem; cum Regina Iandina natione Lotharinga, oppido Haltonuillana, vna quasi ruina humoris pituitosi in membra omnia influentis oppressa, non tantum partium omnium motum neruis humore dissolutis ac fluxis perdidit, sed etiam capitis inundante fluxione pressi tam acerbum sensit crucia-

tum, vt eo inter manus deposito, sine motu tùm imbecillitate tùm dolore defixa, biduò iacere cogeretur. Quo in statu monita à quibusdam, Nancæi vbi illam morbus inuaserat, Imaginem esse Cotoni manu ac nomine subscriptam, quæ aliis iam fuisset salutaris, magnopere eam expetiit; sed cum illa ad ægrotum quempiam alium missa iam esset, interrogata num confideret se recipere sanitatem posse, si altera ei Cotoni subscriptio, quæ in literis ab eo olim scriptis ad manum esse importeretur; cum respondisset se plane confidere, iussa est Cotoni subscriptum literis nomen, sigillumque IESV nomine insigne osculari. Et concidere è vestigio dolores corporis omnes, receptoque mox membrorum omnium motu atque vsu, lecto se eripuit mulier, solitasque operas quanta prius facilitate exercere à multis est conspecta. Hæc res ad initium contigit Martij; sed circa diem eius sextam Ioanna Liouilla, & circa vndecimam Francisca du Bois cum acerrimis dolorum aculeis toto capite compungerentur, eius quam dixi imaginis contactu dolorem ex tempore sedatum senserunt. Quæ omnia Nancæi apud Simonium Protonotarium Apostolicum tres quas modo nominaui mulieres iureiurando testatæ in ætæ referri publica, quæ in manibus nostris sunt, voluere. Hactenus de primo à Cotoni funere anno.

Quo loco sustinendum nobis stylum censemus, rati nos in iis quæ de illo viuente ac demortuo complexi scribendo sumus, satis huc vsque elaborasse, vt & omnes homines diuinæ in illum bonitatis commendandæ ac prædicandæ argumenta plurima, & qui illi Religionis ac voti sumus consortes exempla habeamus ab eo illustrissima indiuiduæ cum Deo omnibus in rebus coniunctionis, inexplēbilis salutis proximo-

rum

rūm studij , inuincibilis rerum aduersarum toleran-
tiæ, peruigilis in omni vita vel susceptorum vel im-
peratorum operum accurationis , & constantis à pri-
mo in Dei obsequium aditu ad vitæ exitum cogita-
tionum consiliorumque omnium integritatis.

FINIS.

PROTESTATIO AVCTORIS.

Cum Sanctiss. D. N. Urbanus Papa VIII. die 13. Martij anno 1625. in S. Congregatione S. R. & Vniuersalis Inquisitionis Decretum ediderit, idemque confirmauerit die 5. Iulij anno 1634. quo inhibuit imprimi libros hominum qui sanctitate, seu Martyrij famâ celebres è vita migrauerunt, gesta, miracula, vel reuelationes, seu quacunque beneficia, tanquam eorum intercessionibus à Deo accepta continentes, sine recognitione atque approbatione Ordinarij; & qua hactenus sine ea impressa sunt, nullo modo vult censi approbata. Idem autem Sanctissimus die 5. Iunij 1631. ita explicauerit, ut nimirum non admittantur Elogia Sancti, vel Beati absolutè, & qua cadunt super personam; bene tamen ea qua cadunt super mores, & opinionem; cum protestatione in principio, quod iis nulla adsit auctoritas ab Eccles. Rom. sed fides tantum sit penes Auctorem. Huic decreto, eiusque confirmationi & declarationi, obseruantia & reuerentia quâ par est, insistendo, profiteor me haud alio sensu, quicquid in hoc libro refero, accipere, aut accipi ab ullo velle, quàm quo ea solent, qua humanâ duntaxat auctoritate, non autem diuina Cathol. Rom. Ecclesia, aut Sancta Sedes Apost. nituntur.



